



رواية قطة في عرين الأسد

## روايتي الثانية

### قطة في عرين الأسد

بقلمي : بنوتة أسمرة  
"منى سلامة"

أرحب بالنقد البناء

حسابي على الفيسبوك :

<https://www.facebook.com/rewayat.bannota.asmara>

رابط مدونة روايات بنوتة أسمرة

<http://rewayatasmara.blogspot.com>

## المقدمة

الخيانة .. هذا الخنجر الغادر الذى يطعن الإنسان فى غفله منه .. لا يتطلب سوى لحظات حتى يتمكن نصل الخنجر من الانغماس داخل قلبك ويسيل الدم منه أنهاراً .. لكنك تحتاج الى سنوات وسنوات للشفاء .. أحياناً تُشفى وأحياناً لا .. تظل مرارته ملازمة لك طيلة عمرك .. وترى كل الألوان حولك وقد دُبغت بالسواد .. فتعتاد عيناك على الأسود ولا تستطيع رؤية غيره من الألوان حتى لو كانت واضحة جلية أمام عيناك .. الوفاء عملة نادرة .. لكنها ليست منعدمة الوجود .. ابحث عن الوفاء فى زمن الخيانة .. وعن الصدق فى زمن الكذب .. وعن الحب فى زمن الماديات .. فلا يخلو زمان ولا مكان من اللون الأبيض مهما ندر وعز وجوده .. ولولا السواد ما استطعنا تمييز البياض والنقاء .

## الفصل الأول

أشرقت شمس الصباح وأخذت أشعتها الذهبية تتسلل الى السماء على استحياء .. انه صباح يوم آخر .. يهرع فيه الناس الى أعمالهم و أشغالهم .. فترى زحمة السير فى الطرق وترى أطفالا يحملون حقائبهم ذاهبون الى مدارسهم صحبة وفرادى .. وترى المواصلات العامة وقد اكتظت براكبيها .. تتمعن فى تلك الوجوه .. فترى بعضها شارداً وبعضها مكتئباً وبعضها متأففاً وقليل منهم تحمل ملامحهم علامات الراحة والرضا .. ترى تلك السيدة الكبيرة التى صعدت الى الحافلة فيقوم هذا الشباب الشهم ويُجلسها مكانه اكراماً لسنها فينال دعوة طيبة .. وترى تلك الفتاة التى تسند رأسها على شباك الحافلة الزجاجى وتبدو مهمومة فتمتنع فيها محاولاً تخمين ما الذى يؤرق مضجع فتاة يافعة مثلها...

وترى هذا الرجل الواقف فى وسط الحافلة لا يجد مكاناً للجلوس تتمعن فى وجهه فتراه منهمكاً فى التفكير وكأنه يحمل هموم الدنيا فوق أكتافه .. وترى ذلك الطفل الصغير الذى اندس بين الكبار يبحث عن مكان يتسع لقدماه الصغيرتان وجسده النحيل .. تلك هى الدنيا .. كالساقية تدور وتدور .. وكل منا يعرف دوره فى هذه الحياة .. دوره الذى اختاره الله عز وجل له .. فمننا من يبرع فيه .. وينال أجر الدنيا والآخرة .. ومنا من يتكاسل عنه .. فيخسر أجر الدنيا والآخرة .. وسط تلك الوجوه المصرية التى تتباين فى الشكل واللون والملامح .. ترى فتاة خمرية البشرة متوسطة الوزن والطول ليست بالجميلة باهرة الحسن وليست بالدميمة .. فتاة مصرية عادية كملايين الفتيات اللاتى ترتطم بها عيناك وأنت تسير فى شوارع القاهرة .. لا يميزها سوى حجاب تخفى به شعرها .. وملابس محتشمة تخفى تفاصيل جسدها الأنثوى .. تسير الفتاة الى المترو لتركب فى العربة المخصصة للسيدات .. تجلس على أحد المقاعد الشاغرة وتُخرج من حقيبتها مصحف صغير .. تقضى معه تلك الدقائق التى تفصلها عن مكان نزولها .. يتوقف المترو ويستعد الركاب للمغادرة .. تغادر "مريم" العربة وتتوجه الى تلك البناية التى تقع فى مواجهة المترو .. تدلف اليها ويلقى عليها حارس العمارة نظرة .. ثم يعود لمطالعة جريدته

الصباحية .. تركب "مريم" المصعد وتضغط رقم ٥ .. يتوقف المصعد فى الطابق الخامس .. تسير "مريم" عبر الردهة الطويلة التى اعتادت السير فيها يومياً حتى تصل الى باب مفتوح ومزين بلافته أنيقة كُتِبَ عليها " شركة رؤية للدعاية والإعلان.. "

توجهت "مريم" مباشرة الى احد المكاتب ووضعت حقيبتها على المكتب وجلست عليه ..وبدأت فى فتح جهاز الكمبيوتر الذى أمامها .. ماهى الا دقائق حتى دخلت احدى الفتيات .. كانت فتاة جميلة ممشوقة القوام .. تتميز بحجابها واحتشام ملابسها .. أقبلت بإبتسامه عذبه قائله:

-صباح الخير يا "مريم"

رفعت "مريم" رأسها ونظرت الى صديقتها قائله:

-صباح الخير يا "مى"

أخذت الفتاة مكانها على المكتب الآخر الموجود فى الغرفة .. و التى كانت تضم ثلاث مكاتب .. عادت "مريم" الى مطالعة حاسوبها .. نظرت "مى" الى المكتب الفارغ وقالت:

-هى الهانم لسه مشرقتش

-تؤ

قالت "مى" بحدة:

-كالعادة عادتها ولا هتشتريها

قالت "مريم" بهدوء دون أن ترفع عينها عن حاسوبها:

-ملناش دعوة .. كل واحد حر فى نفسه

قالت "مى" بحدة أكثر:

-اشمعنى احنا نلتزم بمواعيدنا .. والهانم لازم كل يوم تتأخر .. أنا هبلغ أستاذ

"عماد" باللى بيحصل ده

رفعت "مريم" عينيها لتتنظر الى صديقتها قائله:

-ملناش دعوة يا "مى" .. لو أستاذ "عماد" سأل نبقى نقوله .. لكن طالما ما

سألش عليها خلاص بلاش نعمل معاها مشاكل بدون داعى .. انتى عارفها

قالت "مى" بغيظ:

-ما هو عشان عارفها .. أوف مش عارفه ليه مينقلوهاش مكتب تانى

ويريحونا منها

قالت "مريم" ببساطة:

-حاولى متحكيش بيها وخلص .. وبعدين سبيني أركز بأه عشان عندى شغل كثير

قالت "مى" وهى تبدأ فى تشغيل حاسوبها:

-شغاله على دعاية شركة ديببس ؟

-أها

-ربنا معاكى شغلهم صعب وصاحب الشركة مبيعجبهوش العجب بيعدل كثير رفعت "مريم" ناظريها قائله:

-اشتغلتى معاهم قبل كدة

-أيوة من كذا سنة كنت ماسكه الحملة الدعائية بتاعتهم .. كانوا متعبين بجد عادت "مريم" تنظر الى حاسبها وتمتمت:

-لحد دلوقتى ما قابلنيش مشاكل معاهم

-يارب دائماً

بعد نصف ساعة .. دخلت الى المكتب فتاة تصبغ وجهها بمكياج صارخ .. حتى سار وجهها وكأنه لوحه متداخلة الألوان .. وحجاب صغير جدا لا يكاد يغطى شعيراتها الثائرة من الأمام .. فتدخل يديها لتحاول عبثاً اخفاء تلك الخصلات .. دخلت ودون أن تلقى التحية توجهت الى المكتب الثالث وجلست عليه وبدأت فى تشغيل حاسوبها .. ثم أخرجت من حقيبتها مرآة وأخذت تتأكد من تمام زينتها ثم قامت وتوجهت الى الخارج .. تابعتها "مى" بعينيها وما كادت تخرج حتى هتفت قائله:

-شوفتى المولد اللى "سهى" عملاه فى وشها .. ده لو مش عشان حرام فعلى الأقل من باب ان مفيش واحدة تحط كمية الميك دى على الصبح .. شغل فلح

صحيح

قالت "مريم" بنفاذ صبره ونظرة محذرة:

"-مى" بطلى تجيبي فى سيرتها .. هى حرة تعمل اللى تعمله .. لينا اننا

ننصحها وبس لكن مش نتكلم عنها كده

قالت "مى" بغیظ:

-يعني عجبك منظرها

قالت فوراً:

-لأ طبعاً مش عاجبنى .. بس بدل ما أنا وانتى نتكلم عنها فى غيابها .. الأحسن  
اننا ننصحها براحه أهو ناخذ فيها ثواب .. ونتجنب احنا اننا ناخذ سيئات عشان  
شوية نميمة

هتفت "مى" قائله:

-ما احنا ياما نصحناها ومفيش فايده مبتحترممش نفسها أبداً .. واهى دلوقتى  
تلاقيها داخله عند أستاذ "أشرف" وهاتك يا تسبيل

قالت "مريم" بغضب:

"-مى" بجد كفاية لو سمحتى

قالت "مى" تحاول تهدنتها:

-خلاص متضايقيش مش هتكلم عنها تانى

عادت "مريم" الى عملها وهى تحاول تناسى غضبها من "مى"

فى المكتب المجاور وقفت "سهى" أمام مكتب الأستاذ "أشرف" قائله بابتسامه  
:

-حقيقي بجد مش عارفه أشكرك ازاي يا أستاذ "أشرف" .. لولاك مكنتش  
عرفت أخلص الشغل ده كله لوحدى  
قال "أشرف" مبتسماً:

-ولا يهملك يا آنسه "سهى" .. احنا زمايل وواجبنا اننا نساعد بعض  
ازدادت ابتسامتها اتساعاً ونظرات عينيها جرئه قائله:

-بصراحة مش عارفة أودى جمالك عليا فين .. من ساعة ما اشتغلت هنا  
وانت بتساعدنى ومرفضتليش أى طلب أبداً ... حقيقي انت انسان ذوق أوى  
ابتسم لمجاملتها قائلاً:

-متشكر يا آنسه "سهى"

قالت وهى تغادر:

-لو احتجت منى حاجه فى أى وقت عرفني وأنا عنيا لحضرتك  
أوما برأسها .. خرجت من المكتب وعادت الى مكتبها تحمل بعض الأوراق

وابتسامتها على شفيتها .. راقبتها "مى" بغيظ .. فانتبهت "سهى" لنظراتها  
فقلت لها بحده:

-ايه مالك بتبصلي كدة ليه .. لو عايزة صورة عرفينى وأنا أجبك بدل ما انتى  
عماله تاخدلى صورة ٤ فى ٦ من ساعة ما دخلت  
قلت "مى" بسخرية:

-وأنا هحتاج صور جنابك فى ايه ان شاء الله .. تكوينش حد مهم وأنا معرفش  
قلت "سهى" بمياعه:

-آه حد مهم ومهم أوى كمان

قلت "مى" ساخرة:

-والله .. تصورى مكنتش أعرف

نظرت اليهما "مريم" قائله بغضب:

-هو انتوا مش هتبتلوا بأه .. مش عارفه أركز فى الشغل .. لو سمحتوا كل

واحدة تبص فى جهازها وتشتغل .. ده مكان شغل مش مكان نتساير فيه

الترمت الفتاتان الصمت وعادتا الى عملهما وكل منهما ترمق الأخرى بنظرات  
حنق .. عادت "مريم" الى عملها تضرب بأصابعها النحيله فوق لوحة المفاتيح

..حانت منها التفاته الى تلك الدبلة الذهبية التى تزين أصابع يدها اليمنى ..

أخذت تتحسسها بأصابعها لحظات .. ثم عادت الى اكمال عملها.

\*\*\*\*\*

من أهم محافظات صعيد مصر .. محافظة قنا .. تلك المحافظة التى تتميز  
بموقع جغرافى رائع .. حيث تحدها شمالاً محافظة سوهاج .. وجنوباً محافظة  
الأقصر .. وشرقاً محافظة البحر الأحمر .. وغرباً محافظة الوادي الجديد .. تضم  
تلك المحافظة ١١ مدينة .. أهمها مدينة نجع حمادى التى تُعرف بالصعيد  
الجوانى .. والتى تتميز بزراعة قصب السكر وبوجود العديد من مصانع  
الألومنيوم .. وتتميز بذلك المناخ الإقليمي الحار الذى يؤثر فى طباع أهلها ..  
تتشابه عادات أهل الصعيد مع عادات أهل الجزيرة العربية من حيث التكوين  
القبلى أو العشائرى فينقسم الناس بها الى عدة قبائل وكل قبيلة تتميز بالتماسك  
والترابط فيما بينهم فلا يستطيع غريب التسلل بينهم .. يتميزون أيضاً بغيرتهم

الشديدة على كل ما يخص القبيلة ومصالحها .. توجد واحدة من كبرى القبائل ويطلق عليها قبيلة "تميم" .. (إذا تشابه الاسم مع اسم قبيلة موجودة بالفعل فهو محض الصدفة .. )

توجد عائلتان من أكبر عائلات تلك القبيلة وهما عائلة "السمري" .. و عائلة "الهوري" .. كان بين العائلتان مصالح مشتركة كثيرة .. يشتركان معا فى العديد من الأعمال ويتميزان بسمعة و هيبة وسط أهل الصعيد .. عائلة "الهوري" .. كان كبيرها هو الحاج "سباعى" والذى يمثل رأس تلك العائلة .. فى ذلك اليوم استيقظ "سباعى" من نومه ليتراأس مائدة الطعام التى وضع عليها ما لذ وطاب بدأ فى تناول الطعام ثم التفت الى ابنه الكبير "جمال" قائلاً:  
-ايه أخبار المشكلة اللى كانت مع العمال يا "جمال"  
قال "جمال" وهو يكمل طعامه بنهم:

-لا متجلجش يابوى حليناها ورضينا العمال .. مع انهم كانوا عايزين جطع رجايبهم

قال "سباعى" بحزم:

-اتعلم تساييس أمورك عشان المركب تمشى .. فى مواقف بتحتاج فيها الحزم وفى مواقف تانية بتعديها عشان مصلحتك  
قال "جمال" بحنق:

-يعنى شوية رجاله ميسووش يمشوا كلامهم علينا

قال "سباعى" بغضب

-الرجاله اللى بتقول عليهم ما يسووش هما من قبيلتك يا ولدى ولازم تطويهم تحت جناحك عشان قوتنا وعزتنا فى عددنا وعشان كده احنا من أكبر عائلات الصعيد كلياتها .. ولا عايزهم يجولوا عيلة "الهوري" مش عارفه تمشى شغلها زى باجى الخلق .. يعنى هيا عيلة "السمري" أحسن منينا ولا ايه  
قال "جمال" بسخرية:

-لا طبعا .. ده احنا نغلبهم بالعدد وبالنسب .. واحنا احسن منيهم مليون مرة .. وكل القبيلة عارفه اكده

-عفارم عليك ومادام اكده يبأه لازم الكل يتكلم عنا منيح وميجيبوش سيرتنا الا بالخير وعشان اكده رضينا العمال .. لكن مش معنا اكده اننا ضعاف .. لا ..



اللى يتنمرد حدانا يا ويله منينا

صمت "سباعى" قليلاً ثم قال:

-أخبار المناجصة ايه .. لسه مفيش نتيجته

-لا يابوى أنى موسى ناس أكابر أول ما يعرفوا المناجصه رسيت على مين

يبلغونا

ثم قال فى حبور:

-بس ما تجلجش واصل .. هترسى علينا يعني هترسى علينا .. مفيش حد حدانا

يجدر يجدم مواصفات أحسن من اللى جدمناها .. متشيلش هم يابوى

قال "سباعى" وهى ينهض:

-ربنا يجدم اللى فيه الخير

\*\*\*\*\*

فى مكتب الأستاذ "عماد" صاحب ومدير شركة رؤية للدعاية والإعلان .. جلس

أحد أصحاب الشركات وقال:

-بس يا أستاذ "عماد" احنا مش عايزين حملة عادية .. عايزين تغيير شامل

فى كل شئ .. لوجو الشركة وبروشورز تعريف بنشاط الشركة تتوزع فى

الشوارع وعلى الشركات الكبيرة .. ده غير البوسترات واعلانات أوت دور

قال "عماد" مبتسماً:

-ما تقلقش أبداً يا بشمهندس "خالد" .. احنا الدعاية عندنا على أعلى مستوى

قال "خالد" محذراً:

-مش عايز أى شغل يا أستاذ "عماد" .. لازم يبقى شغل من الآخر .. أنا مش

مهم عندى الفلوس .. المهم النتيجة

طمأنه "عماد" قائلاً:

-متقلقش وهختارك أحسن ديزاينر عندنا فى الشركة وهى اللى هتمسكك

الحملة

قال "خالد" مستغرباً:

-هى!

ابتسم "عماد": "

-أبوة .. ثوانى وهعرفك عليها  
رفع سماعة الهاتف قائلاً:  
-آنسة "صفاء" من فضلك ناديلى الآنسة "مريم"  
-حاضر يا فندم  
دخلت "صفاء" مكتب "مريم" قائله:  
" -مريم" أستاذ "عماد" عايزك فى مكتبه  
رفعت مريم رأسها قائله:  
-متعرفيش عايزنى فى ايه؟  
-لا مقاليش .. بس عنده عميل جديد  
قامت مريم وعدلت هندامها .. وسارت الى مكتب أستاذ "عماد" وطرقت الباب  
بخفه ثم دخلت وتركته مفتوحاً خلفها .. توجهت الى المكتب قائله:  
-أفندم يا أستاذ "عماد"  
أشار "عماد" الى "خالد" قائلاً:  
-البشْمهندس "خالد" صاحب شركة مقاولات كبيرة .. وحابب يتعاون معنا  
عشان ننفذله حملة دعاية لشركته ونشاطها  
قالت "مريم" بصوت خافت:  
-أهلاً بحضرتك  
قال "خالد" بإقتضاب:  
-أهلاً بيكي  
نظر "عماد" الى "خالد" قائلاً:  
-الآنسة "مريم" من أفضل الديزاينرز اللى فى شركتنا .. وأنا واثق ان شغلها  
هيعجبك  
ثم التفت الى "مريم" قائلاً:  
-يلا يا "مريم" عشان تتفقى مع البشْمهندس "خالد" على تفاصيل الحملة  
أومأت برأسها والتفتت الى "خالد" قائله:  
-اتفضل معايا  
توجهت "مريم" وخالد خلفها الى مكتبها .. تطلعت الفتاتان الى هذا الرجل

الوسيم الأنيق الذى دخل الى مكتبهم .. قامت "سهى" على الفور بإخراج مرآتها تحت المكتب للتأكد من ضبط مكياجها .. جلست "مريم" على المكتب وقالت ل "خالد": "

-اتفضل

جلس "خالد" أمامها وهو يلقي نظرة على الفتاتان .. قالت "مريم" بروتينية:  
-حضرتك تحب تشرب ايه

قال "خالد": "

-قهوة سادة لو سمحتى

طلبت "مريم" له القهوة ثم قالت وهى تمسك بورقة وقلم:

-اتفضل حضرتك قولى طلباتك بخصوص الحملة الدعائية

استغرق الحديث بينهما قرابة النصف ساعة .. حتى قال "خالد": "

-وياريت اعلانات الأوت دور يكون فيها موديلز

قالت "مريم" بإقتضاب:

-آسفين يا بشمهندس .. مش بنستخدم صور الموديلز فى تصميماتنا

رفع "خالد" حاجبه بسخريه قائلاً:

-ازاى يعنى .. كل الناس بتستخدم صور بنات فى الدعاية لشركتهم ومنتجاتهم

قال "مريم" بجديه:

-مش لازم نحط صور بنات على الإعلان عشان نجذب بيه انتباه الناس .. فى

طرق تانية كتير أهمها شكل التصميم .. والكلام اللى مكتوب .. وحجم اليافته ..

والألوان المستخدمه فى التصميم .. ونشاط الشركة نفسها وسمعتها فى السوق

أوما برأسه وبدا غير مقتنعاً بكلامها .. وأخيراً نهض "خالد" للانصراف ومدّه

يده اليها قائلاً:

-تمام يا آنسه "مريم" كده اتفقنا على كل التفاصيل ومنتظر الشغل يخلص خلال

اسبوع زى ما اتفقنا

نظرت "مريم" الى يده الممدوده ثم نظرت اليه وقالت بجديه:

-آسفه مبسلمش .. حضرتك شرفتنا وان شاء الله خلال اسبوع كل التصاميم

هتكون جاهزة .. وهرضهم على حضرتك قبل التنفيذ

أعاد "خالد" يده ونظر اليها ساخراً ثم انصرف دون كلمه .. قالت "سهى"

بعتاب:

-أخرجتى الراجل يا "مريم"  
نظرت اليها "مريم" بجديه قائله:  
-ما يتخرج واياه المشكلة  
ثم عادت الى حاسبها لإكمال عملها

\*\*\*\*\*

هتف "جمال" بغضب بالغ:  
-يعني ايه المناجصة مرسيتش علينا .. يعني ايه الكلام ده  
قال الرجل الواقف أمامه فى المكتب بتوتر:  
-ده اللي حاصل يا "جمال" بيه .. خسرنا فى المناجصة  
صاح بحنق:  
-أمال رسيت على مين ؟  
نظر اليه الرجل وبدا عليه الخوف ثم قال بإستسلام:  
-على عيلة "السمرى"  
ضرب "جمال" على المكتب بكفيه وهب واقفاً وقال بغضب:  
-عيلة "السمرى" ؟ .. ازاي .. ازاي جدرؤا يخدمؤا عرض أحسن منينا ..  
ازاي  
قال الرجل فى خوف:  
-ماخبرش يا جمال "بيه" .. ده اللي حاصل  
صرف الرجل الى عمله وجلس "جمال" يفكر وعلامات الغضب باديه على  
وجهه .. ثم هب واقفاً فجأة وذهب الى مكتب والده .. فتح الباب ووقف أمام  
والده قائلاً بغضب :  
-شؤفت يابؤى .. عيلة "السمرى" سرجؤا المناجصة منينا  
أسند "سباعى" ظهره الى المقعد قائلاً:  
-ياؤلدى مفيش حاجة اسمها سرجؤها منينا .. ده عرض وطلب واللى يخدم  
أحسن عرض هو اللي بيكسب المناجصة .. يعنى المنافسة شريفة

صاح "جمال" بحنق:

-المناجصة دى بتاعتنا .. احنا تعبنا ودفعنا دم جلبنا عشان ترسى علينا .. وفى

الآخر ياخدوها ولاد "السمري" واحنا نطلع من المولد بلا حمص

قال "سباعى" فى غضب:

-انت دفعت رشوى يا "جمال" عشان المناجصة ترسى علينا

قال "جمال" بتوتر:

-ما اسمهاش رشوى يابوى .. دى.....

هب "سباعى" من مكانه قائلاً:

-لو قررتها تانى مرة يا "جمال" لا تلوم الا نفسك .. من امتى عيلة "الهورى"

ليها فى سكة الرشاوى .. على آخر الزمن يجي عيل زيك يفضحنا وسط القبيلة

ويجولوا عيلة "الهورى" ماتعرف تكسب الا بالرشاوى

قال "جمال" باستسلام:

-انى آسف يابوى ما عاد كررها

أشاح "سباعى" بيده قائلاً بضيق:

-يلا على مكتبك .. باعد عنى وشك عاد .. جبر يلحك

غادر "جمال" وهو يتأفف ويتلوى من الغضب

\*\*\*\*\*

-ما تزوجيني يا ماما أوام يا ماما ده عريسي هياخدنى بالسلامة يا ماما

-الله الله .. واجفه تتزوجى أدام المراهيه واحنا تحت ملبوخين تحت فى تحضير

الوكل .. سيبى المراهية اللي فى يدك عاد وانزلى شوفى النسوان تحت

وساعديهم

قامت "صباح" ذات الاثنا والعشرين ربيعاً من فراشها وتركت المرأة قائله

بضيق:

-ماشى يا اماى .. نازله دلوجيت

رمت الأم نظره محذره وهى تبتعد قائله:

-أما نشوف عاد

نزلت "صباح" لتساعد النساء فى تحضير الوليمة التى أعتها جدها كبير عائلة

"السمري" من أجل فوزهم بالمناقصة .. تعالت ضحكات الرجال .. هتف "عبد الرحمن" كبير العائلة بسعاده:

-الحمد لله والشكر ليك يارب .. فوزنا بالمناقصة اللي هنتجنا ناجله تانية بعون الله

قال ابنه الأوسط "ياسين" بفرح:

-صح جوك يا بوى هنتجنا ناجلة تانية .. وهيبقى اسم عيلة "السمري" هو الأول فى سوج الألومنيوم بعون الله

-الحمد لله .. الحمد لله يا ولدى .. ده فضل من عند ربك .. هو اللي بيعطى وهو اللي بيرزج

قال ابنه الآخر "عثمان" بشماته:

-نفسى أشوف دلوجيت وش "جمال" ابن "سباعي" زمانه جلبه جايد نار .. وبيتحسر على المناقصة

قال "عبد الرحمن" بنبرة صارمة:

-ايه اللي جاب السيرة دى دلوجيت يا "عثمان" .. احنا ولاد قبيلة واحدة .. وميصحش حدا فينا يشمت فى التانى .. اكده ولا مش اكده

قال "عثمان" يمتص غضب والده:

-اكده يابوى

-يلا جوموا شوفوا الوكل خلص ولا لسه عاد

كان "ياسين" و "عثمان" هما أحد أبناء "عبد الرحمن" الأربع " ..ياسين" فى

العقد الرابع من العمر .. و "عثمان" فى أوائل العقد الثالث .. الإبن الأكبر

"خيرى" توفاه الله منذ زمن بعيد .. والابنه الصغرى "صباح" ذات الثانية

والعشرين من العمر

التف الرجال حول طاولات الطعام وقد علقت الزينه .. وشرعوا فى تبادل المزاح

وتجاذب أطراف الحديث .. ولم يخلو الأمر من اطلاق الأعيرة النارية فى الهواء

تعبيراً عن فرحهم واحتفالهم

\*\*\*\*\*

فى أحد القاعات الكبرى فى احد فنادق القاهرة .. تم اعداد الحفل الذى يضم

نخبة من رجال الأعمال فى مصر .. وكان على رأس الحضور محافظ القاهرة  
والذى توجه الى الميكروفون للإدلاء بكلمته قائلاً:

-بسم الله الرحمن الرحيم .. السادة الحضور .. يسعدنا انضمامكم معنا الليلة  
ونحن نحتفل ونكرم أربعة من أكبر رجال الأعمال فى مصر .. والذين كان لهم  
الفضل بعد الله عز وجل فى توفير آلاف فرص العمل للشباب المصري ..  
واستثمارهم لما يملكون من أموال فى بلدهم الحبيب مصر .. وكان لهذا أثر بالغ  
فى تنشيط الإقتصاد والصناعة المصرية وارتفاع أسهم البورصة .. واضفاء  
الثقة على الصناعة المصرية وجودتها .. ولذلك فأتشرف بنفسى بتقديم أوسمة  
الشكر من المحافظة الى هؤلاء الرجال الأربعة الذين تعاونوا معاً لخدمة بلدهم  
الحبيب مصر

صمت قليلاً ثم قال:

-الأستاذ "سامر فخرى"

تعالى تصفيق الحضور .. نهض من أحد مقاعد الصف الأول رجل وسيم  
الملامح ذو بشرة بيضاء وعينين عسليتين .. كان يتميز بوسامة لافتة .. تقدم  
وصعد الدرجات التى تفصله عن المنصة .. تقدم من المحافظ الذى سلم عليه  
وبجوار احدى الفتيات التى تحمل الوسام .. قدمت له الوسام مبتسمة فتسلمه  
منها وبادلها الابتسام .. ثم عاد مرة أخرى الى مقعده .. تحدث المحافظ مرة  
أخرى قائلاً:

-الأستاذ "حامد زيدان"

نهض من المقعد لمجاور ل "سامر" .. رجل يتميز بالوسامة وله نظارت خبيثة  
واثقة ..صعد المنصة وسلم على الحافظ .. غمز بعينه للفتاة التى تقدمت  
لتعطيه الوسام .. اقترب المحافظ مرة أخرى من الميكروفون قائلاً:

-الأستاذ "طارق عبد العزيز"

نهض "طارق" من مقعده كان رجلاً متوسط الطول هادئ الملامح .. سلم بدوره  
على المحافظ واستلم وسامه .. قال المحافظ:

-وأخيراً وليس آخراً الأستاذ "مراد خيرى"

نهض من المقعد الرابع رجل فارح الطول ذو ملامح رجولية صارمة ونظرة  
حاددة كنظرة الصقر تقدم ليتسلم وسامه هو الآخر

بعد انتهاء الحفل تعالت القاعة بالأصوات .. حيث كانت هذه من المرات القليلة  
التي يجتمع فيها كل هذا الكم من رجال الأعمال .. وقف الرجال الأربع ملتفين  
حولهم بعض المهنيين .. ثم انفض الحفل وخرج الرجال الأربع من القاعة  
وتوجهوا الى احدى الطاولات فى مطعم الفندق .. صاح "حامد" بمرح:  
-عايزين بأه بالمناسبة الجميلة دى نعمل حاجة مطرقة  
ابتسم له "سامر" قائلاً:

-حاجه زى ايه ؟

-مش عارف فكروا معايا عايزين نشوف نفسنا شويه .. احنا اتطحنا شغل  
الشهور اللى فاتت عايزين ناخذ بريك بأه ونطلع أى مكان  
قال "طارق" مفكراً:

-طيب ايه رأيكوا فى رحلة سافارى

صاح "سامر": "

-سافارى ايه يا طارق .. بيقولك هلكانين شغل

-طيب عايزين ايه يعنى

قال "سامر" بخبث:

-يعنى عايزين حاجات طريه

صاح "طارق" قائلاً:

-ااااه حاجات طريه قولتلى .. لا يا حبيبي مليش فيه

قال "حامد" بسخريه:

-والله انت هتنقطنى يا "طارق" .. المزى بتترمى حواليك يمين وشمال وتقولى

ملكش فيه .. يا ابنى مترفصش النعمة لتزول

ضحك "طارق" بسدة قائلاً:

-طول عمرك بتاع تلت ورقات يا "حامد" .. وتحور فى الكلام عشان يبقى فى

صالحك ..نعمة ايه يا ابنى الله يهديك .. روح انت و "سامر" واعملوا اللى

انتوا عايزينه أنا مليش فى الجو ده

نظر "حامد" الى "مراد" قائلاً:

-ولا انت طبعاً ليك فى الكلام ده

نظر اليه "مراد" ولم يعقب فأكمل "حامد": "



-رجالة معقدة صحيح

قال "مراد" بجدية:

-انتوا مش هتتعشوا ولا ايه.. يلا انجزوا نطلب الأكل عشان راجع المكتب

قال "طارق" بدهشة:

-ليه راجع المكتب دلوقتي

قال "مرد" وهو يتفحص المنيو:

-عندى شغل

صاح "سامر": "

-يا ابني حرام عليك متعبتش .. ده احنا طلعت عنينا الفترة اللي فاتت .. خد

بريك مش كده

نظر اليها "مراد" بحده قائلاً:

-ولما احنا الأربعة ناخد بريك مين اللي يمشى الشغل ؟

قال "حامد": "

-يا "مراد" الدنيا فيها حاجات كتير أوى أهم من الشغل .. مش كله شغل يا

ابني ..وبعدين الجيش اللي احنا موظفينه عندنا ده بيقبضوا مرتبات على ايه ..

مش عشان يشتغلوا واحنا نرتاح شوية

قال "مراد" بجدية وهو يعاود النظر الى المنيو:

-يلا انجزوا عايز أمشى

قال "سامر" بإستسلام:

-مفيش فايدة فيك

أثناء انهماكهم فى تناول الطعام قال "حامد": "

-آه صحيح يا شباب .. فى بنوته عايز أشغلها فى العلاقات العامة .. بنت شيك

وجميلة وموزة وخريجة الجامعة الأمريكية .. يعني هتكون واجهة كويسة

للمشركة

قال "مراد" بهدوء:

-مفيش مشكلة نعملها انترفيو ولو مناسبة نشغلها

قال "حامد" ضاحكاً:

-انترفيو ايه يا "مراد" بقولك البننت موزه شكل وجسم تقولى انترفيو  
قال "مرد" بصرامة موجهاً اليه نظرات نارية:

-احنا شركة محترمة يا "حامد" مش بيت دعارة .. يعني المؤهلات اللي تخلينا  
نشغل أى اوحدة عندنا ملهاش علاقة لا بشكلها ولا بجسمها  
قال "حامد" بحنق وغضب مكبوت:

-مفيش مشكلة هسغلها عندي فى الشركة مع انى كنت حابب انها تشتغل فى  
شركتنا الجديدة اللي بينا احنا الأربعة .. بس مفيش مشكلة  
قال "مراد" بهدوء:

-أنا ما قولتش مش هنشغلها أنا قولت هنعملها انترفيو ونشوف مؤهلاتها  
وخبرتها

قال "حامد" بضيق:

-خلاص يا "مراد" انسى

قال "طارق" مازحاً موجهاً حديثه الى "سامر": "

-ايه يا فنان قولنا ايه اخر أعمالك الفنية

ابتسم "سامر" قائلاً:

-خلال أيام هتشوفوا تحفتى الفنية الجديدة

قال "حامد" بمرح:

-اوعى تكون زى اللي فاتت .. مفهمتتش منها أى حاجه أكنك جايب شوية ألوان

وملغوص بيها ايدك واعد تطبع على اللوحة زى العيال الصغيرين

قال "سامر" بحده:

-وانت ايه يفهمك انت فى الفن والرسم الراقى .. انت اخرك السهرات الحمرا

بتاعتك

قال "حامد" بسخريه:

-وسهراتك انت ايه ؟ .. خضرا

قال "طارق" مبتسماً:

-اللى يشوفكوا بتتكلّموا مع بعض مايقولش رجال أعمال .. يقول شوية أطفال

فى الحضانة

قال له "حامد" ساخراً:

-خلينالك انت العقل انت وسى "مراد" .. اهو اتنين طاقين واتنين عاقلين  
عشان يبقى فى توازن

\*\*\*\*\*

بعد انتهاء الوليمة التى أقامتها عائلة "السمري" احتفالاً بنجاحهم .. وقبل أن  
يوشك "عبد الرحمن" على النوم توجه الى ابنه "ياسين" قائلاً:  
"ياسين" يا ولدى .. روح المخزن وظل طله على الشحنة بتاعة المناجصة  
الى المفروض تتسلم بكرة ان شاء الله  
قال "ياسين" فى تكاسل:

-آنى رجعت عليها ميت مرة يابوى .. واتأكدت من كل حاجة الكمية والجودة  
قال الأب بحزم:

-اتأكد تانى وتالت ورابع .. المناجصة كبيرة ولازم كل شئ يمشى مطبوط  
عشان سمعتنا فى السوج تكبر .. وميلاجوش لينا ولا غلطة  
قال "ياسين" مستسلاً:

-أمرك يابوى .. هروح دلوجيت

توجه "ياسين" بسيارته الى المخازن التى تحتوى على شحنة الألومنيوم والتى  
من المفترض أن يتم ترحيلها فى الصباح الى الشركة التى قبلت عرضهم فى  
المناقصة .. أوقف سيارته وأوشك أن يفتح باب المخزن لكنه دُهِش عندما وجد  
القفل مكسور ..فتح الباب ودخل .. سمع بعض الأصوات فى الخلف .. توجه  
الى حيث مصدر الصوت ليُصدم برجل ملثم يقوم بإسكاب البنزين الذى اخترقت  
رائحته أنف "ياسين" على الكونتینرز التى تحتوى على شحنة الألومنيوم ..  
حانت التفاته من الرجل الملثم الى "ياسين" .. وقف الرجلين فى مواجهة  
بعضهما البعض .. قال "ياسين" فى نفسه تباً لتلك العينين وهاذان الحاجبان  
الكثيفان .. لم يظهر سوى نصف وجهه لكن تمكن من معرفته .. تباً لك يا رجل  
أجرو على معاداة عائلة "السمري" .. ستكون الحرب اذن .. دار هذا الحديث  
الصامت قبل أن يلتفت "ياسين" ويهرول فى اتجاه باب المخزن .. حتى يتمكن  
من احضار الرجال للقبض على هذا الملثم الذى عرفه حق المعرفة .. لكن قبل  
أن يتوجه "ياسين" الى باب المخزن انطلقت رصاصة من مسدس كاتم للصوت

لتستقر فى رأس "ياسين" ويسقط قتيلاً والدماء تنفجر من رأسه على أرض المخزن.

\*\*\*\*\*

جلست "مريم" فى غرفة المعيشة فى بيتها المتواضع للغاية .. تشاهد التلفاز .. بعينين بدتا وكأنهما فى عالم آخر .. تنظر الى اشياء لا وجود لها .. بدت ساهمة هادئة .. متفوقة على نفسها تحتضن قدميها بذراعيها وتستد بذقتها على ركبتيها .. عينيها على ساعة الحائط .. تنظر اليها كل خمس دقائق .. وكأنها على موعد هام .. موعد لا يمكن تفويته .. موعد أهم من اى شئ آخر فى حياتها .. بمجرد أن تحركت عقاب الساعة لتقترب من الثانية عشر .. حتى هبت واقفه .. وتمنت أن تتحرك بسرعة أكبر .. تبال لك أيتها العقارب .. لماذا تسيرين كاسلحفاه .. هيا أريدك أن تصلى بى الى موعدى .. موعدى الذى أنتظره بشوق ولهفة .. دقائق قليلة وأعلنت الساعة وصولها أخيراً الى الثانية عشر بعد منتصف الليل .. لاحت ابتسامة صغيرة على شفثيها .. توجهت الى غرفة نومها وأخرجت حقيبة من دولا ب ملابسها .. جلست على السرير وفتحت الحقيبة الممتلئة بخطابات مغلقة .. وأخذت تبحث بسرعة ونهم عن الخطاب الذى يحمل رقم .. 53 ظلت تبحث عنه حتى وجدته قابلاً بين الخطابات والتي يحمل كل منها رقماً خاصاً به .. اتسعت ابتسامتها ولمعت عيناها وحضنته بين كفيها وكأنها وجدت كنز ثمين .. أسرعت بلهفة تفتح الخطاب وتقرأ ما به:  
-حبيبتي "مريم" .. كيف حالك اليوم حبيبتي .. أنت بخير .. أنت مريضة .. أتشكين من شئ حبيبتي .. أتمنى أن تكونى بخير حال .. "مريم" .. حبيبتي .. معشوقتي .. سأطلب منك هذه المرة شيئاً .. وأعلم أنك ستنفذين طلبى .. أريدك أن تختارى احدى صديقاتك المقربات .. وتذهبين معها غداً فى نزهة نيلية على ظهر مركب .. وسط النيل .. أريدك أن تغمضى عيناك الجميلتين وتتمتعين بالهواء المنعش وهو يلفح وجهك الجميل .. أتذكرين كيف كانت نزهاتنا النيلية .. كيف كنتى تطيرين فرحاً باللعب فى الماء بيدك .. كنت تبدين كطفلة صغيرة مشاكسة وأنت تحاولين رش الماء على ملابسى .. أتذكر جيداً ضحكاتك الجميلة .. وسعادتك فى تلك اللحظات .. أريدك أن تقومى بتلك النزهة يا "مريم" ..

استمتعى بوقتك حبيبتي .. أعلم أنك لا ترفضين لى طلباً وستمتثلين لما أطلبه  
منك .. حبيبتي الجميلة .. القريبة البعيدة .. حبيبك ماجد  
أنهت قراءة الخطاب وضمته الى صدرها بشدة وأغمضت عيناها لتتساقط عبرة  
على الخطاب .. وتقول هامسه:  
-حاضر يا حبيبى .. حاضر.

## الفصل الثاني

أنهت "مريم" قراءة الخطاب وضمته الى صدرها بشدة وأغمضت عيناها  
لتتساقط عبرة على الخطاب .. وتقول هامسه:  
-حاضر يا حبيبى .. حاضر

طوت الخطاب وأعادته بداخل الظرف برفق ثم فتحت درج الكمودينو بجوار  
الفراش .. كان الدرج يحتوى على العديد من الخطابات .. ضمت اليهم الخطاب  
الذى بيدها وتوجهت الى فرشها وتدفرت بالغطاء .. ألقت نظرة حزينة على  
الفراش الآخر الخالى ثم أمسكت مصحفها وشرعت فى القراءة وعيناها تتشعان  
حزناً وألماً .. بعد نصف ساعة أغلقت النور وأمسكت وسادتها وحضنتها  
وضمته بشدة الى صدرها وأسندت عليها رأسها وأغلقت عينيها بعدما رددت  
أذكار النوم

\*\*\*\*\*

أنهى "مراد" عمله بالشركة ونظر الى ساعته ليجدها الثانية بعد منتصف الليل  
.. حمل الجاكت وارتداه ثم خرج من الشركة وتوجه بسيارته الى احدى الفلل  
الأنيقة فى أحد الأحياء الراقية .. دخل الفيلا وما كاد يصعد أول درجة من السلم  
الداخلى حتى سمع صوت من خلفه قائلاً:

-كل ده تأخير يا "مراد"

التفت "مراد" الى المرأة التى تبدو فى العقد السادس من العمر .. أنيقة .. تبدو

علامات الطيبة جلية على وجهها .. أخذت تنظر اليه بعتاب فاقترب منها وقبل يدها قائلاً:

-أنا آسف يا أمى كان عندى شغل كثير

قالت بعتاب:

-وأفل موبايلك ليه .. ومبتردش على تليفون الشركة ليه

قال شارحاً:

-الموبايل فصل شحن والشاحن كان فى العربية كنت مشغول جدا فمعرفة

أنزل أجيبيه وفصلت تليفون الشركة عشان أعرف أشتغل براحتى بدون ازعاج

ثالث محذره:

-اياك تعمل كده مرة تانية .. أنا كنت هموت من قلقى عليك وكنت هكلم "أحمد"

ابن خالتك يدور عليك

قال "مراد" بضيق:

-هو انا عيل صغير يا أمى عشان تكلمى حد يدور عليا

قالت "ناهد" بحزم:

-كلمة واحدة معدتش تعمل كده تانى وتقطع كل وسایل الاتصال بيك

أوما برأسه قائلاً:

-حاضر يا أمى

نظرت اليه بحنان قائله:

-مش هتتعشى

قال وقد ظهر عليه علامات التعب:

-لأ اتعشيت بره بعد الحفلة .. أنا جعان نوم

ابتسمت أمه قائله:

-ألف مبروك يا حبيبي مرة تانية .. انت تستاهل كل خير

قبل يدها قائلاً:

-تسلمي يا أمى .. وتصبحى على خير

-تصبح على خير يا حبيبي

صعد "مراد" الى غرفته وغير ملابسه وجلس على فراشه ليستطيع .... نزع

الساق الصناعية التى تملء الفراغ الموجود من بعد ركبته اليمنى .. ثم تمدد

على فراشه وراح فى سبات عميق

\*\*\*\*\*

كان المخزن يعج برجال الشرطة الذين بدأوا فى التحقيق .. قال " عبد الرحمن " باكياً:

-كبدى عليك يا ولدى .. روحت منى يا ولدى  
ثم التفت الى أحد رجال الشرطة قائلاً بألم:

-مين اللى يجدر يعمل اكده .. مين اللى له صالح يجتل ولدى .. "ياسين" كان  
خيرة الرجال .. عمره ما ضايح حد وعمره ما ظلم حد .. ليه يجتلوا ولدى ليه  
اقترب منه " عثمان " وربت على كتفه قائلاً بصرامة:

-متجلجش يابوى .. هنجيب اللى عمل اكده فى اخوى ونخليه عبره للبلد كلياتها  
قال الضابط بحزم:

-ده شغل الشرطة يا " عثمان " متدخلش نفسك فى المشاكل .. احنا هنعرف  
نوصل للجائل وياخد عقابه

نظر " عثمان " الى الضابط ساخراً وقال بمرارة:

-أما نشوف يا حضرة الضابط .. أما نشوف .. بس اذا معرفتوش توصلوا للى  
جتل اخوى أنا هوصله وهجتله بيدي التنين دول  
قال الضابط بحزم:

" -عثمان" مفيش داعى للكلام ده دلوجيت .. متحطش البنزين على النار وهى  
جايده

نظر " عثمان " بأسى لحنة أخيه الراقد على أرض المخزن واقترب منه قائلاً ثم  
جثا على ركبتيه وقال بصرامة:

-متخفش يا ولد أبوى .. أنى لا هسكت ولا هيرتاحلى بال إلا لما أجيبك حجك  
من اللى عمل فيك اكده .. حتى لو كان آخر يوم بعمرى .. نام فى جبرك واطمن ..  
أخوك راح ياخذ بتارك من اللى جتلك .. ومش هيكفينى فيه حبل المشنجة ..  
لازمن أجتله بيدي .. اطمن يا ولد أبوى

فى بيت عائلة " السمرى " تعالى صوت المذيع على محطة القرآن الكريم ..  
وعج البيت بالنساء اللاتى ارتدين السواد وأخذن فى النواح .. أخذت والده  
"ياسين" تلطم وجهها وتنوح قائله:

-جتلوك يا ولدى .. جتلوك وانت بعز شبابك .. ولدى راح منى يا ناس .. ولدى  
.. خدوك منى ليه يا ولدى  
أخذت "صباح" أخته هي الأخرى تبكى وتنوح هي الأخرى قائله:  
-اخوه .. جتلوك ياخوى  
فجأة دخل "عبد الرحمن" وصاح بغضب بالغ فى النساء:  
-يمين بالله أى حرمة هسمعها بتصوت ولا بتنوح لأكون جتلها بيدي دول ..مش  
عايز جنس حرمة تفتح خشمها وتصوت على ولدى اللى بيتعذب دلوجيت من  
نواحكوا ده  
شعرت النساء بالخوف الشديد وكتمت والده "ياسين" فمها بيادها .. فقال "عبد  
الرحمن" بغضب واحتقار وهو يغادر:  
-جبر أما يلکم کلیاتکم .. حريم ناجصه عجل بصحيح

\*\*\*\*\*

فى صباح اليوم التالى اجتمعت العائله على مائدة الطعام ..ترأس "مراد" رأس  
الطاولة .. ووالدته على المقعد المقابل .. وعلى يمينه أخته "نرمين" .. وعلى  
يساره أخته "سارة" .. قالت "سارة بمرح:  
-بقولك ايه يا أبيه متفكك من الشغل النهاردة وتعالى خرجنا .. نخرج كلنا  
ونروح لآى مكان مع بعض  
قال "مراد" وهو منهمك فى قراءة أخبار البورصة فى الجريده الصباحية:  
-مشغول يا "سارة" مش هينفع  
قالت "نرمين" بتأفف:  
-كل يوم مشغول يا أبيه والمصيبة انك مش بتسمحلنا أصلاً نخرج من غيرك ..  
طيب نعمل ايه يعني زهقتنا من الحبسة دى  
نظر اليها "مراد" قائلاً:  
-ان شاء الله نخرج فى الويك اند مع بعض  
قالت "نرمين" بتحدى:  
-كل مرة تقولنا كده وتيجي فى الويك اند تقول مشغول  
قالت "ناهد" بنبرة محذرة:  
" -نرمين" عيب تتكلمى مع أخوكى الكبير كده



التفتت "نرمين" الى أمها قائلة:

-يا ماما مش قصدى بس زهقت من الأعداء فى البيت ولسه شهر بحاله على  
الجامعه .. مش معقول هقضى الشهر ده محبوسه  
قالت "سارة" مبتسمه:

-طيب أنا بأه أعمل ايه اللي خلصت كلتي خلاص يعني محبوسه محبوسه  
نظر اليهما "مرد" وتنهد قائلاً:

-خلاص هحاول بجد أفضى نفسي وأخرجكوا .. بس مش عايز زن  
قالت "ساره" مبتسمه:

-أنا عن نفسي مبحبش الزن .. قول لـ "نرمين" الكلام ده  
التفتت اليه "نرمين" قائلة برجاء:

-خلاص مش هزن بس حضرتك يا ابيه التزم بكلامك المره دي  
قال "مراد" بصرامة:

"-نرمين" اتكلمى معايا بإسلوب أحسن من كده  
قالت "نرمين" بخفوت:

-أنا آسفه يا ابيه مش قصدى  
نظر اليها وقال بجديه:

-يلا افطروا

شرعت الفتاتان فى تناول طعامهما فى صمت

\*\*\*\*\*

دخلت "مريم" مكتبها وألقت السلام على "مي":

-السلام عليكم .. ازيك يا "مي"

-وعليكم السلام يا "مريم"

جلست "مريم" وشرعت فى فتح حاسوبها .. اقتربت منها "مي" قائلة:

-خلصتى تصميمات شركة ديببىس ولا لسه

-أيوة هفنشها بس وأرفعها على الميل وأبعثها لصاحب الشركة

-مهمممم كويس

التفتت "مي" لتعود الى مكتبها .. لكن "مريم" أوقفتها قائلة:

"-مي" عايزة أطلب منك خدمه

التفتت "مي" قائله:

-خير أأمرى

صمتت "مريم" قليلاً ثم قالت:

-بصى .. عايزاكي تيجي معايا النهاردة مشوار مهم

قالت "مي" بإستغراب:

-مشوار ايه

بدا على "مريم" التردد .. ثم عزمت أمرها قائله:

-هنركب مركب ونتفصح فى النيل

ضحكت "مي" وقالت:

-انتى حلمتى بمركب ولا .. اشمعنى يعني ايه اللى طلعتها فى دماغك

ظهدت سحابة حزن فى عينيها البنيتين .. وتبللت عينيها قليلاً وقالت بتأثر:

"-ماجد" طلب منى كده

اخذت ابتسامه "مي" ونظرت الى "مريم" فى أسى .. فحاولت "مريم"

التماسك وقالت:

-ها هتيجي معايا ؟

قالت "مي" بإستسلام:

-ماشى هاجى معاكى

قالت "مريم" وهى تعاود الإلتفات الى حاسوبها:

-تمام .. نروح بعد الشغل ان شاء الله

أومأت "مي" برأسها وعادت الى مكتبها وهى ترمق "مريم" بنظرات مشفقه

\*\*\*\*\*

اجتمع رجال القبيلة لتقديم العزاء فى "ياسين" .. توجه "سباعى" الى "عبد

الرحمن" وسلم عليه قائلاً:

-شد حيلك يا "عبد الرحمن" .. والبقاء لله

قال "عبد الرحمن" فى خفوت:

-البقاء لله وحده .. ربنا أعطى ودلوجيت بياخذ عطيته

ربت "سباعى" على كتفه قائلاً:

-متجلجش ان شاء الله هنعرف مين اللى جتله .. والشرطة مش ساكتة .. وان

شاء الله جريب هتبرد نارك على ابنك لما يتمسك التيبيببيت اللي عمل اكده  
قال "عبد الرحمن" بأسى:  
-على الله يا "سباعى" .. على الله .. هو اللي جادر يكشف الظالم اللي جتل ابني  
وخرج جلبى عليه .. انا لله وانا اليه راجعون اللهم اجرنى فى مصيبتى واخلف  
لى خيرا منها  
بعدها انصرف الرجال اجتمع كبراء عائلة "السمري" معاً .. قال أحد الرجال فى  
غضب:

-مين اللي يجدر يعمل اكده .. مين اللي يجدر يجف أدام عيلة "السمري"  
ويعاديه  
قال آخر:

-مفيش الا عيلة "الهورى" أكيد حدا منهم هو اللي عيملها  
أكد آخر:

-ايوة مفيش الا عيلة "الهورى" .. جلبهم اتخرج اكمنا كسبنا المناجصة ..  
وهناكلهم فى السوج .. عشان اكده بعثوا حدا من حداهم يخرج المخزن ويجتل  
"ياسين" ولد عمى  
قال "عبد الرحمن" بحزم:

-مش هنتهم الناس من غير دليل .. طول عمر العيلتين واجفة جمب بعضها ..  
وبينا مصالح اكتوبر .. مش هنظلم حدا منهم طالما مفيش دليل .. ان بعض الظن  
اثم .. ومش عايز كلام فى الموضوع ده كثير .. ولساتكم يرطرط فيه .. لان لو  
الكلام وصل لعيلة "الهورى" أكيد النفوس هتشيل  
ثم قال بحزم أكبر وهو يمعن التفكير:  
-ربنا جادر يكشف المستور .. وينتجم من الظالم

\*\*\*\*\*

جلس "سباعى" مع ابنه "جمال" وبعض رجال العائلة .. وقال فى أسى:  
-ضاع الراجل فطيس .. لا حول ولا قوة الا بالله  
قال أحد الرجال:

-هتجنن مين اللي يعمل حاجه بشعة زى اكده ويجتل "ياسين" المسكين .. كان  
راجل طيب والله

قال آخر:

-الله يرحمه .. فعلاً كان راجل طيب

قال "سباعى": "

-اللى عمل اكده حدا من الجبيلة

قال أحد الرجال بدهشة:

-ايه اللى خلاك تجول اكده يا حاج

قال "عبد الرحمن" بحزم:

-لان لو كان حدا غريب كان زمان حدا شافه واتعرف عليه وسطينا .. لكنه واحد

من الجبيلة وعرف يندس وسطينا لما الناس اتلمت والشرطة اجت

قال "جمال" بحده:

-يمكن استخبي منينا يابوى .. ومشى من البلد من غير ما حدا يشوفه

قال "سباعى" فى حيرة:

-الله أعلم يا ولدى .. بس أكيد الشرطة هتعرفه وتمسكه

ثم قال بغضب:

-لازمن يتجتل فى ميدان عام على عملته دى .. بجلنا سنين طويلة ما حدا احدانا

فى الجبيلة مات بطلجة رصاص .. ودلوجيت هنرجع لمرار الجتل والتار عاد ..

ربنا ينتجم منيه

ثم قال بقلق:

-ياخوفى يتهموها فينا ولاد "السمري"

قال "جمال" بحده:

-وليه جولت اكده يابوى .. واحنا ايه دخلنا فى جتل ابنهم

-يخوفى يا "جمال" الشيطان يوزهم بسبب موضوع المناجصة ويفتكروا اننا

عملنا اكده عشان خسرنا .. خصوصى اللى عمل اكده كان جاصد يخرج المخزن

.. لولا "ياسين" اللى راح وكشفه ولد التيببيبيبييت ده

قال أحد الرجال يطمئنه:

-لا اطمن يا حاج .. الحاج "عبد الرحمن" عاجل ودماغه توزن بلد .. مستحيل

يسيب الشيطان يلعب فى دماغ حدا من عيلته .. خصوصى ان مفيش دليل ضدنا

تنهد "عبد الرحمن" قائلاً:

-على الله يا ولدى .. على الله

\*\*\*\*\*

هتفت "مريم" بحنق:

-ده بيستهبل ده ولا ايه بالظبط

نظرت اليها "مى" قائله:

-خير فى ايه

قالت "مريم" بعصبيه:

-صاحب شركة ديبس بعته التصميمات على الميل .. رد عليا وطالب ليستت  
تعديلات هتاخذ منى على الأقل اسبوع .. والمفروض أبدأ من دلوقتي فى حملة  
شركة المقاولات

قالت "مى" مبتسمة:

-قولتك انه متعب

قالت "مريم" بضيق:

-أوف .. كان لازم أعد معاه من الأول ويقولى على اللي عايزه .. بدل ما يسببني  
أشغل وبعدين يبجي يعدل كل التصميمات ويحط التاتش بتاعه .. ما كان من  
الأول

قالت "مى" مقترحه:

-خلاص روحيله الشركة بدل ما تتعبى فيهم تانى والآخر برده يعدل

قالت "مى" بحزم وهى تنهض:

-انا هعمل كده فعلاً .. هروح أقول لأستاذ "عماد" على اللي حصل .. وهطلب

اذن عشان أروح أشوف آخرتها مع الراجل ده

طبعت "مريم" صور التصميمات على الطابعة ووضعتهم فى أحد الملفات

وتوجهت الى مكتب "عماد" الذى نظر الى تصميماتها ثم قال:

-تصميمات ممتازة يا "مريم"

قالت بضيق:

-بس معجبتش صاحب الشركة وطالب تعديلات هتاخذ منى وقت كبير

-كان لازم من الأول تعدوا مع بعض ويقولك على اللي عايزه بدقه عشان

مبضيعش وقتك ومجهودك على الفاضى

-وعشان كده يا فندم بطلب من حضرتك اذن انى أمشى دلوقتي عشان أروحله

الشركة

رفع "عماد" مساعة الهاتف قائلاً:

-لأ خليكي يا "مريم" أنا هتكلم معاه وأخليه يبعثنا حد من عنده يقولنا على الطلبات بالضبط ويكون الكلام أدامى عشان ميرجعش ويطلب تعديلات تانى ذهبت "مريم" الى مكتبها دقائق وكلمتها "صفاء" سكرتيرة "عماد" قائله:  
-أستاذ "عماد" بيقولك مدير تسويق شركة ديببس هيجى بكرة يتفق معاكى على التصميمات يا "مريم"  
-خلاص ماشى فى انتظاره

\*\*\*\*\*

التف الرجال الأربعة حول طاولة الإجتماعات لمناقشة مشروعهم الجديد .. قال "طارق":

-بصوا يا جماعة .. زى ما اتفقنا عايزين نهتم بنقطتين ..الأولى ان السعر يكون مناسب للطبقة المتوسطة .. وتانى نقطة نهتم برده بالجودة .. يعنى مش عشان نقلل فى السعر نقوم ننزل بمستوى الجودة بدرجة كبيرة .. يعنى عايزين توازن ونجمع بين الجودة والسعر وبكده هنتميز عن غيرنا فى السوق وافقه "مراد" على كلامه قائلاً:

-بالضبط كده يا "طارق" .. هى دى المعادلة اللى لو حققناها هنهزم كل منافسينا فى السوق .. لان كل المصانع والشركات المنافسه اما بيهتموا بالجودة على حساب السعر أو بالسعر على حساب الجودة .. لكن احنا ان شاء الله هنقدر نحقق المعادلة الصعبة دى ونهتم بالسعر والجودة مع بعض قال "حامد" باستخفاف:

-طيب بدل تعب القلب ده ليه منحدش الطبقة الراقية كفة نوجه انتاجنا ليهم قال "مراد" شارحاً:

-لان أغلب المصانع الكبيرة والماركات العالمية وأغلب المستوردين بيهتموا بالطبقة دى .. يبقى ايه الجديد اللى احنا هنقدمه لو عملنا زيهم ؟ .. الفكرة هى اننا نعمل اسم وماركة بس تكون فى مستوى العامل والموظف والطبقة العاملة دى .. وفى نفس الوقت جودة معقولة وتصميم راقى هز "سامر" رأسه قائلاً:

-كلامك صح يا "مراد" .. احنا عايزين يبقى لنا اسم فى السوق ونتجاوز كل  
النافسين فى فترة صغيرة وده مش هيتحقق الا لو تميزنا عنهم  
قال "حامد" مبتسماً:

-ماشى يا شباب وأنا معاكوا ان شاء الله .. امتى بأه هتبدأ ساعة الصفر  
قال "طارق": "

-لما ننتهى من أول خط انتاج ونتأكد اننا وصلنا للمواصفات المطلوبة للمنتج  
ساعتها هنبدا الحملة الدعائية على طول

\*\*\*\*\*

توجهت "مريم" مع "مى" الى المصعد لمغادرة الشركة فأوقفها "أشرف"  
قائلاً:

-آنسه "مريم" لو سمحتى

التفتت "مريم" اليه وهى تشعر بالضيق .. وقف أمامها قائلاً:

-سمعت ان شركة ديبس تاعينك فى شغلهم

قالت "مريم" بهدوء:

-لأ مفيش مشاكل .. شوية تعديلات بسيطة

قال وهو ينظر اليها:

-يعني لو تحبى أساعدك فيها .. مفيش عندى مشكلة أنا فاضى حالياً

قالت "مريم" بجديه:

-شكراً يا أستاذ "أشرف" .. زى ما قولت التعديلات بسيطة .. بعد اذنك

خرجت مع "مى" من العمارة وركبا المترو .. قالت لها "مى" الجالس به جوارها

:

-ليس دائماً بتقضى معاه الراجل حابب يساعدك

قالت "مريم" بحده:

-وأنا مش محتاجة مساعدة .. دى مش أول مرة عميل يطلب تعديلات على

الشغل

"-مريم" واضح ان الراجل مهتم بيكي

نظرت اليها "مريم" وقالت بعصبية:

-قصدك ايه بمهتم بيا

قالت "مى" بنبرة ذات معنى:  
-مهتم بيكي يا "مريم" أشرحها لك ازاي يعنى .. وبعدين "أشرف" انسان  
محترم وكويس وابن حلال و.....  
قاطعتها "مريم" بحده:  
" -مى" لو سمحتى اسكتى .. مش حبه أبدأ أتكلم فى الموضوع ده  
نظرت اليها "مى" بأسى قائله:  
-لحد امتى ؟ .. لحد امتى يا "مريم"  
لم تجيبها "مريم" بل التفتت لتتنظر من الشباك فى صمت

\*\*\*\*\*

دخل "طارق" الى مكتب "مراد" المنهمك فى عمله قائلاً:  
-ها يا "مراد" مش هتمشى ؟  
قال "مراد" دون أن يرفع نظرة من الورق الذى أمامه:  
-لا .. لسه عندى شغل  
-طيب خد بريك طيب  
-الشغل كتير يا "طارق"  
-طيب خلاص براحتك أنا ماشى  
-ماشى سلام  
-سلام أشوفك بكرة  
خرج "طارق" وترك "مراد" المنهمك فى عمله .. بعد لحظات دخلت السكرتيرة  
وقالت:  
-أستاذ "مراد" لو سمحت عايزه أمشى بدرى النهاردة  
رفع نظرها اليه قائلاً بحده:  
-ليه ؟  
قالت بتردد:  
-يعنى عندى حاجة مهمة  
-ايه هى الحاجة المهمة اللى أهم من شغلك  
صمتت قليلاً ثم قالت:  
-بصراحة عيد ميلادى النهاردة وخارجة مع صحابي عايزين يحتفلوا بيا .. وأنا



اصلا خلصت كل الشغل اللي ورايا  
صاح بها غاضباً:

-امشى يا آنسه على مكتبك بلاش دلع  
بُهتت الفتاة وقالت بإضطراب:

-أنا مش قصدى يا أستاذ "مراد" .. أنا بس...  
قاطعها قانلاً بصرامة:

-هنفضل فى تضييع الوقت ده كتير .. اتفضلى على مكتبك .. لما ييجى معاد  
الإلتصاف ابقى اخرجى اعملى اللى انتى عايزاه  
أومات الفتاة برأسها وخرجت .. جلست على مكتبها فى عصبية قائله بغضب:  
-راجل قليل الذوق.

\*\*\*\*\*

داعت "مريم" الماء حول المركب بيدها وهى تبتسم فى حبور ..أخذت تجمع  
الماء بيدها ثم تتركه ليتسلل من بين أصابعها .. راقبتها "مي" فى صمت .. وفى  
عينها نظرة أسى .. اختفت ابتسامه "مريم" لتحل محلها عبرة فلتت من  
عينينها فأسرعت بمسحها بأصابعها .. اقتربت منها "مى" وجلست بجوارها  
قائله:

-تحبي نمشى

قالت "مريم" متصنعة المرح:

-لأ خلينا شوية كمان .. انتى زهقتى منى ولا ايه

-لأ طبعا .. بس حساكى مضايقه

قالت "مريم" وهى تحاول الابتسام:

-لأ بالعكس أنا مبسوطة .. أنا بحب أوى ركوب المركب فى النيل .. بفرح أوى ..  
لأن بابا كان بياخذنى أنا وماما وأختى ويفسحنا فى المركب .. وكنت ببقى فرحانه  
أوى

اغرورقت عينها بالدموع رغماً عنها وشعرت بغصة فى حلقها وقالت بصوت  
مرتجف:

-و "ماجد" عارف كده.

## الفصل الثالث

عاد "مراد" الى منزله .. استقبلته والدته قائله:

-حبيبي اطلع شوف عمك لانها كانت تعبانه شوية النهاردة

قال "مراد" بقلق:

-خير مالها يا أمى ؟

-مفيش الضغط على شويه عليها وكانت تعبانه بس الحمد لله هى أحسن دلوقتى

صعد "مراد" درجات السلم وتوجه الى غرفة عمته طرق الباب ففتحت أخته

"سارة" وهى تشير له أن يصمت خرجت وأغلقت الباب خلفها قائله:

-متصحيهاش دلوقتى يا أبيه هى نامت بالعافية

قال بقلق:

-هى عاملة ايه دلوقتى ؟

-لا متقلقش كويسة .. بس مكنش جايلها نوم .. وأخيراً نامت

-متابعة معاها الدوا يا "سارة"

-أيوة طبعا متخافش يا أبيه

-أمال الضغط على ليه ؟

-تلاقيها افكرت حاجة ضايقتها ولا حاجه

أوماً "مراد" برأسه وتوجه الى غرفته .. اتصل به "طارق" قائلاً:

"-مراد" انت فين

قال "مراد" بصوت مرهق:

-فى البيت يا "طارق" خير فى حاجه

-لا كنا طالعين أنا و "سامر" و "حامد" نسهر برة وكنا بنشوفك فى عشان

تيجي معنا .. هعدى عليك ناخذك

-بلاش مش حابب أخرج النهاردة

-ليه يا ابنى تعالى نغير جو أنا من زمان ما خرجتتش وانت كمان .. يلا فرصة

نسهر سهرة حلوة

رفض "مراد" بإصرار قائلاً:

-لأ يا "طارق" .. قولتك مش حابب أخرج

-خلاص برحتك .. سلام

-سلام

قال "حامد" الجالس بجوار "طارق" فى السيارة:

-هيجى ؟

-لأ قال مش حابب يخرج

قال "حامد" بسخرية:

-ده لو بنت مش هتحبس نفسها فى البيت كدة

-سيبه على راحته

هتف "حامد" بغیظ:

-أنا نفسي أفهم هو البنى آدم ده ايه بالضبط .. مفيش وراه غير الشغل وبس ..

أنا عمرى ما شوفت حد صعب زيه كده

قال "طارق" بهدوء:

"-مراد" طول عمره بيحب شغله

قال "سامر" الجالس بالخلف:

-بس مش كده .. يعني محسنى ان الدنيا شغل وبس .. يشتغل ماقولناش حاجه

بس يشوف مزاجه برده .. ده لما واحدة بتعدى من أدامه مبتتهزش فيه شعره

مهما كانت مزه طحن

قال "طارق" مبتسماً:

-سبنالك انت المزز دول

قال "حامد" بسخرية:

-وانت كمان غريب .. عايش فى المدينة الفاضلة .. يعني عايز تفهمنى انك

عمرک ما غلطت أبداً

قال "طارق" فوراً:

-أكید غلطت بس غلط عن غلط يفرق

-آه .. أنا قولت كده برده

قال "طارق" باستغراب:

-قولت ايه ؟

قال "حامد" بنفس السخرية:

-المرء على دين خليله .. انت وصحبك فوله واتقسمت نصين .. بس هو قفل  
أكثر منك

تنهد "طارق" بحسرة قائلاً:

"-مراد" مكنش كده خالص .. بس حصلت ظروف غيرته  
قاطعهم "سامر" قائلاً:

-كفاية بأه كلام عن "مراد" وقولولى ناويين تسهرونا فين

\*\*\*\*\*

عادت "مريم" من عملها .. توجهت الى المطبخ وأخرجت من الثلاجة جبنة  
وخبز وشرعت فى عمل سندوتش وتناوله .. ثم توجهت الى غرفتها لتغير  
ملابسها .. فتحت الدولاب الذى كان مقسم من الداخل لنصفين قسم يحوى  
ملابسها وقسم آخر يحوى ملابس أصغر سناً توقفت أما الملابس الصغيرة جذبت  
احداها وظلت تتحسسها فى ألم وكأنها تشتاق الى صاحبته .. تنهدت وانتهت من  
تغير ملابسها ثم جلست على فراشها صامته لا تفعل شيئاً سوى النظر الى فراغ  
الغرفة .. ظلت قرابة النصف ساعة جالسة دون حراك .. ثم نهضت وتوضأت  
وصلت وفتحت التلفاز لا لتشاهد ما به .. بل لتسمع صوتاً .. أى صوت .. يخترق  
هذا الصمت القاتل الذى تعيش فيه .. وأخيراً استسلمت للنعاس امام التلفاز وهى  
تحضن مخذتها وتسند رأسها اليها  
فى الصباح توجهت الى عملها عن طريق المترو مثلما تفعل كل صباح .. قالت  
لها "مى" وهى تتمعن فيها:

-نمتى امبارح كويس ؟

قالت "مريم" وهى تبدأ فى تشغيل حاسوبها:

-أيوة الحمد لله

قالت "مى" بحدده:

-يبأه رجعتى تانى متكليش كويس .. شوفى وشك فى المراية بأه عامل ازاي يا

"مريم"

قالت "مريم" مدافعه عن نفسها:

-والله باكل يا "مى" .. هعيش من غير أكل يعني

-طيب بصى شوفى فى المرايه وشك أصفر ازاي

قالت "مريم" بحنق:

-خلقة ربنا أعمل ايه يعني

هتفت "مى": "

-لا مش خلقة ربنا يا "مريم" .. حرام عليكى اللى بتعملية فى نفسك ده يا بنتى

انتى لسه صغيره مكلمتيش ٣٠ سنة قالت "مريم" بحنق:

-لأ كملتهم من شهرين

قالت "مى" بعناد:

-برده صغيره .. بس اللى يشوفك يقول دى واحدة عندها ٦٠ سنة مش ٣٠

سنة

قالت "مريم" بنفاذ صبر:

"-مى" شوفى شغلك وفكك منى .. انا عندى شغل كتير

قالت "مى" بغيظ:

-ماشى يا ست "مريم" أما نشوف أخرتها معاكى

ثم استطردت قائله:

-واعملى حسابك ان ماما عزماكى على الغدا عندنا بكرة

قالت "مريم" بحرج:

-اشكرى طنط كتير بس مش هقدر اجى

هتفت "مى": "

-ليه سياتك مش هتقدرى تيجي .. وراكى ايه .. انتى من البيت للشغل ومن

الشغل للبيت

نظرت اليها "مريم" بلوم قائله:

-انتى اللى قولتيلها تعزمنى

هتفت "مى" بغيظ:

-يا ست انتى الست عايزة تشوفك وتعزمك على الغدا انتى مكلعة الدنيا ليه

قالت "مريم" مبتسمه:

-خلاص ماشى هاجى ان شاء الله

ابتسمت "مى": "

-أيوة كده فكيها ربنا يفكها فى وشك ووشى يارب

-آمين

ماهى الا دقائق حتى دخلت "سهى" التى قالت:

-صباح الخير

قالت "مريم: "

-صباح النور

قالت "مى" باستغراب:

-مش عادتك يعنى تقولى صباح الخير وانتي داخله .. أخيراً خدتى بالك ان فى

بشر معاكى فى نفس المكتب

قالت "سهى" مبتسمة:

-مفيش أصلى مبسوطه شوية

قالت "مريم: "

-ربنا يسعدك دايماً

تنهدت "سهى" قائله:

-يارب وينويلى اللى فى بالى

ردن هاتف "سهى" فاتسعت ابتسامتها وقفرت من المكتب قائله:

-استنا خليك معايا هطلع أكلمك من بره المكتب

وغادرت الغرفة لتتحدث بالخارج .. تابعتها "مى" بعينها ثم قالت ل "مريم: "

-شايفه .. اهى رجعت للتليفونات تانى .. شكلها علقت مع حد جديد

قالت "مريم" دون أن ترفع نظرها عن حاسوبها:

-يمكن بتكلم حد من أهلها أو واحدة صحبتها

هتفت "مى: "

-والله .. وبتكلم بره المكتب ليه .. وعماله تتسهوك وترقق فى صوتها ..

ومسمعتهاش وهى بتقوله استنا خليك معايا

نظرت اليها "مريم" بحزم قائله:

-ملناش دعوة يا "مى" .. وعلى فكرة اللى انتى بتقوليه ده بدايه الطريق للقذف

ارتبكت "مى" وشعرت بالخوف من وقع الكلمة وقالت:

-أنا مش قصدى يا "مريم"

قالت "مريم" بحزم:

-قصديك ولا مش قصديك .. اللى انتى بتقوليه فيه شبهة قذف محصنات وانتي

واحدة عارفه ربنا .. عارفه عقاب قذف المحصنات ايه  
ثم قالت:

-ربنا بيقول فى سورة النور

{إِنَّ الَّذِينَ يَرْمُونَ الْمُحْصَنَاتِ الْغَافِلَاتِ الْمُؤْمِنَاتِ لَعُنُوا فِي الدُّنْيَا وَالْآخِرَةِ وَلَهُمْ  
عَذَابٌ عَظِيمٌ}

{وَالَّذِينَ يَرْمُونَ الْمُحْصَنَاتِ ثُمَّ لَمْ يَأْتُوا بِأَرْبَعَةِ شُهَدَاءَ فَاجْلِدُوهُمْ ثَمَانِينَ جَلْدَةً وَلَا  
تَقْبَلُوا لَهُمْ شَهَادَةً أَبَدًا وَأُولَئِكَ هُمُ الْفَاسِقُونَ}  
قالت "مى" وقد شعرت بالندم:

-أستغفر الله العظيم ..الواحد مش ناقص ذنوب .. خلاص معدتش هجيب

سيرتها تانى .. هى حره تعمل اللي هى عايزاه

قالت "مريم" بهدوء:

-أيوة كده .. بلاش نتكلم على أى بنت وحش عشان ربنا مش بيتلينا بواحد

نتكلم عننا وحش .. لان كله سلف ودين

-ماشى يا "مريم" خلاص مش هتكلم عنها تانى

ابتسمت "مريم" قائله:

-او عى تكونى زعلتى منى أنا بنصحك عشان بحبك

ابتسمت "مى" قائله:

-عارفه .. ولو معملتيش كده تبقى مش بتحبينى

عادت الفتاتان الى عملهما .. دخلت "سهى" بعد فترة .. لم تلتفت اليها الفتاتان

.. وبدأت هى الأخرى فى أداء عملها

استيقظ "مراد" من نومه .. وارتنى ملابسه وثبت الساق الصناعية فى قدمه

اليمنى ثم خرج من غرفته وتوجه الى غرفة عمته .. طرق الباب فأذنت له

بالدخول

فتح الباب .. كانت جالسه فى الفراش ومتدثرة بغطائها .. وتمسك أحد الكتب فى

يدها ونظارة كبيرة على عينيها .. امرأة فى العقد السادس من العمر .. ورغم

كبر سنها الا أن ملامحها وبنيتها تتميز بالقوة والصلابة .. لها نظرات حادة قوية

.. تشعر بأنها تسير أغوارك .. اقترب منها قائلاً:

-صباح الخير يا عمته

رسمت ابتسامه خفيفة على شفيتها وقالت:

-صباح الخير يا ولدى

ابتسم قائلاً:

-أخبار صحتك ايه النهاردة .. أمى قالتلى ان حضرتك تعبتى امبارح .. جيت

عشان أشوفك بس كنتى نائمة محبتش أزعجك

قالت عمته "بهيرة": "

-ربنا يبارك فيك يا ولدى .. ويعينك وينورك طريقك .. آنى منيحه الحمد لله

والشكر ليه

جلس بجوارها قائلاً:

-خذى بالك من صحتك يا عمته ولو اتجتى أى حاجة عرفيني

ربتت على كتفه قائله:

-تسلم يا ولد أخوى .. انت مش مخليني محتاجه لحاجه واصل .. ربنا يديك على

أد نيتك .. ويبارك فيك وفى اخواتك البنات

-مش هتنزلى تفطرى معانا

-لا سبجتك يا ولدى .. انزل انت افطر وشوف مصالحك .. الله يعينك ويوفجك

نزل "مراد" وترأس مائدة الطعام كالمعتاد

قالت "نرمين" بتحدى:

-ها يا أبيه هتخرجنا بكرة ولا لا

نظر اليها "مراد" قائلاً بإستلام:

-حاضر يا "نرمين" هخرجكوا ان شاء الله

تنفست الصعداء قائله:

-أخيراً هخرج

نظر اليها "مراد" بإستغراب قائلاً:

-اللى يسمع كده يقول محبوسة فى البيت .. عندك جنبنة طويلة عريضة بره

اتمشى فيها براحتك .. وعندك العربية والسواق اطلعى انتى و "سارة" و اتمشوا

بيها

قالت "نرمين" بدهشة:

-وهى دى اسمها فسحة يا أبيه .. أنا عايزة أروح مولات .. أعمل شوبينج ..

نسافر مكان .. شرم .. اسكندرية .. مطروح .. أى مكان تغيير يعنى



قال "مراد" وهي يتفحص جريدته:

-لما افضى ان شاء الله هنسافر سوا

قالت "نرمين" برجاء:

-طيب وليه منروحش انا و "سارة" لوحدنا شرم مثلا .. والسواق هيكون معانا

.. يوصلنا ويجبنا فى نفس اليوم

نظر اليها "مراد" بحدة قائلاً:

-فى بنت محترمة تسافر لوحدنا من غير أهلها

قالت مرتبكة:

-احنا مش هنبات .. يوم بس ونرجع

قال بغضب:

-وافرضى حد ضايقتك انتى ولا أختك هتتصرفوا ازاي .. افرضى حصلكوا حاجه

..لازم يبقى فى راجل معاكوا .. مينفعش بنتين يسافروا لوحدهم .. انتوا ما

بتقروش جرايد وتسمعوا عن الحوادث اللي بتحصل والبلطجية اللي ملوا البلد

قالت "سارة" لتلطف الجو:

-معاك حق يا أبيه .. هي بس "نرمين" من زهقتها بتقول كده .. بس هي أكيد

عارفه ان مينفعش نساfer من غيرك

قالت الأم وهي تنظر اليهم:

-هو مينفعش فى يوم نفطر بدون نقاش وكلام كتير .. يلا افطروا وسيبوا

أخوكوا يفطر عشان هو مشغول مش فاضى زيكوا

نظرت "ناهد" الى مراد قائله:

-شوفت عمك يا "مراد"

رفع نظره من الجريدة وقال:

-أيوة يا أمى عدت عليها قبل ما أنزل .. واطمنت عليها

-ماشى يا حبيبى

\*\*\*\*\*

جلس "عبد الرحمن" على سريريه ساهماً لا يشتهي حتى تناول الطعام .. اقتربت

منه زوجته وجلست بجواره قائله بصوت باكى:

-جلبي حارجنى جوى على ولدى يا حاج

تنهد قائلاً:

-ربنا يرحمه ويغفرله ويرزجه الجنة .. يارب  
قالت زوجته ودموعها تنهمر:

-كان أحن واحد فى اخواته ..فجدت الكبير بدرى بدرى .. ودلوجيت فجت  
"ياسين" .. يا كبدى عليكوا يا ولادى التنين  
قال "عبد الرحمن" بحده:

-ادعيلهم ان ربنا يرحمهم بدل النواح ده يا وليه  
قالت زوجته بحزم:

-آنى مش ههدى ولا يرتاحلى بال إلا لما أشوف اللى جتل ولدى وهما بيعدموه  
وبيشنجوه .. اللهى ربنا ينتجم منه  
قال "عبد الرحمن" بحزم:

-ان شاء الله هيمسكوه ويتعاقب على عيملته  
ثم قال بحيره:

-بس أموت وأعرف هو مين .. آنى واثج انه حدا من الجبيلة .. بس مين العلم  
عند الله  
تنهد وقال:

-ربنا جادر يكشف المستور .. انا واكلته وهو حسبي

\*\*\*\*\*

دخلت "صفاء" سكرتيرة "عماد" الى مكتب "مريم" قائله:  
" -مريم" .. أستاذ "عماد" عايزك فى مكتبه  
نظرت اليها قائله:

-هو وصل؟

-تقصدى صاحب شركة ديببس .. أيوة وصل  
قالت "مريم" بإستغراب:

-مش قولتلى امبارح ان اللى هيجى مدير التسويق  
هزت "صفاء" كتفيها قائله:

-أستاذ "عماد" قالى كده امبارح .. بس الراجل اللى جه عرف نفسه على انه  
صاحب الشركة

قامت "مريم" وحملت الملف الذى يضم تصميماتها الخاصة بحملة الشركة  
وتوجهت الى مكتب "عماد"  
قال لها "عماد: "

-تعالى يا "مريم" اتفضلى

أقلت "مريم" نظرة على الرجل الجالس فقدمها "عماد" للرجال قائلاً:  
-الآنسة "مريم" الديزاينر المسؤولة عن حملة شركة حضرتك  
ثم نظر الى "مريم" قائلاً:

-الأستاذ "طارق عبد العزيز" مدير شركة ديبس  
قالت "مريم" بخفوت:

-أهلاً وسهلاً

نظر اليها الرجل قائلاً:

-اهلاً بيكي

أشار "عماد" لـ "مريم" قائلاً:

-اتفضلى اعدى يا "مريم"

جلست "مريم" فى المقعد المواجه لـ "طارق" .. الذى نظر اليها قائلاً:

-أولاً أنا آسف على التعديلات الكثير اللى طلبتها .. لان من البداية دى غلطتى

انى موضحتش اللى عايزه الطبط .. وعشان كده جيت بنفسى بدل مدير التسويق

لانى خفت ميقدرش يشرح اللى أنا عايزه بالطبط

قالت "مريم" بهدوء:

-مفيش مشكلة حضرتك

ثم أعطته الملف قائله:

-اتفضل حضرتك دى كل التصميمات الخاصة بالحملة عرفنى التعديلات تحديداً

وأنا هنفذها فوراً

دخلت فى تلك اللحظة "صفاء" قائله:

-أستاذ "عماد" .. فى عميل عايز يقابل حضرتك ضرورى

نظر "عماد" الى "مريم" قائلاً:

"-مريم" خدى أستاذ "طارق" وناقشوا التعديلات فى مكتبك

أومأت "مريم" برأسها وقالت لـ "طارق": "

-اتفضل معايا حضرتك

سار "طارق" خلفها .. ودخلا مكتبها .. رفعت الفتاتان رأسيهما لتنظران الى  
الرجل القادم .. جلس فى مواجهتها وقدمت له شئ يشربه وبدأ فى توضيح  
التعديلات التى يريدھا .. ثم قال:  
-أنا آسف مرة ثانية لو التعديلات كثير  
قالت "مريم" بهدوء وهى تتفحص ما كتبت:  
-مفيش مشكلة .. بس الموضوع هياخد وقت .. يعني ممكن اسبوع من دلوقتى  
.. لان عندى شغل تانى بخلصه  
قال "طارق" مبتسماً:  
-مفيش مشكلة هستنى كفاية انى تعبتك وعطلتك معايا  
نظرت اليه وقالت بجديه:  
-ان شاء الله هعرض على حضرتك التصميمات قبل ما نبعثها المطبعة  
تمعن فيها "طارق" قائلاً:  
-واضح انك مضايقه منى أوى  
قالت مندهشة:  
-لأ أبداً  
قال معترراً:  
-أنا بجد آسف انى تعبتك  
قالت بجديه:  
-مفيش مشكلة  
قام ليغادر فوق نظرة على "مى" فقال وكأنه يحاول أن يتذكر شيئاً:  
-احنا اتقابلنا قبل كده ؟  
قالت بارتباك:  
-أيوة أنا كنت نفذت لحضرتك حملة اعلانية من فترة طويلة  
قال وكأنه تذكر:  
-أيوة تمام افكرتك  
ضحك وهو ينظر الى الفتاتان قائلاً:  
-ووقتھا تعبتك معايا برده .. اظاهر انى طلعت عينكوا انتوا الاتنين  
ابتسمت "مى" قائله:  
-لا مفيش مشكلة .. احنا معرضين فى شغلنا للتعديلات اللى العميل بيطلبھا بعد

ما بيثوف التصميم

ابتسم قائلاً:

-شكراً لذوقكم .. مع السلامة

ردت "مى": "

-مع السلامة

بمجرد أن انصرف قالت "سهى": "

-يا ربي على الذوق والأدب والشياكة .. هو النوع ده تفصيل ولا جاهز ..

ومنشأه ايه بالضبط .. ده يتاكل أكل .. يا بختك يا "مريم"

نظرت اليها "مى" وهى تنفخ بحدة ثم عادت لتكمل عملها دون أن تلتفت اليها

.. وفعلت "مريم" مثلها بعدما رمتها بنظرة صارمة

خرجت "مريم" من الشركة بعد انتهاء عملها .. لفت نظرها "خالد" الذى أوقف

سيارته أمام العمارة فأكملت طريقها .. لكنه انتبه اليها فأوقفها قائلاً:

-آنسة "مريم" لو سمحتى

التفت اليه بضيق وهى تنظر للمارة حولها .. اقترب منها قائلاً:

-ازيك أخبارك ايه .. وأخبار حملتنا ايه

قالت بضيق:

-تمام الحمد لله .. وزى ما قولت لحضرتك ان شاء الله هعرض على حضرتك

التصميمات فى المعاد اللى اتفقنا عليه .. بعد اذنك

همت بالمغادرة لكنه اعترض طريقها قائلاً:

-أنا كنت جاي عشان شوية اضافات محتاج أضيفها فى الأعداد وحجم يفظ

الأوت دور .. بس طالما انتى هنا خلاص

أشار الى سيارته قائلاً:

-تعالى نروح أى مكان نتكلم فيه سوا وأوصلك فى طريقى

نظرت اليه بحدده قائله:

-آسفه مبركباش عربية حد .. بعد اذنك

همت بالمغادرة لكنه أمسك ذراعها يوقفها قائلاً:

-حيلك حيلك انتى بتتكملى معايا كده ليه

جذبت ذراعها من يده بعنف قائله بغضب:

-انت ازاي تسمح لنفسك تمسكنى كده .. ملكش عندى غير شغل وبس وأنا  
دلوقتي مش فى ساعات العمل بتاعتى  
نظر اليها بسخرية من رأسها الى أخمص قدمها قائلاً:  
-فى ايه .. اوعى تكونى شايفه نفسك حاجه .. أنا كل اللي قصدته انى اتكلم فى  
الشغل .. دماغك راحت فين هو انتى مبتشوفيش نفسك فى المرايه ولا ايه ..  
فكرانى هبص لوااحده لوكل زيك  
احمر وجهها من الغضب والتفتت تنصرف بدون أن ترد عليه .. كانت تشعر  
بالحنق والضيق لتلك الإهانة التى تعرضت لها .. ركبت فى المترو وهى تقاوم  
انهمار دموعها بصعوبة .. لكنها تركت لعبراتها العنان بعدما عادت الى بيتها ..  
وعزمت على اخبار "عماد" فى الصباح بقرارها بعدم رغبتها فى العمل على  
الحملة الدعائية لشركة "خالد"

\*\*\*\*\*

فى سكون الليل .. وفى احد الأماكن الهادئة التى تخلو من المارة .. وقف رجل  
ملثم ينظر يمينا ويساراً .. وهو متملماً قلقاً .. حتى رأى فتاة مقبلة فى اتجاهه  
وهى تنظر خلفها .. جذبها من ذراعها ووقفا خلف أحد الأبنية .. أنزل "جمال"  
الثام عن وجهه قائلاً:  
-حبيبتي وحشتيني جوى  
أزاح بيده الطرحة التى كانت تمسكها لتخفى بها نصف وجهها وقال:  
-وحشتيني جوى يا "صباح"  
ارتبكت "صباح" وقالت بخجل:  
-وانت كمان يا "جمال" وحشتنى جوى .. مكنتش عارفه آجى النهاردة خرجت  
بالعافية بعد ما أبويا نام  
نظر اليها محاولاً تقبيلها فابعدته قائله بحزن:  
-شوفت اللي صاير فينا يا "جمال" .. "ياسين" أخوى اتجتل  
قال "جمال" وهو يقترب منها أكثر:  
-معلش يا حبيبتي .. بكرة يمسكوا باللى جتله .. انتى وحشانى جوى جوى  
قبلها .. ثم أبعدته قائله:  
-أنا همشى لحدا يشوفنا ..

-هشوفك تانى امتى  
-ماعرفش .. هبجى أكلمك زى كل مرة .. يلا انا ماشية يا "جمال"  
مشت الفتاة وهى تلتفت خلفها وسارت فى طريقها الى منزلها .. فوجدت والدتها  
تقول:  
-كنتى فين يا "صباح"  
قالت بارتباك:  
-مكنتش فى حتى يامه .. كنت بتمشى شويه  
قالت أها بغضب:  
-فى الوجدت ده .. انتى اتجننتى فى عجبك يا "صباح" .. امشى انجرى على  
اوضتك جبر يلمك قليلة الربايه صحيح  
دخلت "صباح" غرفتها وأغلقت الباب بعصبيه ثم جلست على فراشها تتذكر  
مداعبات حبيبها "جمال" وتلك اللحظات التى اختلستها فى سكون الليل للالتقاء  
به.

## الفصل الرابع

قضت "مريم" ليلتها وهى تشعر بالألم والحزن بسبب الإهانة التى تعرضت لها  
من "خالد" .. وعزمت على ترك حملته تماماً .. توجهت "مريم" فى الصباح  
الى مكتب "عماد" وقالت له:  
-لو سمحت يا أستاذ "عماد" أنا مش حبه أمسك حملة شركة المقاولات  
نظر اليها "عماد" باستغراب قائلاً:  
-ليه ؟  
فكرت قليلاً ثم قالت:  
-يعني مش حبه وخلص .. ممكن أبدل الحملة دى مع أى حد من زمائلي وأخذ  
الشغل بتاعه  
صمت "عماد" قليلاً ثم قال:

-طيب .. بدلى مع "سهى" وخذى الحملة اللى هتبدأ فيها

شكرته قائله:

-شكراً يا أستاذ "عماد"

همت بالإصراف لكنه أوقفها قائلاً:

"-مريم"

-أيوة

نظر اليها متمعناً ثم قال:

-انتى كويسة

أومأت برأسها قائله:

-الحمد لله

ظل ينظر اليها قليلاً ثم قال:

-لو احتجتى لأى حاجة عرفينى

نظرت اليه بإمتنان وقالت:

-شكراً يا أستاذ "عماد"

خرجت وعينا "عماد" تتابعانها فى أسى .. ثم انكب على عمله.

قالت "مريم" لـ "سهى": "

"-سهى" أستاذ "عماد" قالى أبدل معاكى حملة شركة المقاولات بالحملة اللى

فى ايديكى

نظرت اليها كل من "مى" و "سهى" بدهشة .. قالت "سهى": "

-ليه .. اشمعنى

-مفيش هو قالى كده

-مفيش مشكلة هاتى الملف بتاع الحملة وخذى ملف حملتى أهو

بدأت "مريم" فى العمل على الحملة الجديدة .. وهى تحاول أن تتناسى كلمات

"خالد" الجارحة التى قالها لها بالأمس

\*\*\*\*\*

نظر "عثمان" الى أخته "صباح" التى وقفت تصفف شعرها أمام المرأة قائلاً:



-انتي مش هتبتلى وجوف جدام المرايه ولا ابيه .. جومى شوفى أمك  
وساعديها فى تحضير الوكل  
قالت بحنق:

-حاضر نازله

صاح قائلاً:

-يلا يا بت انجرى بلاش دلج وجلة حيا

صاحت قائله:

-هو أنى عملت ابيه يعني .. حاجة غريبة صحيح

صاح " عبد الرحمن " قائلاً:

-هو انتوا مش هتبتلوا خناج أبداً .. لازم كل يوم نسمع الخلق صوتنا

نزلت " صباح " وهى تتمتم بغضب .. جلس " عثمان " بجوار " أبيه على الأريكة

ساهماً .. ثم قال:

-تفتكر مين اللى عمل اكده يا بوى

تنهدت " عبد الرحمن " وقال:

-علمى علمك يا ولدى .. علمى علمك

ثم قال بأسى:

-فجدت ابنى "ياسين" ومن جبله "خيري" الله يرحمهم التتين

-الله يرحمهم

التفت " عثمان " الى أبيه قائلاً:

-لسه مفيش أخبار عن ولاد "خيري" خوى الله يرحمه

قال " عبد الرحمن " بألم:

-لا والله يا ولدى .. أنى ما خلّيت شئ إلا وعميلته .. أنى حتى مخبرش بجيله كام

ولد عايش .. أنى معرفش غير ان بنته ماتت معاه فى الحادثة .. والناس جالولى

انه مخلف غيرها .. لكن مخبرش ولاد ولا بنات عايشين ولا ميتين .. وين

أراضيهم مخبرش

قال " عثمان " بحزم:

-لازم نلاجيهم ونلم لحمنا يابوى

-ان شاء الله يا ولدى .. ان شاء الله هنلاجيهم ونجيبهم يعيشوا معانا انه

\*\*\*\*\*

تقدم رجل الى مكتب سكرتيرة "مراد" قائلاً:

-أنا مندوب جمعية رسالة وعندي معاد مع الأستاذ "مراد خيرى"

قالت له السكرتيرة:

-اتفضل استريح

قامت وتوجهت الى مكتب "مراد" لحظات وعادت وأشارت للرجل بالدخول قائله

:

-اتفضل

تقدم الرجل الى مكتب "مراد" الذى قام ليصافحه .. قائلاً:

-أهلاً بيك اتفضل اعد

قدم الرجل الكارنيه والبطاقة الى "مراد" قائلاً:

-أنا مندوب من جمعية رسالة .. أولاً أنا شاكر لحضرتك انك سمحتلى آخذ من

وقتك .. وآسف لو كنت هعطلك

قال له "مراد: "

-لا أبداً اتفضل

تحدث الرجل قائلاً:

-جمعية رسالة لو حضرتك مسمعتش عنها .. دى جمعية خيرية ليها أنشطة

كثير جداً .. اتأسست فى مصر سنة ١٩٩٩ .. بدأت كحركة طلابيه فى كلية

الهندسة .. وبعدين نشاطها وسع لما تم لتبرع بقطعة أرض فى فيصل وقدرنا

بمجهوداتنا اننا نشهر الجمعية .. وحالياً لينا أكثر من ٥٠ فرع فى جميع أنحاء

الجمهورية .. من نشاطاتنا .. مساعدات الأسر الفقيرة .. محو الأمية .. خدمات

للمكفوفين .. كفالة اليتيم .. رعاية الصم والبكم .. رعاية المعاقين ذهنياً ..

مستوصفات خيريه ..

صمت قليلاً ثم قال:

-وتوفير كراسى متحركة وأطراف صناعية للغير القادرين

أوماً "مراد" برأسه .. فتنحج الرجل قائلاً:

-يعنى أنا دائماً بشوف ان ميحسش بالناس دى غير اللى مر بظروفهم ..

وعشان كدة جيت لحضرتك النهاردة .. لو تحب تساهم معنا فى مساعدة الناس  
دى

أوما "مراد" برأسه ودون أن يتكلم أخرج دفتر شيكات من درج مكتبه وقلماً  
أنيقاً وذيل الشيك بتوقيعه وكتب مبلغاً اتسعت له ابتسامه الرجل وشكره بحراره  
وأعطاه وصلاً قائلاً:

-حقيقي متشكرين جداً يا أستاذ "مراد" .. وأنا كنت واثق من كرم اخلاقك ..  
ومتشكرين مرة ثانية

أوما "مراد" برأسه دون كلمه .. استأذن الرجل وانصرف .. شرد "مراد" قليلاً  
وعلامات الحزن على وجهه .. ثم ما لبث أن عاد الى الملفات التى أمامه واندمج  
فى عمله مرة أخرى

\*\*\*\*\*

توجهت "مريم" مع "مى" الى منزلها .. استقبلتها والدتها بترحاب شديد:

-ازيك يا "مريم" أخبارك ايه

ابتسمت "مريم" قائله:

-الحمد لله يا طنط ازى حضرتك

-بخير يا "مريم" الحمد لله

ثم التفتت الى "مى" قائله:

-يلا خدى صحبتك على أوضتك عمال ما أجهزلكوا الغدا

قالت "مريم" بحرج:

-معلش يا طنط تعبت حضرتك

ابتسمت والدة "مى" وقالت:

-لا يا حبيبتي أبداً مفيش تعب ولا حاجه

دخلت الفتاتان الى الغرفة .. قالت "مى":

-فكى الطرحة متخافيش بابا مش ببيجي دلوقتى

أومات "مريم" برأسها .. اقتربت منها "مى" وجلست بجوارها على السرير

قائله:

-حالك مش عاجبنى يا "مريم"  
حاولت "مريم" رسم ابتسامة على شفيتها قائله:  
-ليه مالى ما أنا كويسه أهو  
نظرت اليها "مى" بحزن وقالت:  
-لحد امتى هتفضلى عايشة لوحدك كده .. كده غلط عليكى يا "مريم" لا  
بتشوفى حد ولا بتتكلّمى مع حد .. أنا مش عارفه ازاي طايقه تعيشى فى البيت  
لوحدك

ظهرت سحابة حزن فى عينيها وقالت:  
-أعمل ايه قدرى كده  
قالت "مى" بحماس:  
-ما هو انتى لو تفكيها شوية .. يعنى "أشرف" كان شكله باين عليه انه عايز

.....

قاطعتها "مريم" بحدّه:  
-تانى يا "مى" .. مش قولتلك مش عايزة أتكلم فى موضوع "أشرف" ده  
قالت "مى" بحزم:  
-يعنى حضرتك ناوية تعيشى طول العمر لوحدك يعنى  
قالت "مى" بأسى:  
-ياريت أموت وأرتاح  
-ليه كده يا "مريم" .. ليه بتقولى كده  
قالت والعبرات فى عينيها:  
-تعرفى يا "مى" دى أكثر حاجه بتمناها .. او تعتبر الحاجة الوحيدة اللى  
بتمناها .. انى أموت وأرتاح .. أنا عايشة ليه أصلاً  
تنهدت "مى" قائله:

-استغفرى ربنا يا "مريم" .. انتى متعرفيش الخير فى  
تمت بصوت خافت:  
-أستغفر الله .. مش قصدى .. بس ساعات بيطلع منى كلام غصب عنى  
ابتسكت بضعف قائله:

-بس متخفيش عليا أنا كويسة .. كويسة أوى .. وبعدين خلاص أنا أخذت على  
الوحدة .. يعنى لما يكون لوحدى فى البيت مش يكون مضايقة .. خلاص أنا

اتعودت على كده

قالت ذلك ثم شردت .. راقبتها "مى" ثم أخرجتها من شرودها قائله:

-انتي ليه سبتي حملة شركة المقاولات

تنهدت "مريم" بحدة وكأنها لا تريد أن تتذكر ما حدث .. لكنها قصت على

"مى" ما دار بينها وبين "خالد" بالأمس .. هتفت "مى" قائله:

-ده انسان مش محترم وقليل الذوق .. ازاي يقولك كده

قالت بأسى:

-أهو ده اللي حصل .. كل ده عشان بقوله ازاي تمسك ايدي كده

التفتت الى "مى" وقالت بغضب:

-كان ماسكنى من دراعى فى وسط الشارع .. عادى ولا أكن فى حاجه غلط

بيعملها .. لا والبشمهندس كان عايزنى أركب عربيته ونعد فى مكان نتكلم فى

الشغل .. حاجه هم صحيح

-سيبك منه .. وأحسن انك سبتي الحملة بتاعته .. بلاش حرقة دم الواحد مش

ناقص الأشكال دى كمان

-مرضتش طبعاً أقول لأستاذ "عماد" على اللي حصل .. اتخرجت جداً أقوله

الكلام اللي قالهولى .. وهو بصراحة كان ذوق أوى ووافق على طول انى أبدل

مع "سهى" الحملة اللي هى مسكاها

ابتسمت "مى" قائله:

"-عماد" طول عمره ذوق ومحترم

قالت "مريم" بسرعة:

-جداً .. محترم جداً .. من الرجالة القليين اللي تقابليهم فى حياتك وتحسى فعلاً

انهم ناس محترمة .. كفاية انه مش بيرضى يعمل حاجات غلط فى شغله رغم انه

ممكن يكسب أضعاف أضعاف ما بيكسب .. لكنه مانع تماماً صور البنات على

التصاميم أو صورة أى حاجة حرام .. وبيرضاش يعمل حملات دعائية لأى مكان

فيه رقص أو خمرة أو أى حاجة حرام .. بجد ربنا يباركله

قالت "مى" بخبث:

-فينه ييجى يسمع الكلام اللي بيتقال عنه

نظرت اليها "مريم" بحدته قائله:

"-مى" مفيش داعى للكلام ده .. انتى فاهمة انى بتكلم عادى ومش فى نيتى

حاجه

هتفت "مى" قائله:

-ماهو المصيبة ان مفيش فى نيتك حاجه .. نفسي مرة أشوفلك نيه مش كويسة

ضحكت "مريم" قائله:

-انتى فظيعة على فكرة

-أنا فظيعة أmaal انتى تبقى ايه .. أنا مش عارفه مستحلامكى ليه

ابتسمت "مريم":

-عشان صحبتى وبتحبينى وعارفه ان أنا كمان بحبك أوى

بادلتها "مى" الابتسام قائله:

-ماشى يا ستى غلبتيني المرة دى

ثم نهضت قائله:

-أما أشوف الحجة دى اتأخرت فى الأكل كده ليه

توجهت "مى" الى المطبخ لمساعدة والدتها .. وقالت لها:

-متحرمش منك يا ماما

ابتسمت أمها قائله:

-ده مش عشانك ده عشان "مريم"

-ربنا يكرمك انك سمعتى كلامى ووافقتى نعزمها

قالت أمها بحزن:

-دى بنت غلبانه ربنا يصلح حالها والله قلبى بيتقطع عليها .. ربنا يرزقها بابن

الحلال اللى يعوضها

ثم التفتت الى "مى" قائله:

-هى لسه عايشة لوحدها

قالت "مى":

-أيوة هتعيش مع مين يعني .. ملهاش حد تعيش معاه

-ولا حتى أهل أبوها أو أهل أمها .. يعني ملهاش أعمام خيلان خالات

-لأ ملهاش حد خالص .. أهل مامتها ميتين ومامتها كانت البنت الوحيدة ليهم ..

وأهل باباها مش عايشين هنا

قالت أمها بسرعة:

-طيب يلا شيلي الأكل معايا نخطه على السفرة .. اتأخرنا فى الغدا أوى وعندنا

ضيفه ميصحش

التف ثلاثتهم حول طاولة الطعام .. قالت والدة "مى": "

"-مريم" حبيبتي كلى مبتاكليش ليه

ابتسمت لها "مريم" بخجل قائله:

-باكل يا طنط

هتفت الأم:

-ده أكل عصافير يا بنتى .. كلى كويس يا حبيبتي ولا مكسوفة انتى زى "مى"

بنتى

-لأ أبدأ يا طنط مش مكسوفة .. بس أنا أكلى كده

-لا يا حبيبتي كده مينفعش لازم تاخدى بالك من أكلك وصحتك

هتفت "مى": "

-قوليلها يا ماما بدل ماهى بقت عاملة زى ستى الحجة كده

عاتبها أمها قائله:

-تؤ عيب يا "مى" متضايقيهاش

ثم التفتت الى "مريم" قائله بحنان:

-يلا يا حبيبتي كلى

نظرت اليها "مريم" بأسف قائله:

-معلش يا طنط بس بجد شبعت

-حبيبتي انتى مكلتيش حاجه

-والله يا طنط شبعت فعلاً .. تسلم ايدك الأكل حلو أوى

تنهدت قالت الأم فى استسلام:

-طيب قومى يا حبيبتي اغسلى ايديكي الحمام فاضى

قامت "مريم" فنظرت أم "مى" اليها وقالت بحزن:

-البنيت دى وجعالى قلبي أوى

-أنا كمان مضايقة عشانها

قالت أمها مستفهمة:

-هو مفيش حد اتقدملها قريب

هتفت "مى" بصوت منخفض:

-وهى أصلاً مديه لحد فرصة .. وانتى فكرك ان حتى لو حد اتقدم هى هتوافق ..

مستحيل توافق

قالت الأم بإستغراب:

-يعني هتعيش طول عمرها لوحدها كدة .. لو كان لها أهل كنا قولنا أهى فى بيت أهلها .. لكن دى عايشة لوحدها .. والناس مبترحمش قالت "مى" بثقة:

-مستحيل "مريم" تفكر فى راجل تانى غير "ماجد" .. مستحيل قالت أمها:

-بس "ماجد....."

قطعت كلامها عندما أتت "مريم" من الداخل .. جلست الفتاتان لتجاذب أطراف الحديث .. حاولت "مى" اضعاء جو من المرح لتخرج "مريم" من قوقعة الأحزان التى حاوطتها من كل جانب

\*\*\*\*\*

كان "مراد" فى طريقه الى بيته عندما أوقف سيارته أمام احدى الإشارات فى انتظار أن يُفتح الطريق .. التفت الى الجانب ليجد شاباً يتحدث الى فتاة توليه ظهرها .. كانت الفتاة ترتدى بدى ضيق للغاية على بنطلون سكينى التصق بجسمها تماماً حتى ظهرت كل تفاصيله واضحة للعيان .. كان من الواضح أن الفتاة متضايقه من حديث الشاب .. لكنه ظل يلف ويدور حولها .. التفتت اليه لتحدثه بحده .. لكنه ظل يضايقها حتى تطاول عليها بيده .. انتفض "مراد" وخرج من سيارته مسرعاً .. وتوجه الى الشاب وجذبه من ملابسه وقال بغضب :

-لم نفسك يله .. لو انت مش متربي وملقتش حد يربيك أنا أعرف ازاي أربيك نظر اليه الفتى فى دهشة وصاح:

-وانت مالك ومالى أنا كلمتك

لكمه "مراد" فى كتفه بقبضة يده قائلاً بغضب هادر:

-بتمد ايدك على واحده فى الشارع وأدام الناس عينى عينك كده .. ليه .. فاكرو ان البلد دى مفيهاش رجاله

تجمع المارة وحاولوا تهدئة "مراد" الذى يبدو وكأنه قد استشاط غضباً .. فقال



الفتى بخوف:

-خلاص محصلش حاجه .. أنا آسف

قال "مراد" بغضب بالغ:

-امشى من أدامى دلوقتى بدل ما أشلفطك وشك

شعر "الفتى بالخوف من نظرات "مراد" النارية وتعبيرات الغضب التى حولته

الى وحش كاسر يكاد أن يفتك بالفتى .. رحل الفتى وهم "مراد" بأنه يتوجه الى

سيارته التى تسد الطريق فوقفت الفتاة أمامه قائله:

-ميرسى أوى لحضرتك على اللى انت عملته عشانى

نظر اليها "مراد" بإحتقار قائلاً بحدده:

-ماهو العيب مش عليكي .. العيب على الراجل اللى سابك تنزلى من بيته

بالمنظر ده .. واللى المفروض ميتقالش عليه راجل أصلاً

تركها وتوجه الى سيارته وقد اشتعلت وجنتاها من الخجل.

\*\*\*\*\*

جلس "حامد" فى بيته يشاهد احدى قنوات الرقص .. وصوت التلفاز يكاد يصم

الأذان .. عندما رن جرس الباب .. توجه ليفتحه فوجد أمامه امرأة تكشف من

جسدها أكثر مما تستر .. نظرت اليه بحدده قائله:

-مفاجأة مش كدة

ظهرت عليه علامات الغضب وترك الباب مفتوح ودخل وعاد الى مكانه فوق

الأريكة .. دخلت وأغلقت الباب ووقفت تنقل بصرها من التلفاز اليه وقالت:

-ممكن لو سمحت نتكلم شوية

قال بلامبالاه:

-مفيش حاجة نتكلم فيها

أمسك الريموت غاضبة وأغلقت التلفاز بعصبية وقالت:

-لأ فى يا "حامد"

وقف وقال لها بغضب:

-انتى عايزه ايه يا "هايدى" بالظبط فى ليلتك اللى مش فايته دى

صاحب بغضب هى الأخرى:

-عايزه نتكلم فى المصيبة اللى أنا فيها دى

قال ببرود:

-اديكى قولتى المصيبة اللى انتى فيها .. انا دخلى ايه بأه  
هتفت قائله:

-لا انت لىك ولىك كمان .. مش انت السبب .. ولا أنا حملت لوحدى  
صاح بسخرية:

-وأنا مضربتكيش على ايدك يا "هايدى" .. ومحدث قالك بتقى غبية  
ومتعمليش حسابك عشان حاجه زى كده متحصلش  
قالت بتوتر بالغ:

-يعني ايه يا "حامد" اتصرف ازاي دلوقتى .. وايه اللى يمنع اننا نتجوز  
صاح ضاحكاً:

-ايه ؟ .. سمعيني تانى كده .. نتجوز .. ليه شيفانى عيل برياله هتعرفى  
تضحكى عليه بكلمتين .. أنا مش بتاع جواز يا كتكوته .. وانتى عارفه كده من  
الأول

قالت وهى تبكى:

-بس أنا دلوقتى فى مصيبة

قال ببرود:

-اتصرفى عندك مليون طريقة تنزلى بيها اللى فى بطنك  
ازداد بكائها قائله:

-بس أنا خايفه يا "حامد" .. خايفة يجراالى حاجه  
زفر بضيق وصاح بحده:

-بقولك ايه بطلى قلة مزاج على المسا .. روحى شوفى هتتصرفى فى مصيبتك  
دى ازاي وحلى عن سمايا  
نظرت اليه باحتقار قائله:

-مكنتش أعرف انك حقير للدرجة دى

قال بسخرية:

-وآديكى عرفتى .. يلا بأه الباب يفوت جمل

جلس مكانه على الأريكة وأعاد تشغيل التلفاز مرة أخرى .. فتوجهت "هايدى"  
بانكسار الى الباب وفتحته وخرجت

\*\*\*\*\*

بعد عدة أيام "طارق" الى مكتب الدعاية .. ودلف الى مكتب "مريم" قائلاً:  
-ازيك يا آنسه "مريم"

نظر اليه الثلاث فتيات .. أومأت "مريم" برأسها قائله:  
-الحمد لله .. اتفضل يا فندم

جلس "طارق" فى مواجهتها ووجهت شاشة الحاسب تجاهه لتريه التصميمات  
قبل طبعها .. قال لها مبتسماً:  
-شغلك ممتاز فعلاً .. والتعديلات زى ما طلبتها بالظبط .. شكك فعلاً بروفيشنال  
شكرته قائله:

-شكراً لذوق حضرتك

تمعن فى وجهها قائلاً:

-انتى مضايقة منى فى حاجه

نظرت اليه فى دهشة وقالت:

-لا

قال باستغراب:

-أمال ليه بتتكلمى معايا ناشف كده .. أنا اعتذرتك المرة اللى فاتت عن تعبك  
معايا فى الحملة وأكد هراعى ده لما آجى أدفع الدفعة الثانية من الفلوس  
قالت بجديه:

-أنا مش مضايقه من حضرتك فى حاجه .. وأنا مش قصدى أتكلم ناشف بس  
دى طريقتى وده اسلوبى

ثم عادت تنظر الى الحاسوب قائله:

-ان شاء الله التصميمات هتدخل المطبعه من بكرة .. وخلال ٣ أيام بالظبط  
هتكون كل حاجة جاهزة وتقدر حضرتك تستلمهم فى أى وقت  
وقف قائلاً:

-تمام أوى .. حابب أتكلم مع أستاذ "عماد" شوية .. متعرفيش هو فى مكتبه  
ولا لا

نظرت اليه قائله:

-لا معرفش .. تقدر حضرتك تسأل السكرتيره

أوما برأسه قائلاً:  
-تمام .. ومتشكر مرة ثانية

بعد ربع ساعة .. قامت "مريم" وحملت حقيبتها قائله:  
-سلام بأه أنا ماشية

قالت "مى" دون أن ترفع عينيها عن حاسوبها:

-سلام يا "مريم"

سألته "مريم":

-مش هتروحي

قالت "مى" بحنق:

-شوية كده .. لسه عندي شغل

قالت وهي تتوجه الى الباب:

-طيب سلام أشوفك بكرة

خرجت "مريم" من باب العمارة لتجد "خالد" يقوم بركن سيارته .. شعرت بالضيق من تلك الصدفة التي جمعتها به ثانياً .. حاولت السير فى طريقها .. لكنه رآها وأقبل عليها يوقفها قائلاً بغضب:

-بأه حته بتاعه زيك ترفض تمسكى الحملة بتاعتي .. ليه فاكهه نفسك مين ..

انتى متعرفيش أنا مين ولا ايه يا بت انتى

نظرت اليه بحده ائله:

-مسمحكش تتكلم معايا بالإسلوب ده

قال بسخريه:

-نعم .. متسمحيليش .. هو أنا محتاج اذنك .. أنا حالا هطلع لمديرك وأخليه

يشوف شغله معاكى .. عشان تعرفى ازاي تبقى محترمة وازاي تتكلمي مع

الناس المحترمة

قالت بصرامة:

-أنا محترمة غصب عنك .. ومش محتاجة حد يعلمنى ازاي أبقي محترمة

استشاط غضباً وقال:

-انتى ازاي تتكلمى معايا كده .. انتى اتجننتى فى عقلك

سمع "طارق" جزء من الحوار عندما خرج من بوابة العمارة وهم بالتوجه الى

سيارته لكن صوت الصراخ جذب انتباهه واسمع الى جزء من الحوار واقترب  
منهما قائلاً:

-في حاجه يا آنسه "مريم"

نظر اليه "خالد" قائلاً:

-انت مين انت كمان .. متخليك في حالك

همت "مريم" بالمغادرة لكن "خالد" وقف أمامها قائلاً:

-استنى أنا لسه مخلصتش كلامي

قالت بصرامة:

-وأنا معنديش استعداد أسمع منك حرف واحد .. عندك مشكلة اعرضها على

أستاذ "عماد" ومتضطرنيش أتصرف معاك تصرف ميعجبكش

صاح غاضباً:

-انتى فعلا اتجننتى فى عقلك .. انتى فاكرة نفسك مين يا بنت انتى ما تفوقى

لنفسك

وقف "طارق" فى وجهه قائلاً:

-لأ لحد كدة وكفاية .. ازاي تتكلم معاها كده

التفت اليه "خالد" قائلاً:

-وانت مالك انت .. مالك وملها

قال "طارق" بحزم:

-انا خطيبها عندك اعتراض .. يلا اتفضل امشى

شعرت "مريم" بالدهشة لادعائه بأنها خطيبته .. لكن كان هذا كفيل بأن يرحل

"خالد" وهو يرمقها بنظرات غيظ .. همت "مريم" بالمغادرة لكن "طارق"

أوقفها قائلاً:

-هو بيضايقك ليه

قالت بتوتر:

-عشان رفضت أمسك الحملة الإعلانية بتاعة شركته

نظر اليها مستفهماً:

-ورفضتى ليه

قالت بإقتصاب:

-عشان انسان مش محترم

ثم قالت دون أن تنظر اليه:

-بعد اذنك

أوقفها قائلاً:

-طيب تعالى اتفضلى معايا وأنا أوصلك

وجهت اليه نظرات نارية لكنها حافظت على هدوء صوتها قائله:

-آسفة مبركباش مع حد .. بعد اذنك

انصرفت "مريم" فى طريقها وعينا "طارق" تتابعانها لفترة ثم ركب سيارته

وانطلق فى طريقه

\*\*\*\*\*

جلست "مريم" كالعادة على الأريكة أمام التلفاز دون أن ترى حقاً ما يتم عرضه

أمامها .. كانت فى عالم آخر .. تلقى نظرة كل فترة على الساعة المعلقة على

الحائط .. وكالعادة تأهبت عندما اقتربت الساعة من الثانية عشر بعد منتصف

الليل .. وتوجهت الى حقيبة الرسائل وأخذت تبحث عن الخطاب الذى يحمل رقم

٥٤ ..دقت الساعة لتعلن الوقت الثانية عشر فتحت الخطاب بلهفة وشغف ..

وعيناها تلمعان وبسمة صغيره على شفيتها .. قرأت بعينها وقلبها وروحها:

-حبيبتي "مريم" .. كيف أنتِ الآن .. أهتمين بنفسك حبيبتي .. أم عدت الى

اهمال نفسك وطعامك مرة اخرى .. أعلم أنك لا ترفضين لى طلباً ولا تعصين لى

أمراً ..لذلك إن كنتى تحبيننى بالفعل فستهتمين بنفسك أكثر .. كيف حالك مع الله

..أتواظبين على قراءة وردك أم تتكاسلين .. أعرف جيداً أن حبيبتي لا تتكاسل

عن فعل الخير .. لكنى أذكرك فحسب .. لا تقطعين خيراً تفعليه .. وارمى سهماً

فى كل خير تجديه .. حبيبتي طلبى هذا الإسبوع هو زيارة صغيرة منك الى

والدتى .. التى أشفق عليها وعلى حالها .. أعلم أنها زيارة لا تفيد .. لكنى أريدك

أن تقومى بها .. من أجلى يا "مريم" .. حبيبك : ماجد

ضمت الجواب الى صدرها واستنشقتة لعلها تجد رائحة "ماجد" وقد علقته به ..

ثم أضافته الى باقى الخطابات فى درج الكمودينو .. أنهت قراءة وردها ووضعت

المصحف بجوارها وأغلقت النور .. ظلت شاردة قليلاً .. وعزمت فى الصباح

على تنفيذ ما طلبه منها "ماجد" .. زيارة والدته التى تعيش فى أحد دور

## المسنين.

\*\*\*\*\*

حاول "مراد" النوم لكنه شعر بالأرق ففتح الشرفة ووقف فيها .. همت والدته  
بغلق شباك غرفتها عندما رأته .. فتوجهت الى غرفته وطرقت الباب .. فتح لها  
"مراد" ودعاها للدخول .. قالت:

-شوفتك من شباك أوضتى عرفت انك صاحى

-مش جايلى نوم

جلست أمه على أريكة فى الغرفة وجلس بجوارها قائلاً:

-عمتو عامله ايه دلوقتى

نظرت اليه بتمعن قائله:

-كويسة .. بس مش هى اللى قلقتانى

قال بقلق:

"-سارة" و "نرمين" كويسين

قالت بنبرة ذات معنى:

-أيوة كويسين بس انت اللى مش كويس يا "مراد"

قال "مراد" بهدوء:

-ليه مش كويس ليه ما أنا زى الفل أهو

نظرت اليه أمه بعتاب قائله:

-مش ناوى تفرحنى يا "مراد" و تتجوز وأشوف ولادك وأطمن عليك قبل ما

أموت

قال "مراد" على الفور:

-ربنا يبارك فى صحتك وفى عمرك يا أمى

قالت بإصرار:

-رد على سؤالى .. ناوى تتجوز امتى .. ناوى تفرحنى بيك امتى

قال "مراد" بضيق:

-أمى لو سمحتى مش حابب أتكلم فى الموضوع ده

قالت أمه بحده:

-يعنى ايه مش حابب .. انت هتفضل دافن نفسك بالحيا كده لحد امتى .. مفيش

فى حياتك غير شغل وبس

قام "مراد" بعصبيه وقال:

-وأنا مش حابب يكون فى حياتى غير الشغل وبس

نهضت ووقفت فى مواجهته قائله:

-لأ .. أنا مش ممكن أسمحك تضيع شبابك كده

قال "مراد" بنفاذ صبر:

-أنا مبسوط كده

هتفت أمه:

-بس أنا مش مبسوطة يا "مراد" .. ولا انت مبسوط .. ده أنا حتى مبشوفكش

بتبتسم .. انت مفيش حاجه بتعملها ولا بتفكر فيها غير شغلك .. حياتك فاضية يا

"مراد"

قال "مراد" بحزم:

-لأ مش فاضية انتى و"سارة" و "نرمين" وعمتو ملينها عليا

قالت أمه بحدده:

"-مراد" .. دور على عروسه .. ولو مش لاقى قولى وأنا أدورك .. عايزه

أشوفك متجوز يا "مراد" وعندك بيت واسرة

قال "مراد" بمرارة:

-ما أنا اتجوزت يا أمى .. اتجوزت

رقت ملامح أمه وقالت بحزن:

-مش كل البنات يا ابنى زى.....

قاطعها قانلاً بعنف:

-لأ كلهم زى بعض .. ميفرقوش حاجة عن بعض .. كلهم عينه واحده .. وأنا

مش ممكن أذل نفسى لواحد فى فيهم .. ولا يبقى لآى ست تأثير عليا

قتربت أمه منه تحاول تهدئته فقال بحدده:

-لو سمحتى يا أمى .. متفتحيش الموضوع ده تانى معايا .. أنا مش هتجوز أبداً

.. مهما قولتى ومهما عملتى .. وده قرارى ومش ممكن أخيره أبداً

نظرت اليه أمه بأسى وأستسلام .. ثم غادرت الغرفة فى صمت .. جلس

"مراد" على فراشه وهو يغطى وجهه بكفيه ثم قام ودخل الشرفة مرة أخرى

وجلس على أحد المقاعد شاردأ .. فى ظلمة الليل البهيم.



## الفصل الخامس

استيقظت "مريم" فى الصباح التالى وقد عازمت على زيارة والدة "ماجد" كما طلب منها فى خطابه الذى قرأته بالأمس .. خرجت وركبت المترو كالعادة وتوجهت الى أحد دور المسنين .. دخلت غرفة والدة "ماجد" لتجدها مستلقية على فراشها تنظر الى سقف الغرفة فى صمت .. شعرت بالألم يغزو قلبها وهى تراها على هذه الحالة .. اقتربت منها .. لم تحرك المرأة ساكناً .. لم تنظر حتى اليها .. ظلت تنظر الى سقف الغرفة وكأنها لا تعى ما يدور حولها .. اقتربت منها "مريم" أكثر ومسحت بكفها على رأسها .. والعبرات تترقرق فى عينيها لحال المرأة النائمة على الفراش أمامها .. اقتربت منها احدى العاملات بالدار .. فالتفتت اليها "مريم" قائلة:  
-هى عاملة ايه دلوقتى ؟

قالت العاملة فى اسف:

-زى ما انتى شايفه .. مبتتكلمش ولا بتستجيب لأى علاج

قالت "مريم" بحزن:

-مواظبين على العلاج بتاعها

-أيوة من يوم ماجت واحنا بنهتم بيها وبحالتها .. ودكتور الدار كمان مهتم بيها لانها صعبانه عليه .. بس اظاهر انها هتقضى باقى أيامها وهى كده .. لانه بيقول

انها مبتستجيبش للعلاج نهائى

ألقت عليها "مريم" نظرة متألّمه ثم التفتت للمرأة قائلة:

-طيب ورجلها

-برده يا بنتى لسه ما بتقدرش تمشى عليها .. لا بتتكلم ولا حتى بتتحرك من

مكانها .. ربنا يكون فى عونها

جلست "مريم" قبالتها على الفراش وتحدثت اليها قائلة:

-ماما .. ازي صحتك .. انتى مش عارفانى .. أنا "مريم"

لم تجد أى استجابة من المرأة .. فأنحنت عليها تقبل رأسها وملامح الألم  
مرسومة على وجهها ثم توجهت "مريم" الى غرفة مديرة الدار وقالت لها:  
-مينفعش أخذها تعيش معايا

قالت مديرة الدار:

-لو خدتها يبأه تخلى بالك انها محتاج معاملة خاصة .. واهتمام ٢٤ ساعة  
لأنها مبتقدرش تعمل أى حاجة لنفسها .. انتى متفرغة  
قالت "مريم" بأسف:

-لأ بشتغل .. وللأسف مضطرة أشتغل

قالت مديرة الدار:

-يبقى مش هتعرفى تهتمى بيها يا بنتى .. مينفعش تتساب لوحدها .. لازم  
مرافق ليها ٢٤ ساعة .. من رأى خليها هنا أفضل .. لأنك مش هتعرفى تهتمى  
بيها الإهتمام المطلوب

قالت "مريم" بألم:

-طيب وحالتها الصحية .. مش ممكن تتحسن

-والله ده علمه عند ربنا .. بس هى مفيش عندها أى استجابة للعلاج .. ولا  
بتتفاعل حتى مع غيرها من المقيمين هنا .. ولا بتحاول حتى تتفاعل معاهم ..  
على طول لوحدها .. هى سامعة وشايفة كل حاجة .. بس مفيش استجابة ..  
واضح ان صدمتها كانت شديدة أوى

شكرها "مريم" ونهضت بأسى .. خرجت من الدار وهى تحاول أن تغالب  
دموعها التى انهمرت من عينيها رغماً عنها

\*\*\*\*\*

دخلت "سهى" مكتب سكرتيرة "خالد" وقالت لها:

-أنا عندى معاد دلوقتى مع البشمةهندس "خالد"

بعد عدة دقائق أدخلتها السكرتيرة .. توجهت الى مكتب "خالد" مبتسمة وقالت:

-ازي حضرتك يا بشمةهندس

قال ببرود:

-الحمد لله اتفضللى

جلست وأخرجت ملفاً من حقيبتها وقالت:

-أستاذ " عماد " قالى آجى لحضرتك وأشوف تفاصيل الشغل اللى حضرتك عايزه

قال بنبرة متعالية:

-أيوة لانى مش هاجى شركتكو تانى.. يعد كدة حد منكوا هو اللى يجيلى هنا وأشرحله اللى أنا عايزه .. لان اظاهر انكوا مبتعرفوش تختاروا الناس اللى بتشتغل فى الشركة .. وأنا لولا سمعتكوا فى السوق وجودة شغلكووا أنا مكنتش اتعاملت معاكوا تانى

ابتسمت "سهى" قوالت:

-أنا مش عارفه حضرتك مضايق مننا ليه .. بس عامة أنا واثقه ان حضرتك مش هتضايق من شغلك معايا ثم ضحكت قائله:

-هى "مريم" معلىش قفل شوية فمممكن يكون ده ضايقتك قال بهدوء:

-دى مش قفل .. دى قليلة الأدب ابتسمت قائله:

-معلىش يا بشمهندس حقك علينا .. وان شاء الله هعملك أحسن من الشغل اللى كانت هتعمله "مريم"

ابتسم قائلاً:  
-أما نشوف

\*\*\*\*\*

جلس الأربعة رجال معاً على طاولة الإجتماعات فبدأ "طارق" فى الحديث قائلاً:

-أنا شايف ان هى دى مواصفات المنتج اللى احنا عاوزينه أخذ الجميع يتفحص ما أمامهم من قطع ملابس .. قال "سامر":  
-أنا كمان رأيي كدة يا "طارق" وكمان دراسة الجدوى اللى عملناها بتقول ان الأرباح هتكون مضمونة ان شاء الله  
قال "حامد": "

-يعني رغم انى لسه عند رأيي الأولانى اننا نريح دماغنا ونشتغل للطبقة الراقية  
.. بس دراسة الجدوى اللى اتعملت شجعتنى بصراحة .. وأنا شايف زيكوا ان  
المنتج ممتاز زى ما احنا عايزين  
التفت "طارق" الى "مراد" قائلاً:  
-وانت يا "مراد" ايه رأيك  
قال "مراد": "

-ممتاز يا "طارق" .. بس معلى لازم نهتم بالفينيشينج أكثر من كدة  
قال "حامد" بسخرية:

-أكثر من كدة ايه يابنى أنا شايف انه مناسب للطبقة المتوسطة دى .. يعني  
كويس أصلاً اننا بنقدم لهم منتج بالجودة دى والسعر ده  
قال "مراد" بحزم:

-يا نشتغل صح يا منشتغلش .. وأنا بحب أهتم بالتفاصيل الدقيقة دى ..  
الفينيشينج كويس بس لازم يكون أفضل من كدة  
قال "طارق": "

-خلاص مفيش مشكلة نهتم بالفينيشينج أكثر .. وأنا هبلغهم كدة فى المصنع ..  
بس مبدأياً أنا شايف انه كله تمام  
قال "سامر" مستفهماً:

-مش المفروض نبتدى الدعاية .. يعني مش عايزين نتأخر لان الأيام اللى جاية  
موسم وعايزين نستغلها  
أوماً "مراد" برأسها قائلاً:

-فعلاً معاك حق يا "سامر" .. أنا هتكلم مع مدير شركة الدعاية اللى بتعامل  
معاها ونبدأ فوراً ان شاء الله  
قال "طارق": "

-لأ أنا أعرف شركة كويسة وتعاملهم ممتاز ومواعيدهم مطبوعة  
التفت اليه "مراد" قائلاً:

-شركة ايه ؟

-اسمها رؤية

فكر "مراد" قليلاً ثم قال:

-مسمعتش عنهم قبل كدة

أخرج "طارق" من حقييته أحد الملفات وأعطاهما الى "مراد" قائلاً:

-دى تصميمات الدعاية اللى عملتها عندهم لشركتى

أخذ "مراد" الملف يتفحصه .. ثم قال مستفهماً:

-أخذ منهم وقت أد ايه الشغل ده ؟

قال "طارق" مبتسماً:

-اسبوع

قال "مراد" بدهشة:

-اسبوع .. فترة صغيرة جدا على شغل عالى زى ده

-أيوة الديزاينر الى عملته واضح انها مجتهدة جداً

قال "سامر" مندهشاً:

-فعلاً الشغل ممتاز فى وقت قياسى

قال "مراد" بإعجاب وهو مازال يتفحص التصميمات التى أمامه:

-تنسيق التصميم ممتاز ومكان اللوجو والألوان نفسها والفونت .. بصراحة

شغل عالى جداً

ثم التفت الى "طارق" قائلاً:

-وجودة التصاميم بعد التنفيذ

قال "طارق": "

-لسه مستلمتش الشغل بعد يومين هستلمه ان شاء الله بس أنا اتعاملت معاهم

قبل كدة من كذا سنة وخامات الورق كانت ممتازة

قال "مراد" بإهتمام:

-طيب تمام يبقى هاتلى رقمهم أو قولى عنوانهم وأنا هتواصل معاهم

صمت "طارق" قليلاً ثم قال:

-كدة كدة أنا بتعامل معاهم .. سبنى أنا اتفق معاهم على الحملة بتاعة شراكتنا ..

وعامة احنا الاتنين ذوقنا فى الشغل واحد

قال "حامد" ساخراً:

-وأنا و "سامر" ملناش رأي فى القصة دى ولا ايه

التفت اليه "سامر" وهو ينظر الى التصميمات قائلاً:

-ديزاينر زى دي تسلمها نفسك وانت مطمئن .. بجد شغلها راقى جداً

التفت الى "طارق" قائلاً:

-اسمها ايه يا "طارق"

نظر اليه "طارق" قائلاً:

"-مريم"

لوك "سامر" الاسم فى لسانه قائلاً:

"-مريم" .. بس ليه مش ماضيه على التصميمات باسمها

هز "طارق" كتفيه قائلاً:

-معرفش بس أكيد عشان بتشتغل تبع شركة دعاية فالامضاء بتكون باسم

الشركة مش باسمها هي

قال "سامر" بحماس:

- على فكرة لو اشتغلت لوحدها هتعمل اسم جامد

قاطعهم "مراد" وهو يقف قائلاً:

-خلاص زى ما اتفقنا .. "طارق" اهتم بموضوع الفينيشينج والحملة .. سلام

أنا راجع المكتب عشان عندي معاد دلوقتى

خرج "مراد" فهتف "حامد" قائلاً:

-الراجل ده مبيريحش نفسه أبداً .. ده ماكنة شغل

قال "سامر" وهو ينهض:

-وعشان كدة دماغه جامدة فى الشغل .. وتدخل معاه أى مشروع وانت مطمئن ..

يلا سلام يا شباب

قال له "حامد" مبتسماً:

-امتى افتتاح الجاليري بتاعك

ابتسم "سامر" قائلاً:

-يعني لسه شوية .. بظبط فيه .. بس قريب أكيد

قال "طارق" مبتسماً بحماس:

-ايه ده أخيراً نويت تعرض أعمالك على الناس

قال "سامر": "

-أيوة يا سيدى خلاص نفذت الفكرة اللي كنت بأجل فيها

قال "طارق" مشجعاً ايه:

-متقلقش يا "سامر" ان شاء الله هينجح نجاح كبير لانك فنان موهوب

قال "حامد" ساخراً:

-آه موهوب أوى هتقولى على مواهبه  
التفت اليه "سامر" بحدده:  
-هو انت مبتعرفش تقول كلمة كويسة أبداً .. كل كلامك سخريه كده  
نهض "حامد" وتوجه الى الباب قائلاً:  
-سيبنالكوا انتوا الكلام الحلو .. يلا سلام أنا كمان مش فاضيلكوا

\*\*\*\*\*

اقتربت "مى" من "مريم" الجالسه على مكتبها وقالت:  
-ايه اللى حصل امبارح ؟  
نظرت اليها "مريم" بدهشة وقالت:  
-مش فاهمة .. ايه اللى حصل فى ايه  
أقلت "مى" نظرة على "سهى" المندمجة فى عملها وقالت ل "مريم" بخفوت  
:

-نزلت امبارح بعدك على طول أجيب حاجة من السوبر ماركت اللى آدم العماره  
..لقيتك واقفة مع الأستاذ "طارق" بتتكلما وبعدين سبتيه ومشيتي  
قالت "مريم" وهى تضرب بأصابعها فوق لوحة المفاتيح:  
-مفيش اللى اسمه "خالد" ده وقفنى وكان بيغتن عليا .. فجه أستاذ "طارق"  
يشوف فى ايه  
نظرت اليها "مى" وقالت بإهتمام:  
-قالك ايه يعني

قالت "مريم" بنفاد صبر وهى تنظر اليها:  
-ما قاليش حاجه يا "مى" هيقولى ايه يعني سأل بس هو فى ايه .. واللى اسمه  
"خالد" ده عمال بيتغابي فى الكلام فأستاذ "طارق" حاشه عنى واضطر يقوله  
انى خطيبته عشان يسيبنى ويمشى  
قالت "مى" بضيق:  
-قال انك خطيبته ؟  
قالت "مريم" بصوت خافت:

-أيوة اضطر يقول كده عشان "خالد" يحترم نفسه ويمشى

أومات "مى" برأسها وعادت الى مكتبها ويبدو عليها علامات الضيق والحنق

\*\*\*\*\*

-مش عايز جنس مخلوج يعرف .. وحجك محفوظ  
تفوه "جمال" بتلك العبارة وهو جالس مع أحد الرجال فى مكتبه .. قال الرجل  
بتوتر:

-بس أنى خايف يا "جمال" بيه  
قال "جمال" بحدده:

-خايف من اييه دلوجيت .. انت كل اللى مطلوب منك انك تجبلى نسخه من  
الملف بس اكده ولا من شاف ولا من درى  
قال الرجل بخوف:

-بس لو "عثمان" بيه درى بالموضوع والله ليطوخنى  
هتف "جمال": "

-واييه اللى هيخليه يدري بس .. انت لو عملت اللى جولتك عليه مفيش حد  
هيعرف شئ واصل  
ثم أخرج عدة رزم نقدية من الخزينه الموضوعه بجوار مكتبه وألقاها على  
الرجل قائلاً:

-خد دول .. ولما تجبلى نسخه من الملف هعطيك زيبهم  
نظر الرجل الى المال وقد لمعت عيناه وقال:

-انت تأمر يا "جمال" بيه أنى خدامك وخدام عيلة الهوارى  
نظر اليه "جمال" بسخرية قائلاً:

-وعشان اكده بتشتغل عند عيلة السمري مش اكده  
قال الرجل بحرج:

-أصلهم بيدفعوا امنيح يا "جمال" بيه  
أشار "جمال" الى الباب قائلاً:

-طب يلا روح اعمل اللى جولتك عليه .. بس اوعى حسك عينك حد يدري  
بالكلام اللى دار بيناتنا دلوجيت .. انت مش جد الوجوف جدامى ها  
قال الرجل بسرعة:

-طبعا يا "جمال" بيه طبعا



\*\*\*\*\*

دخل "طارق" مكتب "مراد" الذى كان يجلس بصحبة "سامر" .. قال  
"طارق": "

-سلام يا "مراد" أنا ماشى عايز حاجه  
تطلع اليه "مراد" قائلاً:

-هتروح شركة الدعاية

أوما "طارق" برأسه قائلاً:

-أيوة .. هتفق معاهم على الحملة بتاعة مشروعا الجديد

فكر "مراد" قليلاً ثم قال:

-عرفت اللي احنا محتاجينه تحديداً مش كدة

-أيوة أيوة متقلقش .. يلا سلام

خرج "طارق" وتوجه الى سيارته لكنه وجد "سامر" خلفه يقول:

-جاي معاك يا باشا

ركب "سامر" بجوار "طارق" الذى سأله بدهشة:

-جاي معايا ليه

نظر اليه "سامر" بخبث قائلاً:

-عايز أشوف الفنانة اللي عملت التصميمات بتاعة شركتك .. يعني .. هى فنانة

وأنا فنان فمممكن نفهم بعض من أول نظرة

وغمز "سامر" بعينه .. انطلق "طارق" بسيارته صمت لفترة ثم قال بهدوء:

-متتعيش نفسك لأنها مش تيمك

ضحك "سامر" قائلاً:

-وعرفت منين انها مش تيمي

-لما تشوفها هتعرف وتتأكد ان كلامى صح

-سيبنى أنا اللي أحكم

قال "طارق" بهدوء:

-براحتك .. بس أنا حذرتك .. تاعب نفسك فى المشوار على الفاضى

دخل "طارق" و "سامر" الى مكتب "مريم" .. اقترب "طارق" من مكتبها

قائلاً:

-مساء الخير يا آنسه "مريم"

رفعت "مريم" رأسها قائله:

-مساء النور يا أستاذ "طارق" .. اتفضل

جلس "طارق" و "سامر" .. ألفت "مريم" نظرة على "سامر" ثم وجهت الكلام الى "طارق" قائله:

-أنا قولت لحضرتك آخر مرة ان الشغل هيكون جاهز بعد بكرة مش النهاردة ابتسم "طارق" قائلاً:

-لأ أنا مش جاى عشان الشغل بتاعى .. أنا جاى عشان عايزك تمسكى حملة تانية .. خاصة بمصنع ملابس وماركة جديدة نازلة السوق قالت "مريم" بهدوء:

-بس الكلام عن جملة جديدة بيكون مع أستاذ "عماد" وهو بيختار الديزاينر اللي بيقوم بالحملة رفع "طارق" حاجبيه قائلاً بتأكيد:

-لازام انتى اللي تمسكى الحملة دى .. لاننا عجبنا شغلك انتى .. وبصراحة شريكى لما شاف شغلك انبهر بيه وعشان كدة عايزينك انتى اللي تمسكى حملة الدعاية بتاعتنا

كان كل من "مى" و "سهى" تتابعان الحوار الدائر باهتمام .. قالت "مى" بشئ من الحنق:

-مفيش مشكلة يا أستاذ "طارق" .. حضرتك كلم الأستاذ "عماد" وأنا عن نفسي خلصت الحملة اللي شغاله عليها وممكن أمسك حملة حضرتك وأظن حضرتك جربت شغلى وعارفه كويس التفت لها "طارق" وقال مبتسماً:

-طبعاً وشغلك ممتاز .. بس شريكى أعجب بشغل الأنسة "مريم" عشان كده عايزها تحديداً اللي تمسك حملتنا

فى هذه الأثناء كان هناك نظرات وابتسامات متبادلة بين "سامر" و "سهى" .. قال "طارق" لـ "سامر":

-مش كدة يا "سامر" ؟

نظر اليه "سامر" وبدا وكأنه لم ينتبه للكلام فقال:

-ايه .. بتقول ايه

-بقولك اننا عايزين الآنسة "مريم" تحديددا اللى تمسك حملتنا مش كدة ؟  
قال "سامر" بسرعة:

-أيوة أيوة طبعا .. شغلها ممتاز فعلاً

قالت "مريم" بهدوء:

-طيب حضرتك قول الكلام ده للأستاذ "عماد" وأنا عن نفسي معنديش مشكلة  
انى أشتغل فى الحملة الدعائية ل حضرتك  
ابتسم "طارق" قائلاً:

-تمام كدة .. هنروح حالاً نتكلم مع أستاذ "عماد" .. وبكرة ان شاء الله هرجعك  
تانى عشان نتكلم فى التفاصيل  
قالت "مريم": "

-ممكن نتكلم فيها النهاردة بدل ما حضرتك تروح وتيجي تانى  
ابتسم لها "طارق" مرة أخرى قائلاً:

-معلش خليها بكرة .. يلا سلام أشوفك بكرة ان شاء الله

خرج الاثنان وتوجها الى مكتب "عماد" للاتفاق على الحملة الجديدة .. ثم  
توجها الى سيارة "طارق" .. انطلق "طارق" فى طريقة فابتسم له "سامر"  
بخبث قائلاً:

-هو فيه ايه بالظبط يا "طارق"

التفت اليه "طارق" بدهشة:

-مش فاهم تقصد ايه

-كان ممكن نقولها تفاصيل الحملة الموضوع مكنش هياخد ١٠ دقائق

نظر "طارق" أمامه ولم يعلق فضحك "سامر" قائلاً:

-معاك حق هى مش تيمي خالص

ثم التفت اليه بخبث قائلاً:

-بس خدت بالك من الموزة اللى كانت معاها فى المكتب

قال له "طارق": "

-مين قصدك .. انهى فيهم

-اللى كانت لابسه بدرى روز

مط "طارق" شفتيه قائلاً:

-مخدتش بالى منها

رفع "سامر" حاجبه قائلاً:  
-آه صح .. ما انت كنت مركز فى حنة تانية  
التفت اليه "طارق" قائلاً:  
" -سامر " يا حبيبي .. خليك فى حالك أحسن  
ابتسم "سامر" ونظر أمامه .. أما "طارق" فقد بدا عليه الشرود والتفكير

\*\*\*\*\*

عاد "مراد" الى بيته وتوجه الى غرفة الطعام حيث كان الجميع مجتمعاً:  
-مساء الخير يا جماعه  
-مساء النور  
مساء النور يا أبيه  
قال "مراد" وقد بدا عليه الإرهاق:  
-أنا طالع أغير هدومى وأناام  
قالت له أمه بحده:  
-مش هتتعشى يعني  
-لأ مليش نفس .. تصبحوا على خير  
دخل غرفته فوجت والدته خلفه .. دخلت وأغلقت الباب ووقفت أمامه . ثم ..  
أخرجت احدى الصور من جيبها ومدت يدها اليه .. أخذ الصورة بدهشة ..  
فوجدها صور لفتاة جميلة محجبة .. نظر الى والدته قائلاً:  
-ايه ده ؟

قالن له "ناهد" بحزم:  
-عروسة .. بنت واحدة صحبتى .. بنت عيلة كبيرة ومحترمة و مهندسة و.....  
قاطعها "مراد" وهو يلقي بالصورة على الكمودينو قائلاً بضيق:  
-تانى يا أمى .. تانى  
صاحت بغضب:

-تانى وتالت ورابع وعاشر لحد ما تريح قلبى وتتجوز  
صاح بحده:

-يعني هو جوازى اللى هيريح قلبك  
-أيوة يا "مراد"

صمت قليلا وبدا وكأن عيناه تشتعل غضباً ثم قال بصرامة:  
-ماما.. أنا مش هتجوز .. أنا مش هتجوز .. فاهمة معنى كلامى . أنا .. مش ..  
هتجوز .. أبداً  
نظرت اليه أمه بغضب .. ثم تركت الغرفة وخرجت وأغلقت الباب خلفها بشدة ..  
زفر "مراد" بضيق وجلس على فراشه وقد بدا عليه الغضب .. التفت للصورة  
الموضوعه على الكمودينو بجواره ودون أن يلقى عليها نظرة أخرى مزقها قطع  
صغيرة ثم قام وألقاها فى سلة المهملات.

\*\*\*\*\*

عادت "مريم" الى بيتها .. وحضرت لنفسها الطعام وجلست تتناوله فى صمت  
وهدوء .. ألقى نظرة على باب الغرفة المغلقة بجوار غرفتها .. نهضت وكان  
شيئاً يسحبها تجاه تلك الغرفة .. فتحت بابها ببطء .. وأضاءت النور .. وقفت  
تتطلع الى أثاث الغرفة بأعين دامعة .. اقتربت ببطء وجلست على الفراش ..  
وأخذت تتحسس بأصابع يدها فى رقبه .. نهضت وأغلقت الضوء والباب ..  
وتوجهت الى اللاب توب الخاص بها حملته الى فراشها وتدفرت بغطائها ..  
وفتحت أحد الملفات التى كُتب عليها "عائلتى" .. أخذت تتطلع لبعض الصور  
الموجودة فى الملف .. صورتها منذ عدة سنوات وقد بدت أصغر سنأ وأكثر  
اشراقاً وبهجة .. وصورة تجمعها بفتاة تصغرها ببضع سنوات وكل منهما تعانق  
الأخرى وتبتسم للكاميرا .. وصورة تجمعها بإمرأة كبيرة وقد لفت "مريم"  
ذراعها حولها وقبلتها على وجنتها .. وصورة تجمعها بالمرأة وبالفتاة وبرجل  
كبير بدا عليه سمة الرجولة والصلابة .. أخذت تتحسس بأصابعها تلك الصورة  
على الشاشة وعيناها تزرع الدموع فى صمت .. وشفتيها ترتجفان وهى تطبق  
عليهما بشدة وكأنها تحاول حبس صرخة ألم كادت أن تخرج من أعماق روحها  
.. ثم توجهت الى ملف آخر عنوانه "حبيبى" .. أخذت تتطلع لعشرات الصور  
التي تجمعها بشباب طويل نحيل خمري البشرة ذو ملامح مليحة .. عشرات  
الصور فى أماكن وأوضاع عديدة .. فى إحدى البواخر فى النيل .. على إحدى  
الكبارى .. على شط البحر .. فى إحدى الحدائق .. عشرات الصور التى تبدو فيها

"مريم" وكأنها فتاة أخرى .. فتاة تشع بهجة وسعادة وابتسامتها الجميلة لا تفارق ثغرها أبداً .. سقطت عبرة خلف عبرة .. وضعت الاب توب بجانبها على السرير ونامت بجوارها وهي تنظر الى صورة تجمعها بذلك الرجل وهو يجلس على كرسي بجوارها وكلاهما يلبس دبلة بيده اليمنى .. وكانت هذه آخر صورة رأتها قبل أن تغمض عينيها وتغطف في النوم.

## الفصل السادس

خرج "مراد" من غرفته في الصباح ومر قبل نزوله على غرفة عمته .. طرق الباب فسمحت له بالدخول .. اقترب منها قائلاً:

-صباح الخير يا عمته

قالت بوجوم:

-صباح الخير يا "مراد" يا ولدي

ابتسم وقال:

-ايه اخبار صحتك النهاردة

-تمام يا ولدي الحمد لله

تمعن "مراد" في النظر اليها ثم قال:

-في حاجة مضايقاكي يا عمته ؟

صمتت طويلاً ثم نظرت اليه قائله بقلق:

-في خراب هيجل علينا يا ولد أخوى .. جلبي مش مطمئن وبحلم بأحلام جلجه

منامي

جلس على الفراش بجوارها ونظر اليها قائلاً:

-ليه بتقولى كده يا عمته .. وحلمتى بايه

قالت "بهيرة" بجدية بالغة:

-جلبي متوغوش جوى يا ولدى .. ومجدرش أحكيك الأحلام البشعة اللي

بشوفها .. لأن سيدك وحبيبك النبي جال " لا تحدث الناس بتلعب الشيطان بك في منامك "

قال "مراد: "

- عليه الصلاة والسلام .. ممكن تكون أطغات أحلام يا عمتو .. متشغليش بالك بيها

لمست كفه قائله بجديه:

-خلى بالك من نفسك يا ولدى ومن أمك واخواتك

وضع "مراد" كفه الأخرى فوق كفه قائلاً بإبتسامه:

-متقلقيش يا عمتو .. كلكوا فى عنيا

-ربنا يبارك فيك وينورك طريجك وما يشمت حدا فيك

\*\*\*\*\*

أدخلت سكرتيرة "خالد" "سهى" الى مكتبه فقالت مبتسمه:

-ازيك يا بشمهندس

مدت له يدها فقام وسلم عليها مبتسماً:

-ازيك انتى يا أنسه "سهى"

قالت برقه:

-تمام الحمد لله .. معلى هعطلك شوية بس فى حاجات مش واضحة ومحتاجه

أعرفها من حضرتك قبل ما أبدأ شغل

ابتسم لها بخبث وقد شعر بأنها حجه ليس إلا .. وقال:

-لا أبدأ مفيش مشكلة اتفضلى استريحي

جلست "سهى" فقال:

-تحبي تشربي ايه بأه

قالت بمرح:

-أنا مبشربش غير عصير .. لا ليا فى الشاى ولا فى القهوة

ضحك قائلاً:

-فى حد مبشربش شاى ولا قهوة

قالت بدلع:

-أنا يا بشمهندس .. كل الناس بتستغرب لما بقول كده .. بس أنا مبجهمش  
نظر اليها بخبث قائلاً:  
-حظهم وحش  
ابتسمت بسرور .. وقد أخذ الإثنان يتطلعان لبعضهما البعض وعيناها تقول  
الكثير.

\*\*\*\*\*

جلس "طارق" قبالة "مريم" على مكتبها وأخذ يشرح لها طلباته فى الحملة  
الإعلانية .. كنت تستمع اليه باهتمام وتدون ما يقول .. لم يرفع عينيه عن  
وجهها .. شعر بالحيرة من نظرة عينيها الحزينة .. دائماً يرى الحزن فى عينيها  
.. أخذ يسأل نفسه .. ترى ما سبب حزنها ؟ .. انتهى من الحديث .. فنظرت اليه  
"مريم" وقالت بجديه:

-تمام يا أستاذ "طارق" .. بس الشغل المرة دى هياخد وقت أطول يعنى نقول  
من ١٠ أيام لاسبوعين  
ابتسم قائلاً:

-مفيش مشكلة خالص .. وطالما انتى اللى ماسكة الحملة بياها أنا مطمئن جداً ..  
بصراحة شغلك ممتاز ودخل دماغى أوى .. وباين عليكى موهوبة فعلاً  
شعرت بالخجل لإطرائه ولاحت ابتسامه صغيره على شفثيها وخفضت بصرها  
قائلاً:

-متشكره لذوق حضرتك

قال لها فجأه:

-تعرفى دى أول مرة أشوفك مبتسمه من يوم ما بدأت الشغل معاكى  
اختفت ابتسامتها الصغيرة سريعاً ليحل محلها تعبيراً جاداً .. كانت "مى"  
ترمقهما شزراً .. وازدادت عصبيتها بعدما سمعت جملة "طارق" الأخيره ..  
قالت "مريم" بجديه:

-فى أى اضافات تحب حضرتك تضيفها

قال "طارق": "

-لأ كده تمام .. ومتشكر جداً انك وافقتى تمسكى الحملة بتاعتنا .. وان شاء الله



مش هيكون آخر تعامل بينا

ثم قال:

-صحيح قوليلي اسمك "مريم" ايه ؟

قالت بخفوت:

"-مريم خيرى"

نهض من مقعده ومد يده اليها قائلاً بابتسامه:

-تمام .. أشوف بعد ١٠ أيام ان شاء الله

قامت من مكانها وقالت بهدوء:

-أنا آسفه مبسلمش .. ان شاء الله الشغل يخلص فى معاده

أعاد "طارق" يده بجواره وابتسم قائلاً:

-برافو عليكى .. بتعملى الصبح حتى لو كان صعب ومحرج

لم ترد وتجنبت النظر اليه .. قال قبل أن يغادر:

-مع السلامه وشكراً مقدماً على الشغل

خرج "طارق" .. فجلست "مريم" مرة أخرى على مكتبها .. التقت عيناها بعين

"مى" التى بدا عليها الحنق والضيق .. قالت "مى" بتهكم:

-ما شاء الله عليه لمأح أوى .. واخذ باله اذا كنتى بتبتسمى ولا مبتبتسمى

قالت "مريم" بضيق وهى تلتفت الى حاسوبها:

-مفيش داعى للكلام ده يا "مى"

كتمت "مى" غيظها ثم عادت الى عملها وهى تحاول التركيز .. لكن عبثاً

\*\*\*\*\*

توجه "أشرف" الى مكتب "عماد" .. فقال له:

-تعالى اتفضل يا "أشرف"

جلس "أشرف" فسأله "عماد" قائلاً:

-أخبار شغل مكتب الديكور ايه ؟

قال "أشرف" بحماس:

-لا حضرتك متقلقش الشغل عجبهم جدا وطالبيين كميات تانية

ابتسم "عماد" وقال:

-ممتاز

تتحنح "أشرف" وقال:

-بصراحة أنا كنت عايز أتكلم مع حضرتك فى موضوع شخصي

-اتفضل يا "أشرف"

بدا عليه التردد وهو يقول:

-يعنى .. بصراحة .. أنا عايز أتقدم للآنسه "مريم"

اتسعت ابتسامه "عماد" وهو يقول:

-يازين ما اخترت .. مش هتلاقى أحسن منها يا "أشرف"

ابتسم "أشرف" وقال:

-عارف يا أستاذ "عماد" .. وبصراحة أنا مش عارف أتقدم لمين ..يعني

حضرتك عارف ظروف "مريم" .. وأنا بصراحة اتخرجت أكلها مباشرة ..

ومبقتش عارف أعمل ايه .. ففكرت ان حضرتك تعرض عليها الموضوع وترفع

عنى الحرج ده

قال "عماد" بسعادة:

-متقلقش أنا هعرض عليها الموضوع وان شاء الله خير

قال "أشرف" بتوتر:

-بصراحة أنا خايف ترفض

صمت "عماد" قليلاً ثم قال:

-مظننش ترفض يا "أشرف" انت انسان كويس وأى واحدة تتمناك

قال "أشرف" ببعض الضيق:

-بس حضرتك عارف موضوع "ماجد" .. يعني أنا خايف تكون لسه متعلقه بيه

قال "عماد" بجديه:

"-مريم" لازم تشوف حياتها .. اكيد مش هتفضل طول عمرها كده ..متخفش أنا

أظن انها هتوافق ان شاء الله

قال "أشرف" بلهفه:

-يارب ان شاء الله

\*\*\*\*\*

-انت مش هتيجي تتجدملى بجه يا "جمال"  
قالت "صباح" هذه العبارة وهى تلتقى بـ "جمال" سرّاً فى مكانهما المعتاد ..  
قال بضيق:  
-انتى شايفه الظروف عامله ازاي يا "صباح"  
قالت بحزن:  
-ظروف ايه يا "جمال" .. آني لما بخرج أجابلك ببجي مرعوبه لحدا يشوفنى ..  
ونفسى ما يبجاش اللى بينا فى السر كاننا بنسرج  
قال "جمال" بحنق:  
-انتى عارفه كويس العداوة اللى بين عيلتى وعيلتك يا "صباح" أنا خايف من  
اكده  
هتفت "صباح" بحدده:  
- عداوة ايه اللى بتتكلم عنها يا "جمال" خلاص دى راحت لحالها .. من يوم  
اللى حصل والعيلتين اتحدوا سوا وجربوا من بعض  
-بس لسه النفوس شايله يا "صباح"  
-لأ يا "جمال" بيتهيجلك .. احنا خلاص معدش فى بينا وبينكوا أيتها عداوة ..  
ازاي يبجى فى عداوة بعد ما العيلتين حموا بعض وداروا على بعض عشان التار  
اللى عليهم  
قال "جمال" وهو شارد:  
-اه بس لو أعرف الحجيجه  
تنهدت "صباح" بحسره قائله:  
-خلاص "خيري" مات الله يرحمه .. ومات السر معاه  
قال "جمال" مفكراً:  
-تفتكرى مين فعلاً اللى كان ظالم ومين اللى كان مظلوم  
قلت "صباح" بإباء:  
-أخوى ما جتلش حدا يا "جمال" .. أخوى ميعملش اكده واصل  
صاح "جمال" بحدده:  
-وآني عمى ميعملش اكده واصل .. آني متأكد ان أخوكى هو اللى عيميلها يا  
"صباح" .. وعمى هو اللى دفع التمن  
قالت "صباح" بغضب:

-وليه ميكنش عمك اللي عيميلها وأخوى هو اللي دفع التمن  
صاح "جمال" بغضب ممائل:

-جولتك عمى ميعملش اكده واصل .. عمى كان راجل يعرف ربنا وكان سيد  
الرجال وكل الناس كانت تحكى عن جد عنته ورجولته  
قالت بتعالى:

-وآني كمان أخوى كان راجل من ظهر راجل .. وزبيبة الصلاه فوج جبينه  
قال "جمال" بغضب وهو ينصرف:  
-فتك بعافيه يا "صباح" .. كلامك بجه سم بيهري فى جتتى  
نظرت اليه "صباح" بحزن وهو يبتعد

\*\*\*\*\*

دخلت "مريم" مكتب "عماد" بعدما أرسل "صفاء" سكرتيرته فى طلبها ..  
تقدمت قائله:

-أفندم يا أستاذ "عماد"

أشار "عماد" الى المقعد أمام المكتب قائلاً:

-أفضلى اعدى يا "مريم"

جلست "مريم" ونظرت اليه بانتباه .. بدا وكأنه يفكر فى طريقه لعرض  
الموضوع عليها .. انتظرت أن يتحدث حتى قال:

"-مريم" .. فى واحد زميلك هنا فى الشركة .. طلب انه يتقدمك

شعرت "مريم" بالخجل والإحمرار بدأ فى غزو وجنتيها وأطرقت برأسها ..  
فأكمل "عماد":

-هو عارف ظروفك .. وعشان كده معرفش يتكلم مع مين .. وجالى  
ثم ابتسم قائلاً:

-أنا بعترك أخت صغيره ليا يا "مريم" وعشان كده بكلمك كأخ وبقولك ..

الشاب ده ممتاز وفعالاً راجل محترم و...

قاطعته "مريم" قائله بضيق:

-بعد ادنك يا أستاذ "عماد" .. انا معنديش استعداد للارتباط حالياً

قال فى هدوء:

-مش تعرفى هو مين الأول

قالت بحزم:

-مش هتفرق

صمت قليلاً ثم قال:

"-أشرف "

نظر اليه بدهشة .. وصمتت لحظات ثم عادت لتقول بحزم:

-زى ما قولت لحضرتك الموضوع ده مبفكرش فيه حالياً

بدا عليه الجزن لردّها .. ثم قال:

-خلاص يا "مريم" اتفضلى على مكتبك .. بس أتمنى انك تفكرى كويس الأول

.. انا مش هديله رد الا لما تفكرى وتردى عليا

قالت بجديه بالغه:

-أنا مش هغير رأيي أبداً يا أستاذ "عماد" .. فياريت حضرتك تبلغه من دلوقتي

بدل ما ينتظر على الفاضى

ثم نهضت وقالت:

-بعد اذنك

عادت الى مكتبها وهى شارده تماماً ومقظة الجبين .. انتبهت "مى" لحالها

فاقتربت منها قاله:

-خير مالك .. كان أستاذ "عماد" عايزك فى ايه

قالت بضيق:

-مفيش

التفتت الى الحاسوب تكمل عملها فى صمت .. أخذت "مى" تمعن النظر اليها

وقالت:

-لأ فى .. واضح على وشك انه فى .. قالك ايه ضايقتك

نظرت اليها "مريم" وقالت بحدّه:

-تصورى ان "أشرف" قال لأستاذ "عماد" انه عايز يتقدملى

ابتسمت "مى" وشفقت بيدها بمرح وقالت:

-كنت واثقه ان احساسى صح .. يا سلام عليكى يا "مى" تفهميها وهى طايره

قالت "مريم" بضيق:

"-مى" قفلى على الموضوع

جذبت "مى" احدى الكراسى وجلست بجوارها وقالت بحدّه:

-ممكن أفهم انتى ليه رافضه .. "أشرف" راجل ممتاز بجد .. والكل بيشكر فيه

قالت "مريم" بنفاذ صبر:

-أنا ما قولتش انه وحش

-أمال ايه ؟ .. رفضاه ليه ؟

صمتت "مريم" فقالت "مى" بحدده:

"-مريم" فوقى بأه .. انسى "ماجد" بأه .. راح ومش هيرجع تانى

نظرت اليها "مريم" بألم وقد تجمعت الدموع فى عينيها .. رق قلب "مى"

لحالتها وقالت بهدوء:

-مش قصدى أضايقك .. بس لازم تعيشي حياتك بأه

تساقطت العبرات من عينيها قائله:

-مش قادرة يا "مى" .. مش قادره أنساه .. مش قادره

نظرت اليها بحنان وقالت:

-لازم تحاولى تنسيه .. وتعيشي حياتك

قالت "مريم" بشفتين مرتجفتين:

-أنساه ازاي يا "مى" .. ازاي أنساه .. "ماجد" كان روحى .. كان حياتى ..

كان مستقبلى .. كان الحاجه الوحيدة اللى بتخلينى مبسوطة وفرحانه .. كان

الحضن الدافى .. كان الانسان الوحيد اللى بحس معاه بالأمان .. كان الهوا اللى

بتنفسه يا "مى" .. فاهمه يعني ايه الهوا اللى بتنفسه .. يعني أنا دلوقتى ميته

قالت "مى" بحزم:

-لأ انتى عايشه مش ميته .. هو اللى مات يا "مريم" .. "ماجد" اللى مات مش

انتى

انفجرت "مريم" فى البكاء قائله:

-أنا مت يوم ما مات يا "مى"

اقتربت منها "مى" وحضنتها قائله بأسى:

-الموضوع ده فات عليه أكثر من سنة يا "مريم" .. لازم تحاولى تنسى بأه

قالت "مريم" من بين شهقاتها:

-حتى لو مر عشر سنين مش ممكن أنساه أبداً .. ومش ممكن أتجوز واحد غيره

..أنا مراته هو وبس .. وان شاء الله ربنا هيجمعنى بيه فى الجنه .. وأبقى

مراته هناك

رفعت "مريم" رأسها ونظرت الى "مى" بوجه مبئل بالدموع وقالت بصوت مرتجف:

-الواحدة فى الجنة بتكون لآخر راجل اتجوزته .. وأنا مش عايزه أكون فى الجنة مرات حد تانى غيره .. انا عايزة أبقي مرات "ماجد" فى الجنة يا "مى" ..دى الحاجة الوحيدة اللى مصبرانى .. عشان كدة مش ممكن أتجوز واحد غيره ..مش عايزه أتجوز غيره يا "مى"  
كانت "مريم" تبكى وترتجف بشدة .. نظرت اليها "مى" بأسى وحضنتها مرة أخرى لتهدئ من روعها.

\*\*\*\*\*

خرج "عثمان" من سيارته مسرعاً وصعد سلالم الشركة بسرعة ودخل مكتبه ليجد رجلين ينتظراه بالخارج فأشار لهما بالدخول ..جلس أما مكتبه وقال لهما:  
-فى اييه .. اييه اللى حصل  
قال أحدهما:

-لجينا راجل يا "عثمان" بيه عم بيدور فى مكتبك على ورج .. بعد ما كل الموظفين روحوا بيوتهم .. كشفناه بكاميرات المراجبه .. ومسكناه وحبسناه فى المخزن  
نهض "عثمان" وسبقهما قائلاً:  
-تعالوا معايا

نزل "عثمان" الى المخزن وفتح الرجال الباب .. نظر الى الرجل المربوط الى الكرسي وقال بغلظة:

-انت ميين .. وميين اللى باعتك .. وكنت عم بتدور على اييه فى مكتبي  
نظر اليه الرجل بخوف دون أن يتحدث .. فلكمه "عثمان" على وجهه وسال دمه .. وصرخ به قائلاً:

-يمين بالله لو متكلمتش وجولتلى كل حاجه لكون طخك بيدى  
قال الرجل بخوف:

-أبوس يدك يا "عثمان" بيه .. انا معرفش كيف الشيطان وزنى خلانى أعلم  
اكده





صمت قليلاً ثم سأله "مراد: " عملت ايه فى موضوع شركة الدعاية

ابتسم "طارق: "

-لا متقلقش كله تمام .. اتفقت معاهم على كل حاجه وهستلم التصاميم بعد ١٠ أيام ان شاء الله

شرد "طارق" قليلاً ثم قال:

-عارف يا "مراد" .. البنت المسؤلة عن الحملة .. بنت محترمة أوى .. واحدة كدة تحس انها جد أوى وشخصيتها قوية وفى نفس الوقت تحس انها رقيقه اوى وضعيفه أوى .. مش عارف ازاي جامعه بين القوة والضعف فى وقت واحد

صمت "مراد" وقد بدا وكأن الحديث لا يعنيه .. فأكمل "طارق: "

-مش عارف ليه لفتت انتباهى مع انها عاديه جداً

ظل "مراد" يتناول طعامه وهو محتفظ بصمته .. فنظر اليه "طارق" قائلاً

بمرح:

-وانت بأه مفيش واحدة عارفه تلفت انتباهك ولا ايه

قال "مراد" بجدية:

-لا مفيش

تمعن "طارق" النظر اليه ثم قال:

-على فكرة يا "مراد" انت غلط .. ليه بتعمم حكمك .. مش كل البنات زي

بعضها .. زي ما مش كل الرجاله زي بعضها .. فى اللى زي "حامد" وفى اللى

زي "سامر" وفى اللى زيك وزىي وغيرنا كتير .. كل واحد غير التانى

نظر اليه "مراد" وقال بحزم:

-أنا مش بعمم حكمى .. أنا بقول ان معظمهم معندهم مش أصل وميعرفوش يحبوا

ولا يخلصوا فى حبهم .. معظمهم أنانى عايز يتحب وبس .. تديها كل ما عندك ..

ومتخدش منها الا اللى تفضل بيه عليك .. تديها حياتك كلها .. وتستخسر فيك

انها تكون جمبك

هتف "طارق" قائلاً:

-ليه النظرة السوداويه دى يا "مراد" .. ليه متديش لنفسك فرصة تانية

قال "مراد" بحزم:

-اديت نفسى فرصة تانية يا "طارق" وانت عارف كده كويس .. وبرده

مفرقتش حاجه عن اللي قبلها

"-مراد" انت مليون واحدة تتمناك مش بقول كده عشان أجاملك بس فعلا انت  
من أرجل الناس اللي عرفتها فى حياتي  
قال "مراد" بمراره:

-بس دائماً اللي بعوزها بترفضنى واللى بحتاجها بتسيبنى .. أنا معنديش  
استعداد أذل نفسي لواحد مرة تانية ..أو أنتظر من واحدة تانى انها تقولى آسفه  
أنا مش هقدر أرتبط بيك أنا عايزه واحد طبيعي  
تنهد "طارق" قائلاً:

-قولتك مش كل البنات رد فعلها واحد .. زى ما فى دى .. فى دى  
قال "مراد" بصرامة:

-وأنا بأه لا عايز دى ولا عايز دى .. أنا مرتاح كده .. أحسن ما تحصلى حاجه  
تانية والأقى اللي بتطعنى فى ضهرى وتقولى مش هقدر أعيش معاك وعايزه  
أطلق  
صمت قليلاً ثم قال بجمود:

-انت مجربتش يعني ايه تمر بأزمة وتبقى محتاج لمراتك جمبك وتلاقيها بتفكر  
انها تسيبك .. مجربتش يعني ايه تترجاها انها تفضل جمبك وتلاقيها مكسوفه  
منك ومن اصابتك .. وتشوف فى عنيها نظره تتمنى انك تتعمى ومتشوفهاش ..  
مجربتش يعني ايه تتقدم لواحد وأول ما تعرف ان رجلك مبتوره ترفضك .. انت  
مجربتش الاحساس ده يا "طارق" احساس مميت .. تحس أكن سكاكين بتقطع  
فيك .. تحس أن حد جاب سكينه تلمه ويبدحك بيها ببطء .. أنا مش ممكن أهين  
نفسى تانى .. أو انى أقبل ان واحدة تعيش معايا وهى حسه بالنقص .. أو شايفه  
انى أقل من غيري .. وحسه انها مكسوفه منى .. مكسوفه تعرف الناس انى  
جوزها .. وانى عندى اعاقه .. مش ممكن أبداً هسمح لنفسي انى أضعف وأحتاج  
لواحده جمبي ..أو انى أترجاها تفضل جمبي ومتسبنيش .. والأقىها رغم  
احتياجى ليها تصدنى بكل برود .. مش هقبل على نفسي الاهانة دى تانى  
صمت "طارق" وقد أيقن أن كلامه مع "مراد" لن يفيد .. لأن جرحه أكبر من  
أن يُشفي ببضع كلمات للمواساه.

\*\*\*\*\*

عاد "مراد" الى بيته ليجد والدته فى استقباله قائله بعجاله وهى تشير الى الصالون:

- عروستك ومامتها أعيدين جوه يا "مراد" يلا تعالى سلم عليهم  
قال بإندهاش:

- عروستى مين  
- بنت صحبتى اللى وريتك صورتها  
قال بحزم:

- ماما احنا انتهينا من الكلام فى الموضوع ده  
قالت بحزم هى الأخرى:

- أنا مش هبطل كلام فى الموضوع ده يا "مراد" .. شوفها واعد معاها يمكن  
تعجبك  
قال بحده:

- مش هتعجبنى ومش عايزها تعجبنى  
نظرت اليه أمه بغضب قائله:

"- مراد" لو مدخلتش ورايا الصالون تسلم على الضيوف اعرف انى غضبانه  
عليك

ثم تركته وانصرف .. كبح جماح غضبه بصعوبه .. ثم دخل الصالون .. نظر الى  
المرأتين وهز رأسه قائلاً:  
- أهلا وسهلا

قالت المرأة الكبيرة مبتهجه:

- أهلا بيبك انت يا "مراد" ازيك وازى صحتك  
جلس على أحد المقاعد قائلاً:  
- الحمد لله

كان يشعر وكأن بداخله بركان غضب على وشك الانفجار .. كان حانقاً بسبب ذلك  
المأذق الذى زجته فيه ولدته .. ظل صامتاً .. ولم يوجه نظرة واحدة الى الفتاة  
الجالسه .. نظرت اليه أمه بعتاب ثم ابتسمت للفتاة قائله:

- منورانا يا "بسمة" دى أول مرة تيجي عندنا  
ابتسمت الفتاة قائله:

-ده نورك يا طنط .. معلش انتى عارفه ان دراستى كانت فى محافظة تانية  
ومكنتش بنزل القاهرة كتير كنت ببقى مشغولة طول الاسبوع .. وفعلاً مبسوفة  
انى جيت مع ماما النهاردة  
ابتسمت "ناهد" قائله:

-شوية وهيجوا البنات ولازم أعرفكوا على بعض ان شاء الله  
قالت بمرح:

-وأنا كمان حابه اتعرف عليهم .. مع انى سمعت ان واحدة فيهم دماغها لاسعه  
يعني شكلى انا وهى هنبقى صحاب لانى أنا كمان لاسعه وبحب اللى دماغهم  
لاسعه

نظر اليها "مراد" متهمماً ثم نظر الي أمه وكأنه يقول (هى دى اللى انتى  
جيبهالى .. (تظاهرت أمه وكأنها لم تفهم معنى نظراته .. وقالت للفتاة:  
-انتى ما شاء الله عليكى عاقلة جدا وكمان بتتحملى السؤلية .. عرفت من ماما  
انك كنتى معتمدة على نفسك طول فترة سفرك  
قالت "بسمة" بفخر ضاحكة:

-طبعا يا طنط .. وكمان انا اجتماعية جدا وقدرت اكون صداقات كتير اوى فى  
المحافظة اللى كنت فيها يعني انا بقيت هناك اشهر من النار على العلم .. امشى  
فى الشارع بس قولى "بسمة" هتلاقى الناس تقول اه البنات الموزه اللى مفيش  
منها اتنين دى

ألقي عليها "مراد" نظرة أخرى متهممة .. قالت والدة "بسمة": "  
-مالك يا "مراد" يا حبيبي ساكت ليه  
قال مراد" بهدوء:

-بسمعكوا

التفت "بسمة" اليه قائله بمرح:

-شكلك جد اوى فكها شوية .. وبعدين أنا اللى يعد معايا لازم يموت على روجه  
من الضحك .. لان عليا خفة دم محصلتش  
نظر اليها "مراد" ببرود وقال:

-معلش اظاهر أنا اللى مبفهمش فى خفة الدم  
تدخلت "ناهد" قائله:

-طبعا يا حبيبتي ده انتى زينة البنات .. ما شاء الله عليكى أدب وجمال وتعليم

وكل حاجة .. ده انتى تتخطفى خطف  
ضحكت الفتاة قائله:

-والله يا طنط هو على الخطف فأنا بتخطف فعلاً .. انا بيتقدمولى كتير أوى ما  
أقولكيش بس أنا اللى مش عجبني حد .. اللى أتجوزه ده لازم يكون واد مخلص  
مفيش منه اتنين  
قال "مراد" ساخراً:  
-واد!

أكملت "بسمة" قائله بمرح:

-وبما ان عنيا عسلى فياريت يبقى عنده أوبشن العيون الزرقا أو الخضرا عشان  
نكون لايقين على بعض .. بس لو مفيش الا بنى خلاص مفيش مشكلة هرضى  
بالأمر الواقع  
كانت نظرات "مراد" مليئة بالتهكم والسخرية .. نظرت اليه الفتاة وقد تضايقت  
من نظراته الساخرة .. قام "مراد" قائلاً:  
-بعد اذنكوا

توجه الى غرفته فلحقت به أمه قائله:

-رايح فين والناس تحت .. هما جايين عشانى ولا عشانك  
التفت اليها "مراد" قائلاً ببرود:

-والله مكنتش أعرف ان البنت هى بتتقدم دلوقتى وبتروح تشوف الراجل فى  
بيته ..ومع ذلك أعدت معاها عشان أريحك .. بالله عليكى انتى شايفه انها  
مناسبه ليا ؟  
قالت بحده:

-مالها يعني ماهى بنت زى الفل أهى  
تنهدت "مراد" قائلاً:

-ماما أنا بجد مرهق جداً وتعبت مناهده معاكى فى الموضوع ده .. تروح  
تشوقلها واد مخلص بأوبشن العيون الملونه .. تتجوزه وتفكها منى خالص  
خرجت أمه وهى ترمقه بنظرات غاضبة .. دخل "مراد" الى شرفة غرفته ..  
ووقف شادراً وقد بدا عليه الإستغراق فى التفكير .. لم يشعر بمضى الوقت .. بعد  
فترة رأى "بسمة" وأمها تخرجان من البيت .. وقفا قليلاً أما سيارتهما التى  
أوقفها أمام الباب .. سمع الفتاة تقول لأمها:

-مش كفايه انه معاق .. لأ وكمان راسم نفسه وعایش فى الدور .. قولتلك من الأول مش هينفعنى انتى اللى أصريتى انى آجى معاكى  
شعر "مراد" وكان خنجراً مسموم انغرس فى جراحه مرة أخرى .. ليسيل الدم منه أنهاراً.

## الفصل السابع

لحظات وسمع طرقات على باب غرفته .. لم يحرك ساكناً .. وقف واجماً مقطب الجبين سمع والدته من خلفه تقول:

-عجبك كده أهم مشيوا بسرعة ومرضيوش يعدوا أكثر من كده التفت "مراد" اليها ببطء .. كانت النار تشتعل داخل عيناه .. زار كأسدٍ غاضب:

-مش عايز أبدأ .. أبدأ .. أسمع كلام فى موضوع الجواز ده تانى .. أنا مش عايز أتجوز .. ولا محتاج انى أتجوز  
ثم أكمل بصرامة:

-لو جبتيلى سيرة الجواز تانى أنا هسيب البيت وأخذ شقة أعد فيها لوحدى قالت امه بحدده:

-وليه متديش لنفسك فرصة انك تعرف البنت

قال بعنف:

-البنت اللى أول ما خرجت من باب بيتنا قالت لمامتها كفاية انه معاق .. هى دى اللى عايزانى أتجوزها .. عشان تتكبر عليا وتحسنى بالنقص طول عمرى .. أنا لا هسمح لها ولا هسمح لغيرها انها تقلل منى أو تمس كرامتى .. عرفيها

ان أنا اللى رافضها مش هى

قال ذلك ثم خرج من الغرفة بغضب .. تنهدت أمه بحسرة وحيرة وضيق.

توجه "مراد" الى سيارته وأغلق الباب بعصبية وانطلق بأقصى سرعة .. كان الغضب بادياً على وجهه وهو يسير مسرعاً بدون وجهة محددة .. وكلما زاد افراز الأدرينالين فى دمه .. زاد من سرعة سيارته .. حتى كادت أن تنحرف عن الطريق .. كان يشعر بأن بداخله بركان ثائر .. يريد أن يفرغه ليرتاح .. لكن هيهات .. لا طريقه لإفراغه أبداً .. وصل الى الطريق الصحراوى .. ثم أوقف سيارته على جانب الطريق كان يلهث وكأن خرج من سباق للعدو .. استغرق الأمر ساعة ونصف حتى استطاع التحكم فى غضبه .. أدار مقود السيارة وعاد فى طريقه مرة أخرى .. أدار المسجل ليستمع الى ترتيل آيات الله .. فشعر بسكينه داخل قلبه .. ولانت ملامحه قليلاً .. وأصبح أكثر هدوءاً .. أثناء توجهه الى بيته .. سمع آذان العشاء ينطلق من مكبر أحد المساجد الصغيرة على الطريق .. أوقف سيارته وتوجه الى المسجد توضاً ووقف يصلى .. كان يطيل كثيراً فى سجوده وكأنه لا يريد لجبينه أن يفارق أرض المسجد .. ثم يبتعد عنه ليعود اليه مرة أخرى فى لهفه .. أنهى صلاته ورحل الجميع لكنه ظل فى المسجد .. أسند ظهره على أحد الأعمدة .. بدا عليه الوجوم والشرود .. اقترب منه الإمام قائلاً:

-مالك يا ابنى فى حاجه

نظر اليه "مراد" قائلاً:

-لا يا شيخ مفيش حاجه

تفرش الشيخ الأرض بجوار "مراد" وقال له:

-ارمى حمولك على الله .. هو وحده اللى بإيده الحل

تمتم "مراد":

-ونعم بالله

أكمل الشيخ:

-ضاقت ولما استحكمت حلقاتها فرجت وكنت أظنها لا تفرج .. الدنيا دى دار

ابتلاء .. ولازم الواحد يصبر ويحتسب

ثم نظر الى "مراد" قائلاً:

-تعرف ان أى حاجه بتصيبك فى الدنيا بتكفر من سيئاتك وحملك فى الآخرة ..

تعرف ان حتى الشوكة لما تشكك بتكفر عنك سيناتك .. ده مش كلامي أنا ده  
كلام النبي صلى الله عليه وسلم "لا يصيب المؤمن من هم، ولا غم، ولا أذى إلا  
كفر الله به عنه حتى الشوكة" .. شوف رحمة ربنا بيك أد ايه  
بدا على "مراد" التأثر فأكمل الشيخ قائلاً:

-الصبر يا ابني نعمة من ربنا وثوابه عظيم .. بس أهم حاجة تصبر صبر جميل  
..يعني تكون راضى .. مش تصبر بسخط ولأن مش قدامك حاجة الا انك تصبر  
.. لا .. تصبر وانت راضى وبتقول الحمد لله .. ربك بيقول { فَصَبْرٌ جَمِيلٌ وَاللَّهُ  
الْمُسْتَعَانُ عَلَى مَا تَصِفُونَ }

أوما "مراد" برأسه وابتسم للشيخ قائلاً:

-شكرا يا شيخ كنت محتاج أسمع الكلمتين دول .. ربنا يباركك  
ربت الشيخ على كتفه ثم نهض .. سكن "مراد" قليلاً ثم غادر المسجد وتوجه  
الى سيارته وهو يشعر بأنه أصبح أفضل حالاً وأكثر راحة.

\*\*\*\*\*

جلست "سارة" على فراشها تتأمل احدى الصور ولاحت على شفيتها ابتسامه  
صغيره .. اقتحمت "نرمين" أختها الصغرى الغرفة دون استئذان .. ارتبكت  
"سارة" وحاولت اخفاء الصورة خلفها قائلة بحنق:

-فى حد يفتح الباب كده من غير ما يخبط  
نظرت اليها "نرمين" بخبت قائلة:

-ايه اللي مخبياه ورا ضهرك

قالت "سارة" بتوتر:

-ملكيش دعوة حاجة متخصصكيش

ثم اكملت بغضب:

"-نرمين" متفتحيش الباب كده وتهجمى على الأوضة .. ابقى خبطى الأول زى  
الناس المحترمة

قفزت "نرمين" اتجاهها وفى لحظة خطف الصورة من يدها .. حاولت "سارة"  
انتزاع الصورة منها .. لكن "نرمين" كانت قد رأتها بالفعل .. فصاحت:

-يا حلاوة يا ولاد .. يادى الفضيحة ام جلاجل يادى الجرسه أم حناجل

قالت "سارة" بارتباك وهى تخطف الصورة من يدها:



-فضيحة ايه متحترمي نفسك

أمسكتها "نرمين" من يدها وأجلستها على الفراش وجلست بجوارها قائله:  
-قوليلي بأه ومن الأول وواحدة واحدة كدة .. صورة "طارق" بتعمل معاكى ايه  
.. وجبتيا منين

قالت "سارة" بتوتر وهي تنظر الى الباب المفتوح:  
-قومي اقفلى الباب الأول

فعلت "نرمين" وعادت لتجلس بجوارها مرة أخرى .. قالت "سارة" بخجل:  
-دى صورة كان "مراد" و "طارق" متصورينها مع بعض بس أنا قصيت  
الجزء اللي فيه "طارق" .. يعني مش هو اللي ادھالى أو حاجه عشان دماغك  
متروحش لبعيد

ابتسمت "نرمين" بخبت وقالت:

-آه جولتيلي يا بنيتي .. وبتعلمي ايه بأه بصورة سي "طارق"

نظرت اليها "سارة" بحزن وقالت بصوت خافت:

-بحبه يا "نرمين" .. ومش عارفه أعمل ايه

قالت "نرمين" بجديه:

-طيب انتى حسه ان فى حاجه من نحيته

هتفت "سارة" بحنق:

-هو أنا بشوفه أصلا .. وبآله كتير مجاش عندنا .. مش عارفه "مراد" ليه

مبقاش يعزمه كتير زى الأول

قالت "نرمين" بسخريه:

-قال يعني لوجه كتير هتعرفوا تتكلموا سوا

قالت "سارة" بحزن وهي تنظر الى الصورة:

-عارفه ان مفيش أمل

ابتسمت "نرمين" وقالت بمرح:

-بس بصراحة لو جيتي للحق يعني هو مش أمور .. "مراد" عنده صحاب كتير

أحلى منه

نظرت اليها "سارة" بجديه وقالت:

-بس راجل وانسان محترم وذوق وأخلاقه كويسة وبعدين مش وحش .. هو

مش وسيم أوى ماشى .. بس مش وحش

ابتسمت "نرمين" بخبث وقالت:  
-أنا مالى يا ستى هو بتاعى ولا بتاعك  
قالت "سارة" بحدده:  
-ايه بتاعى وبتاعك دى متحترمى نفسك يا "نرمين"  
-يا ستى متزعلش كده بهزر .. هو لا حد يعرف يهزر معاكى ولا مع أخوكى ..  
ايه يارب البيت العقد ده  
صمتت قليلا ثم قالت:  
-وناويه تعملى ايه يا ست الكتكوته  
قالت "سارة" باستغراب:  
-أعمل ايه يعني .. ولا حاجه طبعا  
هتفت "نرمين":  
-يا فرحتى بيكي يا "سارة" .. عايشه فيلم حب من طرف واحد .. وحتى  
معندكيش استعداد تحاولى يبقى من طرفين  
قالت "سارة" بدهشة:  
-انتى عجيبة فعلا عايزانى اعمل ايه يعني اروح أقوله أنا بحبك ممكن لو  
سمحت تحبنى وتيجي تتقدملى  
-لأ طبعا ما قولتش كده .. بس حاولى مثلا تلفتى نظره .. يعني مثلا روحى ل  
"مراد" الشركة .. وبصى ل "طارق" بصات ليها معنى و كمان ممكن.....  
قاطعتها "سارة" قائله بغضب:  
-بس كفايه .. أنا غلطانه انى حكنتك أصلا ايه العك اللى بتقوليه ده .. أنا  
مستحيل طبعا أعمل كده  
صاحت "نرمين" وهى تنهض وتغادر الغرفة:  
-براحتك بأه أنا نصحتك وانتى حره  
خرجت من الغرفة لتترك "سارة" التى أخذت تتأمل الصورة مرة أخرى فى حزن

\*\*\*\*\*

جلست "مريم" تراقب ساعة الحائط .. ها هى على موعد مع خطاب آخر من  
خطابات "ماجد" .. دقت الساعة معلنة منتصف الليل ففتحت الخطاب رقم ٥٥

فى لهفة وقرأت:

-حبيبتي "مريم" .. أتذكرين الزهرة التى أهديتها لك يوم أن كُتِب كتابنا .. قلت لك يوماً انها تشبهك فى رقتك وبراعتك .. ليس عندي ذرة شك فى أنك مازلتى تحتفظين بتلك الزهرة .. لم تخبريني أبداً أنكِ تحتفظين بها لكننى على يقين من ذلك .. حبيبتي طلب منكِ هذا الاسبوع سيكون صعباً قليلاً .. أريدك أن تتخلصى من تلك الزهرة .. تخلصى منها بالشكل الذى يريحك .. تخلصى منها اليوم يا "مريم" .. اليوم .. حبيبك ماجد

انهمرت العبرات من عينيها بغزارة وصاحت بغضب:

-ليه يا "ماجد" كده .. ليه

توجهت الى أحد الأدراج وأخرجت حقيبة صغيرة فتحتها وأخرجت منها زهرة قد تجففت .. أخذت تنظر اليها بحسرة وكأنها شخص غالى لا تبغى مفارقتة .. وضعتها بجوارها على الوسادة ونامت بأعين دامعه .. فى الصباح توجهت الى أحب مكان اليها .. كانت تقف فى هذا المكان مع "ماجد" يمزحان ويمرحان وهو يعلمها كيف تصطاد السمك .. وقفت قليلاً ثم أخرجت الزهرة من حقيبتها وألقته فى الماء وهى تنظر اليها فى ألم.

\*\*\*\*\*

رن جرس هاتف "سهى" فاتسعت ابتسامتها عندما رأت اسم المتصل وردت بلهفه:

-ألو

-ألو ازيك يا "سهى"

قالت برقه:

-الحمد لله يا بشمهندس "خالد"

التفت كل من "مريم" و "مى" الى "سهى" التى تتحدث فى الهاتف .. التقت النظرات فقامت "سهى" من فورها وقالت:

-ثوانى يا بشمهندس هطلع أتكلم من بره عشان الشبكة

خرجت "سهى" فقالت "مى" بسخرية:

-عشان الشبكة ولا عشان الاتنين اللى كاتمين على نفسك فى المكتب

التفتت "مريم" الى حاسوبها تكمل عملها فى وجوم .. اقتربت منها "مى" قائله

:

-مالك .. فى حاجه مضايكاى

-تؤ

-ده العادى بتاعك يعنى

ابتسمت "مريم" بمرارة قائله:

-بالظبط كده

عادت "سهى" مرة أخرة وعلى شفيتها ابتسامه واسعه لم تستطع مداراتها ..

الفتت اليها "مى" قائله:

-متفرحيننا معاكى

قالت "سهى" بفخر:

-مفيش .. البشمهندس "خالد" كان بيعزمنى على حفلة عيد ميلاده

نظرت الفتاتان الى بعضهما البعض .. ثم قالت "مى":

-بشمهندس "خالد" مين ؟

قالت بدلع:

-صاحب شركة المقاولات اللى بنفذه الحملة بتاعة شركته

قطبت "مريم" جبينها وقالت:

-خلى بالك يا "سهى" .. ده انسان مش محترم

قالت "سهى" بسخرية:

-انتى اللى معقده يا "مريم" .. فكيتها شوية يا بنتى مش كده .. مش هتتجوزى

بطريقتك دى

نهضت "مريم" بعصبية وقالت:

-و أنا مش عايزة أتجوز أصلاً

ثم غادرت المكتب فالتفت "مى" الى "سهى" قائله:

-على طول كده مبتعرفيش تنقى كلامك

هتفت "سهى":

-أنا مالى اذا كانت صحبتك معقدة نفسياً تروح تشوفلها دكتور يعالجها .. أنا

مقولتش حاجه غلط .. هى اللى منفسنه

خرجت "مى" للبحث عن "مريم" لكنها صدمت عندما رأتها واقفة مع

"طارق" خارج المكتب .. وقفت بجوار الباب الخارجى للمكتب تتخفى وتستمع

الى حديثهم .. سمعت طارق يقول:  
-أيوة عارف انك قولتيلي انهم هيخلصوا بعد ١٠ ايام مش اسبوع بس قولت  
يمكن تكونى خلصتيهم بدرى  
قالت "مريم" بجديه:  
-لا يا فندم مخلصتهمش ولو كنت خلصتهم كنت بعث لحضرتك ايميل .. عن اذنك  
أوقفها "طارق" ونظر اليها قائلاً:  
-انتى اضايقتى منى ولا ايه  
قالت بنفاد صبر:  
-لا يا فندم وهضايق من ايه  
قال "طارق":  
-يعنى عشان.....  
قطع "طارق" كلامه وهو ينتبه لأول مرة الى الدبلة التى تزين أصابع يدها  
اليمنى .. بُهت للحظات ثم سألها بصوت خافت:  
-انتى مخطوبة  
تتبع "مريم" نظراته الى أصابع يدها ثم قالت بحزم:  
-لا مش مخطوبة .. مكتوب كتابى  
ظهر الضيق على وجه "طارق" .. فقالت "مريم":  
-بعد اذن حضرتك  
ثم التفتت ودخلت المكتب دون أن تنتبه الى "مى" التى ظهرت علامات الحزن  
على وجهها

\*\*\*\*\*

-المسخرة دى متحصلش فى شركتى يا "حامد" انت فاهم  
تفوه "مراد" بهذه العبارة فى غضب وهو يجتمع بـ "حامد" فى مكتبه بالشركة  
.. هتف "حامد":  
-مسخرة ايه وبتاع ايه .. انت اللى قفل يا "مراد"  
قال "مراد" بغضب هادر:  
-لما أشوفك انت وواحدة من الموظفين فى مكتبها وعمالين بتبوسوا فى بعض

دى متبقاش مسخرة .. امال المسخرة تبقى ايه بالظبط  
هتفت "حامد" بحدده:

-انا حر أعمل اللي أنا عايزه أنا مش عيل صغير

قال "مراد" بصرامه وعيناه تشعان غضباً:

-تعمل اللي انت عايزه بره الشركة بتاعتي لكن طول ما انت فى الشركة تحترم  
نفسك يا "حامد"

قال "حامد" بغضب:

-انا محترم غصب عنك يا "مراد"

قال "مراد" بسخريه:

-ماهو واضح أوى .. ولعلمك البنيت دى أنا هرفدها فوراً البنيت اللي متكنش

أمينه على نفسها عمرها ما هتكون أمينه على الشغل

دخل "طارق" المكتب وصاح قانلاً:

-فى ايه يا جماعة صوتكوا جايب لحد الأسانسير

قال له "حامد" بغضب:

-فى انه بيتدخل فى خصوصياتى وبيتكلم معايا أكنى عيل صغير

قال "مراد" فى غضب مماثل:

-خصوصياتك دى تبقى فى شركتك او بيتك او ان شاله فى الشارع لكن مش فى

شركتى ..مش هاجى أسمح على آخر الزمن ان قذاره زى دى تحصل فى شركتى

صاح "حامد" بسخريه وتهكم:

-قذاره .. ده قصر ديل يا "مراد"

أسرع "طارق" قانلاً بحدده:

"-حامد"

أكمل "حامد" وهو ينظر الى "مراد" ودون ان يلتفت لـ "طارق" وقال بقسوة:

-ماهو عشان مفيش واحدة راضيه تعبرك غيرت لما شوفتنى معاها .. وعمال

دلوقتى تفش غلك فيا

ساد الصمت للحظات .. صاح "طارق" فى "حامد": "

-انت بجد زودتها أوى

بدا وجه "مراد" جامداً .. لا يحمل أى تعبيرات .. وبدت نظراته جامدة بارده ..

وقال بهدوء:

-بكرة الصبح المحامى بتاعى هيكون عندك فى شركتك عشان فض الشراكة  
اللى بينا  
صاح "حامد" بغضب:

-والله لأخليك تندم يا "مراد" .. مبقاش "حامد" ان مخلصك تندم يا "مراد"  
قال ذلك ثم خرج بعصبيه وأغلق الباب خلفه بعنف .. جلس "مراد" على مكتبه  
ووجهه مازال جامداً .. جلس "طارق" قائلاً:  
-قولتلك قبل كدة انى مبرتلوش .. سبحان الله من أول ما شوفته وأنا قلبي  
مقبوض منه .. أحسن اننا هنفض الشراكة معاه .. واحد مقرف زى ده مش  
عايزين نتعامل معاه أصلاً  
صمت "مراد" ولم يرد .. ثم قام وحمل موبايله ومفاتيحه وغادر المكتب .. تنهد  
"طارق" بضيق وقد شعر بالغضب لكلمات "حامد" الجارحة التى وجهها لـ  
"مراد".

\*\*\*\*\*

دخل "عثمان" مكتب والده فجأة وهو يصيح قائلاً:  
-بوى بوى .. لجينا ولد "خيري" أخوى يابوى  
هب "عبد الرحمن" واقفاً وقال بلهفه:  
-بجد يا ولدى .. كام ولد عنديه .. وهما فين عرفت طريجهم كلياتهم  
قال "عثمان" بحماس:  
-ايوة عرفت كل حاجه يا بوى .. ولد "اسماعيل المنصوري" عرفنا انه عم  
يشتغل فى المباحث ومركزه بجه كبير جوى جوى .. كلمته ووصيته يجيبلى أرار  
الموضوع بس مرضيتش أجيبك سيره الا لما أوصل لنتيجة  
قال "عبد الرحمن" بلهفه:  
-جولى بسرعة عرفت ايه عن ولد أخوك يا ولدى  
قال "عثمان":

-عرفت ان هو ومرته وبنته الصغيره عيملوا حادثه .. كانوا راكبين تاكسي  
وخطبوا فى شاحنة كبيره .. الشاحنة انجلبت وانفجرت ومات اللى اللى فى  
العريبتين

قال "عبد الرحمن" بتأثر:

-لا حول ولا جوة الا بالله

أكمل "عثمان": "

-ادفنوا كلياتهم فى القاهرة .. والراجل اللى كان معاه فى الشغل واللى رد علينا

وجالنا انه مات هاد مكنش يعرف اى شئ عن عيلته .. بس ولد "اسماعيل

المنصورى" عرف يوصل لكل شئ

قال "عبد الرحمن": "

-كمل يا ولدى باجيله كم ولد

قال "عثمان": "

-مش ولد يا بوى .. بنت .. بنت واحده وعائشه لحالها

صمت "عبد الرحمن" قليلاً .. فقال "عثمان" بحزم:

-مينفعش تعيش وحديها فى القاهرة يا بوى .. لازم تيجى تعيش بيناتنا

أوماً "عبد الرحمن" برأسه قائلاً:

-عندك حج يا ولدى لازم نلم نلحمنا مينفعش نسيبها تعيش لحالها

ثم التفت اليه قائلاً بحماس:

-من بكرة الصبح جهز العربية والسواج عشان هنطلع آنى وانت على القاهرة ..

أنا مالى صبر حتى شوف حفيدتي بنت "خيري" ولدى الله يرحمه ويحسن اليه

\*\*\*\*\*

قال "خالد" وهى يتطلع الى عيني "سهى": "

-النهاردة عيد ميلادى والنجوم فى السما والقمر بين ايديا

كانا يرقصان معاً فى شرفة منزله الذى تقام فيه حفلة عيد ميلاده .. كانت

"سهى" تشعر بالحرى لكنها أيضاً كانت تشعر بسعادة بالغه لكلمات الإطراء

الذى يلقيها هذا الرجل الغنى الوسيم على مسامعها .. ابتسمت قائله:

-ميرسى يا بشمهندس

ابتسم قائلاً:

-لأ بشمهندس ايه بأه خليها "خالد" على طول .. أنا شايف ان خلاص

الرسميات معدتش تنفع بينا

ثم قال بخبث وهى يتطلع الى عينيها:

-ولا انتى شايفه ايه



ابتسمت قائله بدلع:

-ماشى يا "خالد"

قال بهيام:

-الله مكنتش أعرف ان اسمى حلو كده الا لما نطقتيه

-من الواضح انك بتعرف تتكلم كويس يعني شكك مش سهل خالص

نظر اليها بجرأة قائلاً:

-هو فى حد يشوف القمر ويسكت .. قمر ايه هو أصلا القمر بييجى حاجه جمبك

..ده انتى جامده طحن

ضحكت بدلال وقالت:

-ميرسى يا "خالد"

توقفت نغمات الموسيقى ..فقال لها:

-خليكى هنا يا قمر هروح أجيب حاجه نشربها وأجى

أومات برأسها مبتسمة .. دخل وتركها وهى تنظر الى السماء وتشعر أن أبواب

الحظ انفتحت لها أخيراً .. عاد "خالد" وهو يحمل كأسين من الخمر وأعطاهما

واحداً .. نظرت بريبه الى كأسها وقالت:

-ده عصير؟

افنجر "خالد" ضاحكاً وقال:

-عصير .. آه عصير .. عصير قصب .. بوزع فى حفلة عيد ميلادى على

الضيوف عصير قصب

ابتسمت بتوتر وقالت:

-لو خمره فأنا مبشر بهاش

أخذ "خالد" رشفة من كأسه وقال:

-ليه مبشر بيهاش

هزت كتفيها وقالت بارتباك:

-مش عارفه .. عشان حرام

مط "خالد" شفتيه وقال:

-سيبك من الشيوخ اللى مفيش وراهم حاجة الا انهم يحرموا كل حاجة مش

على مزاجهم .. ناقص يقولوا الهوا اللى بنتنفسه هو كمان حرام

قالت "سهى" بارتباك:

-بس أنا بيتهيألى ان فى آيه بتقول ان الخمره حرام .. انا مش عارفه الآيه ..

بس بيتهيألى كده

قال "خالد" وهو ينظر اليها:

-الحرام هو انك تشربي كمية كبيرة .. لكن لو كمية صغيرة مفيهاش مشكلة مش  
هتضرك .. تعرفى أصلاً ان الخمرة مفيدة جداً وليها فوايد كتيرة وان فى آيه فى

القرآن بتقول كده

قالت "سهى" بدهشة:

-بجد

أوماً "خالد" برأسه وقال:

-أيوة بجد .. الآية فى سورة البقرة وبتقول : " يسألونك عن الخمر والميسر قل  
فيهما منافع للناس "

لم يكن ما قاله "خالد" سوء تأويل للآيه فقط بل تحريف للآية الكريمة التى تقول  
{يَسْأَلُونَكَ عَنِ الْخَمْرِ وَالْمَيْسِرِ قُلْ فِيهِمَا إِثْمٌ كَبِيرٌ وَمَنَافِعُ لِلنَّاسِ وَإِنَّهُمْ أَكْبَرُ مِنْ  
تَفْعِهِمَا ..} بدا على "سهى" شئ من الاقتناع بكلامه .. فحثها قائلاً:

-اشربي هتعجبك أوى

قربت "سهى" الكأس من شفيتها وأخذت رشفة صغيرة وهى تسمع صوتاً

بداخلها يخبرها بأنها ترتكب اثماً ثم ما لبثت أن أسكتت هذا الصوت وتجاهلته

واندمجت مع "خالد" فى الضحك والمزاح

دخلت "سهى" الى بيتها وهى تسير على أطراف أصابعها حتى لا يستيقظ أهلها

..دخلت غرفتها وهى تشعر بنشوة وسعادة بالغة .. لقد قضت سهرة رانعه مع

فتى أحلامها والذي يبدو أنه أعجب بها هو الآخر

\*\*\*\*\*

فى اليوم التالى سافر كل من "عبد الرحمن" و "عثمان" الى القاهرة للبحث

عن ابنتهم "مريم" .. ذهبا الى العنوان الذى حصلوا عليه .. لم يجدا أحداً فى

المنزل .. انتظراها قرابة الخمس ساعات أمام الباب لا يتحركان من مكانهما ..

أكد لهما الجيران أنها تبيت فى بيتها كل يوم .. ولا تبيت برة البيت أبداً ..وأنها

تعود قبل المغرب من عملها .. انتظراها حتى رأى فتاة تصعد درجات السلم

وتقف أمامهما فى دهشة وهى تراهما يجلسان على السلم أمام باب شقتها ..  
وقف "عبد الرحمن" بمجرد أن رآها .. أخذ يمعن النظر فيها وقد اغرورقت عينا  
بالدموع .. قالت "مريم" بدهشة:

-أفندم .. فى حاجة حضرك .. دى شقتى  
اقترب منها "عبد الرحمن" فرجعت للخلف فى خوف وقالت:  
-فى ايه حضرتك

قال "عبد الرحمن" بتأثر شديد:

-انتى بنت "خيرى" .. بنت "خيرى" ولدى

نظرت اليه "مريم" بدهشة وقد عقد لسانها .. فقال بصوت مرتجف:

-ايوة انتى بنته .. أنا واثج انك بنته .. عرفتك بجلبى يا بنت ابنى .. أنى جدك  
"عبد الرحمن" يا بنتى .. أنى جدك

ازدادت دهشت "مريم" واضطرابها وهى تنقل نظرها بين الرجلين .. فأشار  
"عبد الرحمن" الى "عثمان" قائلاً:

-هاد عمك "عثمان" يا بنتى .. عمك أخو بوكى الله يرحمه ويحسن اليه

كانت "مريم" تشعر وكأن لسانها عقد من الصدمة .. اقترب منها "عبد  
الرحمن" فتوترت .. فقال "عثمان":

-وريها بطاقتك والصور يابوى يمكن تظمن شوى

أخرج "عبد الرحمن" من جيبه بطاقته وأعطاه لـ "مريم" أخذت تتفحص  
الاسم وقلبها يخفق بشدة .. مد يده وأعطاه عدة صور قائلاً:

-دى صور بوكى يا بنتى .. صورى أنى وهو وعمك "عثمان" وعمتك

"صباح" وعمك "ياسين" الله يرحمه ويحسن اليه

تطلعت "مريم" الى الصور وقد اغرورقت عيناها بالعبرات وهى تتطلع الى

صورة والدها وعائلته .. كانت تنظر صور والدها بشوق ولهفة .. تساقطت

عبراتها الصامته .. لم يتحمل "عبد الرحمن" أكثر فضمها بشدة الى صدره وهو  
يردد:

-بنت ولدى .. ما عاد سيبك واصل .. احنا اهلك يا بنتى .. احنا منك وانتى منينا

.. وحشتينى كثير .. دورت عليكى كثير .. على ولاد الغالى .. والحمد لله لجيتك ..

الحمد لله .. الحمد لله

رغم العبرات التى كانت تتساقط من عينيها وشهقات بكائها الصغيرة التى خرجت

منها رغباً عنها .. إلا أنها وجدت ابتسامة صغيرة وقد رسمت على شفثتها وأخذت تتمسك بيديها بملابس هذا الرجل الذى يعانقها .. تشبثت به وكأنها تخشى أن يتركها .. كالغريق الذى يتعلق بطوق نجاته .. لكم افتقدت هذا الحزن الحانى ..حزن عائلتها التى فقدتها منذ سنوات .. وذاقتم بعدهم مرارة الوحدة واليتم والحرمان .. وها هو الله الآن قد رزقها بعائلة والدها .. لتعوضها عن فقدان عائلتها .. ولتخرجها من وحدتها القاتلة المميته.

## الفصل الثامن

-دى صور بوكى يا بنتى .. صورى أنى وهو وعمك "عثمان" وعمتك "صباح" وعمك" ياسين" الله يرحمه ويحسن اليه تطلعت "مريم" الى الصور وقد أغرورقت عينها بالعبرات وهى تنطلع الى صورة والدها وعائلته .. كانت تنظر صور والدها بشوق ولهفة .. تساقطت عبراتها الصامته .. لم يتحمل "عبد الرحمن" أكثر فضمها بشدة الى صدره وهو يردد:

-بنت ولى .. ما عاد سيبك واصل .. احنا اهلك يا بنتى .. احنا منك وانتي منينا .. وحشتينى كثير .. دورت عليكى كثير .. على ولاد الغالى .. والحمدلله لجيتك .. الحمد لله .. الحمد لله

رغم العبرات التى كانت تتساقط من عينيها وشهقات بكائها الصغيرة التى خرجت منها رغباً عنها .. إلا أنها وجدت ابتسامة صغيرة وقد رسمت على شفثتها وأخذت تتمسك بيديها بملابس هذا الرجل الذى يعانقها .. تشبثت به وكأنها تخشى أن يتركها .. كالغريق الذى يتعلق بطوق نجاته .. لكم افتقدت هذا الحزن الحانى ..حزن عائلتها التى فقدتها منذ سنوات .. وذاقتم بعدهم مرارة الوحدة واليتم والحرمان .. وها هو الله الآن قد رزقها بعائلة والدها .. لتعوضها عن فقدان عائلتها .. ولتخرجها من وحدتها القاتلة المميته.

دلف ثلاثتهم الى داخل البيت .. رحبت "مريم" بهم بحماس قائلة:  
-اتفاضوا .. اتفضلوا

جلس جدها وعمها فى حجرة الصالون وأخذا يتطلعان الى الشقة المتواضعة  
وأثاثها المتواضع .. استأذنتهم ودخلت المطبخ لتعد لهم الشاى .. لم تشعر  
بنفسها إلا وهى تسجد شكراً لله على أرض المطبخ .. تشكره لأنها أخيراً ستشعر  
أنها وسط عائلة كأى فتاة أخرى .. لها عم وجد وعمه .. يا ما أحلى ذلك .. أخذت  
تتسائل ترى هل جدتها على قيد الحياة .. هل لدى عمها وعمتها أطفال .. هل  
سيرحب الجميع بها .. لكم تتمنى رؤيتهم جميعاً .. والتعرف عليهم .. عادت  
بلهفة حاملة أقداح الشاى وقدمتها اليهما .. جذبها جدها من يدها وأجلسها  
جواره قائلاً:

-تعالى يا بنت الغالى .. اجعدى جمبى اهنه .. حاسس انى شامم فيكى ريحة  
المرحوم "خيرى"  
ابتسمت له وجذبها الى حضنه وقبل رأسها .. ابتسمت فى سعادة .. رفعت رأسها  
وقالت:

-أنا لسه مش مصدقة .. حسه انى بحلم .. أنا فرحانه أوى .. فرحانه أوى انكوا  
جيتوا وانكوا دورتوا عليا  
قال "عبد الرحمن" بتأثر:

-من يوم ما عرفت بموت أبوكى وأنا عم دور على ولاده .. والحمد لله لجيتك يا  
بنتى .. الحمد لله

قال "عثمان" مستفهماً:

-انتى عايشه لحالك اهنه

نظرت اليه وابتسمت بخجل قائلة:

-أيوة عايشة لوحدى

شعرت فوراً بالألفة مع جدها .. لكنها كانت متوجسه خيفه من عمها .. ربما  
لتعبيراته الجامدة التى تظهر على ملامح وجهه .. ربما لو ابتسم لها لذاب الجليد  
قليلاً .. نظرت الى جدها قائلة:

-أنا هقوم أحضر العشا

قال "عثمان": "

-لا نبجى ناكل فى البيت ان شاء الله .. يلا لىمى خلجاتك عشان تيجي معانا  
نظرت اليه "مريم" بدهشة وشعرت بالإضطراب قائله:

-آجى معاكوا فىين

قال "عثمان": "

-تيجي معانا البلد .. النجع .. بيت أهل أبوكى

بدت عليها الحيرة فقال "عبد الرحمن": "

-مش معجول نسيبك عايشه اهنة لحالك يا بنتى .. انتى مهما كان بنت وصغيرة  
والدنيا معدتش أمان

ارتطمت عيناه بالدبلة فى أصابع يدها اليمنى فابتسم قائلاً:

-انتى مخطوبة يا بنتى ؟

نظرت "مريم" الى دبلتها ولمستها بأصابعها بحزن وقالت بصوت خافت:

-مكتوب كتابى

اتسعت ابتسامة جدها وقال:

-ما شاء الله .. خلاص كلى جوزك ييجى عشان نتعرف عليه ويتعرف علينا

عشان يعرف انك ليكى أهل وعزوة

ترقرقت العبرات فى عينيها وقالت بصوت مرتجف:

-هو .. ميت

ظهر الحزن على وجه جدها وقد شعر بالحزن الذى بداخلها .. قال "عثمان": "

-وليه لابسه دبلته .. مات الله يرحمه .. لازم تجليها للناس تفتكر مخطوبه

تضايقت من طلب عمها .. لكنها تماكت "مريم" نفسها وأخفت حزنها وضيقها

سريعاً .. وابتسمت قائله:

-هو تيته موجودة .. يعنى عايشه ؟

قال "عبد الرحمن" باستغراب:

-تيته .. تيته مين ؟

قال "عثمان": "

-تجصد أماى يا بوى .. ابيوه عايشه

ابتسمت بسعادة وقالت:

-نفسى أشوفها أوى .. بابا الله يرحمه كان بيحكلى عنها كثير

ربت "عبد الرحمن" على ظهرها قائلاً:

-وهى كمان نفسها تشوفك كثير .. هى مستنيانا .. يلا جومى يا بنتى جهزى  
حالك

قالت "مريم" بتردد:

-بس مش هينفع آجى كده مرة واحدة .. يعنى أنا عندى شغل .. ومش عارفه ..  
مكنتش متخيلة أبداً انى هفارق البيت ده  
قال "عثمان" بحده:

- عيزانا نسيبك لحالك اهنه ولا ابيه .. ليه عينتك مفياش راجل ولا ابيه  
قالت "مريم" بسرعة:

-لأ مش قصدى يا عمو .. بس أنا أقصد ان فى مصالح ناس فى ايدي .. يعنى فى  
الشغل .. ومينفعش أمشى كده فجأة من غير معرف حد .. وكمان معرفش أنا  
طول عمري عايشه هنا .. معرفش عمري ما روحت فى مكان تانى غير هنا  
قال "عبد الرحمن" وقد شعر بالحيرة والتوتر داخلها:  
-طيب يا بنتى .. هجولك على اجتراح وان شاء الله يعجبك  
التفتت اليه قائله:

-اتفضل يا جدو

-بصى يا بنتى .. هنسيبك اهنه اسبوع .. تفكرى منيح .. وتعرفى صاحب الشغل  
انك هتمشى .. عشان بردك مصالح الناس اللى فى يدك متتعطلش .. وبعدين  
تيجي تعيشي حدانا شهر .. وتشوفى هترتاحى حدانا ولا ترجعى اهنه تانى  
قال "عثمان" بحده:

-كيف يعنى ترجع اهنه تانى يا بوى .. كيف تجول اكده

قال "عبد الرحمن" بصرامة بصوت مرتفع:

-مالك صالح يا "عثمان" .. الحكى بينى وبينها لا تتدخل واصل  
سكت "عثمان" على مضد .. التفت "عبد الرحمن" الى "مريم" وقال بحنان:  
-ايه جولك يا بنتى

ابتسمت "مريم" قائله:

-ماشى يا جدو موافقه

ابتسم "عبد الرحمن" وأخذها فى حضنه قائلاً:

-ربنا يبارك فيكى يا بنتى ويكملك بعجلك

نظرت اليه قائله:

-بلاش تروحوا النهاردة يا جدو .. خليكوا بايتين هنا النهاردة .. أوضة بابا  
وماما الله يرحمهم فاضيه .. وأنا بنصفها على طول .. باتوا فيها النهاردة  
ابتسم "عبد الرحمن" قائلاً:

-ماشى يا بنتى .. كيف ما بدك  
قالت له "مريم" بحماس:

-احكىلى عن المكان اللي عايشين فيه يا جدو

أخذ "عبد الرحمن" يحدثها عن بلدهم وبعض من عاداتهم وهى تستمع اليه  
وعلى ثغرها ابتسامه وفى عينها فرحه غابت عنها طويلاً .. قالت له عندما  
انتهى من حديث:

-أنا فرحانة أوى انى هعيش معاكوا هناك

قال "عبد الرحمن" وعلى ملامحه الجديه:

-قبل أى حاجه لازم تعرفى الأول حكاية التار اللي كان على أبوكى الله يرحمه  
لعيلة "المنفلوطى"

قالت "مريم" بهدوء:

-عارفه يا جدو

-عارفه ايه بالظبط يا بنتى ؟

-بابا الله يرحمه قالى ان فى حد عندكوا اتقتل وهما اتهمومها فى بابا الله يرحمه  
.. وعشان كده هرب من بلده وجه القاهرة .. بس هو معملش كده .. مش هو

اللى قتل الراجل اللي مات

سألها "عبد الرحمن":

-مجالكيش حاجه تانى

-لأ قالى كده بس .. وأصلاً مكنش بيحب يتكلم فى الموضوع ده

أوما "عبد الرحمن" برأسه قائلاً:

-فعلاً محدش فينا بيحب يتكلم فى الموضوع ده .. بس لازم تعرفى شئ ..

محدش يعرف ان أبوكى مات .. لأن لو عيلة "المنفلوطى" خبرت انه مات وان  
معندوش الابنت .. يبجى هياخدوا بتارهم من عمك "عثمان" يا بنتى .. وعشان

اكده خبر موت أبوكى ما هيخرجش من عيلتنا .. كلياتهم عارفين انه هربان بره

الصعيد .. لكن محدش يعرف انه مات الله يرحمه .. فهمتى يا بنتى ؟

أومات "مريم" برأسها وقد شعرت ببعض الخوف .. ثم ما لبثت أن تناست



خوفها وذكريات ماضى والدها .. و قامت "مريم" وحضرت العشاء لجدها وعمها .. ارتدت عباءة وشعرت بالخجل من الكشف عن شعرها بالرغم من أنهم محارمها .. كانت تشعر بالراحة مع جدها وكأنها تعرفه من زمان .. لكن خجلها الأكبر كان من "عثمان" الذى بدا جامداً فلم تستطع الشعور بالألفة تجاهه قضت "مريم" ليلتها وهى تشعر بالراحة والأمان .. لأول مرة منذ سنوات تشعر بالأمان وهى فى بيتها .. تشعر بأنها ليست بمفردها .. كانت من فرط سعادتها لا تستطيع النوم .. كلما سمعت صوتاً فى الخارج ابتسمت .. ياه لكم تفتقد العيش مع غيرها .. لكم تفتقد أن تسمع فى البيت أصوات وحركات غير صوت جهاز التلفاز .. أصوات آدمية تعيش معها وتتحدث معها .. قامت على آذان الفجر .. خرجت لكى تتوضأ فوجدت جدها وعمها وقد استيقظا .. ابتسمت لهما قائلة:

-صباح الخير

ابتسم "عبد الرحمن" قائلاً:

-صباح الخير يا بنتى

قال "عثمان": "

-صباح الخير يا بنت خوى

قال "عبد الرحمن": "

-سمعنا صوت مسجد جريب من انه

قالت "مريم" شارحه:

-أيوة يا جدو .. حضرتك انزل من العمار امشى شوية يمين هتلاقى المسجد

-طيب يا بنتى هننزل نصلى ونرجعك

أومات برأسها وأغلقت الباب خلفهما .. صلت الفجر وجلست تقرأ وردها ..

سمعت صوت جرس الباب .. شعرت بالخوف لأول وهله .. ثم مالبت أن تذكرت

جدها وعمها .. ابتسمت بحزن وهى تحاول أن تتذكر متى آخر مرة سمعت فيها

صوت هذا الجرس .. فتحت لهما وأدخلتهما .. قال "عثمان": "

-احنا هنمشى يا بنت خوى

قالت "مريم" بحزن:

-دلوقتى .. طيب نفطر سوا

قال "عبد الرحمن" بحزن:

-معلش يا بنتى بس جالنا تليفون ان جدتك بعافيه شويه

قالت بقلق:

-ليه مالها

-مفيش شوية تعب .. وكمان لينا مصالح هناك .. مينفعش نتأخر عليها واصل ..

انى كنت فاكرا اننا هنرجع امبارح

شعرت "مريم" بالأسى .. جذها جدها الى حضنه قائلاً:

-هو اسبوع واحد زى ما اتفجنا وهنجي ناخدك .. ماشى

أومأت برأسها قائله:

-ماشى يا جدو

آلمها رحيلهما سريعاً .. كانت تتمنى بقائهما فترة أطول .. طلبت من جدها ترك

الصور معها .. جلست على فراشها وهى تتطلع الى صور أفراد العائله وهى

مبتسمه وفرحه .. مضى وقت طويل لم تشعر فيه بهذه البهجة .. ذهبت الى

عملها والابتسامه بادية على محياها وحيث "مى" و "سهى" قائله:

-السلام عليكم .. ازيكوا يا بنات

قالت "مى": "

-وعليكم السلام ازيك يا "مريم"

قالت "سهى": "

-الحمدلله ازيك انتى

قالت مبتسمه:

-كويسة الحمد لله

قالت لها "مى" وهى تتمعن فى النظر اليها:

-خير .. شكلك مبسوط

قالت "مريم" بسعادة:

-جدا يا "مى" جدا

صاحت "سهى": "

-ايه اتخطبتى ؟

نظرت اليها "مريم" وبدا وكأنها سمعت حديث يضايقها .. فقالت بضيق:

-لأ

مطت "سهى" شفيتها قائله:

-أمال ايه اللى يفرح غير كده

قالت "مريم" بسعادة:

-امبارح زارنى جدى وعمى

قالت "مى" بدهشة:

-جدك وعمك!

قالت "مريم" بابتسامه واسعة:

-أيوه وليا كمان عمه وجده

هتفت "مى" بسعادة:

-بجد ولا تهزرى

-أيوه بجد

-ما شاء الله .. أخيراً عرفتى طريق أهلك

ضحكت بسعادة:

-ومش كده وبس .. عايزينى أروح أعيش معاهم كمان

قالت "مى" بدهشة:

-تعيشي معاهم فين ؟

-فى الصعيد

شهقت "سهى" قائله:

-الصعيد .. بتهرجى يا "مريم"

قالت "مريم" بهدوء:

-لأ مش بهرج .. دول كمان كانوا عايزنى أسافر معاهم امبارح .. بس أنا

مرضتش أسافر بسرعة كده

قامت "مى" من مكتبها وجلست أمام "مريم" قائله:

-بتتكملى بجد .. يعنى فعلاً هتسافرى الصعيد

قالت "مريم" بحيرة:

-مش عارفه يا "مى" حسه انى متلخبطه ..بس كل اللى أعرفه انى ليا أهل

ومش عايزه أبعد عنهم .. أنا تعبت أوى من العيشه لوحدى يا "مى" .. أنا حبه

أكون وسطيههم .. حبه أعيش معاهم .. بس هى فكرة الصعيد دى اللى مخوفانى ..

أنا مش عارفه نظام حياتهم ازاي .. وهعرف أعيش معاهم ولا لأ .. ومش عارفه

أصلاً هما كلهم هيتقبلونى وسطيههم ويحبونى ولا لأ .. خايفه أوى .. وعشان كده

جدو قالى أجرب شهر .. ولو ارتحت خلاص أفضل عايشه معاهم .. ولو

مرتحتش أرجع القاهرة تانى

قالت "سهى" بسخريه:

-وانتى فكرك هيسيبوكى ترجعى القاهرة .. أكيد لأ طبعاً .. مش هيخلوكى ترجعى

تعيشي لوحدك .. دول صعايده يا بنتى يعني بيغيروا على بناتهم موت

تنهدت "مريم" قائله بحيره:

-أنا استخرت ربنا .. وراضيه باللى يختار هولى

قالت "مى" بأسى:

-على الرغم من انى فرحانه انك أخيراً عرفتى أهلك وقابلتيهم بس اضايقت أوى

لما عرفت انك ممكن تسافرى ومترجعيش تانى

ابتسمت "مريم" قائله:

-عارفه يا "مى" انتى هتوحشيني أوى بس حتى لو سافرت أكيد هاجى

هنا كل فترة .. وبعدين هيكون بينا تليفونات ان شاء الله

قالت "سهى" مبتسمه:

-ربنا يسعدك يا "مريم" انتى طيبه وتستاھلى كل خير

توجهت "مريم" الى مكتب "عماد" لكى تخبره بأمر سفرها وتركها للعمل قال

بوجوم:

-بصراحة أنا مضايق جداً انى هخسر واحدة زيك يا "مريم" .. انتى أفضل

ديزاينر عندى فى الشركة

ابتسمت قائله:

-متشكره يا أستاذ "عماد" ..بس فى كتير زمايلى هنا موهوبين أكثر منى

قال بجديه:

-لما أقولك انك أفضل ديزاينر يباه بقول الحقيقة ومش بجاملك

صمت قليلاً وبدا عليه التفكير ثم قال:

-طيب يا "مريم" أنا عندى اقتراح .. ايه رأيك تستمرى فى العمل فى الشركة

حتى وانتي مسافره

قالت "مريم" بدهشة:

-ازاى ؟

ابتسم "عماد" قائلاً:

- عن طريق الانترنت .. هنتواصل معاكى ونبعثك الأوردرز المطلوبة وانتي  
تنفيذها وتبعيتها على الميل ومرتبك يوصلك عن طريق البنك  
ابتسمت "مريم" وقد شعرت بسعادة غامرة لأنها لن تضطر الى ترك عملها  
الذى تعشقه .. قالت بسعادة:  
-بجد متشكرة جداً يا أستاذ "عماد" .. انا فعلاً مكنتش حبه أبداً أسيب شغلى  
لانى بحب شغلى أوى .. ومش متخيله انى ممكن أبعد عنه  
قال "عماد" بسعادة:  
-خلاص اتفقتنا .. وربنا يوفقك فى حياتك يا "مريم" انتى مش بس ديزاينر  
ممتاز .. لأ وعلى المستوى الشخصى بنت ممتازة كمان  
أطرقت رأسها بخجل وقالت لخفوت:  
-شكراً يا أستاذ "عماد" .. بعد اذنك  
خرجت "مريم" من مكتبه وقلبها يقفز فرحاً .. ستعيش وسط عائلتها وفى نفس  
الوقت ستستمر فى عملها بالشركة.

\*\*\*\*\*

جلس "عبد الرحمن" على المائدة مع زوجته و"عثمان" و "صباح" .. قالت  
زوجته بلهفه:  
-شكلها ايه يا حاج  
ابتسم "عبد الرحمن" قائلاً:  
-حلوة وصغيره بس سفيفه جوى شكلها مبتغذاش منيح  
قالت "صباح":  
-متجوزه يابوى ؟  
-لا .. كان مكتوب كتابها بس جوزها مات  
قالت زوجته بحسره:  
-لا حول ولا جوة الا بالله .. يعنى اترملت جوام جوام  
قال "عبد الرحمن":  
-بس هى لساتها صغيره .. والحياة أدامها .. وان شاء الله نجوزها حدا من  
عيلتنا واحنا أولى بلحمنا

أوما "عثمان" برأسه قائلاً:  
-اييوه يا بوى نشوفلها حدا من عيلتنا مينفعلش تبجي لحالها اكده خاصه من بعد  
ما اترملت .. مش عايزين حدا يتكلم عليها  
-ان شاء الله يا ولدى .. ان شاء الله

\*\*\*\*\*

صاح "حامد" بحنق:  
-بعتلى المحامى بتاعه عشان يفض الشراكه اللى بينى وبينه .. وكل ده عشان  
ايه عشان شافنى ببوس موظفه عنده .. وهو مال أهله هى كانت من بقيت عيلته  
قال "سامر" بحزم:  
-انت عارف كويس يا "حامد" ان "مراد" صعيدي وطبعه حامى .. يعني أكيد  
مش هيشوف منظر زى ده ويسكتلك  
قال "حامد" بحنق:

-ده راجل متخلف .. تصور طرد البنت من الشركة .. طبعاً جبتها وشغلتها عندى  
فى شركتى .. ولا الحوجه لسى "مراد" خالص  
قال "سامر" بضيق:

-بس مكنش يصح تقول لـ "مراد" الكلام اللى سمعته من "طارق" ده  
صاح "حامد" بغضب:  
-هى مش دى الحقيقة ولا ايه .. مراته سابته زى الكلب الجربان واطلقت منه  
وراحت اتجوزت واحد تانى .. ولما فكر يخطب تانى والبنت رحبت بيه .. أول ما  
عرفت ان رجله مبتوره رفضته على طول .. كدبت أنا ولا دى الحقيقة  
قال "سامر" بغضب:

-انت ليه معندكش احساس كده هو ذنبه يعني .. دى حادثة قضاء وقدر ..  
وبعدين دى حاجه متعيبوش "مراد" راجل وشهم وصعب دلوقتى تلاقى واحد  
زيه

صاح "حامد" بسخريه:  
-ليه ان شاء الله جايب الديب من ديله .. شكلكوا كلكوا عينه واحده  
صمت "حامد" قليلاً وبدا عليه التفكير ثم قال وهو يحاول أن يكظم غيظه :

-فاكر انه لما يطردنى بره الشركه هسكتله .. بكرة يشوف أنا هعمل فيه ايه  
قال "سامر" بقلق :

-هتعمل ايه يعني يا "حامد"  
نظر اليه "حامد" وقال بحزم :  
-اتفرج واتعلم

شعر "سامر" بالقلق من التعبيرات الباديه على وجه "حامد" .. ونظر اليه  
يحاول أن يخترق عقله ليعلم فيما يفكر .. وماذا ينوى أن يفعل .. وكيف ينوى  
الإنتقام من "مراد "

\*\*\*\*\*

-مش هتصدج يا "جمال" .. لجينا بنت "خيري" الله يرحمه  
هتفت "صباح" بهذه العبارة وهى تلتقى بـ "جمال" سراً فى مكانهما المعتاد  
قال "جمال" بلهفه:

-بنت بس معندوش ولاد ؟  
قالت "صباح": "

-لا معندوش ولاد .. بنت بس والبنت التانيه ماتت معاه فى الحادثه هو ومرته  
أوماً "جمال" برأسه وقال وهو يمعن فى التفكير:  
-يبجى اكده لو عيلة "المنفلوطى" فكروا ياخدوا بتارهم منيكم يبجى أخوكى  
"عثمان" هو اللي عليه الدور  
قالت "صباح" بهلع:

-وايه اللي هيعرف عيلة "المنفلوطى" ان أخويا "خيري" مات وان عنديه بنت  
واحد

قال "جمال" وقد لمع عيناه بخبث:  
-معاكى حج .. وايه اللي هيعرفهم

نفض "جمال" الأفكار من رأسه واقترب من "صباح" قائلاً:  
-اشتجتلك جوى يا "صباح"  
حاول تقبيلها فابتعدت قائله:

-آني مضايجه منك جوى يا "جمال" .. حسه انك مش رايد تتجوزنى  
قبلها قائلاً:

-كيف تجولى اكده يا "صباح"  
-أمال ليه مش بتطلبنى من أبوى يا "جمال" .. أنى خايفه حد يتجدملى ..  
وأبوى يوافق عليه  
قال "جمال" وهو يغير الموضوع:  
-لما بنت "خيري" توصل عرفيني يا "صباح"  
قالت "صباح" بحدده:  
-وانت عايز تعرف ليه يا "جمال"  
قال "جمال" بنفاذ صبر:  
-عرفيني وخلص ملكيش صالح  
نهض وقال وهو يغادر:  
-فتك بعافيه أنا راجع الشركة عندى شغل كثير  
نظرت اليه "صباح" بغل وهو يبتعد.

\*\*\*\*\*

التف "مراد" حول طاولة الطعام مع أسرته فى أحد المطاعم الفخمة .. قالت  
"سارة" التى كان يبدو عليها الشرود والتفكير:  
-أبيه أنا عايزة أشتغل عندك فى الشركة  
نظر اليها "مراد" بدهشة قائلاً:  
-تشتغلى فى الشركة  
-أيوة  
-تشتغلى ايه يا "سارة"  
قالت بلهفه:  
-أى حاجه فى المكان اللى انت تختاره  
فكر "مراد" قليلاً ثم قال:  
-لا يا "سارة" مش هينفع  
قالت بالحاح "  
-ليه بس يا أبيه أنا هكون معاك .. وبعدين حطنى فى مكان مختلطش فيه بحد ..  
يعنى يكون اللى فى المكتب معايا بنات بس .. عشان خاطرى يا أبيه أنا حسه



بزهدق فظيع .. وبعدين هروح انا وانت سوا ونرجع سوا مش همشى لوحدى تنهد "مراد" ثم قال:

-طيب يا "سارة" هفكر فى الموضوع وارد عليكى قالت بحماس:

-بس عشان خاطرى مترفضش .. بجد أنا حبه أوى أشغل فى الشركة ابتسم قائلاً:

-خلاص سبيني أفكر

تلاقت نظرات "سارة" مع نظرات "نرمين" الى ابتسمت اليها بخبث .. فتجاهلتها "سارة" وتناولت طعامها فى صمت .. بعد قليل جاء لـ "مراد" اتصال هام فإستأذن منهم ليتحدث بالخارج .. خرج من المطعم ووقف على جانب يتحدث فى الهاتف .. ما كاد ينهى اتصاله حتى سمع سيدتان تخرجان من المطعم تقول احدهما للأخرى:

-خدتى بالك من "مراد خيرى" وعيلته كانوا جوه

-أيوة شوفته صعبان عليا أوى بعد اللى حصله فى رجله

قالت الأولى فى أسى:

-وكم ان مراته اللى سابته واتجوزت واحد غيره .. مسكين صعبان عليا أوى

احساس صعب برده انه يحس ان مراته سابته عشان اعاقته واتجوزت واحد

تانى وخاصة انه لسه متجوزش لحد دلوقتى

-طبعا يا بنتى صعب انه يلاقى واحده ترضى بيه أنا عن نفسى مرضاش أتجوز

واحد أحس معاه بالنقص والناس بتبصله بشفقه وصحابي بأه يستلمونى تريقه

ملقتيش الا واحد معاق

رحلت المرأتان .. دون أن تنتبها الى "مراد" الواقف فى أحد الأركان على مدخل

المطعم .. شعر "مراد" بألم وغضب يغزوان قلبه وكيانه كله .. هذا ما يلاقيه من

الناس إما الرفض وإما السخرية وإما الشفقة .. وثلاثتهم يكرههم كرهاً .. ولا

يقبل على نفسه احداهن أبداً .. توجه الى داخل المطعم وقال لأسرته:

-يلا عشان نمشى

نظرت اليه "نرمين" قائلة:

-لا يا أبيه سيينا أعيدين شويه لسه مطلبناش الحلو

صاح "مراد" فيها بغضب:

-قولت قومي حالاً

نظرت اليه أمه قائله:

-بتزعلقها ليه يا "مراد" .. خلينا أcedين شوية

نظر الى أمه قائلاً بحزم:

-أنا عايز أمشى عندى شغل .. ومش هينفع أسيبكوا لوحدكوا .. يلا قوموا معايا

نهضت الفتاتان وهما تشعران بالحرق والضيق .. شعرت والدته بأن شيئاً ما

أصابه أو أن المحادثة الهاتفية عكرت مزاجه للغايه .. أوصلهم الى المنزل دون

أن يتفوه ببنت شفه .. ثم انطلق فى طريقه وهو لا يدرى وجهته .. فقط يدرى

شئ واحد .. لا شئ فى هذه الدنيا يستطيع مداواة جراحه أبداً.

\*\*\*\*\*

تعددت اللقاءات بين "خالد" و "سهى" .. كانت تخرج معه فى سيارته .. أخذها

الى أماكن عده .. كانت تشعر بسعادة غامرة وهى تركب تلك السيارة الفارهه ..

وتحاول الاقتراب منه أكثر فأكثر .. كانت تتمنى ألا تفترق عنه وأن توقعه فى

حبها .. شعرت بأنها حققت هذا الهدف بالفعل .. فها هو "خالد" وقد أغمرها

بالحدايا والفسح .. كانت تتمنى وهو يلبي .. ابتسمت لنفسها بسعادة والهواء

المنعش يداعب وجهها من شباك السيارة .. مد "خالد" يده ونزع قطعة القماش

الصغيره التى تسميها مجازاً حجاب .. ثم نظر اليها قائلاً:

-كده شكلك أحلى

ابتسمت له وعدلت من تصفيف شعرها وهى تنظر الى المرأة

لمس "خالد" شعرها قائلاً:

-طالما شعرك حلو كده بتخبيه ليه

ضحكت قائله:

-تعود بأه

-لا مش عايزك تلبسيه تانى شكله وحش عليكى

ابتسمت قائله:

-بس لازم ألبسه أدام أهلى وأنا نازله من البيت .. بس أوعدك أول ما نتقابل

هقلعه على طول

ابتسم قائلاً:

- ماشى يا جميل .. تحبى بأه تروحي فين النهاردة

قالت بدلع:

- اختار انت المكان

رفع حاجبه بخبث قائلاً:

- ومش هتعترضى

قالت بدلال:

- تؤ مش هعترض

بعد ربع ساعة من القيادة أوقف سيارته أمام العمارة التى يقطن فيها .. نظرت

"سهى" الى العمارة بريبه ثم التفتت الى "خالد" قائله:

- مش ده بيتك

ابتسم قائلاً:

- أيوة يا حبيبتي

أوقف السيارة ونزل منها والتف حولها وفتح لها الباب .. نزلت وبدا عليها

التردد ثم قالت:

- طيب مينفعش نروح مكان تانى

ابتسم لها قائلاً:

- انتى خايفه منى ولا ايه

قالت بسرعة:

- لأ طبعا بس خايفة يعنى ان حد يشوفنا

جذبها من يدها قائلاً:

- محدش هنا يعرفك .. ولو عليا فمحدث له حاجه عندى

صعدت معه وهى تشعر بخفقات قلبها المتسارعه .. عاد الصوت بداخلها يخبرها

بأنها تفعل شيئاً خاطئاً وبأنها تمادت كثيراً وتنازلاتها تكبر يوماً بعد يوم .. لكنها

أسكتت هذا الصوت كالمعتاد وقالت له "أنا مش هعمل حاجه غلط مجرد زيارة

صغيرة وهنزل على طول أنا كبيرة وعاقلة وأقدر أحافظ على نفسي كويس " ..

دخلت الى البيت وهى متوتره قليلاً .. فضلت الجلوس فى الشرفة عاد اليها وقدم

لها كأساً فقالت بدهشة:

- بالنهار كده

ضحك قائلاً:

-وفيهما ايه يعني هي الخمرة ليها وقت محدد  
قالت بقلق:

-لا بلاش مش عايزه  
ابتسم قائلاً:

-خلاص براحتك  
نظر اليها قائلاً:

-انتى ليه متوتره كده  
-بصراحة أصل دى أول مرة أروح بيت واحد  
-ما انتى جيتي هنا قبل كده  
قالت بسرعة:

-بس يومها كان فى حفلة بس النهاردة مفيش غيري  
اقترب منها قائلاً:

-ماهو حلاوتها ان مفيش غيرك  
ابعدته عنها قائله:

" -خالد " انت عايز منى ايه بالظبط  
لمعت عيناه قائلاً:

-لسه مفهمتيش .. حبيبتي أما عايز أتجوزك  
شعرك بسعادة غامرة تجتاح كيائها كله .. شعرت وكأنها لمست النجوم بيديها  
وحصلت على نجمة منهم .. قالت بحبور:

-بجد يا "خالد" .. بتتكلم جد .. عايز تتجوزنى بجد  
ابتسم واقترب منها قائلاً:

-أيوة طبعاً يا حبيبتي .. بتكلم جد .. من يوم ما شوفتك وانتى دخلتى دماغى ..  
ومبقتش بتمنى غير انك تكونى ليا

اتسعت ابتسامتها .. لكنها تحطمت وتلاشت عندما سمعته يقول:  
-بس هنتجوز عرفى

صمتت قليلاً تحاول استيعاب ما قال .. ثم دفعته "سهى" بعيداً عنها وقالت  
بغضب:

-عرفى .. انت ازاي تعرض عليا حاجه زى كده .. انت فاكرنى ايه

حاول أن يقترب منها مرة أخرى فأبعدته عنها بعنف .. صاح غاضباً:  
-انتى هتترسمى عليا ولا ايه .. ما انتى كنتى عارفه من البداية ان ده هيجصل  
نظرت اليه وهى غير مصدقة أذنيها فأكمل بتهكم وسخرية قائلاً:  
-بقيتى بتتججى بأى حجة عشان تجيلى المكتب ولما عزمته على عيد ميلادى  
كنتى طايره من الفرحة .. ورقصتى معايا يوم عيد ميلادى ومفيش حاجه قولتهاك  
وعارضتيني فيها حتى لما ادتلك خمرة تشربيهها نفذتى كلامى ورضيتى تخرجى  
معايا وتقبلى منى هدايا وتيجى معايا بيتى وانتى عارفه انى عايش لوحدى ..  
فبلاش بأه الرسم ده وطالما أنا وانتى فاهمين بعض كويس وعارفين كل واحد  
فينا عايز ايه من التانى بياخلىنا حلوين مع بعض وبلاش نعكر مزاجنا بكلام  
ملوش لزمه

كانت تشعر بصدمة شديدة .. من كلماته التى ألقاها على مسامعها .. حاول  
الإقتراب مرة أخرى .. ابتعدت عنه فوراً وتوجهت الى باب البيت وخرجت  
مسرعه .. نزلت درجات السلم وهى تكاد لا ترى من الدموع التى تنهمر من  
عينيه .. أوقفت سيارة أجرة .. وأسرعت مبتعدة عن هذا المكان وهذا الشخص  
الذى أشعرها أنها فتاة رخيصة يمكن شرائها ببضع هدايا وبضع كلمات.

\*\*\*\*\*

هاهى على موعد مع خطاب آخر من خطابات "ماجد" .. فتحت الخطاب بلهفة  
شديدة .. لكم كانت تتمنى وجوده معها لتخبره بأمر عائلة والدها .. قرأت ما كتبه  
"ماجد" لها:

-زوجتى الحبيبة "مريم" .. كيف هو حالك مع الله .. لا أريد أى شئ أن يشغلك  
عن وردك وأذكارك وقيامك وفعلك للخير يا "مريم" .. أتذكرين حديثنا معاً  
ودعائنا معاً بأن نلتقى أنا وأنت فى الجنة من بعد هذا الفراق الذى كُتب علينا ..  
أنا هنا لا أدري الى أين أوصلتنى أعمالى يا "مريم" وليس لى سواكى ليهدينى  
ما يخفف عنى حملى الثقيل .. لن أطلب منك شيئاً محدداً .. لا أريد سوى ما فى  
استطاعتك فعله .. من أجلى ومن أجلك .. حبيبك "ماجد"  
ابتسمت "مريم" وترقرقت العبرات فى عينيه وهى تعلم جيداً ما ستقدمه له ..  
توجهت الى أحد الأدراج فى غرفتها وأخرجت علبة صغيره .. فتحتها وأخرجت  
منها القطع الذهبية التى بها .. وفى الصباح ذهبت الى الصائغ وباعت ما

بجوزتها .. أخذت المال والابتسامه على شفقتها .. توجهت الى أحد المساجد التي تم بنائها حديثاً فى شارعها .. كان مسجداً صغيراً لم يتم الإنتهاء من تشطيبه حيث توقف استكمالها بسبب قلة الموارد المالية .. سألت عن صاحب المسجد وذهبت الى محله الذى يقع فى نفس الشارع .. كان شيخاً ديناً .. أعطته "مريم" ما بحوزتها من مال جمعه من بيع مصوغاتها ومصوغات والدتها وأختها .. وطلبت منه أن يقوم بتشطيب المسجد بهذا المال ويقوم بفرش المسجد وشراء المصاحف .. شكرها الرجل كثيراً ودعا لها بسعة الرزق .. كانت "مريم" تشعر بسعادة غامرة لأنها لم تتصدق عن "ماجد" فقد بل شملت صدقتها أمها وأبيها وأختها .. وتذكرت حديث رسول الله صلى الله عليه وسلم : " من بنى لله مسجداً يذكر فيه اسم الله تعالى بنى الله له به بيتا في الجنة " .. دعت الله أن يتقبل الهدية التي أهدتها لأفراد عائلتها .. قال لها الرجل:  
-قوليلي يا بنتى الصدقة ليكي ولا لحد متوفى

قالت "مريم" باستغراب:

-لحد متوفى .. بس ليه حضرتك بتسأله ؟

قال الرجل مبتسماً:

-عشان يا بنتى احنا هنعمل يافته بأسماء الناس المتوفيه واللى أهلهم اتبرعوا للمسجد وهنلقها فى المسجد عشان الناس تدعيهم بالرحمة والمغفرة  
أومأت "مريم" برأسها وأملته أسماء أبيها وأمها وأختها .. فقال الرجل بأسى:  
-ربنا يرحمهم ويغفر لهم .. ماتوا مع بعض

قالت "مريم" بحزن:

-أيوة فى حادثة

نظر اليها الرجل مشفقاً وقال:

-ربنا يجعل الصدقه دى فى ميزان حسناتهم وحسناتك يا بنتى

تمتت بخفوت:

-آمين .. ولسه فى كمان جوزى

نظر اليها الرجل بحزن بالغ وقال:

-لا حول ولا قوة الا بالله .. ربنا يعوضك يا بنتى ويصبر قلبك .. قوليلي اسمه

قالت "مريم" بحزن:

"-ماجد" ... "ماجد خيرى"

## الفصل التاسع

فى اليوم التالى ذهبت "سهى" الى عملها فى وجوم .. كان يبدو عليها الحزن وعلى عينيها آثار البكاء .. تطلعت "مريم" و "مى" كل منهما الى الأخرى .. لم تتحدث "سهى" طوال اليوم ولم تتأكد فى "مى" كعادتها .. فقط انكبت فوق حاسوبها لكن بدا وكأنها لا تحرك الماوس تحت أصابع يدها .. فقط تنظر الى الشاشة شاردة .. ظلت هكذا طوال اليوم حتى آتى موعد الانصراف .. قالت "مى" لـ "مريم": "

-ها خلصتى

قالت "مريم" وهى منهمة فى علمها:

-لألسه .. عايذة ألحق أخلص كل الشغل اللى ورايا قبل سفرى ان شاء الله

سألته "مى" قائلة:

-ليه مش أستاذ "عماد" قالك انك هتشتغلى عن طريق النت

نظرت اليها "مريم" ويبدو على وجهها علامات التعب وقالت:

-أيوة بس أكيد أول كام يوم مش هعرف أشتغل هكون مشغوله مع أهلى ..

وعشان كده حابه أخلص جزء كبير من شغلى .. عشان ما أتأخرش فى تسليم

الشغل

أومأت "مى" برأسها وقالت:

-ماشى يا حبيبتى .. أنا ماشية بأه أشوفك بكرة

-مع السلامة

خرجت "مى" وألقت "مريم" نظرة على "سهى" لتجدها فى دنيا أخرى تماماً

.. نادتها قائلة:

"-سهى" .. "سهى"

التفتت اليها "سهى" قائلة:

-أيوه يا "مريم"

نظرت اليها "مريم" بقلق وقالت:

-انتي مش هتمشى ؟

قالت بوجوم:

-آه .. لا .. لسالى شويه

لحظات وانفجرت "سهى" فى البكاء .. شعرت "مريم" بقلق شديد اتجاهها

فهبته واقفه واتجهت اليها وضعت يدها على كتفها قائله:

"-سهى" مالك فى ايه .. بتعيطي ليه .. "سهى"

حاولت "سهى" تمالك نفسها ووقف بكائها .. أعطتها "مريم" منديلاً من

حقيبتها فكفكت دموعها وقالت بصوت مرتجف:

-مفيش أنا كويسه

جذبت "مريم" أحد المقاعد وجلست بجوارها قائله:

-لا مش كويسه طبعاً .. قوليلي مالك ايه مضايقتك يمكن أقدر أساعدك

نظرت اليها "سهى" وقالت:

-مش هتقدرى تساعديني

-جربي

صمتت "سهى" قليلاً ثم قالت بخجل:

-مش هقدر أحكيلك على المشكلة .. بس كل اللي أقدر أقولهولك انى اتهنت

اهانه جامده أوى أوى .. والمشكلة اللي تعبانى انى شايفه نفسى غلظت فعلاً

واستحق الإهانه دى

نظرت اليها "مريم" قائله:

-طيب طالما شايفه انك كنتى غلط .. يبقى تحاولى تصلحى الغلط ده

قالت "سهى" بمرارة:

-ياريت بس معدش ينفع اللي حصل حصل

قالت "مريم" بهدوء:

-لو معرفتيش تصلحى الغلط .. يبقى على الأقل توقفيه فوراً ومتكرريهوش تانى

أبدأ مهما حصل

نظرت اليها "سهى" وقالت بأعين دامعه:

-أنا حسه انى واحده رخيصة أوى .. مش عارفه أعمل ايه وازاى أشيل



الإحساس ده من جوايا

ربتت "مريم" على كتفها وقالت:

"سهى" هكلمك بصراحة لاني بحبك .. ولانى طلبتى منى النصيحة .. "سهى"  
اعرفى حاجه واحده .. سعادتك فى قربك من ربنا مش فى بعدك عنه .. ربنا  
مبيحرمش الا الحاجات اللى بتضرنا فعلاً .. هو اللى خلقنا وهو أدرى بينا من  
نفسنا .. احنا اتخلقنا فى الدنيا دى مش عشان ناكل ونشرب وننام وبس .. لأ ..  
احنا اتخلقنا عشان نعبد ربنا .. نعبده صح زى ما قالنا .. مش نعبده بمزاجنا ..  
أكد كلنا بنغلط .. بس فى فرق بين غلظه وغلطه .. وحتى لو اتنين غلطوا نفس  
الغلطه .. فى فرق بينهم .. لان الأول ممكن يتمادى فى الغلط ويستمر فيه ويموت  
عليه ويبعث يوم القيامة عليه .. أما التانى يعمل الغلط ويندم عليه ويبكى من  
الندم عشان غلط فى حق ربنا قبل ما يكون فى حق نفسه ويقرر انه ميعملش  
الغلط ده تانى طول عمره وربنا يقبل توبته ويموت وهو مفيش عليه الذنب ده  
كانت "سهى" تستمع اليها فى استكانه وهدأت نفسها بعد سماع تلك الكلمات ..  
قالت "سهى" بشك:

-يعني لو مرجعتش للغلط ده تانى ربنا هيسامحنى أكنى مغلطتش أصلاً  
ابتسمت "مريم" قائله:

-أيوة بالظبط كده .. الغلط ده يتمحى تماماً .. بس بشرط .. تكون توبه بجد ..  
وتندمى بجد .. وتقررى بجد انك مترجعيش لاي حاجه غلط بتعملها .. وتصلحى  
من نفسك وتبعدى عن الحاجات اللى تغضب ربنا  
أومأت "سهى" برأسها ثم قالت ل "مريم":

-على فكرة متفكريش ان الموضوع كبير .. لأ دى حاجه بسيطة بس أنا اللى  
حساسه شويه .. يعتبر مفيش حاجه أصلاً بس هما كلمتين بس اتقالولى  
واضايقت منهم

ابتسمت "مريم" قائله:

-تمام يا جميل .. ولو احتجتى تتكلمى تانى أو تسألنى عن حاجه أنا موجوده  
ابتسمت "سهى" قائله:

-على فكرة انتى طيبة أوى .. قفل آه .. بس طيبة

ضحكت "مريم" قائله:

-أنا قفل

شاركتها "سهى" ضحكاتها قائله:  
-ده القفل يقولك قومی وأنا أعد مطرحك  
ثم قالت:

-بس بنت جدعه .. وطيبة .. ومش غلسة وبتحدفى طوب زى "مى"  
قامت "مريم" قائله وهى تتوجه الى مكتبها:  
"مى" على فكرة طيبة أوى هى كمان .. لو قربتى منها هتحببها  
جلست "مريم" على مكتبها .. ونظرت اليها "سهى" مبتسمة ثم عادت الى  
عملها.

\*\*\*\*\*

طرقت "سارة" باب غرفة المكتب الخاصة بـ "مراد" فى الفيلا .. سمعت صوته  
يدعوها للدخول .. دخلت وأغلقت الباب بهدوء وتقدمت وهى متوترة قليلاً وقالت  
:

-معلش يا أبيه عطلتك

نظر اليه "مراد" الذى بدا منهمكاً فى قراءة احد الكتب وقال:

-خير يا "سارة"

قالت بارتباك:

-انت قولتلى هتفكر فى موضوع شغلى فى الشركة

وضع "مراد" الكتاب أمامه على المكتب وبدا عليه التبرم وقال بنفاذ صبر:

-نفسى أفهم هتستفادى ايه

قالت بحنق:

-يا أبيه أنا زهقانه من الأعدة فى البيت .. عايزة أحس انى بعمل حاجه مفيدة ..

وبعدين هو أنا هشتغل عند حد غريب .. أنا هشتغل عندك فى الشركة

صمت "مراد" وبدا عليه التفكير .. طال صمته .. ثم نظر اليها قائلاً:

-ماشى يا "سارة" أنا موافق تشتغلى عندى فى الشركة

اتسعت ابتسامتها وقالت بسعادة:

-بجد يا أبيه .. يعنى خلاص وافقت

قال "مراد" بحزم:

-أيوة .. بس بشرط هتشتغلى فى المكان اللى أنا أحده

أمأت رأسها وقالت بحماس:

-ماشى يا أبية موافقه

قال "مراد" وهو يعود أخذ الكتاب من فوق المكتب:

-خلاص بكرة ان شاء الله جهزى نفسك عشان ننزل سوا

قالت مبتسمه بحماس:

-ماشى .. شكراً يا أبية

\*\*\*\*\*

قالت "نرمين" لـ "سارة" بسخرية وهما جالستان فى غرفة هذه الأخيرة:

-والله .. طيب كويس أوى انه حن واتعطف واتكرم عليكي ووافق انك تشتغلى

فى شركته

ضحكت "سارة" وشفقت بيدها قائلاً:

-مش مصدقه .. الحمد لله انه وافق

قالت "نرمين" بحنق:

-أنا مش عارفه ايه السجن اللي احنا عايشين فيه ده .. ما البنات بتشتغل عادى

وبيخرجوا لوحدهم عادى .. اشمعنى احنا يعني اللي محبوسين كده .. مبنخرجش

الامع "مراد" أكننا أطفال فى الحضانه .. هانت والسنة تبتدى فى الكلية وأخرج

أشم نفسي شوية

ابتسمت "سارة" قائله:

-آل يعني لما تروحي الجامعة هتشمى نفسك .. "مراد" بيخلى السواق يوصلك

ويرجعك ومش كدة وبس بيعرف كل مواعيد محاضراتك وسكاشنك

قالت "نرمين" بحنق:

-بس على الأقل هشوف ناس غيركوا .. دى حاجه صعبة أوى حسه انى مش

بنت زى باقى البنات .. ده ولا السجن يا شيخة ايه ده

قالت "سارة" بهدوء:

-بصى هو "مراد" بيخاف علينا عشان بنات .. وانتى شايفه أصلاً البلد دلوقتى

مش أمان خالص .. وكل شوية نسمع عن حوادث خطف واغتصاب وقتل وسرقة

يعني هو معذور برده فى خوفه علينا  
قالت "سارة" بغضب:

-بس مش كده يفكها شويه .. فيها ايه يعني لما تشتغلى فى الشركة ليه كل  
التفكير ده .. وايه المشكلة يعني لما نروح نزور صحباتنا ليه دايماً هما اللى  
بيجوا يزورونا واحنا مبنزوروش حد .. ده حتى الخروج مش بيوافق عليه .. بالله  
عليكي دى عيشة .. دى عيشة تخنق بجد .. ده أنا مش عارفه أصلاً هنتجوز  
ازاى لا حد بيشوفنا ولا بنشوف حد .. حتى صحابه لما ببيجوا يزوروه بيفرض  
علينا حظر تجول لحد ما يمشوا  
قالت "سارة" بضيق:

-أهى دى الحاجه الوحيدة اللى مضيقانى  
ابتسمت "نرمين" بخبت وقالت:  
-بس طلعتى مش سهل يا سارة  
-تقصدى ايه ؟

-يعني .. الراجل معدش ببيجى قولتى تروحيله بنفسك  
صاحت "سارة" بحنق:  
-ايه تروحيله دى متنقى ألفاظك .. اخرجى يا "نرمين" شوفى حاجه اتسلى بيها  
غيري  
قامت "نرمين" وقالت بتهكم وهى تغادر الغرفة:  
-ده على أساس ان التسليه مالیه البيت

\*\*\*\*\*

ذهبت "مريم" الى دار المسنين حيث تعيش والدته "ماجد" .. دخلت غرفتها ..  
وجدتها كما تتركها كل مرة .. نائمة على فراشها تنظر الى سقف الغرفة ويبدو  
أنها تسبح فى عالم آخر .. جلست بجوارها ومررت يدها على شعرها وقالت  
بحنان:

-ازيك يا ماما .. أخبارك ايه .. ماما .. ردى عليا .. أنا "مريم" .. "مريم"  
مرات "ماجد"

بدا وكأن المرأة لا تسمعها ولا تلفت اليها .. أكملت "مريم" وهى تنظر اليها

بأسى:

-كان نفسي أعرف أأخذك معايا يا ماما .. كان نفسي تكون صحتك اتحسن  
وأقدر أسفرك معايا .. أنا مسافرة يا ماما .. مسافرة النجع .. أهل بابا الله يرحمه  
عرفوا طريقى .. وجولى .. وعايزنى أعيش معاهم .. وأنا خلاص كلها كام يوم  
وهسافرلهم

فجأة وجدتها "مريم" ولأول مرة تحرك رأسها تجاهها وتنظر اليها .. ابتسمت  
"مريم" بفرح وقالت:

-ماما انتى سمعانى مش كده .. فاهمة أنا بقولك ايه .. مش كده  
ظلت المرأة تنظر اليها بدون أن تتكلم .. فأكملت "مريم" بحماس:  
-ماما كلميني .. طيب هزى راسك .. أنا حسه انك فهمتيني لما قولتلك انى  
مسافرة النجع

تجمعت العبرات فى عين المرأة .. وبدا عليها التأثر الشديد .. مسحت "مريم"  
على رأسها وقالت لها بحزن:

-عارفه ان جرحى وجرحك كبير أوى .. بس أنا عايزاكى تتحسنى يا ماما .. احنا  
الاتنين ملناش الا بعض .. أنا عارفه ان نفسك ترجعى النجع تانى .. البلد اللى  
اتولدتى فيها وعشتى فيها .. وعشان كده عايزاكى تتحسنى عشان أقدر أأخذك  
تعيشي معايا  
ثم أكملت قائله بابتسامه:

-أنا هبقى على تواصل مع مديرة الدار .. وكمان أكيد هاجى أزورك ان شاء الله  
..والمرة الجاية الى أشوفك فيها تكونى اتحسنتى وأقدر أخذت معايا  
قبلت "مريم" يد المرأة ووجنتها .. بدت نظرات المرأة اليها حانية للغاية .. ولاح  
شبح ابتسامه على شفيتها .. ابتسمت "مريم" بسعادة وهى ترى هذه الإستجابة  
منها .. توجهت الى مديرة الدار وأعلمتها بأمر سفرها وأخبرتها "مريم" أنها  
ستستمر فى الاتصال بها حتى تستطيع الإطمئنان على حالة والدة "ماجد" ..

خرجت "مريم" من الدار ووجدت فى الخارج صندوقاً للصدقة من أجل الدار  
فتحت حقيبتها وأخرجت منها ما يسره الله لها ووضعته فى الصندوق بنية شفاء  
والدة "ماجد" .. كانت "مريم" تعلم حديث النبي صلى الله عليه وسلم "داووا  
مرضاكم بالصدقة" .. دعت لها أن يشفيها الله عز وجل وتعود الى رشدها مرة

أخرى

كانت الزيارة التاليه هى الأصبعب على نفس "مريم" لكنها أصرت عليها ..  
توجهت الى المقابر حيث دفن "ماجد" رفعت يديها ودعت الله له كثيراً والعبرات  
تنهمر من عينيها لتغرق وجهها .. ظلت واقفة وسط المقابر تنظر الى تلك القبور  
التي حولها .. يا الله كل هؤلاء فقدوا حياتهم وأرواحهم وتركوا خلفهم أمهات  
وآباء وأبناء وزوجات .. وأولئك سيلحقون بهم بدورهم .. كل فى ميعاده الذى  
كتبه الله له .. ظلت تنقل بصرها من قبر الى آخر وهى تتسائل ما الذى يدور  
داخل كل قبر الآن .. من من هؤلاء يتعذب بعمله ويتحول قبرة الى حفرة من حفر  
النار .. ومن يجازى بعمله الطيب ويتحول قبره الى روضة من رياض الجنة ..  
شعرت بالتأثر الشديد .. ظلت تدعو لـ "ماجد" ووالدها ووالدتها وأختها ولكل  
موتى المسلمين .. ثم أخيراً استدارت لتتصرف وهى تشعر أن فى قلبها جرحاً  
كبيراً تأمل أن يندمل يوماً ماً.

\*\*\*\*\*

كانت والدة "صباح" تجهز العديد من أنواع الطعام المختلفة .. وتضعها فى  
المبرد .. دخلت عليها "صباح" قائله:  
-اييه كل الوكل ده ياماي .. احنا عازمين جيبه ولا اييه  
ابتسمت لها أمها قائله:  
-لا يا بنيتى .. بنت خوكى .. "مريم" .. جايه كمان كام يوم .. ولازمن نستجبلها  
امنيح  
قالت "صباح" بتبرم:  
-اييوه بس مش كل ده يعني .. أصلاً بوى جال انها سفيفه يعنى ملهاش فى  
الوكل  
قالت لأم بغضب:  
-اييه الكلام اللى عاتجوليه ده يا "صباح" .. امشى انجرى شوفيك حاجه  
اعملها .. لسه البيت عايزين نجلبه فوجيه تحته .. يلا يا بت مبتصليش اكده  
قالت "صباح" بتهكم:  
-والهانم بجه كانت بتشتغل اييه فى مصر  
ابتسمت أمها قائله:

-مخبرش بس باين عليها بتشتغل شغلانه مهمه لانها جالت لابوكى ان فى يدها  
مصالح ناس متجدرش تسيبهم وتمشى من غير ما تجولهم .. وكمان أبوكى  
جالى انها باين عليها متنورة ومتعلمه امنيح  
خرجت "صباح" من المطبخ متبرمه وهى تتمم بحنق:  
-آني أحسن منيها مليون مرة

\*\*\*\*\*

دخل "طارق" الى مكتب "مريم" رفعت "مى" رأسها لترى القادم .. خفق قلبها  
بشدة عندما رأت "طارق" أمامها .. نظر "طارق" الى مكتب "مريم" الخالى  
ثم تطلع الى الفتاتان قائلاً:  
-مساء الخير .. هى مدام "مريم" مش موجودة  
شعرت "مى" بالخجل من أن تطلع اليه .. كانت تخشى أن تفضح عيناها ما  
يعتمل بداخلها فخفضت بصرها قائله بصوت خافت:  
-فى مكتب أستاذ "عماد" شوية وراجعه  
ابتسمت له "سهى" قائله:  
-على فكرة هى مش مدام  
نظرت اليها "مى" بحدده .. التفت اليها "طارق" قائله باستغراب:  
-بس هى قالتلى انها متجوزة .. يعنى مكتوب كتابها وفى دبله فى ايدها  
قالت "سهى" مبتسمه:  
-أيوة كان مكتوب كتابها وخطيبها اتوفى من زمان  
نظر اليها "طارق" بدهشة وقال:  
-يعنى هى مش مكتوب كتابها  
قالت "سهى" وهى تتفحص تعبيرات وجهه بخبت:  
-لأ زى ما قولتلك جوزها مات  
قالت "مى" بحدده وقد شعرت بالضيق الشديد لكثرة أسئلته عن "مريم":  
-لو سمحت هنا مكان شغل مش عشان نتكلم فى خصوصيات  
التفت اليها "طارق" قائلاً:

-آسف مكننتش قصدى أتكلم فى خصوصيات

فى تلك اللحظة دخلت "مريم" الى المكتب .. التفت اليها "طارق" وابتسم  
ابتسامه واسعه .. نظرت اليه "مريم" دون أن تبادلله الإبتسام ثم جلست الى  
مكتبها قائله بجديه:

-اتفضل يا أستاذ "طارق"

جلس "طارق" وهو لا يرفع نظره عنها .. شعرت بالضيق من نظراته المثبتة  
عليها ..أخرجت ملف وحاولت بسرعة انهاء المقابله .. تطلع "طارق" الى  
الملف ثم قال مبتسماً:

-زى ما توقعت شغل من الآخر

ثم نظر اليها قائلاً:

-انتى مكسب لآى شركة تشتغلى فيها

شعرت "مريم" بالضيق من كلماته ومن نظراته ومن وجوده ..كانت نظرات  
"مى" مثبتة عليهما وعلامات الحنق والضيق على وجهها .. أما "سهى"  
فكانت تنظر اليهما مبتسمه بخبث .. قالت "مريم" بجديه:

-لو مفيش تعديلات يبقى خلاص هنبدى طباعة ان شاء الله من ٣ ل ٦ أيام  
وحضرتك تستلم الشغل

قال وهو ينهض:

-خلاص تمام ان شاء الله أشوفك بعد ٣ أيام

نظرت اليه "مريم" وقالت بحزم:

-قولت من ٣ ل ٦ يعنى الأفضل حضرتك تنتظر لما أبعث ميل بيان الأوردر وصل

بدل ما حضرتك تيجي على الفاضى

نظر اليها نظره أشعرتها بالخجل فأخفضت بصرها .. قال مبتسماً:

-أفضل آجى بنفسى .. متشكر على الشغل الجامد ده

خرج من المكتب .. فهتفت "سهى" بمرح:

-يا سلام على التثبيت اللى كان عيني عينيك ده

التفت اليها "مريم" بحنق وقالت:

"-سهى" ايه اللى بتقوليه ده

قالت "سهى" ضاحكة:

-يا بنتى مشوفتيش كان بيبيصلك ازاي .. لا وايه "أفضل آجى بنفسى"



قاطعتها "مى" بغضب قائله وهى تنهض من على مكتبها:  
"سهى" كفاية لو سمحتى .. "مريم" مبتحش الاسلوب ده  
قالت ذلك وخرجت من المكتب بعصبية .. رفعت "سهى" حاجبها بدهشة قائله:  
-مالها دى

شردت "مريم" وهى تفكر فى سبب غضب وعصبية "مى" بهذا الشكل

\*\*\*\*\*

دخلت "سارة" مع "مراد" الى أحد المكاتب .. كان مكتباً صغيراً فى حجرة  
صغيره .. التفت اليها "مراد" قائلاً:  
-مهمتك يا "سارة" هى انك تدخلى كل المعلومات اللى فى الملفات دى على  
الكمبيوتر

أشار الى كومة من الملفات على المكتب وأكمل قائلاً:  
-هبعتك السكرتيرة تشرحك بالظبط هتدخلى البيانات على البرنامج ازاي ..  
وبعدها تشتغلى لوحداك

قالت "سارة" بضيق:  
-يعني شغلى هيكون فى الأوضة دى بس يا أبيه  
قال بجديه:

-أيوة .. مش هتحتاجى أى حاجه تانيه .. الملفات موجودة والكمبيوتر موجود  
قالت "سارة" برجاء:

-طيب يا أبيه مفيش شغله تانيه ممكن أعملها غير دى .. دى حاجه ممله أوى  
قال "مراد" بحزم:

-احنا اتفقنا انك هتشتغلى الشغلان اللى هخترهالك .. يلا اتفضلى على المكتب  
وهبعتك السكرتيرة دلوقتى

جلست "سارة" على مكتبها واجمه .. نظرت الى الملفات على مكتبها وهى  
تقول فى نفسها " أنا اللى جبت ده كله لنفسى "

\*\*\*\*\*

دخل "مراد" الى مكتبه .. وبعد دقائق حضر "طارق" الذى جلس قبالته على المكتب وهو يقول:

-ايه الأخبار .. المحامى عمل ايه مع "حامد"  
قال "مراد" بهدوء وهو يتفحص الملفات أمامه:  
-خلاص فضينا الشراكة ودفعنا الشرط الجزائي

قال "طارق" بإرتياح:

-أحسن غار فى داهيه

وضع الملف الذى فى يده أمام "مراد" الذى نظر اليه قائلاً:  
-ايه ده ؟

ابتسم "طارق" قائلاً:

-ده شغل الفنانة اللى ماسكلنا الحملة

أخذ "مراد" الملف وتطلع الى التصميمات بإمعان .. ثم قال:

-تمام .. ممتاز

شرد "طارق" قليلاً .. تطلع اليه "مراد" قائلاً:

-هنبداً امتى

قال "طارق": "

-متقلقش احنا مجهزين كل حاجه وعلى أول الاسبوع ان شاء الله كل الناس

هتعرف اسم الماركة بتاعتنا

أوماً "مراد" برأسه وترك ملف التصميمات وعاد الى تفحص الملف الذى أمامه

.. نظر اليه "طارق" قائلاً:

"-مراد" عايز أسألك على حاجه

قال "مراد" دون أن يرفع نظره اليه:

-اسأل

بدل على "طارق" التردد قليلاً لكنه قال:

-ازاى تلفت نظر واحدة ليك .. اذا كانت قفله كل الأبواب فى وشك

تطلع "مراد" الى "طارق" فى صمت .. ثم ابتسم قائلاً:

-هى مطلعه عينك أوى كده

ابتسم "طارق" قائلاً:

-بصراحة أيوة .. يعني حتى الكلام مش عارف أتكلم معاها .. بحسها انها بتقطم

فى الكلام .. وكلامها ناشف وجد أوى  
صمت "مراد" وأخذ يفكر قليلاً ثم قال:  
-طيب خلى بالك ليكون فى حد فى حياتها  
قال "طارق" بثقه:

-لأ مفيش .. هى كان مكتوب كتابها وبعدين مات من فترة .. وهى مش مرتبطة  
دلوقتى

قال "مراد": "

-بص يا "طارق" أنا מבحبش اللف والدوان .. أنا مليش الا فى الكلام المباشر ..  
يعنى أنا لو مكاتك هروحلها وأقولها أنا معجب بيكي .. وعايذ أتقدمك .. ده لو  
انت فعلاً معجب بيها وسألت عنها كويس وواثق من أخلاقها وواثق انها انسانه  
كويسه وتصلح زوجه ليك  
فكر "طارق" قليلاً ثم قال:

-يعنى رأيك أقولها كده خبط لزق انى عايذ أتجوزها على الرغم من انها مش  
مديانى وش خالص

قال "مراد" وهو يعاود فحص الملفات التى امامه:

-أنا قولتك لو أنا مكاتك كنت هعمل ايه .. انت حر بأه اختار الاسلوب الذى  
يناسبك .. لكن أنا بحب أجيب من الآخر

أخذ "طارق" يفكر فى كلام "مراد" .. وقد بدأ يميل الى وجهة نظره.

\*\*\*\*\*

عاد "مراد" الى بيته وبصحبه "سارة" التى أشارت لها "نرمين" للذهاب الى  
غرفتها .. نظرت اليها "نرمين" وقالت بمرح:

-ها قوليلى عملتى ايه .. شوفتى "طارق"

أقلت "سارة" حقيبتها على السرير وقالت بحنق:

-لأ مشفتش حد .. مشفتش أى حد .. لا "طارق" ولا غير "طارق"

قالت "نرمين" بدهشة:

-ازاى يعنى

صاحت "سارة" بغضب:

-أخوكى دفنى فى مكتب فى آخر دور فى الشركة .. وأعدت طول النهار د أدخل أرقام على البرنامج بتاع الشركة لما خلاص جالى حول ضحكت "نرمين" بسخرية قائله:

-كان لازم أتوقع كده .. أنا برده استغربت لما "مراد" وافق .. قولت يمكن تعبان ولا حاجة .. لكن كده اتأكدت انه سليم جلست "سارة" على فراشها قائله:

-يعني لا شوفت "طارق" .. ولا شكلى هشوفه .. وبالمنظر ده شكلى هتعمى قريب ومش هشوف حد أصلاً ضحكت "نرمين" وربتت على كتفها قائله:

-لينا الجنة يا بنتى لينا الجنة .. أنا راحه أوضتى دخلت "نرمين" غرفتها .. لتجد هاتفها يرن .. ردت قائله:  
-السلام عليكم

أتاها صوت رجل عبر الهاتف:

-ألو .. الأناسه "نرمين"

قالت "نرمين" باستغراب:

-أيوة أنا .. مين حضرتك

قال الرجل بصوت رخيم:

-أنا واحد عارفك بس انتى متعرفيهوش

قالت "نرمين" بحدده:

-انت بتستهيل

قال الرجل:

-لأ مش بتستهيل تحبى أثبتك

قالت بحدده:

-أنا هقفل السكة .. متتصلش هنا تانى

قال الرجل بسرعة قبل أن تغلق الخط:

-اسمك "نرمين خيرى" وأخوكى الكبير "مراد" و عندك أخت أكبر منك اسمها

"سارة" ووالدك متوفى .. وانتى فى آخر سنة فى الجامعة .. وعندك ٢٢ سنة

قالت "نرمين" باستغراب شديد:

-انت عرفت المعلومات دى كلها ازاي .. انت مين بالظبط ؟

قال الصوت هامساً:

-أنا معجب

قالت بسخريه:

-نعم ..معجب!

قال بنفس الصوت الهامس:

-أنا مش معجب بس أنا عاشق ولهان

قالت "نرمين" بحده:

-لو ماقولتش انت مين هقفل السكة

قال الرجل:

-بكرة تعرفى انى مش بعاكس يا "نرمين" .. وانى فعلا معجب بيكي .. وحابب

أتعرف عليكي

قالت بحده:

-أنا مبتعرفش على حد

-أنا مش أى حد يا "نرمين" أنا الراجل اللى هيبقى جوزك .. يعني تتكلمى معايا

بإسلوب أحسن من كده

أغلقت الخط فى وجهه وهى تشعر بالدهشة من جرأة ذلك الرجل الذى يعرف

عنها كل شئ .. جلست شاردة تحاول أن تخمن من يكون هذا الرجل!

\*\*\*\*\*

تقابلت "صباح" مع "جمال" فى مكانهما المعتاد خلف أحد الأبنية التى لم يتم

الانتهاء من بنائها .. قال "جمال" وهو يمعن التفكير:

-يعني هيا هتيجي كمان كام يوم .. وهتعيش حداكوا على طول

قالت "صباح": "

-بوى جال انها هتعد شهر وبعدين تشوف هتعد حدانا ولا هترجع مصر

نظر اليها "جمال" قائلاً:

-شكلها اييه .. حلوة ؟

صاحت "صباح" بغضب:

-مالك انت حلوة ولا مش حلوة .. ان شاء الله تطلع قرد مسلسل انت مالك



-ابجى وريني هتعملى ابيه .. هتروحي تجولى لأبوكى "جمال" كان بيسرح بيا  
يابوى .. عشان خوكى "عثمان" يفرغ طبنجته فى راسك ونرتاح منيكي  
قال ذلك وانصرف .. وتركها تتلوى من الغضب والحقد والرغبة فى الإنتقام  
لكرامتها المهانه.

\*\*\*\*\*

خرج "مراد" من شركته وطلب من السائق اىصال "سارة" الى الفيلا .. ثم  
التفت اليها قائلاً:

-مش هروح دلوقتى هتمشى شوية

-طيب والعربية يا أبيه

-مش مشكلة هاخذ تاكسي

سار "مراد" فى شوارع القاهرة وتحت سمائها .. جلس على أحد الكافيهات  
المطلة على النيل .. وأخذ يتطلع اليه متملاً ما حوله .. أخرج من جيبه دفتر  
صغير وقلم أنيق .. ظل يسطر بضع كلمات .. سرقه الوقت .. واندمج فى الكتابه  
.. كان متنفسه الذى يعشقه .. هو الكتابه .. كلما شعر بالرغبة فى البوح  
بمكونات نفسه أخرج دفتره وقلمه ودون ما يشعر به من مشاعر وأحاسيس  
خفيه .. لا يعلمها الا هو وربّه .. دفتر وراء دفتر .. حتى تجمع لديه أعداد كبيرة  
منها .. يحتفظ بها فى خزانة مكتبه .. كان يبدأ فى الكتابة بحال وينتهى بحال آخر  
..كانت دائماً تريحه وتزيل حمل كتفيه الثقيل .. كان يشعر بنفسه أخف وبقلبه  
أرق .. أطلق تنهيدة عميقه .. وأخذ ينعش رنتيه بالهواء المنعش الذى يهب فى  
تلك الليلة الساحرة .. سمع صوت ضحكات طفل صغير .. التفت فوجد على بعد  
خطوات زوجين بصحبة ابنيهما الصغير .. كان الصغير يضحك بمرح لمداعبة  
والده له .. نظر اليهم "مراد" مبتسماً .. كان كلما زاد الرجل من مداعباته زاد  
الصغير من ضحكاته واتسعت ابتسامته "مراد" أكثر .. بعد فترة أخذ الصغير  
يتلهى بالطعام أمامه وانشغل به .. فاقترب رأسى الزوجان من بعضهما البعض ..  
هو هامساً وهى مستمعه مبتسمة .. أشاح "مراد" بوجه عنهما وقد شعر بغصه  
فى حلقه .. ووغزة فى قلبه .. وقال فى نفسه "ما شاء الله لا قوة إلا بالله"  
خشية أن يحسدهما دون أن يقصد .

فى الصباحت صلت "مرىم" صلاة الإستخاره للمرة التى لا تتذكر عددها ..  
وارتدت ملابسها واستعدت لإستقبال عمها "عثمان" الذى حضر بسيارته  
الفارمه وحمل حقائبها الى السيارة .. جلست بجواره فى المعقد الأمامى وهى  
تبتسم بسعادة فها هى مقبلة على موطن والدها وبيته وعائلته .. شعرت بأن  
السعادة قد آن أوانها .. ترى هل كان شعورها صحيحاً أم خاطئاً!؟

## الفصل العاشر

فى الصباحت صلت "مرىم" صلاة الإستخارة للمرة التى لا تتذكر عددها ..  
وارتدت ملابسها واستعدت لإستقبال عمها "عثمان" الذى حضر بسيارته  
الفارمه وحمل حقائبها الى السيارة .. جلست بجواره فى المعقد الأمامى وهى  
تبتسم بسعادة فها هى مقبلة على موطن والدها وبيته وعائلته .. شعرت بأن  
السعادة قد آن أوانها .. ترى هل كان شعورها صحيحاً أم خاطئاً!؟  
كان "عثمان" صامتاً معظم الوقت .. لم يتحدث الا قليلاً .. وكانت هى لا ترغب  
فى ازعاجه بكثرة حديثها وأسئلتها .. فالتزمت الصمت .. وصلت "مرىم" الى  
النجع بعد عناء السفر .. كان فى استقبالها جدها وجدتها .. خرجت من السيارة  
معانقة اياهم بشدة .. قالت جدتها وهى تبكى:

-بنت ولدى الغالى .. يا حبيبي يا ولدى .. الله يرحمك يا "خيرى" .. ويرحم  
مرتك وبنتك

ترقرت العبرات فى عيني "مرىم" وأخذت تتساقط على وجهها الذى تبدو عليه  
علامات التأثر .. أدخلها الى البيت ... كان بيتاً كبيراً له مذاق وطابع خاص ..  
جلست بين جدها وجدتها التى قالت:



-بصيلي عشان أملى عنيا بشوفتك يا حبيبة جلبي .. ما شاء الله عليكي .. ربنا  
يحرصك يا بنيتي .. ربنا يحرصك  
خرجت "صباح" لترحب بـ "مريم" .. قال "عبد الرحمن" مشيراً الى "صباح"  
:

"-صباح" عمتك يا بنتى .. أخت بوكى الله يرحمه  
ابتسمت لها "مريم" وقامت لتسلم عليها .. تفحصتها "صباح" من رأسها الى  
أخمص قدميها .. وقبلتها بشئ من البرود .. قالت لها "مريم" بسعادة:  
-أنا فرحانه أوى انى شوفتك يا عمتو  
شهقت "صباح" قائله:

-عمتو ايه عمتو دى .. انتى عنديكي كام سنة  
شعرت "مريم" بالإرتباك قائله:  
-عندى ٣٠ سنة

قالت "صباح" بتهكم وإستفزاز:  
-آنى بجه عندى ٢٢ سنة .. يبجى مين اللى يجول للتانى يا عمتى  
ابتسمت "مريم" قائله:

-معلش مكنتش أعرف سنك .. جدو ما قاليش .. وأنا مش بعرف أعدد سن اللى  
أدامى معلش متضايقيش منى يا "صباح"  
قالت "صباح" ببرود:

-خلاص محصلش حاجة  
قالت والدة "صباح":

-يلا يا بنيتى روى حضرى الوكل زمان "مريم" على لحم بطنها  
قالت "صباح" بتأفف:  
-حاضر يا أماي

جلس الجميع على الطاولة .. قالت جدتها وهى تضع الطعام أمامها:  
-كلى يا بنتى .. كلى امنيح  
ابتسمت "مريم" قائلاً:

-باكل يا تيته .. أنا أكلتى ضعيفة أصلاً  
قالت "صباح" بسخرية:

-تيته!

قالت "مريم" بارتباك:

-طيب أقولها ايه

نظر اليها "عبد الرحمن" قائلاً بسعادة:

-جوليلها زى ما تحبي تجولى .. مفيش مشكله واصل

قال "عثمان" لـ "مريم" بحزم وهو يتطلع الى الدبلة فى يدها:

-ليه لابسه الدبلة .. مش جولتلك اخليها

قالت له "مريم" بهدوء:

-أسفة يا عمو بس مش حابه أقلعها

قال "عثمان" بحده:

-لييه .. مش رايده تخلعيها ليه .. اكده الناس تفتكرك مخطوبة يا بنت خوى

قالت "مريم" بحزم:

-مفيش مشكلة لو افتكرونى مخطوبة

نظر "عبد الرحمن" اليها وقد شعر بضيقها فالتفت الى "عثمان" قائلاً بصرامة

:

-مش وجته الحديث ده يا "عثمان" .. لكل مجام مجال

سكت "عثمان" على مضد .. بعدما انتهى الجميع من تناول الطعام .. شعرت

"مريم" بالتعب الشديد والإرهاق .. انتبهت جدتها فقالت لها:

-جومى يا بنيتي ريحيلك شوية

قالت "مريم" معتذرة:

-معلش أنا أسفة بس تعبت من الطريق والسفر وأنا أصلاً مش متعودة على

السفر

قال "عبد الرحمن" وهو يربت على ظهرها:

-جومى يا "مريم" جومى

أدخلتها جدتها الى غرفة مرتبة ونظيفة وقالت لها مبتسمة:

-دى غرفتك يا بنيتى .. هتبجى من اليوم ورايح بتاعتك انتى

ابتسمت لها "مريم" فقامت المرأة بمعانقتها طويلاً وكأنها تعوض بها ابنها

الذى فقدته .. نظرت اليها جدتها والعبرات فى عينيها قائلة:

-اتحرمت من أبوكى غصب عنى .. بس الحمد لله والشكر لىك يا رب انه

عوضنى ببنته .. حتة منيه

قبلت "مريم" رأسها وقد شعرت بالتأثر الشديد وقالت:  
-أنا كمان فرحانه أوى انى وسطيكم .. لانى حسه انى وجودى بينكم هيعوضنى  
عن أهلى اللى راحوا  
نامت "مريم" ملء جفونها تلك الليلة وهى تشعر بالراحة والطمأنينة.

\*\*\*\*\*

رن هاتفها فردت قائله:  
-السلام عليكم  
-ألو .. صباح الخير  
قالت "نرمين" بحده:  
-انت تانى .. انت عندك كام رقم بالظبط  
ضحك قائلاً:  
-ما أنا قولت أكيد لو اتصلت بالرقم اللى اتصلت بيكي منه قبل كده مش هتردى  
عليا .. فجبت خط تانى  
قالت بسخريه:  
-لأ ناصح .. على أساس انى هرد على ده يعني  
-عارف انك ممكن مترضيش على ده تانى .. بس أنا عامل حسابى وجايب  
خطوط كتير .. خلى بالك أنا مفيش فى قاموسى كلمة ياس  
أغلقت الهاتف ووضعت الرقم فى قائمة البلاك ليست .. ظلت تفكر كثيراً فى  
محاولة تخمين هوية هذا الرجل.

\*\*\*\*\*

استيقظت "مريم" فى الصباح .. وهى تشعر بالنشاط .. قامت وفتحت شباك  
غرفتها لترى المنظر الجميل الذى تطل عليه غرفتها .. حملت فوطتها وفرشتها  
وتوجهت الى الحمام .. كانت سعيدة للغاية وهى تشعر لأول مرة منذ زمن بعيد  
أنها تعيش مع أشخاص آخرين .. ستسمع صوتاً آخر فى البيت غير صوت  
تنفسها المنتظم .. هبطت من الدرج لتستقبلها جدتها قائله:  
-يا صباح الأنوار .. كيفك اليوم يا ابنيتي

قالت "مريم" مبتسمة:

-الحمد لله يا تيته .. ازيك حضرتك انتى  
-منيحه يا بنيتي .. يلا عشان حضرنا الوكل .. كنت لسه هبعث "صباح"  
تصحيكي بس ما شاء الله عليكي بتصحى بكير

قالت "مريم" بحماس:

-أيوة أنا متعودة أصحى بدرى عشان شغلى  
قالت جدتها مستفهمه:

-وبتشتغلى اييه يا بنيتي ؟

-ديزاينر

-اييه

قالت "مريم" مبتسمة:

-أقصد يعني مصممة جرافيك .. يعني بصمم لوح إعلانات يفت اغلفة كتب  
كروت مطويات

اتسعت ابتسامه جدتها قائله:

-ما شاء الله ما شاء الله باينك ذكيه كتير

ابتسمت "مريم" لطيبه جدتها .. فعانقتها جدتها وقبلتها قائله:

-ربنا يحفظك ويحميك يا بنت ولدى

دخلت "مريم" غرفة المعيشة فاستقبلها جدها بالترحاب قائلاً:

-صباح الخير يا بنتى .. نمتى امنيح

أجات "مريم" وهى تقترب منه وتقبل يده:

-أيوة يا جدو الحمد لله

التفتت قائله ل "عثمان": "

-صباح الخير يا عمو

قال مبتسماً ابتسامه صغيره:

-صباح الخير يا بنت اخوى

اتسعت ابتسامه "مريم" لابتسامه عمها .. بعد قليل حضرت "صباح" قائله:

-يلا عشان الوكل

التفتت اليها "مريم" قائله:

-صباح الخير يا "صباح"

ردت ببرود:

-صباح النور

التف الجميع حول طاولة الطعام ومثلما حدث بالأمس ظلت جدتها بجوارها تحثها على تناول المزيد من الطعام .. كانت "مريم" تنظر اليهم فى سعادة بالغة .. وشعرت بأن أيامها فى النجع .. ستحمل لها الخير .. والسعادة.

\*\*\*\*\*

توجه "طارق" الى مكتب الدعاية بصحبة "سامر" الذى أصر على الحضور معه .. قال له "طارق" بضيق وهو يقود سيارته:

-عايز تيجي معايا ليه .. أنا هسلتم الشغل مش أكثر .. يعني مكنش فى داعى نروح احنا الاتنين

قال له "سامر" بخبث:

-انا مش رايح عشان الشغل .. رايح أظبط المزه اللي فى المكتب التفت اليه "طارق" بحده قائلاً:

-انت مش شوفتها واتأكدت انها مش ستايلك يا "سامر" .. يعني متنفعكش .. هى مش بتاعة صحوبيه والعك اللي انت عايزه ده

ضحك "سامر" فإزداد غيظ "طارق" الذى قال بضيق الشديد:

-ماشى مفيش مشكلة حابب تجرب بنفسك جرب .. بس أنا متأكد انها هتصدك قال له "سامر" ضاحكاً:

-يا ابنى أنا مش رايح عشان "مريم" دى .. أنا رايح عشان أم بادي روز .. دخلت دماغى بصراحه .. وشكل كمان الصنارة غمزت معاها .. ده اللي حسيته

من نظراتها المرة اللي فاتت

شعر "طارق" بالراحة .. وقال له "سامر" محذراً:

-اعمل اللي تعمله بس مش عايز مشاكل مع الشركة دى .. فاهم يا "سامر" .. يعني عايز تعمل اى حاجه اعملها بره الشغل .. انت حر .. انت أدري بمصلحتك

-متخفش يا "طارق" مفيش مشاكل ولا حاجه

دلفت الإثنان الى مكتب .. نظر "طارق" الى المكتب الفارغ ثم توجه الى "مى" قائلاً:

-صباح الخير .. هي آنسه "مريم" مش موجودة النهاردة ؟  
اضطربت "مى" لرؤية "طارق" أمامها .. وشعرت بالألم يغزو قلبها لسؤاله عن  
"مريم" .. "تطلعت اليه لحظة فى حزن .. ثم أسرعت بخفض بصرها قائلة:

"-مريم" سمرت

قال "طارق" مستفهماً:

-هترجع امتى ؟

نظرت اليه "مى" بحدده قائلة:

-مش هترجع

قال بدهشة:

-ازاى يعنى

قالت له "سهى" التى كانت سعيدة بنظرات "سامر" اليها:

-سافرت عند أهلها فى الصعيد تعيش معاهم هناك ومش هترجع هنا تانى

شعر "طارق" بالضيق الشديد .. راقبت "مى" تعبيرات وجهه فى حنق .. قال

"سامر" الى "سهى" وهو يرمقها بنظرات الإعجاب:

-يعنى معدتش هتشتغل هنا تانى

بادلته نظراته وابتساماته قائلة برقه:

-لأ .. بس لو حبين انها تستمر فى حملة شركتكو مفيش مشكلة .. أستاذ

"عماد" مدير الشركة قالها تستمر فى الشغل وهيبعتلها الأوردرز عن طريق

النت ..يعنى هتفضل تشتغل لحساب شركتنا

سألها "طارق" بلهفه:

-طيب معاكى رقمها ؟

نظرت اليه "مى" بحدده وقالت:

-مستحيل طبعاً نديك رقمها

التفت اليها "طارق" وقال بهدوء:

-أمال هتفق معاها على الشغل ازاى

قالت بحنق:

-راسلها على ايميل الشركة زى ما العملاء الأجانب بيعملوا معانا

ابتسم "طارق" وقد شعر بالراحة لوجود خيط يوصله اليها فنظر الى "مى"

قائلاً:

-طيب متشكر .. هروح لأستاذ "عماد" مكتبه أستلم منه الشغل اللي اتطبع  
هم بأن ينصرف لكنه التفت الى "مى" قائلاً وهو ينظر اليها بتمعن:  
-ممكن أعرف انتى بتكلميني بجده ليه  
ارتبكت "مى" ولم تستطع النظر اليه لكنها ردت بتماسك:  
-مش بتكلم بجده ولا حاجه .. لو حضرتك حسيت بجده فمعلش ممكن يكون بس  
من ضغط الشغل  
خافت أن تنظر اليه فيكتشف كذبها .. قال "سامر" ل "سهى" مقترباً من مكتبها

:  
-أنا بأه مليش فى الشغل بالمراسله ده .. أنا أحب أتعامل مع الناس فيس تو  
فيس وبعدين عشان لو فى تعديلات أقدر أشرحها كويس .. وبصراحه حابب  
أتعامل معاكى

صمت قليلاً ثم ابتسم اليها قائلاً:  
-ممكن رقمك .. يعني عشان لما احتاجك أوصلك بسرعة  
ابتسمت "سهى" بسعادة ودونت رقمها على ورقة وأعطته اياها قائله برقه:  
-اتفضل وتحت أمرك فى أى وقت يا استاذ.....

ابتسم لها قائلاً:  
" -سامر " .. وانتى ؟

" -سهى "

قال بخبث :

-آدى أول حاجة مشتركة بينا .. احنا الاتنين اسمنا بيبدأ بحرق السين  
ربت "طارق" على كتف "سامر" وقال بنفاذ صبر:  
-يلا يا "سامر "

خرج الاثنان وعينا "سهى" تتابعانها .. نظرت اليها "مى" بغيظ وقالت بجده:  
-انتى اتهبلتى فى عقك يا "سهى" .. من امتى بندى أرقام تليفوناتنا للعملا اللي  
بيجولنا

قالت "سهى" بنفاذ صبر:

-قالك عشان يعرف يوصلنى بسرعة .. أمال شغله يتعطل يعني

قالت "مى" بحزم:

-كل الناس اللي مبتقدرش تيجي مكتبنا أو بيكونوا مشغولين .. بيراسلونا على

ايميل الشركة .. على فكرة لو أستاذ "عماد" عرف حاجه زى كده أنا واثقه انه  
مش هيسكت  
هتفت "سهى" بحدده:  
-انتى هتخوفيني بأستاذ "عماد" ولا ايه .. لا أنا مبخفش من حد .. عايزة  
تروحي تقويله قوليله .. أنا محدش يلوى دراعى  
عادت "مى" الى عملها وهى تشعر بالغيظ الشديد .. من "سهى" ... و من  
"طارق"

\*\*\*\*\*

التفت "سامر" الى "طارق" فى السيارة وهى يشير الى الورقه التى بيده قائلاً  
:  
-شوفت يابنى بدون أى اعتراض ادتنى رقمها على طول .. مش قولتلك الصنارة  
غمزت معاها  
نظر اليه "طارق" بتهكم وهو يقود قائلاً:  
-ودى حاجه كويسه يعني ؟ .. انها تديك رقمها بالسهولة دى .. اذا كان البنيت  
اللى مسافره مرضتش صحبتها تديني رقمها .. أكيد لانها عارفه ان ممكن  
صحبتها تعمل مشكله معاها لو ادتهولى .. يبقى اللى هنا فى القاهرة واللى سهل  
اوى تخطف رجلك لحد شركتهم تديك رقمها بسهولة كده  
ثم قال:  
-مش عارف بتستفيد ايه لما تعمل علاقة مع كل واحدة شوية .. وكل ما تزهرق  
من واحده تسيبها وتدور على الجديدة  
قال "سامر" مبتسماً بتهكم:  
-اذا كان هما نفسهم مبيبقاش عندهم مانع للعلاقات دى .. هاجى أنا وأقول لأ  
قال "طارق" بهدوء:  
-سيدنا "يوسف" قال لأ  
صاح "سامر": "  
-ده سيدنا "يوسف" يعني نبي .. أنا مش نبي  
ثم ضحك قائلاً:  
-أنا شيطان



هز "طارق" رأسه وقد علم أن لا فائدة من الحوار معه .. وشرد في "مريم" التي تركت القاهرة فجأة توجّهت الى الصعيد .. ثرى ما قصتها بالضبط؟! عاد "طارق" الى مكتبه .. وتوجه الى حاسوبه وفتح ايميله وهم بإرسال رسالة لـ "مريم" .. ظل متردده كثيراً .. الصفحة مفتوحة أمامه دون ان يكتب حرفاً .. كلما بدأ فى الكتابة عاد لمسح ما كتب .. حتى استجمع شجاعته وكتب لها:  
-السلام عليكم .. آنسه "مريم" .. أنا روحتك النهاردة الشركة وعرفت انك مسافره عند أهلك الصعيد وانك مش راجعه الشركة تانى .. وشغلك هيكون عن طريق النت .. أنا كنت حابب ان الكلام بينا يكون وجهاً لوجه بس للأسف سافرتى قبل ما أعرف أتكلم معاكى .. وكمان صحبتك رفضت تديني رقمك .. فملقتش غير انى أراسلك على ايميل الشركة .. مقدمة طويلة أنا عارف بس كنت حابب أعرفك السبب فى انى ببعثتك الكلام ده عن طريق الميل .. أنا مش عايز أقولك كلام يضايقك منى .. أو تعتبريه جرأة زايده .. بس أنا معجب بيكي جداً .. وشايف فيكي الزوجة المناسبة ليا .. كنت حابب تكونى هنا عشان أقدر أتكلم معاكى وأعرف ظروفك لانى معرفش معلومات عنك غير انك كنتى مكتوب كتابك وخطيبك اتوفى .. وعارف انك هترفضى الكلام معايا سواء نت أو تليفون لانى التمتست فيكي انك بنت محترمة ومش ممكن تسمحى بحاجه زى كده وانك عارفه ربنا كويس وبتعرفى تحطى حدود لأى راجل أدامك مهما كان هو مين .. ودى حاجه أنا احترمتها فيكي جداً .. لانى زيك مليش فى العلاقات والكلام الفارغ ده .. أنا لما أعجب بواحد .. احب ان كل حاجه بينا تكون فى الحلال .. عشان ربنا يباركلنا فى بعض .. ولو أنا طلبت منك غير كده يبأه أنا لا بحبك ولا بصونك ومستهلكيش أصلاً .. عشان كده مفكرتش أطلب منك اننا نتكلم على النت أو التليفون .. أنا كل اللى طالبه منك رقم ولى أمرك .. وهتكلم معاه وان شاء الله آجى أزوركوا فى الصعيد وأعرف ظروفك وتعرفى ظروفى .. ولو لينا نصيب فى بعض أكيد ربنا هيبسر الأمور .. منتظر منك رسالة برقم ولى أمرك فقط .. مش طالب منك أكثر من كده " .. طارق عبد العزيز "

قرأ الرسالة مرات ومرات ثم أخيراً ضغط Send وقلبه يخفق بشدة وهو يفرك كفيه بقوة من فرط التوتر .. ليس أمامه سوى الإنتظار .. حتى ترى الرساله وترد عليها.

\*\*\*\*\*

اتصل "جمال" بـ "صباح" وأخبرها بضرورة لقائها في مكانهما المعتاد ..  
ذهبت "صباح" وهي تتطلع خلفها خشية من أن يراها أحد يعرفها .. وغطت  
ونصف وجهها يطرحتها الطويلة .. استقبلها "جمال" قائلاً:

-حبيبتي وحشتيني جوى يا "صباح"

صاحت "صباح" بتهكم:

-لا والله .. بعد اييه .. بعد ما سميت بدنى بكلامك وجولتلى انك مش هتتجوز  
واحد من عيلتنا

اقتربت منها وابتسم قائلاً:

-ما انتى كمان استفزتينى يا "صباح" لما جولتلى انك غلطانه انك خليتى واحد  
من عيلة الهوارى يجرب منيكي

قالت "صباح" بحزم:

-جولى عايز اييه خليني أمشي يا "جمال"

اخرج من جيبه علبة قطيفه وقدمها لها .. نظرت الى العلبة بريبه وقالت:

-ده اييه ؟

ابتسم قائلاً:

-افتحيها

أخذتها صباح وفتحتها .. وجدت سلسلة ذهبية كبيرة .. نظرت اليها بإعجاب  
قائله:

-اييه ده يا "جمال" .. دى جميلة جوى

قال لها:

-عجبتك

قالت "صباح" بفرحه:

-جوى جوى يا "جمال"

ثم بدا وكأنها تذكرت شيئاً فأخفت ابتسامتها وقالت:

-مش هجبلها منيك .. انت عايز تضحك عليا بسلسله

قال لها هامساً:

-لا يا حبيبتي .. ده جزء من شبكتك

نظرت اليه بشك قائله:

-شبكتى

-اييوة طبعاً .. هو أنا اجدر اعيش من غيرك يا "صباح" ده انتى اللى فى الجلب  
يا بت

قالت بدلال:

-أمال اييه الكلام اللى جولتهولى المره اللى فاتت يا "جمال"

أحاطها بذراعيه وقبلها قائلاً:

-سيبك من اللى فات أنى كنت متضايق شويه وفشيت غلى فيكى .. اذا مكنتيش

انتى تتحملينى مين يتحملنى يا "صباح"

ابتسمت وهى فى أحضانه وقالت:

-طبعاً أتحمك يا حبيب جلي .. بس جولى امتى هتيجي تتجدملى بجه

قال هامساً:

-باجى الجليل يا "صباح" متجلجيش يا حبيبتى

قالت بدلال:

-طيب أنى ماشيه بجه

-استنى خليكى معاى شويه كمان ملحجتش أشبع منيكي

قالت بضيق:

-أعمل اييه لازم أرجع البيت عشان أمى متدنيش الطريحه عشان سايبه اللى

اسمها "مريم" دى لحالها

ابتعد "جمال" عنها فجأة وقال باهتمام:

-تجصدى بنت "خيري" ؟ .. هى إجت

-اييوه إجت وأعده حدانا

قال "جمال" بحده:

-أمال مجولتليش ليه من الصبح يا بت .. مش أنا جايلك ومنبه عليكى لما توصل

تخبريني

قالت بغضب:

-وانت مالك ومالها اصلاً .. ملكش صالح بيها واصل ده دى

ثم قالت وهى تهم بالمغادرة:

-آنى ماشيه بجه العواف

\*\*\*\*\*

دخلت "مريم" مع جدتها المطبخ تساعدها فى تحضير الطعام .. قالت جدتها:  
-اجعدى انتى ارتاحى يا بنيتى .. "صباح" زمانها راجعه من عند خالتها  
ابتسمت "مريم" وهى تشرم ذراعها قائله:  
-لأ يا تيته حابه أساعدك متخفيش أنا بعرف أطبخ كويس  
ابتسمت جدتها وربتت على كتفها قائله:  
-ربنا يبارك فيكى يا ابنيتى .. بس لو زهجتى أو تعبتى خلاص سببى وأنا أكمل  
عادت "صباح" لتجد "مريم" تساعد أمها فى المطبخ فقالت بتهكم:  
-انتى بتعرفى تطبخى ولا هتوظيفينا الوكل  
التفتت اليها "مريم" وابتسمت قائله:  
-متخفيش يا "صباح" بعرف أطبخ  
قالت "صباح" باستفزاز:  
-بس أكيد مبتعرفيش تطبخى زينا .. احنا عندنا أسرار فى الطبخ محدش  
يعرفها غيرنا .. حتى التوابل اللى بنستخدمها مفيش منها عنديكوا فى مصر  
قالت "مريم" وهى مازالت محتفظة بابتسامتها:  
-وأنا فرحانه أوى انى هتعلم منكوا الطبخ بطريقتكوا .. أكيد طبعاً هتكون أحسن  
من طريقتى بكثير  
ابتسمت لها جدتها وقد شعرت بمدى نضج "مريم" التى تدير الحوار بعقل  
وحكمة .. ونظرت الى "صباح" قائله:  
-يلا يا بت .. ادخل غيرى خلجاتك وتعالى ساعديني .. أخوكي وأبوكي زمانهم  
جايين .. يلا دجيجه والأجيكى أدامى  
خرجت "صباح" من المطبخ متأففة .. وهى تتمتم بكلمات غاضبة

\*\*\*\*\*

قال "جمال" الى والده "سباعى" وهو فى مكتبه بالشركة:  
-تعرف ان بنت "خيرى السمرى" اجت الصعيد وعاشته مع أهل بوها  
رفع "سباعى" نظره اليه قائلاً:

-وانت عرفت منين

قال بفخر:

-ليا مصادري الخاصه

قال "سباعى" محذراً:

-مش عايز مشاكل يا "جمال" .. ملناش صالح مين اجه ومين مجاش ..

متدخلش فى خصوصيات عليه السمرى .. مش عايزين مشاكل يا ولدى

قال "جمال" وهو يهم بالإنصراف:

-أمرك يا بوى

\*\*\*\*\*

عادت "مى" الى عملها .. ودخلت غرفتها وألقت بنفسها على فراشها باكيه ..

فتحت أمها باب غرفتها فجأة بعدما سمعت شهقات بكائها من خلف الباب ..

دخلت أمها وأغلق الباب واقتربت منها قائله:

"-مى" فى ايه .. بتعيطى ليه

اعتدلت "مى" فى جلستها ومسحت دموعها قائله:

-مفيش يا ماما .. مفيش حاجه

جلست بجوارها على الفراش وقالت:

-لا فيه .. قوليلى يا حبيبتي حصل حاجه .. حد ضيقك .. حد عمك حاجه

هزت رأسها قائله:

-لا .. أنا بس مخنوقة شوية

نظرت اليها أمها بتفحص قائله:

-عشان سفر "مريم"

قالت "مى" دون أن تنظر اليها:

-أيوه

-بس أنا قلبي حاسس ان فى حاجه تانية

كادت أن تعاود البكاء مرة أخرى لكنها تماكنت نفسها قائله:

-لا صدقيني مفيش حاجه

مسحت أمها على رأسها قائله بحنان:

-طيب براحتك بس اعرفى انى موجوده ومستعده أسمعك فى أى وقت .. أنا أكبر

وأعقل منك وخبرتي أكبر منك فى الدنيا دى .. يعنى أكيد هفيدك أكثر من أى  
واحدة صحبتك .. وانتى عارفه انى دايماً بتعامل معاكى كصديقه مش كام .. فأنا  
هسيبك برحتك لحد ما تيجي تحكىلى بنفسك على اللى مضايقتك  
قالت ذلك ثم نهضت وغادرت الغرفة .. ظلت "مى" تفكر فى كلمات أمها وهى  
فى حيرة من أمرها.

\*\*\*\*\*

اقتربت "ناهد" من "مراد" الجالس فى الشرفة يقرأ أحد الكتب .. جلست على  
المقعد بجواره وقالت:

"-مراد" عايزه أتكلم معاك شويه

أغلق الكتاب قائلاً:

-أفضلى يا ماما

تتهدت "ناهد" وهى تنظر اليه بأسى قائلاً:

- عارفه انك مش حابب تتكلم فى الموضوع ده بس يا "مراد" أنا نفسى أفرح  
بيك بأه

ظهر الضيق على وجه "مراد" فأكملت قائله:

-والله فى بنات كتير كويسة .. انت بس ادى لنفسك فرصه انك تتعرف على  
واحدة فيهم

شجعها صمته وهدوئه على الاسترسال فقالت بحماس:

-لو وافقت .. من بكرة هجبلك صور ١٠ عرايس شوفهم كلهم واتكلم مع كل

واحدة فيهم واختار اللى قلبك يرتاحلها .. قولت ايه يا "مراد"

بدا عليه التفكير وظل محتفظاً بصمته فأكملت قائله بحنان:

-لو مش عايزنى أنا أدورك على عروسه .. و فى واحدة انت حاطط عينك

عليها قولى وأنا أخطبهاك

خرج "مراد" عن صمته قائلاً:

-لأ مفيش حد

ابتسمت قائله:

-خلاص يبقى زى ما اتفقنا .. هجبلك صورهم بكرة .. وشوف منهم مين تحب

تتكلم معاها وتتعرف عليها .. ماشى يا حبيبي ؟

أوما "مراد" برأسه موافقاً فاتسعت ابتسامه أمه ودعت الله أن يقذف بحب  
احدى الفتيات فى قلبه.

\*\*\*\*\*

-انت اتجننت يا "جمال" ازاي تطلب منى حاجه زى اكده  
تفوهت "صباح" بهذه العبارة بغضب وهى تلتقى بـ "جمال" سرأ فى مكانهما  
المعتاد .. قال لها "جمال": "  
-انتى مش بتجولى انك مش طايجاها وعائزه تخلصى منيها  
صاحت بحنق:

-بس مش للدرجادى يعنى .. مش لدرجة انى أأذيها اكده  
قال "جمال" وهو يحاول اقناعها:  
-هى مش هتتأذى بالعكس دى هتتجوز يا بت وتسيبك البيت تمرحى فيه لحالك  
..وتروح هى على بيت جوزها ومش كل شويه يجولوك "مريم" عملت  
"مريم" سوت  
فكرت "صباح" قليلاً ثم قالت:

-بس مين الراجل اللى هيرضى يعمل اكده .. وايه مصلحته يعنى يجيب لنفسه  
مصيبه زى دى  
قال "جمال" شارحاً:

-الفلوس يا بت .. الفلوس تعمل أكثر من اكده .. أنى بعمل اكده عشان صالحك يا  
"صباح" دى لو فضلت حداكم أكثر من اكده مش بعيد تلحس عجل أبوكى  
وتخليه يكتب كل حاجه بإسمها وتطلعى انتى وأخوكى من المولد بلا حمص  
هتفت "صباح" قائله:

-يا مصيبتى هى ممكن تعمل اكده  
قال "جمال" ينفث سمه:

-اييوه يا بت وأكثر من اكده كمان .. دى واحده كانت عايشه فى مصر لحالها  
يعنى مخها يوزن بلد .. وأكد أكيد جايه عشان تأش اللى وراكوا واللى جدامكوا  
وتاكل عجل أبوكى وأمك  
تمتمت "صباح" بغل:

-بنت التيببيبيبيت

-ها جولتى اييه

قالت متردده:

-بس انت متأكد ان الموضوع هينتهى بجواز مش بدم ؟

قال بسرعة:

-اييوه اييوه متجلجيش أنا عارف دماغ أبوكى امنيح .. وبعدين طالما الراجل

هيرضى يتجوزها خلاص ايه لازمته الجتل عاد

بدا عليه التردد مرة أخرى فقال لها:

-اعرفى انك اكده بتدافعى عن حجك وحج أخوكى .. وكمان بتحمى أبوكى وأمك

من واحدة زى دى .. انتى بتعملى اكده عشان صالح عيلتك يا "صباح" ..

وعشان تخلصى من الحربايه دى

قالت "صباح" بحزم:

-ماشى يا "جمال" آنى موافجه

ابتسم "جمال" وقد شعر بالإرتياح وقال:

-وأوعدك يا "صباح" بمجرد ما الحكاية دى تخلص هتجوزك على طول يا بت

قالت بلهفه:

-بجد يا "جمال"

-اييوه طبعا أمان .. بس اثبتى انتى بس انك جدها وانك تستحجى تكونى مرت

"جمال الهوارى"

قالت بثقه:

-متجلجش يا "جمال" آنى جدها .. بكرة تشوف

\*\*\*\*\*

أخذ "مراد" يشاهد الصور التى أحضرتها والدته لعدة فتيات مرشحات لتكون  
احداهن زوجة المستقبل .. ظل ينظر الى صورة تلو الأخرى .. وهو يشعر أنه فى

حيرة من أمره .. كلهن جميلات .. لكن .. ولا واحدة منهن جذبتة ليفضلها عن

الأخريات .. اعاد مشاهدة الصور مرة أخرى .. مرات ومرات .. ونفس الأمر ..

لم يتوقف عند واحدة بعينها .. ترك الصور من يده وزفر بضيق ثم أحضر دفتره

وقلمه .. وكعادته أخذ يبوح لدفتره بما يجيش فى صدره



فى اليوم التالى ذهبت "سارة" الى عملها مع "مراد" كالمعتاد .. توجهت الى الطابق الذى يحوى مكتب "مراد" و "طارق" وباقى الإداريين .. كانت تشعر بخفقات قلبها تتسارع .. لا تعلم ماذا تفعل .. ولا ماذا ستقول ل "مراد" اذا رآها .. لكنها أخذت تسير فى الردهة على غير هدى .. ثم شعرت بسخافة ما تفعل .. فتوجهت الى المصعد وانتظرت صعوده .. فى تلك اللحظة انفتح أحد الأبواب ورأت "طارق" يخرج منه .. ازداد خفقان قلبها بشدة وشعرت بتوتر بالغ .. كان بيده احد الملفات التى يتفحصها فبدأ وكأنه لا يراها حتى توقف بجوارها أمام المصعد .. رفع رأسه ونظر اليها تلاقت أعينهما فشعرت بإضطراب بالغ .. هز رأسه مرحباً ففعلت المثل .. انفتح باب المصعد فنظر اليها مبتسماً وأشار الى المصعد بيده قائلاً:

-افضلى

ثم .... نزل هو عن طريق السلالم .. تابعته "سارة" بعينها حتى اختفى.

\*\*\*\*\*

دخلت "صباح" الى غرفة "مريم" تحاول تفحص أغراضها .. دخلت "مريم" الغرفة فارتبكت "صباح" وقالت:  
-كنت بدور عليكى  
ابتسمت "مريم" وقالت:  
-كنت مع جدو كان بيفرجنى على البلد .. بلدكوا حلوة أوى يا "صباح" .. وفيها أماكن جميلة .. جدو قالى انه هياخذنى آخر الإسبوع ويفرجنى على أماكن أجمل كمان من اللى شوقتها النهاردة  
شعرت "صباح" بالحقد والحسد وقالت ببرود:  
-امنيح

رأت "صباح" قلاده ذهبية فى رقبة "مريم" فأقبلت نحوها وأمسكتها قائلة:  
بإعجاب:

-جميلة جوى

ابتسمت "مريم" وقالت بسعادة:

-جدو جبهالى النهارده  
نظرت اليها "صباح" وهى تحاول أن تخفى حنقها وضيقها وقالت:  
-بجولك ايه يا "مريم" متيجي نخرج سوا وأفرجك على بلدنا صوح  
قالت "مريم" بسعادة:  
-طبعاً يا حبيبتي شوفى يناسبك نخرج امتى  
قالت "صباح" بحزم:  
-بكره ان شاء الله .. هنخرج سوا بكره  
عانقتها "مريم" وقالت مبتسمه:  
-أنا فرحانه أوى انى موجودة وسطيكم .. ربنا ما يحرمنى منكوا أبداً

\*\*\*\*\*

فى اليوم التالى خرجت "مريم" مع "صباح" .. التى أخذتها الى أماكن عدة ..  
كانت تتطلع الى هاتفها كأنها تنتظر شيئاً .. ثم رن هاتفها معلناً عن وصول  
رسالة فأجابت عليها ثم قالت ل "مريم":  
-يلا يا "مريم" هفرجك على مكان تانى  
قامت "مريم" معها وهى تنظر الى الطبيعة والمبانى حولها والابتسامه على  
شفتيها .. كانت "صباح" تشعر بالتوتر .. وتنظر خلفها .. جذبت "مريم" من  
ذراعها وأدخلتها فى المكان الذى تلتقى فيه ب "جمال" وقالت لها:  
" -مريم" خليكي اهنه أنى رجعالك كمان شوى  
قالت لها "مريم" بقلق:  
-ليه يا "صباح" هتروحي فين  
قالت "صباح": "

-فى واحدة صحبتنى هتجابلى جريب من اهنه هروح أخذ منها حاجه وأرجعك  
قالت "مريم": "

-طيب خديني معاكى .. هقف بعيد مش هضايقكوا

قالت لها "صباح" بحزم وهى تغادر:

-لأ خليكي اهنه .. على الأجل تتحمى من الشمس .. أنى رجعالك مش هتأخر  
قالت ذلك ورحلت دون أن تعطى "مريم" فرصة للإعتراض .. وقفت "مريم"  
تتطلع الى المكان حولها .. والى البيت الذى لم يكتمل بناءه .. فى تلك الأثناء

وعلى بعد خطوات .. كان رجلاً ما يتابع ما يحدث .. وبمجرد أن رأى "صباح" تغادر وتترك "مريم" بمفردها .. جرى مسرعاً وذهب الى رجلين جالسان معاً على أحد المقاهى وقال لهما بهمس:

-الحجوا يا رجاله .. لجيت "جمال" ابن "سباعى" مع واحدة فى حته جريبه من انه وهاتك يا غرام

صاح أحد الرجلين بغضب:

-أعوذ بالله .. هى وصلت لأكده

قال الآخر بغضب:

-ده تبيبيبيبيبت صحيح .. فإكر نفسه فىن ده

قال الرجل وهو يلهث من الجري:

-يعنى هنسيبه اكده يعمل اللى على مزاجه مع بنات الناس .. ليه هى البلد مفهانش رجاله ولا اييه

هب الرجلين واقفين وذهبوا بصحبة الثالث الى مكان البيت .. بمجرد أن رآهم "جمال" الذى كان يتخفى بجوار البيت .. دخل على "مريم" التى فزعت لرؤيته وهجم عليها معانقاً اياها .. حاولت "مريم" ابعاده عنها ففشلت .. دخل الرجال وصاح أحدهم:

-بتعمل ايه يا "جمال" يا تبيبيبيبيبيبت

نظر اليهم "جمال" ليتأكد من أنهم قد رأوه بالفعل ثم قفز من الشباك وجرى فى اتجاه بيته .. ووقفت "مريم" مصدومة مندهشة لا تدرى ماذا حدث ولماذا حدث .. أقبل عليها أحد الرجلين وهو يصيح بغضب هادر:

-انتى مين وبنت مين

قالت بصوت مرتجف والعبرات تتساقط من عينيها:

-أنا "مريم" .. بنت "خيري عبد الرحمن السمرى"

نظر الرجلين الى بعضهما البعض وصاح فيها أحدهما:

-عيلة السمرى .. يعنى من عيلتنا .. أنا ليا صرفه مع "عبد الرحمن" جدك و

"عثمان" عمك اللى مش عارفين يربوا بنتهم

جرت "مريم" وهى منهارة .. لا تدرى حتى طريق البيت .. سألت امرأة كانت

تسير فى الطريق فأرشدتها الى مكان البيت .. جرت مسرعه الى غرفتها ..

وجلست على الفراش تلف نفسها بذراعيها لتوجف رجفه جسدها و تحاول

استيعاب ما حدث .. ما هي الا دقائق حتى سمعت صوت طرقات عاليه على باب البيت حتى كان أن يتهشم .. ثم سمعت أحد الرجال يصيح قائلاً:

" -عبد الرحمن " .. شوفت اللي عملته بنت ابنك

قال " عبد الرحمن " بفزع:

-ايه اللي حوصل

قال الرجل بغضب هادر:

-بنت ابنك كانت بتجابل " جمال الهوارى " شفناها وهي فى حضنه ومسخرة

وجله أدب

قال " عبد الرحمن " بدهشة:

-بنت ابني مين ؟

قال الرجل بغضب:

-جالتلنا ان اسمها " مريم "

قال الآخر بصرامة:

-لو معرفش كيف تربي بناتك يا " عبد الرحمن " احنا نربيهاك

كان " عبد الرحمن " مذهولاً مما يسمع .. تتمم قائلاً:

-لا مش ممكن

قال الرجل بصرامة:

-بجولك شفناها بعيننا وهي معاه هتكذبنا ولا ابيه

لم يستطع " عثمان " التحمل أكثر هب فى اتجاه غرفتها فأسرع " عبد الرحمن " خلفه قائلاً:

-لا يا " عثمان " متجتلهاش دى بنت خوك

أخذت جدة " مريم " تصرخ وهي تلحق بهما .. اقتحم " عثمان " غرفة " مريم "

فنظرت اليه " مريم " الجالسه على فراشها بفزع .. جذبها من شعرها وشفعها

بقوة على وجهها وصرخ فيها قائلاً:

-على آخر الزمن جايه تفضحيننا .. صحيح محدش عرف يربيكى ويعلمك الأدب

.. ماشيالى على حل شعرك فاكره مفيش فى عيلتك رجاله ولا ابيه

كانت " مريم " تبكى من الألم والصدمة والخوف .. خلصها " عبد الرحمن " من

يده قائلاً:

-اتركها يا " عثمان " بجولك اتركها

جذبتها جدتها الى حضنها وأبعدتها عن "عثمان" الذي صرخ في والده قائلاً:  
-اتركها كيف يا بوى بعد ما جرستنا وسط الخلج  
قال "عبد الرحمن" بصرامة:  
-آنى هشوف حل للموضوع ده انت لا تتدخل واصل .. سمعنى يا "عثمان" لا  
تتدخل واصل  
ثم خرج وهو غاضب بصحبة الرجال متوجهاً الى بيت علية "الهورى"

\*\*\*\*\*

قال "سباعى" بحزم:  
-اللى غلط يصلح غلظته .. "جمال" لازم يتجوز "مريم"  
تفوه "سباعى" بهذه العبارة بعدما أقبل عليه الرجال من عيلة "السمرى"  
وعلى رأسهم "عبد الرحمن" .. كادت الحرب أن تندلع بين العائلتين مرة أخرى  
.. ولم يكن حل أمام الجميع سوى زواج "مريم" من "جمال" .. أقبل "سباعى"  
تجاه "عبد الرحمن" قائلاً:  
-متجلجش يا "عبد الرحمن" .. "جمال" هيتجوزها .. عرضك متصان  
متخافش

قال "عبد الرحمن" بصرامة:  
-لو ده محصلش يا "سباعى" يبقى بتعلن الحرب بنفسك  
أكد "سباعى" بثقه:  
-جولتلك هيحصل .. احنا كمان ما بدناش حرب معاكم .. "جمال" هيتجوز  
"مريم" بنتكم آخر الاسبوع .. ومفيش الا عيلتنا وعيلتكم اللى هتعرف بعملة  
التنين دول .. طالما غلطوا يبجى يستهلوا جطم رجايبهم والغلظة دى تتصلح  
بالجواز بدل ما العيلتين ياكلوا فى بعض .. ما فيش حل الا اكده  
قال "عبد الرحمن" بحزم قبل أن ينصرف هو والرجال:  
-اتفجنا يا "سباعى" .. كتب الكتاب آخر الاسبوع

\*\*\*\*\*

صاح "سباعى" بغضب هادر:  
-ملجش الا بنت عيلة السمرى اللى تفضحنا معاها يا ابن التيبيبيبيبيب

-هى اللى غوتنى يابوى وجالتلى أجيلها فى هداك البيت  
صرخ فيه قائلاً:

-ومدام هيه حرمة تيببيبيبيبت .. بتسمع كلامها ليه الا اذا كنت تيببيبيبيبت زيها  
ثم قال بحزم:

-آخر الاسبوع هتكتب عليها والدخلة بعديها بيوم .. انت فاهم  
قال "جمال" وعيناه تلمعاه خبثاً:  
-فاهم يا بوى .. فاهم .. وموافق كمان

\*\*\*\*\*

لم تتوقف "مريم" لحظة عن البكاء فى حضن جدتها وظلت تردد:  
-انا مظلومة والله العظيم مظلومة

ربتت جدتها على رأسها وهى تشاركها بكائها فى صمت .. أقبل "عثمان"  
واقترح الغرفة ففزعت "مريم" وانزوت أكثر فى حضن جدتها التى أحاطتها  
بذراعيها لتحميها منه .. قال "عثمان" بغضب وقسوة:

-اعملى حسابك ان كتب كتابك على "جمال" هيكون آخر الاسبوع والدخلة  
بعدها بيوم

تجمدت "مريم" فى مكانها واتسعت عيناها من الدهشة وقالت بصوت مرتجف:  
-ايه .. بتقول ايه .. "جمال" مين .. كتب كتاب مين

صرخ فيها:

-أمال كنتى عايز تمشى على حل شعرك ونسيبك تعملى ما بدالك .. هتتجوزيه  
يعنى هتتجوزيه .. لازم نتستر على اللى حوصل ده

هبت "مريم" واقفه وقالت بغضب:

-أنا مغلطتش .. أنا معمطتش حاجه غلط .. هو اللى طلعلنى فجأة وحضنى غصب  
عنى معرفش طلعلنى منين ومعرفش ليه عمل كده .. أصلا انا معرفش حد فى

البلد .. ولا عمرى جيت هنا .. ازاي يعنى هعرف واحد فى الكام يوم اللى أعدتهم  
هنا .. وانا مخرجتش لوحدى أبدا .. بخرج مع جدو أو "صباح" .. ازاي هيكون  
عارفه واحد يعنى

قال بقسوة:

-يا تتجوزى اللى فضحتينا وضيعتى شرفك وشرفنا معاه يا هجتلك بيدي يا بنت

خوى

واجهته قائله بحزم:

-مش هتجوزه

نظر اليها "عثمان" بغيظ ثم صفعها على وجهها مرة أخرى وصرخ فيها:

-طبعا لازم تبجى بجحه وجليله الحيا ما انتى كنتى أعدالى فى مصر لحالك

وأكيد كنتى هناك برده ماشيه على حل شعرك

صرخت أمه وهبت واقف وأخفت "مريم" خلفها وصاحت فى "عثمان": "

-أبوك جالك لا تدخل فى الموضوع ده يا "عثمان" .. امشى اطلع بره

خرج "عثمان" وهى يغلى من الغضب .. انهارت "مريم" على الأرض باكيه

وجلست جدتها بجوارها وأخذتها فى حضنها .. نظرت اليها "صباح" التى

جاءت على اثر صراخهم ..لم تكن لتجرو على أن تقص الحقيقة على أحد ..

كانت تشعر بألم قاتل فى قلبها .. فقد اتفق معها "جمال" على أن رجلاً آخر هو

الذى سيقوم بذلك ويتزوج "مريم" .. لم تكن تعلم بأن "جمال" أراد "مريم"

لنفسه.

\*\*\*\*\*

قالت جدة "مريم" لـ "عبد الرحمن" فى غرفتهما:

-آنى مش مصدجه ان "مريم" تعمل اكده

قال "عبد الرحمن" واجماً:

-الرجاله شافوها مع "جمال"

ثم أكمل بحيره:

-لحجت منين تعرف "جمال" وتسلمه حالها اكده

قالت زوجته:

-وعشان اكده بجولك ان مستحيل تكون عملت اكده هى جالتلى انه طلعلها فجأة

قال "عبد الرحمن" بحزم:

-خلاص مفيش فايده من الحديث ده .. لو متجوزتوش الناس هتفضل تتكلم عنها

وعنا وانتى عارفه "عثمان" دمه فاير .. لو متجوزوش والله ليجتلها هى و

"جمال" وتبجى الحرب بين العيلتين نارها جادت تانى

قالت زوجته بحسره:

-وذنبها ايه المسكينة دى .. اذا كان معملتش حاجه

قال " عبد الرحمن " بحزم:

-مصلحة الجبيله فوج كل شئ .. لازم يتجوزا يا اما هنشوف بحر دم بين العيلتين .. متنسش ان اللي حوصل زمان لسه ناره مبردتش لحد دلوجيت ثم قال بحيره:

-وبعدين يعني كيف معملتش حاجه .. يعني " جمال " هيجيب مصيبه لنفسه ويتجوزها غصب عنه ليه يعني تنهد قائلاً:

-اللى رايده ربنا هيكون ومحدث هيجدر يمنعه واصل

\*\*\*\*\*

التقى " جمال " بالرجل الذى أخبر الرجلين على المقهى برؤيته لـ " جمال " مع امرأه .. أعطى له رزم نقديه قائلاً:

-آدى بجيت حبك

قال الرجل فرحاً:

-تسلم يا " جمال "

ربت " جمال " على كتفه قائلاً:

-طلعت راجل .. كنت خايف لتبوظلى المصلحة

-عيب يا " جمال " هو أنا عيل ولا ابيه .. ده أنا خلتهم أدين مش على بعضهم وجاموا معايا يشوفوا اللي بيحصل .. بس انت شيطان يا " جمال " بجد شيطان ..

مكنتش أعرف ان جلبك مغلول للدرجة دى من عيلة " السمرى "

قال " جمال " بقسوة:

-العين بالعين والسن بالسن والبادى أظلم .. زمان خدوا منينا حرمة بفضيحة ..

ودلوجيت خدنا منيهم حرمة بفضيحة .. اكده معدش حد أحسن من حد

صمت لبرهه .. ثم قال بغل وعلامات الحقد والكره على وجهه:

-لا ومش أى حرمة .. دى بنت " خيرى عبد الرحمن السمرى " .. أخيراً عرفت

أردلك اللي عيملته فينا يا " خيرى " .. وبنتك اتجرت زى ما مرت عمى

اتجرت بالظبط.



## الفصل الحادى عشر

قضت "مريم" ليلها باكيه حزينه .. لا يفتر لسانها عن قول "حسبي الله ونعم الوكيل فى اللى ظلمنى" ظلت ترددها دون غيرها .. حتى تعبت ونامت .. ظلت جدتها ساهرة بجوارها حتى اطمننت لنومها .. دثرتها جيداً وعادت الى غرفتها .. ما هى الا أقل من نصف ساعة حتى استيقظت "مريم" راقبت الساعة التى تسير الى الثانية عشر الا ثلاث .. جلست على الفراش فى انتظار مرور الوقت .. وما ان دقت الساعة معلنة منتصف الليل حتى نهضت من فراشها وتوجهت الى الحقيبة الصغيرة التى تحوى خطابات "ماجد" وأخرجت منها الخطاب الذى حان دوره بحسب ترتيب الأرقام وجلست على فراشها تقرأه:

-حبيبتي "مريم" .. أتذكرين كلماتك لى وأنا على فراش المرض .. كنت تذكرينى دائماً بفضل الصبر وبثوابه عند الله .. كنتى تذكرينى بالآية التى فى سورة "هود" والتى تقول " إِلَّا الَّذِينَ صَبَرُوا وَعَمَلُوا الصَّالِحَاتِ أُولَئِكَ لَهُمْ مَغْفِرَةٌ وَأَجْرٌ كَبِيرٌ ... " وبالآية التى فى سورة "النحل" والتى تقول " مَا عِنْدَكُمْ يَنْفَدُ وَمَا عِنْدَ اللَّهِ بَاقٍ وَلَنَجْزِيَنَ الَّذِينَ صَبَرُوا أَجْرَهُمْ بِأَحْسَنَ مَا كَانُوا يَعْمَلُونَ " ... وبالآية التى فى سورة "المؤمنون" والتى تقول " إِنِّي جَزَيْتُهُمُ الْيَوْمَ بِمَا صَبَرُوا أَنَّهُمْ هُمُ الْفَائِزُونَ " .. كنتى تذكرينى بتلك الآيات وتتلئها على مسامعى لأحتسب دوماً آلامى وعذابي ومرضى .. ها أنا الآن أذكرك بتلك الآيات ليكون لك فيها سلوى على فراقى الذى أعلم أنه كان شاقاً عليك .. حبيبتي "مريم" .. أثق جيداً فى أن الله سيحفظك ويرعاك .. لأننى أعرفك جيداً أعرف أنك تحاولين قدر استطاعتك ألا تغضبيه وأن تفعلى ما يرضيه لذلك أعلم بأنه سيكون معك مثلما أنتِ معه .. أختم خطابي بتلك الآية الكريمة .. والتى ستكون طلبى منك هذه المره " .. يَا أَيُّهَا الَّذِينَ آمَنُوا اسْتَعِينُوا بِالصَّبْرِ وَالصَّلَاةِ إِنَّ اللَّهَ مَعَ الصَّابِرِينَ." أنهت "مريم" قراءه الخطاب والدموع فى عينيها وضمت الخطاب الى صدرها قائله:

-ياااه يا "ماجد" .. لو تعرف أنا أد ايه كنت محتاجه أسمع منك الكلام ده ..

كأنك حاسس بيا ومعايا

نهضت وتوضأت ووقفت بين يدي الله تبث له شكواها وترجو رحمته .. ظلت

تصلى طول الليل ولا يفتر لسانها فى السجود عن قول "حسبي الله ونعم الوكيل" .. فقد أوكلته وهو حسبها .. أنهت صلاة الفجر وجلست تقرأ وردها حتى الشروق .. شعرت بالسكينة وبالراحة تغمرانها .. وكأن صب فى قلبها الذى يشتعل برداً وسلاماً .. فاطمئن وسكن .. شعرت بشعور غريب يجتاح كيانها نظرت من مكانها الى شباك غرفتها والى النور الصباح الذى بدأ يتسلل الى السماء .. شعرت وكأن دعائها قد استجاب .. شعرت بقشعريرة غريبة تسري فى جسدها كله .. ظل نظرها معلقاً بالسماء وصوت بداخلها يهتف "لقد استجاب الله لك" .. كبر هذا الشعور بداخلها حتى أدركته بكل حواسها .. كان هذا الشعور بداخلها كما لو كان يقيناً وأمر واقع .. حتى أنها وجدت الإبتسامه تتسلل الى شفيتها وقلبها يرقص فرحاً .. شعور غريب لم تختبره من قبل ولا تعلم سببه ولا حتى تعلم كيف شعرت به .. كل ما تعلمه هو أنا كانت فى تلك اللحظة واثقة من شئ واحد فقط" .. لقد استجاب الله دعائها"

\*\*\*\*\*

طرقت "مى" باب غرفة أمها فأذنت لها بالدخول .. قالت أمها:  
-تعالى يا "مى"  
كانت الأم جالسه على فراشها تشاهد أحد البرامج فى تلفاز غرفتها .. اقتربت منها "مى" وجلست بجوارها .. أغلقت الأم التلفاز والتفتت الى ابنتها تنظر اليها باهتمام .. قالت "مى" بشئ من التردد:  
-فاكرة يا ماما لما كلمتيني من كام يوم فى أوضتى وقولتيلي لو فى حاجه حبه أتكلم فيها أتكلم معاكى انتى لانيك هتفدينى أكثر من صحابى  
-أيوة يا حبيبتي فاكراه  
بدا عليها التوتر فجذبتها أمها من يدها وأجلستها بالقرب منها وقالت بحنان:  
-تخيلى دلوقتى ان احنا صحاب .. مش أم وبنتها .. واتكلمى براحتك  
قالت "مى" بخجل:  
-فى عميل عندنا فى الشركة .. أنا كنت صممتله شغله من فترة .. دلوقتى رجع يتعامل مع مكتبنا تانى فى حملة جديدة و "مريم" هى اللى مسكاله شغله

صمتت فلم تقاطعها أمها .. أكملت "مى" بصوت خافت:  
-هو انسان محترم أوى يعنى مشفتش منه حاجه وحشه .. وكمان مؤدب أوى  
وشخصيته حلوة .. يعنى بصراحة .. أنا أعجبت بيه .. وحسه بحاجه نحيته  
ثم تلتفت العبرات فى عينيها وقالت:  
-بس هو أنا حسه انه معجب بـ "مريم" .. لما بتغيب ببسأل عليها باهتمام ..  
وفى آخر مرة طلب رقمها .. وحسه انه مش شايفنى أصلاً  
صمتت أمها قليلاً ثم قالت:

-عايز رقم "مريم" ليه  
مسحت "مى" العبره التى تساقطت على وجنتها وقالت:  
-هو انسان محترم أوى وجد .. يعنى أنا حسه انه عايز يتقدم لـ "مريم" .. هو  
مش بتاع صحوبيه وكده .. وهو عارف ان "مريم" محترمة يعنى أكيد عايز  
حاجه رسمى

قالت أمها وهى تنظر اليها بتمعن:  
-وانتى حسه بيايه دلوقتى ؟  
أجهشت "مى" فى البكاء وقالت:  
-حسه انى بتقطع من جوه .. أنا فعلاً حسه انى اتعلقت بيه أوى رغم انه  
بيتعامل معايا عادى جداً .. بس حسه ان هو ده الانسان اللى نفسى ارتبط بيه ..  
بس هو مش حاسس بيا خالص .. وكل ما يسألنى عن "مريم" أو يتكلم معاها  
أدامى بحس انى مخنوقة أوى ومضايقه أوى منه ومنها  
ربتت أمها على ظهرها وقالت بهدوء:

-بصى يا "مى" .. أولاً وقبل كل شئ انتى عارفه كويس ان الراجل اللى  
هتجوزيه ده ربنا كتبها لك من قبل ما انتى تتولدى .. يعنى مهما عملتى مش  
هتاخدى غير نصيبك اللى ربنا كتبها لك .. صح  
أومات "مى" برأسها فأكملت أمها بحنان:

-عارفه ان اللى انتى حسه بيه دلوقتى شعور صعب .. بس حبيبتي الى ضايقتى  
فى كلامك انك قولتى انك لما بتشوفيهم مع بعض بتضايقي منه ومنها .. أولاً يا  
حبيبتي لازم أفكرك بحديث النبي صلى الله عليه وسلم " لا يؤمن أحكم حتى  
يحب لأخيه ما يحب لنفسه " .. و"مريم" صحبتك وأعز صحباتك .. وحتى لو

مكنتش صحبتك وكانت مجرد زميله عاديه أو حتى واحده متعرفيهاش .. برده لازم تحبيلها الخير زى ما بتحبيه لنفسك .. لو هو الراجل ده ربنا اختاره لـ "مريم" محدش أبدأ هيقدر يمنع ارتباطهم .. ولو ربنا اختاره ليكي انتى محدش أبدأ هيقدر يمنع ارتباطه بيكي هدأت "مى" قليلاً فأكملت أمها:

-الحقد والحسد أول حاجه بيدمروها هو صاحبهم اللى حاسس بيهم .. كل الناس فى جواها حسد .. مفيش حد مبيحسش الاحساس ده .. بس الفرق بين شخص والتانى هو الايمان .. اللى ايمانه قوى بيقدر يسيطر على مشاعر الحسد اللى جواه ويحولها لطاقة ايجابية .. واللى ايمانه ضعيف بيسيب الشعور ده يتملك منه ويطغى عليه لحد ما يتدمر نفسياً ويحس انه كاره الناس وكاره نفسه .. اوعى تسيبي الاحساس ده يسيطر عليكي .. ولما تلاقى فى ايد غيرك حاجه انتى بتتمنيها بدل ما تحسديه وتحسي بالغضب وبالحد .. قولى ما شاء الله لا قوة الا بالله .. ربنا يباركله فيها .. ساعتها الملايكة هتدعيك زى ما دعيتله .. وشوفى بأه الملايكة لما تدعيك .. الملايكة اللى مفيش عليها ذنب واحد .. يعنى أفضل من دعائك لنفسك مليون مره لاحت الإبتسامه على شفتى "مى" وقد شعرت بالراحه تغمرها فأكملت أمها مبتسمه:

"-مريم" انسانه كويسة وتستاهل كل خير .. وانتى كمان كويسة وتستاهل كل خير ..وأكيد زى ما ربنا رزق "مريم" .. هيرزقك انتى كمان .. بس أهم حاجه تتقبلى تأخير الرزق بنفس راضيه .. مش صبر عشان مقدمكيش حل غيره .. لا نفس راضيه ..أنا راضيه يارب بكل اللى ترزقتى بيه وكل اللى تكتبه ليا لانك أدرى بمصلحتى ولانك عارف أكثر منى ثم مسحت على شعرها قائله:

-اتفقتا يا حبيبتى

ابتسمت "مى" وألقت بنفسها فى حضن أمها قائله:

-ربنا يخليكي ليا يا ماما .. ريحتى قلبي ونبهتيني لحاجات مكنتش واخده بالى منها

قبلت أمها رأسها قائله:

-ربنا يريح قلبك كمان وكمان

\*\*\*\*\*

استيقظ الجميع فى بيت "عبد الرحمن" والتفوا حول طاولة الطعام .. كانت  
"مريم" هادئة ساكنه .. قال "عثمان" لأبيه وهو يرمق "مريم" بنظراته:  
-اتفجنا مع الحاج "سباعى" على كل حاجه .. وكتب الكتاب هيكون انه فى  
بيتنا

قامت "مريم" قائله:

-بعد اذنكوا

هتفت جدتها:

-انتى مكلتيش حاجه يا بنيتى

نظرت اليها "مريم" قائله بوجوم:

-شبعت يا تيته

ثم دخلت غرفتها .. نظرت أم "عثمان" اليه بعتاب قائله:

-كان لزمان الحديث ده على الوكيل يا "عثمان" .. سميت بدن البنيه

قال "عثمان" متهكماً:

-ماهى عارفه انها هتتجوزه .. ولا كانت فالحه بس تجابله فى السر وتجل

أدبها معاه

قاطعه "عبد الرحمن" بحدّة قائله:

-لما تتكلم عن بنت أخوك تتكلم بإسلوب أحسن من اكده .. أنى لحد دلوجيت

مش مصدج ان "مريم" تعمل اكده .. بس مضطر للجوازه لانى عارف ان ده لو

محصلش الناس هتاكل وشنا يا اما هتتجلب لدم

قال "عثمان" بعنف:

-يمين بالله لو متجوزته لكون جاتلها هى وياه

قال "عبد الرحمن" بغضب:

-طول عمرك ما بتعرف تحل أمورك بهدوء .. ما كان فى ولادى غير "خيرى"

الله يرحمه هو الوحيد اللى كان عاجل وعجله يوزن بلد

ثم نظر اليه باحتقار قائلاً وهو يغادر:  
-سديت نفسي الله يسد نفسك

ظلت "صباح" تحاول الإتصال ب "جمال" الذي لم يجيب على أى من اتصالاتها ..  
كانت تشعر بغضب بالغ .. حبيبها سيتزوج من ابنة أخوها ..  
وهي التي ساعدته فى تنفيذ خطته للإيقاع ب "مريم" والزواج بها .. كانت  
تشعر بغيرة فاقت قدرتها على الإحتمال فحولتها الى كلب مسعور يريد الفتك  
بمن تسبب بإشعال نار غيرتها.

\*\*\*\*\*

كانت "نرمين" تجلس مع عمته "بهيرة" فى حديقة الفيلا .. قالت "بهيرة":  
-النجع وأهل النجع وحشونى جوى  
بتسمت "نرمين" قائله:  
-أنا نفسي أشوف المكان اللى بابا اتربى فيه  
ابتسمت "بهيرة" قائله:  
-ان شاء الله يا ابنتى نجى نروح كلياتنا  
ثم تنهدت قائله:  
-بس لما ربك يريد والأمور تتصلح  
قالت "نرمين" بإستغراب:  
-أمور ايه اللى تتصلح  
-متشغليش بالك انتى با بنيتى دى مشاكل جديمه جوى متشغليش عجلك بيها  
رن هاتف "نرمين" فوجدت رقماً غريباً استأذنت من عمته وابتعدت قائله:  
-السلام عليكم  
-حبيبتي وحشتيني  
قالت بجديه:  
-انت مبتهزهاش

-منك لا طبعاً مستحيل أزها

-أفندم عايز ايه

-عايز أقولك انك قاسيه أوى وبسببك معرفتش أنام طول الليل .. كان نفسي  
أوى أكلمك واسمع صوتك بس تليفونك كان مقفول .. مجاليش نوم طول الليل  
من خوفى عليكي خوفت تكونى تعبانه أو حاجه حصلتك ومحتجاني جمبك  
قالت "نرمين" بخفوت:

-لأ مش تعبانه ولا حاجه وبعدين أعرفك منين يعني عشان أحتاجك جمبي لو  
تعبت

-انتى لسه مش حسه بيا يا "نرمين" .. ليه مش قادره تحسي انى فعلاً بحبك  
...وانك بقيتي كل دنيتي .. صحيح متكلمناش مع بعض كثير بس أنا قريب منك  
أوى وشوفتك أكثر من مرة  
قالت بإستغراب:

-شوفتنى فين

-أقولك ويبقى سر بينا

-أيوة قول

-أنا واحد من صحاب أخوكى "مراد" .. حبيت بس أقولك كده عشان تكونى  
مطمئه من نحيتي .. لانى طبعاً مستحيل أكون بلعب بأخت صاحبي  
قالت "نرمين" بإستغراب:

-انت مين فيهم .. مين فى صحابه

-تو مش هقولك .. هسيب قلبك يدلك

ثم قال:

-سلام يا حبيبتي .. هكلمك تانى متفقلش تليفونك عشان مقلتش عليكي  
أنهت "نرمين" المكالمة وابتسامه صغيره قد رسمت على شفيتها

\*\*\*\*\*

اتصل "سباعى" بـ "بهيرة" قائلاً:

-لازم تيجي النجع يا بهيره .. "جمال" كتب كتابه آخر الإسبوع

قالت "بهيرة" بسعادة:

-بجد .. ما شاء الله أخيرا الواد ده هيعجل ويتجوز

تنهد "سباعى" بحسرة قائلاً:

-اييوه

قالت "بهيرة" بفرحه:

-مين اللى هيتجوزها .. من عيلة مين ؟

تنهد "سباعى" قائلاً:

-من عيلة "السمري"

اختلفت ابتسامة "بهيرة" وقالت بوجودم:

-من بيت مين فى عيلة "السمري" ؟

-من بيت "عبد الرحمن"

قالت "بهيرة" بحده:

-واشمعنى يعني بيت "عبد الرحمن" .. واشمعنى عيلة "السمري" أصلاً ..

"جمال" ملجاش غيرهم فى البلد ولا ايبويه

قال "سباعى" بنفاذ صبر:

-أما تيجي هبجى أحكيلك .. المهم دلوجيت آنى مستنيكي لازم تحضرى

-ان شاء الله يا "سباعى" متخافش .. "مراد" لما ييجي هجوله وان شاء الله

هجينك اما بكرة أو بعده بالكثير

-طيب يا "بهيرة" بس خلى "مراد" ياخذ باله وميتكلمش مع حد واصل وانتوا

فى البلد

-متجلجش يا "سباعى" .. "مراد" عارف اكده امنيح

-طيب سلام دلوجيت

فى تلك اللحظة دخلت "مراد" بسيارته من بوابه الفيلا وتوقف أمام الباب ..

قامت عمته ونادته قائله:

"-مراد" تعالى شويه

أقبل "مراد" عليها قائلاً:



-ازيك يا عمتو .. اخبار صحتك ايه النهاردة  
قبل يدها فقالت:

-امنيحه يا ولدى .. اجعد عايزه أتكلم معاك  
جلس قائلاً:

-خير يا عمتو  
ابتسمت قائله:

"-جمال" ابن عمك "سباعى" .. كتب كتابه آخر الاسبوع ان شاء الله  
ابتسم قائلاً:

-ربنا يتمله على خير  
أكملت قائله:

-وأنا بدى أروح وانت طبعاً هتيجي معى  
-طبعاً يا عمتو ان شاء الله نروح سوا

-بس يا ولدى آنى حبه أروح جبلها بكام يوم يعني مش معجول أروح يوم كتب  
الكتاب على طول

ابتسم "مراد" وأوماً برأسه قائلاً

-مفيش مشكلة يا عمتو ممكن نساافر بكرة ان شاء الله .. هرجع دلوقتى على  
الشركة وأخلص الشغل المهم عشان الكام يوم اللى هنعدهم هناك  
ربتت على كتفه قائله:

-ربنا يحميك يا ولدى ويبارك فيك

\*\*\*\*\*

جلست "مريم" واجمة فى غرفتها على فراشها .. دخلت جدها الغرفة وجلس  
بجوارها .. لم تلتفت اليه "مريم" فقال لها:

-انتى منيحه يا بنتى

أومات "مريم" برأسها وقالت بهدوء:

-أبوة كويسة لاني واثقة ان ربنا هيجبلى حقى لانه ميرضاش بالظلم .. وانتوا  
كلكوا ظلمتونى

نظر اليها "عبد الرحمن" قائلاً:

-اسمعيني امنيح يا بنتى .. أنى مش مصدج اللى اتجال عليكي .. عارف ان  
الرجال شافوكى معاه .. بس أنى مش مصدج .. بس يا بنتى لو متجوزتيش  
"جمال" هتبجى مشكلة كبيرة جوى .. من ناحية الرجال فى عيلتنا هياكلوا وشنا  
بسبب اللى حصل والكلام اللى اتنشر دلوجيت فى العيلة كلياتها .. ومن جهه  
لان محدش منهم هيسكت لو جولنا ما بدهاش تتجوزه .. ويمكن حدا منهم  
يتهور وتجلب لدم .. اسمعى يا بنتى كان بين عيلتنا وعيلة "الهورى" مشاكل  
كثير .. راح فيها شباب زى الورد بسبب التار .. أسر بكاملها راحت فى الرجلين  
.. وممكن تكون البدايه حاجه تافهه جوى .. بس جلبت بدم .. وكل عيلة عايزه  
تاخذ بتارها من العيلة الثانية وهكذا واحد من عيلتنا مقابل واحد من عيلتهم ..  
استمر الوضع سنين طوال .. لحد ما حصل اللى وحدنا ووجف بحر الدم بيناتنا  
.. وآنى ما بديش نرجع للى فات تانى والعداوة بيناتنا .. ويضيع رجالتنا  
وشبابنا بسبب هاى العادة المتخلفة .. وعشان اكده انا و "سباعى" من سنين  
طوال عاهدنا بعض نعمل كل اللى فى وسعنا عشان نمنع المشاكل بين العيلتين  
.. ونوجف تيار الدم اللى بيناتنا

التفتت اليه "مريم" قائله بأعين دامعه:

-طيب أنا ذنبى ايه .. أنا مغلطتش .. ومش عايزه أتجوزه

قال "عبد الرحمن" بحزم:

-انى جولتلك ان مصلحة العيلة والجبيلة فوج كل شئ وبعدين احنا مش

هنرميكي يا ابنتى .. لو "جمال" معرفش يحافظ عليكي هناخدك منه

قالت "مريم" بحنق:

-بعد ما أكون اتجوزته

قال "عبد الرحمن": "

-يا بنتى "جمال" ابن عيلة أكابر .. وعنده شركه بتاعته .. وراجل زين .. يعنى

مش هنرميكي لراجل مش من مجامك .. لا عيلة "الهورى" عيلة كبيرة

ومعروفة وسط الخليج

قالت "مريم" بغضب:

-وأنا ميهمنيش هو من عيلة مين أو عنده ايه .. أنا مش عايزه لا أتجوزه ولا أتجوز غيره .. هو ظلمنى معرفش ليه عمل كده وهو ميعرفنيش بس أنا واثقه ان ده بسبب العداوة اللى كانت بين العيلتين .. بس قادر ربنا ينتقم منه ويجبلى حقى

قام "عبد الرحمن" وقال بحزم:

-الكلام ده معدش له لزوم .. لان خلاص كل شئ اتحدد واترتب

قالت "مريم" بعند:

-ربنا معايا وهينصرنى أنا واثقه .. اعملوا اللى تعملوه مفيش مأذون هيرضى يجوزنى من غير ما أقول أنا موافقه  
صاح "عبد الرحمن" غاضباً:  
-انت دماغك ناشفه كتير

ثم تركها وانصرف .. وعادت "مريم" الى شرودها مرة أخرى ولسانها لا يفتر  
ترديد الآيه فى سورة الشعراء التى تقول " رَبِّ نَجِّنِي وَأَهْلِي مِمَّا يَعْمَلُونَ " ..  
ظلت ترددها ولا تقول غيرها حتى فى صلاتها وسجودها كان هذا دعائها الوحيد  
" رَبِّ نَجِّنِي وَأَهْلِي مِمَّا يَعْمَلُونَ "

\*\*\*\*\*

فى صباح اليوم التالى قاد "مراد" سيارته بصحبة عمته متوجهاً الى النجع ..  
وصلا بعد عناء السفر واستقبلهم "سباعى" بالترحاب .. أقبل علي "مراد"  
قائلاً :

-أهلا ومرحبا بابن خوى

عائقه "مراد" قائلاً:

-ازيك يا عمى أخبارك ايه

ابتسم "سباعى" قائلاً بفرح:

-امنيح يا ولدى كيفك انت وكيف اخواتك البنات

قال "مراد" مبتسماً:

-بخير الحمد لله يا عمى .. ازي عريسنا أخباره ايه  
أشار "سباعى" الى الداخل قائلاً:  
-عندك جوه ادخله يا ولدى  
ساعد "مراد" عمته "بهيرة" على الخروج من السيارة .. استقبلها "سباعى"  
قائلاً:

-كيفك يا بنت بوى  
-الحمد لله يا "سباعى" كيفك انت ومرتك وابنك  
-الحمد لله يا "بهيرة" الحمد لله  
استقبل "جمال" .. "مراد" بالترحاب وعاقته قائلاً:  
-أهلا أهلا بـ "مراد" ولد عمى  
قال "مراد": "

-أهلا بعريسنا .. مبروك يا "جمال" ربنا يتمملك بخير  
قال "جمال" بسعادة:

-عجبالك انت كمان يا ولد عمى .. أمال فين عمتى مجتش معاك ولا ابيه  
-لا جت .. بره مع عمى  
-ماشى هروح أسلم عليها .. يلا ادخل غرفتى ارتاح شوى  
-ماشى يا "جمال"

توجه "مراد" الى غرفة عمته أولاً ووضع بها حقيبتها ثم توجه الى غرفة  
"جمال" ووضعها حقيبته بها .. دخل وأخذ دشاً خرج ليجد "جمال" جالساً على  
فراشه قائلاً بمزاح:

-ايه رأيك نشوفلك واحده من بلدنا مادام بنات مصر مش عاجبينك  
ابتسم "مراد" قائلاً:

-هو انا أسيب ماما فى القاهرة تطلعلى انت يا "جمال" .. بقولك ايه عشان  
منخسرش بعض أقل على الموضوع ده خالص  
ضحك "جمال" قائلاً:

-ماشى يا ولد عمى .. بس لو نويت جولى وأنا أختارك عروستك .. أنى  
أعرف كل البنات اللى فى البلد .. ومنهم بنات ايبه يا بوى يحلوا من على حبل  
المشنجه

ضحك "مراد" قائلاً:

-يا ابني انت كمان كام يوم وهتجوز .. لو مراتك سمعتك بتتكلم كده متلومش  
الا نفسك

قال "جمال": "

-لا آنى أجول وأعمل اللي على كيف كيفي .. وهى مش هتكون أكثر من  
الكرسي اللي انت جاعد عليه ده  
ابتسم "مراد" بتهكم وقال:

-بداية غير مبشرة .. ربنا يكون فى عونها  
قال "جمال" وهو يغادر الغرفة:

-آنى أدري بالطريجه اللي أعامل بيها مرتى .. يلا ارتاحك شوى

التف الجميع حول طاولة الطعام فى بيت "سباعى" .. قالت "بهيرة" التى كانت  
تشعر بدوار موجهه حديثها الى أخيها:

-جولى بجه يا "سباعى ايه حكاية الجوازه دى بالظبط .. واشمعنى بيت "عبد  
الرحمن السمري"

فجأة وأمام أعينهم المندهشه سقطت "بهيرة" مغشياً عليها .. فزع "مراد"  
وهب واقفاً .. جثا على ركبتيه بجوارها وحاول أن يفيقها .. استجابت عمته له  
بصعوبه .. حملها مع "جمال" الى غرفتها وأحضروا لها الطبيب الذى قال:  
-هى مكنتش ليها سفر دلوجيت .. شكلها الضغط عندها على جوى .. والسفر  
تعابها بزيادة .. مطلوب راحه تامه وتاخذ أدويتها بمعاها .. وكمان الأدوية  
بتاعة ضهرها تاخذها بانتظام لان من الواضح انها مكنتش مواظبه عليهم ..  
وياريت محدش يجولها اى حاجه تضايجها او ترفع ضغطها لان ضغطها على  
كثير

تنهد "مراد" قائلاً:

-شكراً يا دكتور

انصرف الطبيب والتف الجميع حول "بهيرة" .. قالت والدة "جمال": "

-حمدالله على سلامتكم يا "بهيرة" خوفتينا عليكم جوى

جلس "مراد" بجوارها وقبل يدها قائلاً:

-حمدالله على سلامتک يا عمتو

التفتت اليه قائله:

-تسلم يا ولدى

قال "سباعى": "

-ارتاحى يا اختى ولو احتجتى حاجه ناديلنا

أومات برأسها وانصرف الجميع ليتركوها تنعم بالراحه

طلب "سباعى" من زوجته و من "جمال" اللحاق به فى غرفته .. أغلوا الباب  
خلفهم والتفت اليهم قائلاً:

-حالة "بهيرة" لا تسر عدو ولا حبيب .. مش عايزها تدرى بالمصيبة اللى  
وجعنا فيها عشان الضغط ميعلاش تانى  
قال "جمال": "

-متخافش يا بوى مش هجيبها سيرة واصل

سأله "سباعى" بقلق:

-جبت سيرة ل "مراد"

-لا متكلمتش معاه فى حاجه

-امنيح .. مجولوش حاجه مفيش داعى يعرف وعشان كمان ميحولش لعمته ..  
وان شاء الله الموضوع يعدى على خير .. وكتب الكتاب ينكتب فى معاده  
ونخلص من الورطة دى

\*\*\*\*\*

بعد يومين قال "عثمان" لـ "مريم" التى كانت تساعد جدتها فى المطبخ:

-اعملى حسابك ان بكره هنروح سوا عشان الكشف الطبي اللى بيطلبوه عشان  
كتب الكتاب

نظرت اليه ببرود قائله:

-مفيش داعى .. لانى مش هتجوز

اقتحم "عثمان" المطبخ صاح فى غضب:

-جولتى اييه سمعيني تانى اكده

أبعدته أمه قائله:

"-عثمان" روح شوف صالحك

نظر الى "مريم" بغضب قائلاً:

-بكرة الصبح تكونى جاهزه بكير سمعتى ولا مسمعتيش

قالت أمه وهى تخرجه من المطبخ:

-طيب هتكون جاهزه يلا انت امشى من هنه .. يلا دلوجيت

عادت "مريم" تكمل ما بيدها وهى تشعر بالحزن والأسى وعادت مرة أخرى

تردد "رَبِّ نَجْنِي وَأَهْلِي مِمَّا يَعْمَلُونَ"

فى صباح اليوم التالى وفى المركز الطبي جلس "مراد" بجوار "جمال" الذى

أخذ يهتف بحنق:

-مش عارف آنى لزمته ايه الكشف ده .. أهو عطله على الفاضى

قال له "مراد": "

-متقلقش الموضوع مش بياخد وقت

رن هاتف "مراد" فوجد أن المتصل والدته .. حاول التحدث معها لكن كان

الصوت متقطعاً بشدة فنهض قائلاً:

-ماما اقفلى وهطلع أتكلم من بره لان المكان اللى أنا فيه الشبكة فيه ضعيفه

التفت الى "جمال" قائلاً:

-هطلع أكلمها من بره وأرجعك

-ماشى يا ولد عمى

نزلت "مريم" من سيارة "عثمان" التى أوقفها أمام المركز الطبي قائلاً:

-اسبجيني انتى .. أنى هركن العربيه وآجيلك

ذهبت فى اتجاه المركز وعلامات الأسى على وجهها .. ستفعل كل ما يطلبوه

منها حتى معاد كتب الكتاب .. لكنها لن توافق على الزواج أبداً حتى لو كان

البديل هو موتها .. كانت تسير مكتتبه حزينه فما كادت توشك على الدخول من

باب المركز حتى وجدت رجلاً خارجاً فرجعت خطوة الى الخلف لتسمح له

بالمروور .. رفعت رأسها فارتطمت نظراتها بوجه الرجل .. لم تشعر بحقيبة يدها

التي سقطت منها .. انحنى "مراد" والتقطت حقيبتها التي سقطت ونظر اليها

قائلاً:

-اتفضلى

بدت "مريم" وكأنها لا تسمعه .. كانت تحديق فى وجهه بشدة بأعين متسعه .. أخذت نظراتها تتفرس فى ملامحه وهى تنظر اليهذهول .. شعر "مراد" بغرابة نظراتها .. ظل متفرساً فيها هو الآخر يحاول فهم تلك النظرات الغريبة التى ترمقه بها .. كانت نظراتها تتسم بالدهشة والصدمة ثم مالبت أن تحولت الى نظرة شوق ولهفه وكأنها حبيبه التقت بحبيبها بعد طول غياب .. قال "مراد" مرة أخرى وهو يحاول تفسير نظراتها:

-اتفضلى

مدت يدها تأخذ الحقيبة وهى لا ترفع عينيها عن وجهه فلمست يده .. نظر "مراد" الى يدها الموضوعه على يده ثم رفع نظره اليها .. لحظة وأفقت لنفسها وشعرت بالخجل الشديد أخفضت بصرها وأخذت الحقيبة ودخلت الى المركز مسرعة .. تابعها "مراد" بنظراته وهو مازال مندهشاً من تمنعها فى النظر اليه بهذا الشكل .. دخلت "مريم" وجلست على أقرب مقعد وهى تشعر بأن قدمها ترتجفان ولا تستطيعان حملها .. وبضربات قلبها تتسارع ويزداد اضطراب تنفسها .. بدا عليها الذهول الشديد .. عندها رفعت نظرها لترى "جمال" الذى كان متجهاً للخارج ويبدو أنه لم ينتبه اليها .. حمدت الله على ذلك فلو جاء للتحدث اليها لما استطاعت التحكم فى أعصابها ولكانت صرخت فى وجهه بكل ما يعتمل فى داخلها من غضب .. خرج "جمال" و انتظر حتى أنهى "مراد" مكالمته ثم قال:

-خلاص خلصت

قال له "مراد": "

-طيب كويس يلا نمشى

التفت "مراد" ليلقى نظرة على المركز قبل أن يغادر وهو مازال مندهشاً من النظرات التى رمقته بها تلك الفتاة .. التقيا ب "عثمان" الذى دلف من بوابه المركز الخارجية فقال له "جمال" بسخرية:

-أهلا يا عم مرتى

قال له "عثمان" بغيظ وهو يسير فى طريقه:



-جبر يلمك  
أطلق "جمال" ضحكه عاليه ساخرة وهو يتابعه بنظراته .. قال له "مراد: "  
-مين ده  
التفت اليه جمال قائلاً:  
-عم مرتى  
-بس شكله مضايق منك  
ابتسم "جمال" بسخرية قائلاً:  
-تعالى تعالى متشغشش بالك كثير

\*\*\*\*\*

-متأكد انها بنت "خيري السمري" ؟  
ألقى "حسن المنفلوطى" هذا السؤال على أحد رجاله الذى رد قائلاً:  
-أبيوه متأكد .. وكتب كتابها هى و "جمال السباعى" آخر الاسبوع  
كان "حسن المنفلوطى" رجل فى العقد السادس من عمره .. لكن تبدو عليه  
القوة والصلابة وتعبيرات وجهه التى تتسم بالغلظة والقسوة .. قال وكأنه  
يتحدث الى نفسه:  
-يعني بنت "خيري" هياخذها ابن "سباعى"  
ثم التفت الى الرجل قائلاً:  
-لسه مفيش أخبارك عن "خيري السمري" أو "خيري الهوارى"  
-لا يا حاج "حسن" مظهرش ولا واحد منيهم  
قال "حسن: "  
-أكد "خيري السمري" هيطهر فى فرح بنته  
قال الرجل:  
-وان مظهرش ؟  
قال "حسن" بحزم:

-ان مظهرش ومعرفتش أوصله لا هو ولا "خيري الهواري" .. يبجي لازم  
الفرح ده يتحول لبركة دم .. والعيلتين يجعوا فى بعض

\*\*\*\*\*

أتى اليوم الموعود وتعالى الزغاريد فى بيت "عبد الرحمن" كانت "مريم"  
تنظر الى ما حولها وكأن الأمر لا يعنىها .. كانت عازمة ومصرة على رفض  
هذا الزواج وأن تقف أمام هذا الظلم الذى وقع عليها .. لن تسمح لهذا المدعو  
"جمال" أن يحقق غرضه مهما كان السبب الذى دفعه لأن يفعل ذلك ويتزوجها  
بهذه الطريقة المهينه .. أصرت جدتها على ارتداء احدى العباءات المنقوشة ..  
امتثلت لطلب جدتها بعد الحاح لكنها أصرت على عدم وضع أى زينة .. لبست  
عبائتها المزركشة وارتدت حجابها والتف حولها النساء يصفقون ويغنون وهى  
جالسه بينهم فى هدوء

اجتمع رجال العائلتين بالأسفل فى انتظار حضور المأذون الذى سيكتب كتاب  
"جمال" على "مريم" .. كان "جمال" يبدو سعيداً للغاية ويرحب بالرجال  
بحماس والابتسامه لا تغادر شفتاه وهى مزهواً بنفسه وياتتصاره .. قال أحد  
رجال "المنفلوطى" المندسين بين عائلة "الهواري" لآخر:  
-هو مين هاد؟

أشار الرجل الى "مراد" الجالس بجوار "سباعى" ويتحدثان معاً .. قال له  
الرجل:

-معرفش بس اظاهر انه يجرب لعيلة "الهواري" لانه جاعد وسطيهم واظاهر  
انه حد مهم لانه جاعد جمب "سباعى" بذات نفسه وبيتكلموا مع بعض  
أوماً الرجل المندس برأسه وهو ينظر الى "مراد" بتمعن متفحصاً اياه .. ذهب  
وسأل أحد الرجال من عائله "السمري" عن "مراد" فرد الرجل:  
-معرفش يا ولد العم .. اللى أعرفه انه جاعد فى بيت "سباعى" .. يمكن ابن  
حد من جرابيه .. معرفش بالضبط  
ذهب الرجل بعيداً عن الأبصار وأخذ يتحدث الى هاتفه هامساً.

\*\*\*\*\*

اقتربت زوجة "سباعى" من "بهيرة" النائمة فى فراشها والتفتت الى الخادمة  
قائله بهمس:

-خلى بالك منيها .. من ساعة ما اجت من مصر وهى تعبانه ومبتتحركش من  
السريير من ألم ظهرها ومن الضغط اللى عنديها .. لو فاجت واحتاجت حاجه  
متخليهاش تنزل من فرشتها وهاتيها لها انتى  
قالت الخادمة:

-حاضر يا حجه متجلجلىش ست "بهيره" فى عنيا .. مبروك لـ "جمال" بيه  
-الله يبارك فيكي .. يلا فتك بعافيه اتاخرت عليهم  
غادرت زوجة "سباعى" وماهى الا لحظات حتى أفاقت "بهيرة" وحاولت  
الجلسو .. أسرعت الخادمة اليها قائله:  
-عايزة حاجه يا ست "بهيرة"

قالت "بهيرة" بصوت خافت من التعب:  
-هما انه ولا مشيوا  
-لا مشيوا راحلوا كلياتهم كتب الكتاب  
أومأت "بهيرة" برأسها فأكملت الخادمة:  
-والله سي "جمال" ده راجل ولا كل الرجاله مش عارفه ايه بس اللى وجعه فى  
العيلة دى  
تمتمت "بهيرة" قائله:

-وانى كمان مش عارفه اشمعنى اختار بنت "عبد الرحمن" .. ما البنات مليون  
البلد  
قالت الخادمة:

-لا يا ست "بهيرة" مش بنت "عبد الرحمن"  
التفتت اليها "بهيرة" وقالت بضعف:  
-بتجولى ايه يا بت .. هيتجوز بنت "عبد الرحمن"  
-لا يا ست "بهيرة" هيتجوز حفيدة "عبد الرحمن"  
قالت "بهيرة" بدهشة:

-حفيدته مين .. "عبد الرحمن" مغدوش حفيدة  
ابتسمت الخادمة قائله:

-لا عنده .. بنت ابنه "خيري" .. لجوها من فترة وجابوها تعيش حداهم  
اتسعت عينا "بهيرة" من الدهشة وقالت وعلامات الصدمة على وجهها:  
"جمال" هيتجوز بنت "خيري عبد الرحمن" ؟

-ايوه

هبت جالسها مكانها وكأنها تناست مرضها وآلامها وهتفت قائلة:

-انتى متأكده ؟

قالت الخادمة بتوتر:

-ايوة متأكده

أزاحت "بهيرة" الغطاء بعنف وصاحت بصوت مرتجف وهى تغادر فراشها:

-مستحيل يتجوزها "جمال" .. مستحيل

لكنها ما كادت تقف حتى سقطت على الأرض مغشياً عليها.

ذهبت زوجة "سباعى" الى بيت "عبد الرحمن" واستقبلتها زوجة "عبد

الرحمن" وأجلستها مع النساء فى الغرفة .. تطلعت زوجة "سباعى" الى

"مريم" من رأسها الى أخمص قدمها وقالت بتهكم:

-هى مش هتيجي تسلم عليا وتبوس يدي ولا اييه

قالت زوجة "عبد الرحمن" لـ "مريم":

-جومى يا بنتى سلمى على حماك وبوسى يدها

قامت "مريم" وتوجهت اليها قائلة:

-ازيك حضرتك

قالت لها بتهكم:

-امنيحه

عادت "مريم" أدراجها وجلست مكانها دون أن تفكر حتى فى تقبيل يد المرأة ..

استمرت النساء فى التصفيق والغناء .. كانت هناك عينا تتطلعان الى "مريم"

بحقد وحسد وغل دفين .. عينا "صباح" كانت تشعر بالنار تأكلها من كل جانب

..فها هى تلك الفتاة ستصبح بعد لحظات زوجة لحبيبها .. حبيبها الذى انتظرته

سنوات طوال .. وملك حبه كل كيانه .. نظرت اليها وكأنها تريد تقطيع

أوصالها ..وكانها تريد تهشيم رأسها .. وكأنها تريد قتلها .. كانت تغلى من

الغضب .. لم تشعر بنفسها الا وهى متوجهه الى غرفة والدها .. فتحت أحد الأدرج الذى كانت تعلم جيداً بإحتوائه على قطعة سلاح .. أخذتها وأخفتها فى ملابسها وخرجت من الغرفة والشرر يتطاير من عينيها.

\*\*\*\*\*

جاء المأذون فصاح "عثمان: "

-المأذون اجه

قال "عبد الرحمن: "

-على خيرة الله

صاح "سباعى" فى أحد الرجال:

-نادوا له "جمال" عشان نكتب الكتاب

نهض "عبد الرحمن" قائلاً:

-وانى هروح أخذ موافجة العروسة

سأل المأذون:

-فين العريس؟

رد "سباعى: "

ثوانى وييجى العريس

لحظات وجاء "جمال" وهتفت بمرح:

-منورينا يا رجاله عجبنا عندكم كلياتكوا

جلس "جمال" بجوار المأذون فى انتظار "عبد الرحمن" .. التفت الى "مراد"

الجالس بجواره قائلاً:

-عجبالك يا ولد عمى

ابتسم له "مراد" وربت على كتفه

كان أحد رجل "المنفلوطى" المندس وسط الحضور .. يمعن النظر فى "مراد"

الجالس بجوار "جمال" ويده تتحسس مسدسه الذى أخفاه بين طيات ثيابه

سُمع صوت الطلقات فى الهواء تعبيراً عن فرحهم بهذا الزواج .. كانت الطلقات

تخترق السماء بعشوائيه .. لكن إحدى الطلقات لم تنطلق بعشوائيه .. بل

انطلقت متعمدة .. متعمدة لأن تخترق أحد الأجساد .. انطلقت الرصاصة تعرف

وجهتها جيداً .. تعرف فى أى جسد ستستقر .. ولم تخطئ الرصاصة وجهتها ..  
واستقرت فى الجسد الذى أطلقت من أجله .. لتنفجر الدماء من هذا الجسد قبل  
أن يسقط أرضاً .

## الفصل الثاني عشر

سُمع صوت الطلقات فى الهواء تعبيراً عن فرحهم بهذا الزواج .. كانت الطلقات  
تخترق السماء بعشوائيه .. لكن إحدى الطلقات لم تنطلق بعشوائيه .. بل انطلقت  
متعمدة .. متعمدة لأن تخترق أحد الأجساد .. انطلقت الرصاصة تعرف وجهتها  
جيداً .. تعرف فى أى جسد ستستقر .. ولم تخطئ الرصاصة وجهتها .. واستقرت  
فى الجسد الذى أطلقت من أجله .. لتنفجر الدماء من هذا الجسد قبل أن يسقط  
أرضاً .

تعالى الهرج والمرج وبدأت النساء فى الصراخ قفز قلب "مريم" من مكانه  
وهى تردد:

-استر يارب .. استر يارب

تجمهر الرجال وتعالى أصواتهم:

-اتصلوا بالإسعاف بسرعة

-مين ابن التيبيبىيت اللى عمل اكده

-هاتوا حاجة نكتم بيها الدم

ووسط الرجال المتجمعين حول بركة الدماء التى خلفها النزف .. كان "مراد"  
جائياً على ركبتيه حاملاً رأس "جمال" فوق ذراعيه وأخذ يقول بصوت  
مضطرب:

"-جمال" .. متقلش الإسعاف فى الطريق

ثم صرخ فى الرجال قائلاً:

-اقللوا الباب كويس عشان اللي عمل كده ميهر بش ومتسمحوش لأى حد انه  
يخرج من هنا  
نفذ الرجال أوامره وأغلقوا البوابه الخارجيه تماماً ولم يسمحوا بخروج أحد على  
الإطلاق  
أخذ "سباعى" يردد:

-ولدى .. ولدى "جمال" .. مين اللي عمل اكده .. آه يا ولدى  
ربت "عبد الرحمن" على كتفه محاولاً تهدئته .. تعالت أصوات صراخ النساء  
وخاصة أم "جمال" .. فصعد اليهم "عبد الرحمن" مسرعاً وصرخ فيهم قائلاً:  
-أى حرمة فيكم هتفتح خشمها يمين بالله لظنها  
انزوت النساء وهن يشعرن بالخوف من تهديد "عبد الرحمن" .. وكتمن  
صرخاتهن .. نظرت "مريم" من الشرفه مع النساء المتجمهرات فى الشرفه  
ورأت "جمال" نائماً على الأرض والرجال حوله .. نظرت اليه بأسى وقالت  
بصوت خافت:

-يمهل ولا يهمل .. اللهم لا شماته  
فتح "عثمان" البوابه لتدخل سيارة الإسعاف التى حملت "جمال" و "سباعى"  
وزوجته وانطلقت الى المستشفى وانطلق خلفهم "مراد" بسيارته .. و "عبد  
الرحمن" بسيارته وقال لـ "عثمان": "

-خليك اهنه يا "عثمان" متسمحش لحدنا انه يمشى لازم نعرف مين اللي عمل  
اكده .. مين اللي استجرى يطخ "جمال" فى بيتي  
-حاضر يا بوى متجلجش

أمر "عثمان" الرجال بغلاق البوابه لحين حضور الشرطة .. تجمهر الرجال وكل  
منهم يحاول تخمين هوية من أطلق النار على "جمال" .. قال أحد أفراد عائلة  
"السمري": "

-لا حول ولا قوة الا بالله  
قال أحد رجال "الهوراري" بغیظ:  
-مش عارفين تحمونا فى بيتكم يا ولاد "السمري" .. ينطخ ابن كبيرنا النار فى  
داركم

قال أحد رجال "السمري" بحدده:  
-ملناش صالح باللى حوصل .. الله أعلم مين اللي عيملها

قال أحد رجال "الهورى" غاضباً:  
-هيكون مين اللى عيميلها غير حدا منيكم  
قال أحد أحد رجال "السمرى" غاضباً:  
-واحنا اييه مصلحتنا نعمل اكده مادام ابنكوا وافج يتجوز بنتنا  
قال أحد رجال "الهورى" متهكماً:  
-ما انتوا لو كنتوا عرفتوا تربوا بنتكوا مكنش حوصل اكده  
وقامت معركة بين الرجال وتعالق أصوات النساء بالصراخ مرة أخرى .. دخلت  
"مريم" الى احدى الغرف الشاغرة وأغلقت الباب عليها .. كانت تشعر بالرعب  
وظل قلبها يخفق بشدة .. جلست على الفراش وظلت تستغفر ربها وتحاول أن  
تهدى روعها وتوقف ارتجافه جسدها .. بعد لحظات حضرت الشرطة وفرقت  
الرجال .. وأخذوا أقوال الجميع وانفض الجمع.

\*\*\*\*\*

فى المستشفى جلس "سباعى" مع زوجته و "مراد" و "عبد الرحمن" وبعض  
الراجل من العائلتين خارج غرفة العمليات فى انتظار خروج "جمال" .. بعد  
ساعتين خرج الطبيب من غرفة العمليات فأقبل عليه "سباعى" فى لهفة قائلاً:  
-ظمنى يا دكتور .. ولدى جراه اييه  
قل الطبيب بهدوء:  
-للأسف الرصاصة استقرت فى عموده الفقري ومحتاج عملية تانية  
لظمت أم "جمال" قائله:  
-ولدى .. ولدى  
نهرها "سباعى" قائلاً:  
-اسكتى يا وليه واجفلى خشمك  
وضعت كفها على فمها تكتم بكائها .. فقال "عبد الرحمن" للطبيب بلهفة:  
-يعنى هيبجى امنيح يا دكتور  
قال الدكتور بأسف:

-كان نفسي أظمنكوا بس للأسف الرصاصة مستقرة فى مكان حساس وممكن  
تتسبب فى شلله طول عمره .. بس هنعمل اللى نقدر عليه ان شاء الله .. الأيام



الجايه هي الولى هتحدد خطورة حالته  
بكا "سباعى" قهراً على ابنه فاقترب منه "مراد" وربت على كتفه قائلاً:  
-ادعيه وان شاء الله يبقى كويس  
قال "سباعى" فى أسى:  
-ربنا يجومك بالسلامه يا ولى

\*\*\*\*\*

بعدها أفاقت "بهيرة" أصرت على أن تأخذها الخادمة الى بيت "عبد الرحمن  
السمري" .. وعندما وصلت علمت من "عثمان" بما حدث لـ "جمال" فأسرعت  
بالذهب الى المستشفى مع رجل من عائلتها .. هرع "مراد" اليها بمجرد أن  
رآها فى بدايه ممر المستشفى وقال بجزع:  
-عمتو ايه اللى جابك .. ليه قمتى من السرير  
قالت بلهفه:

-ظمنى على "جمال" هو امنيح ؟  
أحاطها "مراد" بذراعيه وأجلسها على أقرب مقعد وقال:  
-أيوة يا عمتو متقلقيش هو كويس وهو دلوقتى فى أوضة العمليات بيعملوله  
عمليه تانية  
قالت بلهفه:

-كتب الكتاب انكتب ولا لاء يا ولى ؟

قال "مراد" بأسى:

-لا للأسف اضرب عليه النار قبل ما المأذون يكتب الكتاب  
تنهدت "بهيرة" فى راحه قائله:  
-الحمد لله يارب .. الحمد لله

نظر اليها "مراد" باستغراب وكاد أن يسألها عن سبب قولها لذلك لكن  
"سباعى" أسرع بالإقتراب منهما قائلاً:

"-بهيرة" ايه اللى جومك من فرشتك .. الدكتور جال متعمليش مجهود واصل  
قالت "بهيرة" بحده:

-كيف تسمح بان ده يحصل يا "سباعى" .. كيف تسمح لـ "جمال" انه يتجوز

بنت "خيري السمري"

قال "مراد" بدهشة:

"-خيري السمري" ؟ .. مش ده اللي قتل راجل من عيلة "المنفلوطى"

واتهموها فى بابا الله يرحمه

قال "سباعى" متنهداً:

-اييوه هو يا ولدى

ثم نظر الى "بهيرة" قائلاً:

-انتى متعرفيش يا "بهيرة" سبب الجوازه دى

صاحب بغضب:

-السبب واضح يا "سباعى" .. ابنك "جمال" بده ينتجم من "خيري" فى بنته

..انت بتعرف امنيح ان ابنك عايز يذل عيلة "السمري" ويكسر عينهم .. كيف

بتوافج على الجوازه دى وكيف "عبد الرحمن" بيوافج يسلم بنت ابنه لـ

"جمال"

قال "سباعى" بنفاد صبر:

-اللى حوصل يا "بهيرة" ان "جمال" كان على علاقة ببنت "خيري" وكان

بيجبلها فى السر ورجال من عيلتها ظبطوهم سوا و"جمال" نفسه اعترف بان

فى حاجه بينه وبينها .. وعشان اكده اضطرينا نتستر على البنيه ونجوزها لـ

"جمال" اللي اتفضحت معاه

نظرت اليه "بهيرة" بدهشة وقالت:

-كيف بنت "خيري" تسلم حالها اكده لـ "جمال" .. هى معندهاش عجل ولا

اييه

سأله "مراد": "

-فى شهود على كده

قال "سباعى": "

-اييوه بجولك فى رجال من عيلتها شافوهم وظبطوهم مع بعض فى حتة

مخطوعه فى بيت عم يتبنى جديد وهما فى وضع مو منيح .. ساعتها راحوا

لجدها البيت وجولى الرجال كلياتهم

قال "مراد" ساخراً:

-اظاهر ان مش الأب بس اللي معندوش أخلاق .. لا وبنته شربته منه كمان

ثم نظر الى عمه "سباعى" قائلاً:

-مكنش الفروض توافق على جوازه منها .. دى واحدة غير أمينه على نفسها  
ازاى تخليها تشيل اسم ابنك .. وايه يضمناك انها معملتش مع غير "جمال" زى  
ما عملت معاه  
قال "سباعى" بحدده:

-الموضوع أكبر من اكده يا ولدى .. المشكلة كانت هتجلب دم .. واهى جلبت  
اهى ..أموت بس وأعرف مين اللى طخ "جمال" .. ياخوفى يكون راجل من  
عيلة "السمري" مجدرش يتحمل اللى حصل لبنت من عيلتهم ودمه غلى وطخ  
"جمال" .. "ساعتها هيبتى التار من أول وجديد بين العيلتين ومحدش هيجدر  
يوجفه عاد

بدت "بهيرة" وكأنها مستغرقه بشدة فى التفكير ثم قالت بحزم:

-بدى أجابل بنت "خيري"

قال "مراد" بدهشة:

-عايزه تقابليها ليه يا عمتو

قالت بحزم:

-ملكش صالح .. بدى أجابلها

قال "مراد" بنفاد صبر:

-طيب يا عمتو تعالى أروحك دلوقتى .. خلاص الفجر بأقيله كام ساعة .. وبكرة  
الصبح ان شاء الله أخذك عندها طالما ده هيرحك

\*\*\*\*\*

بعدها رحلت جميع النساء من بيت "عبد الرحمن" دخلت زوجته على "مريم"  
التي كانت تنام على فراشها متفوقعه على نفسها وهي تنظر الى فراغ الغرفة ..  
اقتربت منها جدتها وجلست بجوارها قائله بحنان:  
-انتى امنيحة يا بنيتى

جلست "مريم" على فراشها ونظرت الى جدتها قائله بحدده:

-تيته لو سمحتى احكىلى ايه اللى بيحصل .. أنا مش فاهمة حاجه .. مين عيلة  
"الهوري" دى .. ومين "سباعى" ومين "جمال" .. وليه فى مشاكل وضرب

نار .. أنا مش فاهمة حاجه  
تنهدت جدتها بحسره قائله:

-بصى يا بنيتي .. هحكيلك اللي حوصل زمان .. من زمان جوى كان فى بين  
عيلتنا وعيلة "الهواري" مشاكل جديمة جوى جوى وتار وجتل .. وكانت  
العيلتين بيكرهوا بعض كره العمى .. لحد ما فى يوم انجتل واحد من عيلة  
"المنفلوطى" .. ابن "حسن المنفلوطى" ..والعيلة دى كان فى بينا وبينهم  
مشاكل وكمان كان فى بينهم وبين عيلة "الهواري" مشاكل  
كانت "مريم" تستمع الى جدتها باهتمام فأكملت قائله:  
-ابن "حسن النفلوطى" جبل ما يموت كتب بدمه على الأرض اسم اللي جتله ..  
كتب "خيري" .. وكان فى اتنين "خيري" .. خيري أبوكى اللي من عيلة  
"السمري" .. "وخيري من عيلة "الهواري" اللي هو أخو "سباعى" .. وكان  
بينه وبين الاتنين مشاكل فمعرفة فوش يحددوا هو كان يجصد "خيري" مين فيهم  
اتسعت عينا "مريم" من الدهشة وبدا عليها الصدمة .. أكملت جدتها قائله:  
-الشرطة حجبت مع الاتنين وطلعوهم الاتنين براءه لان مكنش فى أى دليل  
ضدهم غير الاسم الله كتبه ابن "حسن" جبل ما يموت .. لكن "حسن" أقسم انه  
يجتل التنين .. "خيري" أبوكى و "خيري" أخو "سباعى" .. ومكنش فى الا  
حل واحد .. ان العيلتين يهربوا ولادهم التنين على مصر .. ومن يومها  
والعيلتين وجفوا الجتل بيناتهم وداروا على بعض  
بدا على "مريم" التأثر وهى تستمع الى جدتها وتنهدت قائله بأسى بصوت  
منخفض:

- هو ده السر اللي كنت مخبيه عليا يا "ماجد"  
قالت جدتها بدهشه:  
" -ماجد" مين ؟

تجاهلت "مريم" سؤالها وقالت بحزن:  
-بس بابا قالى انه مقتلش حد يا تيته وانه برئ  
قالت جدتها بحزم:

-طبعا مجتلش حد .. أبوكى مكنش حتى بيحب يشيل سلاح .. أبوكى كان راجل  
بيعرف ربنا .. مستحيل يجتل .. اللي جتل ابن "حسن المنفلوطى" هو "خيري  
الهواري" مش أبوكى يا بنتى

اطمننت "مريم" لتأكيد جدتها براءة والدها وقالت:  
-صح يا تيته بابا كان يعرف ربنا مستحيل يعمل كده .. انا واثقه ان مش هو اللى  
قتل الراجل اللى مات

ربتت جدتها على كتفها قائله:

-يلا يا ابنيتى الفجر عم بيأذن .. صلى ونامى وارتاحى  
خرجت جدتها وقبل أن تتوجه الى غرفتها مرت على غرفة "صباح" فوجدتها  
ساهره أمام الشباك المفتوح .. فرزت "صباح" لرؤيتها وهبت وقافه وقالت:  
-خير فى حاجه ياماي  
قالت أمها بدهشه:

-انتى منمتيش لحد دلوجيت يا "صباح"

قالت "صباح" بارتباك:

-لا مجاليش نوم

-طيب يا ابنيتى صلى الفجر ونامى .. تصبى على خير  
خرجت أمها لتعود "صباح" الى مكانها أمام الشباك وشردت من جديد.

\*\*\*\*\*

صاح "حسن المنفلوطى" بدهشة:

-يعني ابيه محدش منيكم هو اللى طخه .. أمال مين اللى طخه  
قال أحد رجاله:

-معرفش يا حاج "حسن" .. فجأة انطخ ومحدش عرف مين اللى عيميلها  
قال "حسن" ضاحكاً بسعادة:

-مش مهم مين اللى عيميلها .. المهم العيلتين وجعوا فى بعض خلاص  
ثم ضاقت عيناه وقال بخبث:  
-وان موجعوش نوجعهم

\*\*\*\*\*

فى صباح اليوم التالى استيقظت "نرمين" على صوت هاتفها .. نظرت الى

الهاتف ثم ارتسمت ابتسام صغيره على شفيتها وردت قائله:

-أفندم

-صباح الخير يا حبيبتي

قالت محاولة تصنع الجديه:

-مش قولتك متتصلش تانى

-يبقى بتقوليلي روح موت أحين.. لانى لو مسمعتش صوتك معناها ان الموت

أحسنلى

-آه والاسطوانه دى شغلتها لكام بنت قبل كده

"-نرمين" لو قولتيلي الكلام ده تانى هزعل منك بجد .. متشبهيش مشاعرى

نحيتك وكلامى ليكي باسطوانه .. ده كلام من قلبي يا "نرمين" .. قلبي اللى انتى

مش حسه بيه ومعذباه معاكى

قالت "نرمين" بصوت خافت:

-أنا أصلا مش فاهمة انت عايز ايه .. بتقول بتحبنى .. طيب وبعدين يعنى

-عايز أشوفك

قالت بدهشة:

-تشوفنى ؟

-أيوة نتقابل .. فى حاجات كتير لازم نتكلم فيها الأول قبل ما أكلم "مراد" أخوكى

.. لازم أشرحك ظروفى بالتفصيل و آخذ منك موافقه عشان محرجش نفسى مع

أخوكى

صمتت "نرمين" وهى تشعر بالحيره .. فأكمل قائلاً:

-مش محتاج منك غير مقابله واحده بس .. نتكلم فيها ونحط النقط على

الحروف وبعدها هكلم "مراد" على طول .. بس لازم نتقابل الأول يا "نرمين"

قالت "نرمين" بحيره:

-نتقابل فين ؟

قال الصوت بلهفه:

-فى أى مكان تختاريه .. انا مش هعترض .. شوفى المكان اللى يريحك

صمتت "نرمين" ولم ترد فقال:

-حبيبتي متخفيش منى .. أنا مش ممكن أدكي .. أنا بس محتاج أتكلم معاكى

الأول قبل "مراد"

قالت "نرمين" بعد تفكير:

-طيب سيبنى أفكر شوية وهقولك قرارى

-طيب بس حبيبتي متتأخريش عليا .. عشان انتى وحشانى أوى ومن زمان  
مشفتكيش .. وكمان فرصة ان "مراد" مسافر وهتعرفى تخرجى براحتك  
قالت بدهوة:

-انت كمان عارف ان "مراد" مسافر

ضحك الصوت قائلاً:

-طبعاً مش بقولك صحبه

ثم قال بهمس:

-واللى بيحب حد بيهتم بكل التفاصيل عنه .. خلى بالك من نفسك يا حبيبتي ..  
ومتخرجيش لوحدك و"مراد" مش موجود .. اتفقنا  
ابتسمت قائله:

-ماشى .. أنا مضطره أقفل دلوقتي

-ماشى حبيبتي مع السلامه

-مع السلامه

أغلقت هاتفها وقد اتسعت ابتسامتها وشعرت بخفقات قلبها المتسارعه

\*\*\*\*\*

عاد "عبد الرحمن" الى بيته ظهراً فاستقبلته أسرته متساعلين عما حدث  
فطمأنهم قائلاً:

-الحمد لله شالوله الرصاصه .. وبيجولوا احتمال كبير يبجى امنيح .. الحمد لله  
كل على الله

قال "عثمان" بغیظ:

-آه لو أعرف مين اللى عيمل اكده وطخه فى بيتنا .. كنت جتلتة بيدي  
قالت زوجته:

-ومين اللى معاه

-أبوه وأمه و عمته وابن عمه

قالت زوجته بدهوة:

-ابن عمه مين ؟

قال "عبد الرحمن" وهو يتوجه الى غرفته:

-ابن "خيرى الهوارى"

خفق قلب "مريم" بشده والفتت الى جدتها تسرع خلفه قائله:

-جدو .. هو ابن "خيرى الهوارى" ده شكله ايه ؟

التفت اليها جدها قائلاً بدهشه:

-يعني ابيه شكله ابيه .. راجل زى باجى الرجاله

صاح "عثمان" بحده:

-فى واحده متربيه تسأل عن راجل غريب شكله ابيه .. اظاهر انك عايزه تتربي

من أول وجديد

التفتت الى عمها قائله بضيق:

-بسأل لسبب فى نفسى .. مش فضول وخلص

قالت ذلك ثم توجهت الى غرفتها .. فتحت اللاب توب وجلست على فراشها

وفتحت المجلد الذى يحوى صور "ماجد" .. وأخذت تتطلع اليها وهى تتمتم

بحيره:

-معقول .. معقول أخوك .. نفس الشكل ونفس الاسم .. مش معقول كل ده صدفة

ثم قالت لنفسها بدهشه:

-بس ازاي أخوك .. وكان فىن طول السنين دى .. وععيش مع مين .. معقول

عايش مع أبوك .. طيب ليه محدش دور عليك .. يعنى مامتك تبقى مرأة الراجل

اللى قتل واللى بابا اتظلم بسببه

تهدت بقوة ووضعت كفيها على رأسها قائله:

-أنا هتجنن .. معدتش فاهمه حاجه ابدأ

\*\*\*\*\*

نامت "بهيرة" ليها فى احدى حجرات المستشفى بعدما ازداد عليها تعبها ..

استيقظت فوجدت "مراد" الى جوارها .. فاقترب منها قائلاً:

-صباح الخير يا عمتو .. ازى صحتك دلوقتى ؟

قالت بضعف:



-بخير يا ولدى الحمد لله

ثم قالت:

-كيف حال "جمال" ولد عمك

ابتسم قائلاً:

-الحمد لله بخير .. لسه مفاقش بس الدكاتره طمنونا الحمد لله .. ان شاء الله

تعدى على خير

-على الله يا ولدى على الله

صمتت قليلاً ثم نظرت اليه قائلة:

-ناديلي الممرضة تساعدنى ألبس عشان تاخذنى على بيت "عبد الرحمن

السمري"

صاح "مراد" بدهشه:

-دلوقتي يا عمتو .. انتى تعبانه .. اجلى الزياره دى شويه .. مع انى مش فاهم

سببها اصلاً .. ليه تروحي تزورى واحده زى دى .. عايزه تتكلمى معاها فى ايه

مهم كده

قالت "بهيرة" بحزم:

-جولتلك ناديلي الممرضة وملكش صالح بأى حاجه واصل

استسلم "مراد" لرغبة عمته .. وافق الطبيب على خروجها من المستشفى على

أن تواظب على تناول أدويتها فى موعدها .. مرا على غرفة "جمال" الذى أفاق

واطمئنا على صحته .. قال "جمال" متهكماً بصوت ضعيف:

-جيت أدخل دنيا كنت هخرج منها

قالت أمه بلهفه:

-بعد الشر عليك يا ولدى لا تجول اكده

ابتسم له "مراد" قائلاً:

-حمدالله على سلامتک يا "جمال" ان شاء الله تقوم بالسلامه وتبقى زى

الحصان

-تسلم يا ولد عمى

دخلت الممرضة وقالت:

-لو سمحتوا كفاية لحد كدة وسيبوا المريض يرتاح

خرج الجميع من الغرفة وأصر "سباعى" و زوجته على البقاء فى المستشفى ..

خرجت "بهيرة" مع "مراد" وتوجهوا الى بيت "عبد الرحمن" .. استقبلهم  
"عثمان" ببرود .. فواجهه "مراد" ببرود مماثل .. أدخلهم الصالون وذهب  
ليوقظ والده .. رحب بهم "عبد الرحمن" .. قالت "بهيرة":  
- عايزه أشوف حفيدتك يا "عبد الرحمن"

قال "عبد الرحمن" بقلق:

"-مريم" .. خير يا "بهيرة" .. عايزاها فى ابيه

قالت بحزم:

-ملكش صالح يا "عبد الرحمن" .. عايزه أشوفها

أدخلها "عبد الرحمن" الى غرفة "مريم" فطلبت أن تمكث معها بمفردها فخرج

"عبد الرحمن" وتركهما بمفردهما .. نظرت اليها "مريم" بدهشة وهى لا

تعرف من تلك المرأة التى دخلت عليها غرفتها .. تفحصتها "بهيرة" من رأسها

الى أخمص قدمها وقالت:

-الى خلف مماتش .. فيكي من أبوكى كثير .. بس انتى أحلى منيه .. أكيد أمك

كانت منيحه

ابتسمت "مريم" لإطراء المراه وقالت:

-متشكره

أشارت "مريم" الى السرير قائله:

-اتفضلى حضرتك اعدى

جلست "بهيرة" دون أن ترفع عينها عن "مريم" التى جلست بجوارها .. بدأت

"بهيرة" الحديث قائله:

-آنى عايزه أسألك سؤال واحد بس .. مش أكثر من اكده

قالت "مريم" بهدوء:

-طيب ممكن أعرف الأول حضرتك مين

قالت "بهيرة":

-آنى "بهيرة الهوارى" .. أخت "سباعى" و "خيرى"

نظرت اليها "مريم" بدهشة وقالت:

-حضرتك أخت "خيرى الهوارى" ؟

-ايوة يا بنتى أنا

قالت لها "مريم" بلهفه:

-أنا كنت عايزه أسأل عن حاجه مهمه .. ومكنتش عارفه أسأل مين .. وانتي أكثر حد هيفيدنى

- عن ابيه عايزه تسألنى يا بنيتي ؟

قالت "مريم" وهى تمعن النظر فى المرأة:

" -خيري" أخوكى .. اللى هرب من التار على القاهرة .. كان مخلف ولدين مش كده ؟

ضاقت عينا "بهيرة" وقالت:

-أبوكى حكاك ابيه بالظبط

قالت "مريم" بحماس:

-لأ بابا محكاليش حاجه خالص .. بس تيته امبارح حكلى عنكوا وعن جريمة

القتل اللى حصلت .. واللى لفت نظرى اسم الراجل اللى من عيلتكوا اللى هرب

هو كمان على القاهرة .. الراجل ده يبقى أبو جوزى

نظرت اليها "بهيرة" بدهشة قائله:

-أبو جوزك ازاي؟

قالت "مريم" بحماس:

-أنا مرات "ماجد" .. "ماجد خيري الهواري"

اغرورقت عينا "بهيرة" بالعبرات وقالت:

-مش معجول .. انتى اتجوزتى "ماجد" ابن خوى

قالت "مريم" بتأثر:

-أيوه .. ومكنتش أعرف انه ابن الراجل اللى فيه بينه وبين بابا عداوة ..

محدث قالى لا بابا قالى ولا "ماجد" قالى

قالت "بهيرة" بلهفة:

-وينه ؟ .. وينه ابن خوى

اغرورقت عينا "مريم" بالعبرات وقالت:

-اتوفى .. من أكثر من سنة

أجهشت "بهيرة" بالكباء .. فلم تتحمل "مريم" فشاركتها بكائها .. ضمتها

المرأة الى صدرها وقالت:

-كان نفسي أشوفه جبل ما يموت .. كان نفسي أشوفه جوى

شعرت "مريم" بالأمان فى حضن المرأة التى لم تصدق حتى الآن انها اتقت بها

..بعمة "ماجد" .. رفعت "مريم" رأسها قائله والعبرات تتساقط على وجهها:

-ادعيه ان ربنا يرحمه ويغفرله

قالت "بهيرة" بتأثر:

-ربنا يرحمك يا خوى انت وولدك

قالت "مريم" باهتمام:

-أنا من يومين شوفت صدفة واحد شبه "ماجد" بالظبط .. شبهه بشكل غير

عادى .. ده أخوه مش كده ؟ .. أخوه من أم تانيه ؟

صمتت "بهيرة" وبدا عليها التردد ثم قالت:

-ايوة أخوه .. "مراد"

ثم قالت بجدية بالغة:

-سيبك دلوجيت من اكده .. أنى عايزة أسألك سؤال وعايزاكى تقسمى بالله انك

هتجولى الحجيجة ومش هتكدي

قالت "مريم" بسرعة:

-من قبل ما أعرف السؤال .. والله العظيم مش هكذب وهقول الحقيقة

سألتها "بهيرة" وهى تفرس فى وجهها تراقب تعبيراته:

-فى حاجة حصلت بينك وبين "جمال" ابن "سباعى" زى ما الخلج بتجول ؟

قالت "مريم" بثقة دون أن يرف لها رمش:

-لأ مفيش .. ولا عمري شوفته قبل كده

قالت "بهيرة" وهى مازالت تنفرس فيها:

-بس رجال من عيلتك شفوكى معاه

قالت "مريم" بحزم:

-كل الحكايه انى كنت خارجة مع "صباح" وسابتنى وراحت لواحد صحبتها

فجأة لقيت اللى اسمه "جمال" ده طلعى وحضنى وفى كام راجل دخلوا فجأة

ومبقتش فاهمة أى حاجه ولا فاهمة مين دول ولا ايه اللى بيحصل بالظبط ..

وفجأة لقيت نفسي مضطره أتجوز اللى اسمه "جمال" ده

أومأت "بهيرة" برأسها وتنهدت قائله:

-كان جلبي حاسس انه جاصدها

قالت "مريم" باستغراب:

-قاصد ايه ؟



أمسكت "مى" الماوس وحذفت الرسالة .. صاحت "سهى":  
-حذفتيها ليه؟

توجهت "مى" الى مكتبها دون أن تجيبها وأخرجت هاتفها من حقيبتها ثم ضربت بأصابعها فوق لوحة المفاتيح وسجلت أحد الأرقام على هاتفها ثم غادرت المكتب ووقفت أمام باب الشركة .. اتصلت بالرقم وقلبتا يخفق بقوة .. أتاها صوت رجولى:

-ألو

صمتت قليلاً فقال:

-ألو

قالت بتوتر وهي تحاول وقف ارتجافة صوتها:

-ألو .. أستاذ "طارق"

-أيوة مين معايا

-أنا الأنسه "مى" من شركة رؤية للدعاية والإعلان

-أيوة أيوة أهلا بيكي يا آنسه "مى"

-أهلا بحضرتك .. أنا بس كنت عايزة أعرف حضرتك حاجة

-أفضلنى

قالت بإضطراب:

-الإيميل اللى حضرتك بعث عليه الرساله لـ "مريم" ده ايميل الشركة .. يعني

مش "مريم" بس اللى بتدخله .. كل الديزاينرز اللى فى الشركة معاهم

الباسورد

صاح "طارق" بحرج:

-اووووف .. يعني تقصدى تقولى ان الناس كلها شافت رسالتى

قالت بصوت خافت:

-لأ .. انا و "سهى" بس

شعر "طارق" بحرج بالغ وقال وهو يشعر بالغیظ من نفسه:

-معرفةش ازای اتغيبت للدرجة دى .. أكيد طبعاً ايميل الشركة مش هيكون خاص

بيها لوحدها .. موقف محرج جداً

قالت "مى" محاولة ضبط انفعالاتها:

-أنا بس حبيت أقول لحضرتك .. انى مرضتتش أديك رقم "مريم" لانها مش

بتدى رقمها لاي عميل ولا لاي راجل .. بس من رسالتك واضح ان حضرتك حد  
جد وعايز حاجه رسمي .. لان "مريم" واحدة محترمة ومش هتوافق بحاجه  
غير كده زى ما انت قولت عنها فى رسالتك .. وعشان كده أنا هديك رقمها  
هيكون التواصل معاها أسرع وكمان متقلقش أنا حذفته الرسالة اللي حضرتك  
بعته يعني متقلقش محدش تانى هيشوفها

قال "طارق" بارتياح:

-بجد مش عارف أشكرك ازاي

قالت بصوت خافت:

-لا أبداً مفيش حاجه

أعطته الرقم ودونه عنده .. ثم قالت:

-قبل ما أقفل بس أحب أقول لحضرتك حاجه .. "مريم" لسه متأثره بموت  
خطيبها ..يعني حبيت أقولك كده عشان لو رفضتك من أول مرة متستسلمش ..

ده لو انت عايزها بجد .. يعني الموضوع هيبقى متعب شوية .. بس "مريم"

بجد انسانه تستاهل ان الواحد يتعب عشانه

قال "طارق" برقه:

-انتى مخلصه أوى .. "مريم" محظوظة ان عندها صاحبه زيك

شعرت بالتوتر الشديد لإطرائه فأنهت المكالمه بسرعة:

-أنا مضطرة أقفل دلوقتي .. مع السلامة

أغلق الهاتف وحاولت ضبط انفعالاتها لتستطيع العودة الى داخل المكتب .. لكن  
رغم أنها سقطت عبرة حزينه على وجنتها فى صمت.

\*\*\*\*\*

كانت "مريم" فى غرفتها تقرأ وردها .. عندما سمعت صوت صراخ وضرب نار  
بالأسفل .. شعرت بالفرع .. وخرجت من الشرفة لتجد عمها "عثمان" ملقى على

الأرض وغارقاً فى دمانه .. هرعت الى الخارج وهى تصرخ:

-الحقيني يا تيته .. الحقيني يا "صباح"

خرجت مسرعة وانحنى بجوار عمها وهى تبكى قائله:

-عمو .. عمو متمتش .. عمو  
وضعت يديها على الجرح تحيط بنصل المطواة المغروزة فى جسده تحاول وقف  
النزيف ..أخرجت هاتفها من جيبها واتصلت بجدها الذى كان يزور "جمال" فى  
المستشفى ..هتفت قائلة بهلع:  
-الحقنى يا جدو عمو ضربوه بالمطوه  
صاح "عبد الرحمن" بفزع:  
-بتجولى ابيه يا "مريم"  
قالت وهى تبكى والدماء تغرق يدها:  
-بينزف جامد أوى .. اطلبنا الاسعاف بسرعة يا جدو .. عمو مبيردش عليا  
خايفة يكون مات  
أغلق "عبد الرحمن" الهاتف وشرع فى طلب الاسعاف اقترب منه "سباعى"  
قائلاً:

-ايه اللى حصل يا "عبد الرحمن"  
التفت اليه "عبد الرحمن" بلهفه قائلاً:  
-الحقنى يا "سباعى" طعنوا "عثمان" بالمطاوى  
صاح "سباعى":  
-لاحوة ولا قوة الا بالله  
وقف "مراد" يتابع ما يحدث فى وجوم

وصل "عثمان" الى المستشفى بصحبة "مريم" و أمه استقبلهم "عبد  
الرحمن" وأخذ ينظر الى ابنه المحمول على النقالة والى ملابس "مريم"  
الغارقة فى الدماء .. صاحت "مريم" باكيه:  
-ليه يا جدو عملو كده فى عمو ليه  
أحاطها "عبد الرحمن" بذراعيه وأدخلها احدى الغرفة وأمر الطبيب الممرضة  
بإعطائها بعض المهدئات  
اقترب "سباعى" من "عبد الرحمن" قائلاً:  
-يمين بالله يا "سباعى" آنى ماليا دخل باللى حوصل .. ولو عرفت ان واحد من  
عيلتى هو اللى عيميلها لأكون مسلمه للشرط بيدي  
قال "عبد الرحمن" واجماً:



-يعرف يا "سباعى" يعرف .. بس باجى الرجال ما بيعرفوا .. وفى رجال  
الغضب بيعميههم ومايخليهم يشوفوا جدامهم  
قال "سباعى" بحسرة:

-لولا اللى حصل لـ "جمال" كان زمانا خلصنا من المشكلة دى  
اجتمع خارج المستشفى عدد كبير من رجال العائلتين وبدا وكأن معركة ستحدث  
بينهما .. خرج لهم كل من "عبد الرحمن" و "سباعى" .. أخذ الرجال يكيلوا  
الاتهامات لبعضهم البعض وتوتر الجو لولا تدخل الحكيمين "عبد الرحمن" و  
"سباعى" .. قال "عبد الرحمن": "

-يا رجاله "عثمان" امنيح .. وآنى متأكد ان الى عمل اكده بعيد عن عيلة  
"الهوري "

قال أحد الرجال:

-كيف يتعرف يعني يا "عبد الرحمن" .. معروفش يهربوا من الجوازه جاموا  
جتلوا "عثمان" كمان

صاح أحد رجال "الهوري": "

-وليه متكنوش انتوا اللى طخيتوا "جمال" بعد ما فضح بنتكوا

صاح أحد رجال "السمري": "

-اتكلم عن حريمنا امنيح يا تيبيبيبيب

قاح أحد رجال "الهوري": "

-مانتوا لو كنتوا عرفتوا تربوا بنتكوا مكنش ده حوصل

صاح أحد رجال "السمري": "

-انتوا اللى ابنكوا ناجص ربايه وبيتعدى على حرمة غيره

صاح "سباعى" غاضباً:

-خلاص مفيش داعى للكلام ده عاد .. الجوازه بين العليتين هتتم .. ومش عايز

حد يفتح خشمه بالموضوع ده بعد اكده واصل

صرف "عبد الرحمن" الرجال الذين انصرفوا فى غضب وكل منهم ينظر للآخر  
شزراً

ما كاد "عبد الرحمن" و "سباعى" يدخلون المستشفى حتى استقبلهم "مراد"  
قائلاً:

-دخلوه أوضة العمليات .. ان شاء الله خير

رفع " عبد الرحمن " كفيه قائلاً:

- يارب جيب العواجب سليمه

سمعا من خلفهم صوت " بهيرة " تقول:

- ايه اللي حوصل لـ " عثمان " صحيح اللي سمعته

هرع اليها " مراد " قائلاً بحدده:

- عمتو ايه اللي جابك .. نفسي تريحى نفسك بأه .. انتى تعبانه

التفتت الى " عبد الرحمن " و " سباعى " قائله بحزم:

- الحكاية مش هتنتهى الا بالجواز .. ودلوجيت .. كتب الكتاب يتكتب دلوجيت

صاح " سباعى " بحنق:

- كيف يعنى دلوجيت يا " بهيرة " .. مش لما " جمال " يفوق من اللي فيه .. ده

لسه فى عمليه تانى بكره

قالت " بهيرة " بحزم:

" - مريم " مش هيتجوزها " جمال " .. مستحيل تكون لـ " جمال "

قال " عبد الرحمن " بحدده:

- تجصدى ابيه يا " بهيرة " .. لو محصلش الجواز ده هيكون فيها دم .. مينفعش

ابنكوا يتعدا على حريمتنا وتجولى مينفعش يتجوزها

قالت " بهيرة ": "

" - مريم " هتتجوز .. بس مش " جمال "

ثم التفتت الى " مراد " قائله:

- هتتجوز " مراد " ولد خوى " خيرى "

قال " مراد " بدهشة:

- بتقولى ايه يا عمتو

- اللي سمعته يا ولدى انت اللي هتتجوزها

صاح " مراد " بغضب:

- مش ممكن طبعاً .. مستحيل أتجوز واحدة ظبطوها مع ابن عمى

قالت " بهيرة " بحزم:

- متظلمهاش يا ولدى مش كل اللي بينشاف بيكون هو الحجيجة اسألنى آنى

قال " مراد " بحزم:

- مش ممكن أتجوزها يا عمتو شوفولها راجل تانى .. الرجاله ماليه العيلة

قالت "بهيرة": "

-انت اللي عليك الدور يا ولدى .. لو ابتدا التار بين العيلتين هيجى انت اللي عليك الدور بعد "جمال" .. هاى العادة المتخلفة راح فيها رجال كتير .. مش عايزين نعيدها تانى .. مش كل الرجاله بتحكم عجلها .. فى رجاله بتمشى ورا غضبها من غير تفكير .. ودول بيحكموا غضبهم وبينسوا شرع ربنا .. وبسببهم هتجيد النار تانى بين العيلتين ومفيش حل الا الجواز .. لازم تتجوز "مريم" صمت "مراد" وهو يشعر بالحنق الشديد ثم قال بصرامة بعد تفكير:

-لو فاكرة انى ممكن اتجوزها واعيش معاها زى اى زوجين طبيعين فده مش هيحصل يا عمتو .. انا ممكن انقذ الموقف واكتب كتابى عليها مش اكر من كده عشان المشكله دى تتحل وبعدين نساقر القاهرة ونحل الموضوع

قالت "بهيرة": "

-وانى مش عايزة أكثر من اكده يا ولدى تكتب عليها وتأخدها معاك على مصر لحد ما أتأكد ان الأمور اتحلته انه وبعدين أجيلكوا على مصر واللى رايدته ربنا ساعتها هو اللي هيكون

زفر "مراد" بضيق ثم قال بعنف وهو يكظم غيظه:

-طيب .. ماشى .. بس فهميها ان طول ما هى اعده معايا ولحد ما حضرتك ترجعى القاهرة هتنفذ كل اللي هقولها عليه بالحرف .. أنا مش هسمح أبدا بالتسيب اللي هى كانت عايشه فيه .. لحد ما نشوف هنخلص من المشكله دى ازاي .. ولو شوفت منها غلطة واحده مهما كانت صغيره هطلقها فوراً ومش هسمحها تستنى فى بيتي لحظه واحده ..ولو كلامى ده معجبهاش يبقى شوفولها راجل غيري يحل المشكله دى

قال "عبد الرحمن" بصرامة:

-بنت ابني متربيه امنيح عيب تتكلم عنها اكده

ابتسم "مراد" بسخريه وتهكم وقالت "بهيرة": "

-فيها "مريم" ؟

أشار "عبد الرحمن" الى غرفتها .. دخلت "بهيرة" الغرفة لتجدها نائمة على الفراش وعلامات الارهاق على وجهها .. التفتت اليها الممرضة قائله:

-هديت دلوقتي بعد ما ادتلها المهدئ

وأمت "بهيرة" برأسها واقتربت منها قائله:

-كيفك يا ابنيتي

التفت اليها "مريم" بأعين دامعه وقالت بصوت مرتجف:

-ليه عملوا فى عمو كده .. كان شكله صعب أوى وهو واقع فى الأرض وعماله  
بينزف .. ليه عملوا فيه كده

مسحت "بهيرة" على شعرها قائله:

-ولو مسمعتيش كلامى ايديهم هتطول جدك وكل رجال عيلتكوا

قالت "مريم" وشهقات بكائها تتصاعد:

-ليه .. ليه كل ده

تتهدت "بهيرة" فى حسرة قائله:

-بعد عن ربنا وعن شرع ربنا .. للأسف فى ناس بيخلوا الأحكام والأعراف

والعادات تتحكم فيهم حتى لو كانت بتخالف شرع ربنا

قالت "مريم" بتأثر:

-أنا مش عايزه حد من عيلتى يحصله حاجه وحشه أنا ما صدقت لقيتهم

ابتسمت لها "بهيرة" قائله:

-يبجى تسمى اللى هجولك عليه .. وخليكي متأكده انى مستحيل أضرك أبدا يا

ابنيتي ده انتى مرات الغالى ابن الغالى .. يعني مكانك فى جلبى من جوه يا

"مريم"

ابتسمت لها "مريم" وقالت بضعف:

-عارفه يا عمتو انك مستحيل تضرينى

مسحت "بهيرة" على شعرها مرة أخرى قائله:

-آنى أنقذتك من جوازك من "جمال" ابن خوى لانى عارفه هو عايزك ليه ..

عايز ينتجم منيكي .. وعشان تخلصى من الورطة دى ومن المشكلة اللى دايره

بين العيلتين .. مفيش الا حل واحد

قالت "مريم" بضعف:

-ايه هو

قالت "بهيرة":

-تتجوزى "مراد" ابن خوى

نظرت اليها "مريم" وقد اتسعت عيناها دهشة وقالت:

-اخو "ماجد"

-ايوة

-مستحيل .. مستحيل

قالت "بهيرة" بحزم:

-اسمعى كلامى ومتجيش عنيده .. هو ده الحل اللى يخرجك من ورطتك ..  
وبعداها آنى بنفسى هحل موضوع زواجك منه .. بس نخلص من المشكلة اللى  
فى يدنا الأولى ..يا اما اكده .. يا اما تنتظرى بجه لما "جمال" يفوج وصحته  
ترجعله ويتكتب كتابك عليه

نظرت اليها "مريم" بحيرة والم وقالت:

-طيب شوفلى حل تانى مفيهوش جواز

قالت لها "بهيرة" بحنان:

-لو كان فى مكنتش اتاخرت .. بس مفيش .. حل الورطة دى الجواز .. تسافرى  
فورا على القاهرة بعيد عن انه لحد ما ارجعك وكل شئ هيتحل ساعتها وكل  
اللى مستخبي هيبان .. بس افضلى محافظة على السر ومتجيش سيرة لحد  
واصل لحد ما ارجعك .. اتفجنا يا ابنيتي

بلعت "مريم" ريقها بصعوبة .. وأخذت تفكر وهى حائرة .. كانت تشعر بالضعف  
والوهن .. لا تدرى أهدا بسبب الأحداث المتتالية والتي لم تتخيل من قبل أن  
تحدث لها .. ام بسبب المهدئ الذى يسري فى دماغها .. كان الشئ الوحيد الذى  
تريده هو أن تعود الى حياتها الطبيعية .. الهادئة .. الساكنة .. بلا مشاكل وبلا  
دماء .. وبلا كره وحقد وضغينة .. حثتها "بهيرة" بحنان قائله:

-ها جولتى ايه .. هتطحى يدك فى يدى عشان أنقذك .. ولا أسيبك انه يعملوا  
فيكى اللى رايدينه ؟

نظرت اليها "مريم" دامعه .. وقالت بوهن:

-انا واثقه فيكى .. معرفكيش قبل كده .. بس كفايه انك تكونى عمة "ماجد"

عشان أثق فيكى

ثم قالت:

-ماشى موافقه

ابتسمت "بهيرة" وقالت:

-امنيح يا ابنيتي امنيح

قالت لها "مريم" برجاء:

-متأخر يش عليا وتسببني معاه كثير .. هنتظرك ترجعي وتحليلي الموضوع ده  
قالت "بهيرة" بحنان: "  
-متخافيش واصل .. متخافيش

خرجت "بهيرة" وطلبت من "مراد" الذهاب واحضار المأذون .. قال "مراد"  
بحنق:  
-بالسرعة دى  
قالت "بهيرة" بصرامة:  
-لازم المشكلة تنحل بأسرع وجت .. بيكفى الدم اللي سال  
توجه "مراد" الى خارج المستشفى وعينا "بهيرة" تتابعانه وتمتمت فى خفوت  
:

-كله سلف ودين ولازم ترد الجميل يا ولدى  
بعد ساعة .. حضر المأذون بصحبة "مراد" وفى مشهد غريب عجيب فى أحد  
زوايا المستشفى .. بدأت مراسم الزواج وأخذ المأذون يلقن كلماته لـ "عبد  
الرحمن" و "مراد" .. والتي انتهت بـ "مراد" وهو يقول بحنق وضيق شديد:  
-قبلت زواجها.

## الفصل الثالث عشر

تنهدت "بهيرة" فى راحة وتوجهت الى غرفة "مريم" .. واقتربت من فراشها

قائله بحنان:

-خلاص يا بنيتي كتبوا الكتاب

شعرت "مريم" بالألم فى قلبها وروحها ورغماً عنها تساقطت العبرات على وجنتيها وهى تحاول أن تكتم شهقات بكائها .. قالت جدتها لـ "بهيرة" فى حده:  
-خلاص عيملتوا اللى رايدينه .. حججتوا حلمكوا بجواز ابنكوا من بنتنا

نظرت اليها "بهيرة" وقالت:

-فى حاجات كتير ما بتعرفيها .. وآنى مستحيل أضر "مريم" واصل  
ثم التفتت الى "مريم" قائله:

-شدى حيلك يا بنيتي عشان تسافرى على مصر فى أجرب وجت .. لازم  
تبعدى عن المشاكل اللى اهنه .. ومتجلجيش واصل "مراد" ولد خوى راجل  
وهيعرف يحافظ عليكى لحد ما أجيلك  
ثم اقتربت من أذنها هامسه:

-بس لحد ما أجيلك متجيبش سيرة لحدنا عن موضوع "ماجد" .. احنا مش  
ناجسين مشاكل دلوجيت .. ماشى يا بنيتي  
أومات "مريم" برأسها فى صمت وهى تشعر بالإرهاق والوهن .. قالت  
"بهيرة"

-هسيبك دلوجتى ترتاحى

خرجت "بهيرة" من الغرفة واقتربت من "مراد" الذى كان واقفاً وعلامات  
الغضب والضيق على وجهه وقالت:

-اسمعنى امنيح .. أول ما تجدر تجوم وتجف على رجلها تاخدها طوالى على  
مصر .. وآنى هبجى أحصلكوا بس لما أظمن على الحال اهنه  
أوما "مراد" برأسه بصمت فأكملت قائله:

-مش لازم أمك وأخواتك يعرفوا باللى حوصل

قال "مراد" بسخريه وتهكم:

-أمال أقولهم ايه .. حب من أول نظرة .. ومقدرتش أستنى لما أرجع القاهرة  
فكتبت عليها فى الصعيد من غير ما أعرف حد منكم ! .. لا وكمان مش قادر  
أتحمل فراقها فعجلت بالدخلة وجبتها فى ايدي على القاهرة

قالت "بهيرة" بحده:

-جول اللى تجوله .. المهم مش عايزه أمك تعرف ان جوازتك فيها مشاكل ..  
مش عايزاها تسود عيشة البنيه .. لحد ما أجيلكم ونشوف حل للمشكلة دى  
ثم أكملت بحزم:

-خلى بالك منيها امنيح حظها جوه عينك .. البنيه غليانه وملهاش حدا .. دى  
أمانه فى رجبتك حافظ عليها لحد ما أرجعك  
قال "مراد" بنفاد صبر:

-ربنا يسهل .. ولو انى مش طايق حتى أشوفها أدامى .. مش عارف ازاي  
هتحمل انى أدخلها بيتي وأأعدها مع ماما وأخواتى البنات  
قالت "بهيرة": "

-متظلمهاش يا ولدى .. متظلمهاش

أقبل الطبيب مطمئناً الجميع على وضع "عثمان" قائلاً:

-الحمد لله جميع الأعضاء سليمه والمطوة اتضربت فى مكان خالى من  
الأعضاء .. هو بس نرف كثير ومحتاجين نقل دم لان فصيلته مش متوفره  
حدانا

قال "سباعى" باهتمام:

-فصيلته ايه يا دكتور ؟

قال الطبيب:

B-نيجاتيف

قال "مراد" بسرعة:

-نفس فصيلتي

التفت اليه الطبيب قائلاً:

-طيب اتفضل معانا عشان ناخذ منك عينه الأول نحللها

ربت "عبد الرحمن" على كتف "مراد" قائلاً:

-ربنا يبارك فيك يا ولدى

\*\*\*\*\*



فى صباح اليوم التالى دخل " عبد الرحمن " غرفة حفيدته بالمستشفى للإطمئنان على صحتها .. ووجدها جالسه فى فراشها ساكنه صامتة تراقب السماء من شباك الغرفة .. اقترب منها قائلاً:

-كيفك دلوجيت

قالت بصوت مبسوح وكأنها انتهت للتو من البكاء:

-الحمد لله

جلس " عبد الرحمن " بجوارها على الفراش وأخرج من جيبه ورقة وفتحها أمام عينيها وأشار بإصبعه على موضع بها وقال:

-دى شهادة وفاة زوجك الأول .. مكتوب انه اسمه .. "ماجد خيرى الهوارى " .. انتى كنتى بتعرفى انه من عيلة " الهوارى " اللى بينا وبينها مشاكل ؟

هزت "مريم" رأسها نفيًا وقالت:

-لأ مكنتش أعرف .. معرفتش غير لما جيت هنا

طوى " عبد الرحمن " الورقة وقال بحزم:

-اوعى تجيبى سيره لحدنا واصل انك كنتى مرت "ماجد" .. وخصوصى "مراد"

اوعى تجيبيله سيره واصل .. لانى معرفتش أبوه جاله ايه وفهمه ايه .. ومش

عايزه يأذيكي يا بنيتى

قالت "مريم" باستغراب:

-مش فاهمه .. ليه يأذيني لما يعرف انى مرات "ماجد" .. وليه الأسرار دى

كلها .. وليه محدش بيحبيب سيرة "ماجد" هنا كأنه مكنش موجود .. ليه كل ده

قال " عبد الرحمن " بحزم:

-فى حاجات كتيره مبتعرفيهاش ومادام أبوكى الله يرحمه مجالكيش عليها يبجى

الأحسن تفضلى مش عارفها .. أهم حاجه اوعى تجيبى سيره لزوجك انت كنتى

مرت أخوه أو انك بتعرفى مكان أخوه

صمت قليلا ثم قال:

" -بهيرة" بتعرف مش اكده

أومأت "مريم" برأسها قائلة:

-أيوة عارفه .. وهى كمان قالتلى مجبش سيرة لحد

تمتم "عبد الرحمن": "

-كنت متأكد انها بتعرف .. وعشان اكده جوزتك لـ "مراد" مش لـ "جمال"

اقترب منها ووضع يده على ذراعها ونظر الى عينيها وقال بصراحة:

-الحاجة الوحيدة اللى بدك تعرفيها وتكون متأكده منيها ان أبوكى كان راجل

زين ولا كل الرجال وكان يعرف ربنا .. مهما سمعتى غير اكده او عى تصدجى

أى كلمه تتجال على أبوكى

صمت "عبد الرحمن" قليلاً ثم قال:

-وينها "زهرة" أم "ماجد" .. لساتها عايشه؟

قالت "مريم" بأسى:

-أيوه عايشة .. فى دار مسنين .. حالتها الصحية صعبة جدا .. مبتتكلمش

ومبتتحركش .. صدمة موت "ماجد" الله يرحمه كانت شديده عليها أوى ..

خاصة بعد وفاة بابا وماما واختى .. مقدرتش تتحمل كل ده وراحت فى دنيا

تانيه

قال "عبد الرحمن" بأسى:

-اتعدبت كثير جوى .. واتظلمت كثير جوى .. ربنا يشفيها ويبرد نارها

ثم قال شارداً:

-يا ترى يا "بهيرة" ناويه على ابيه .. هتكشفى المستور ولا هتسيبى كل حاجه

لحالتها اكده

نظرت "مريم" اليه باستغراب .. شعرت بأن هناك أشياء كثيرة تخفى عليها ..

صممت بينها وبين نفسها أن تكشف كل تلك الأسرار .. لكن دون أن تفضح

أمرها كما أمرها "عبد الرحمن" و "بهيرة" .. أخذت تتساءل ... لماذا يحذرها

الجميع من اخبار "مراد" بأنها كانت تعرف أخيه .. ترى هل يعرف أصلاً أن

لديه أخ .. وإذا كان يعرف فلماذا لم يتلقى مع "ماجد" أبداً .. "ماجد" نفسه لم

يخبرها أبداً بأن له أخ .. ترى هل كان "ماجد" يعرف وأخفى ذلك عليها .. أم

هو مثلها لم يكن يعرف بوجود هذا الأخ!!

\*\*\*\*\*

-ماشى موافقة

نطقت "نرمين" بهذه العبارة وهى تشعر بشئ من التوتر الممزوج بالفرحة ..  
قال الصوت الرجولى بلهفه وسعاده:

-حبيبتي أنا مش قادر أوصفك فرحتيني أد ايه .. أخيراً هشوفك .. ياااه انتى  
كنتى وحشائى أوى يا "نرمين"

ابتسمت بخجل وقالت:

-بس مش عايزة أتأخر .. نص ساعة بس  
قال بسرعة:

-أمرك يا حبيبتي متقلقيش هنتكلم مع بعض ونحط النقط على الحروف بس ..  
مش عايز أكثر من كده  
ثم قال بلهفه:

-تحببى نتقابل امتى وفين ؟

قالت "نرمين" بحيرة:

-مش عارفه .. بس ياريت يكون مكان عام وفيه ناس كتير  
ضحك الرجل وقال:

-انتى خايفه منى ولا ايه

قالت بتوتر:

-لأ بس مش هينفع أقابلك الا فى مكان عام

-طيب يا حبيبتي مفيش مشكلة هختار كافيه كويس ومليان ناس على آخره

عشان تبقى مطمئنه .. اتفقنا

ابتسمت قائله:

-اتفقنا

قال بلهفه:

-امتى ؟

فكرت قليلاً ثم قالت:

-يفضل النهاردة .. لان "مراد" احتمال يرجع فى أى وقت .. ولو رجع مش

هعرف أخرج بسهولة

-خلاص اتفقتنا النهاردة فى أى ساعة تحديدها .. وهفضى نفسي عشانك ..  
هنتظر منك تليفون تعرفيني المعاد اللى يناسبك  
قالت بخجل:

-خلاص اتفقتنا هشوف ظروفى هنا وهعرف أخرج امتى وأكلمك  
-منتظر مكالمتك على أحر من الجمر يا حبيبتي .. هتوحشيني لحد ما اشوفك ..  
خلى بالك من نفسك .. لا اله الا الله  
تمتت مبتسمه:

-محمد رسول الله  
أنهت المكالمة وهى تشعر بسعادة بالغه وبقلبها يقفز فرحاً .. فتحت دولاب  
ملابسها لتختار ما سترتيه فى تلك المقابله .. أخرجت معظم دولابها على  
السريير ووقفت أمام المرآه تحاول اختيار ما تراه جميل عليها .. نظرت الى  
ملابسها بحنق .. فقد كانت محتشمة للغاية .. ودت لو كان لديها شيئاً ضيقاً  
أكثر ليبرز جمال جسدها الأنثوى .. زفرت فى ضيق وهى تجرب ملابسها  
لتختار من بينهم .

\*\*\*\*\*

خرج "جمال" من غرفة العمليات للمرة الثانيه .. طمأنهم الطبيب على حالته ..  
وعلى نجاح العمليه .. وأذن بالخروج لـ "مريم" .. خرجت "مريم" بصحبة  
جدها وجدتها وتوجهت فى بيتهما .. استقبلتهم "صباح" قائله:

-كيف "عثمان" دلوجيت يابوى  
-الحمد لله يا بنيتى امنيح .. آنى جيت أوصل "مريم" وأمك يرتاحوا ورايح  
تانى دلوجيت على المستشفى  
قالت "صباح" بلهفه:  
-طيب خدنى معاك يا بوى

فى المستشفى وفى غرفة "جمال" .. التف حوله "سباعى" و زوجته و  
"مراد" و "بهيرة" .. قالت أمه وهى تجلس بجواره باكيه:

-عين وصبتك يا ولدى عين وصبتك  
قال "سباعى": "

-الحمد لله انها جت على أد اكده  
قال "جمال": "

-مسكوا اللى طخنى ؟  
تتهدت أمه فى حسره قائله:  
-لا يا ولدى لسه الشرطة بتحجج  
قال "جمال" بتهكم:

-هو الموضوع محتاج تحجيج .. أكيد اللى طخنى واحد من عيلة "السمرى"  
ومش بعيد يكون "عثمان"  
صاحت "بهيرة" بحده:

-وايه دليلك على اكده .. ولا رمى الناس بالباطل بجه سهل أوى اكده  
ابتسم "جمال" بخبت قائلاً:

-يعملوا اللى يعملوه المهم انى هتجوز بنتهم  
نظر الجميع الى بعضهم البعض ثم نظروا الى "مراد" الذى كان واقفاً دون أن  
يظهر أى شئ على وجهه .. فقالت أمه:  
-يا ولدى خلاص .. الموضوع ده اتحل  
قال "جمال" بدهشة:

-موضوع ايه اللى اتحل  
قال "سباعى": "

-خلاص يا ولدى بنت علية "السمرى" اتكتب كتابها  
صاح "جمال" بحده:

-اتكتب كتابها على مين ؟

قال "سباعى" وهو يشير الى "مراد": "  
-على ولد عمك

نظر "جمال" الى "مراد" بغضب:

-ليه تعمل اكده يا ولد عمى .. ليه تعمل اكده .. انت عارف انى كنت هتجوزها

قال "مراد" بحنق شديد:

-والله ان كان عليا أنا مش طايق أسمع اسمها اصلاً ولا عايز اتجوزها .. ولو

الموضوع اتحل دلوقتي أنا مستعد أطلقها وأخلص من المصيبة اللي ربنا

ابتلاني بيها دي

اقتربت "بهيرة" من فراش "جمال" وأمرت الجميع بالخروج للتحديث هي و

"جمال" بمفردهما .. خرج الجميع فنظرت الي "جمال" وقالت بصرامة:

-آنى بعرف امنيح انت ليه عيملت اكده يا ولد خوى

صمت "جمال" ولم يرد فأكملت قائله وهي تمعن النظر اليه:

-انت كان بدك تنتجم من "خيري" نفسه .. ولما عرفت انه مات بجيت زى

المجنون مستنى أى معلومة عن ولاده .. وأنى متأكده ان فى حدا من عيلة

"السمري" بينجلك المعلومات دي .. كنت بتعرف ان "عبد الرحمن" بيدور على

ولاد ابنه .. وكنت مستنى يظهرله ولد عشان تفتن عنه لعيلة "المنفلوطى" ..

لكن اتحسرت لما عرفت ان عنده بنت واحده .. ففكرت بطريجه تانيه للانتجام

.. طريجه ترد بيها اللي حوصل زمان .. فوجعت البنية فى روضة وخلت عليه

"السمري" هما اللي يترجوك تتجوزها .. وانت ما بدك الا الانتجام من

"خيري" فيها .. مش اكده يا ولد خوى

ظل "جمال" محتفظاً بصمته فنظرت اليه "بهيرة" باحتقار قائله:

-مكنتش أعرف ان جواك حقد وغل اكده .. انت جواك سواد كبير يا "جمال" ..

والسواد اللي فى جلبك ده عامى بصرك وبصيرتك وهيضيعك لو ما فوجتتش

لنفسك يا ولدى .. النار مبتحرجش غير صاحبها .. فوج لنفسك واتعظ من اللي

حصلك .. ده ذنب البنية المسكينه اللي افتريت عليها وطعنت فى شرفها .. لو

ضميرك مفاجش وصحى .. يبجى متلومش الا نفسك لان انتجام ربنا كبير ..

ودعوة المظلوم مستجاب ..خاف من مكر الله يا ولدى خاف .. انت لساتك

محتاج علاج كتير عشان تجدر تجف على رجلك من جديد .. ويا عالم هتجف

ولا لا .. انت محتاج لربنا جمبك .. كيف هتدعى ربنا انه يشفيك وانت ظالم اكده

.. كيف بدك ربك يستجيبك وينجيك من اللي انت فيه وانت ظالم حرمة بتدعى

عليك ليل ونهار .. بكرر هالك تانى يا ولدى .. دعوة المظلوم مستجاب ومفيش

بينها وبين الله حجاب .. هاى البنت ضعيفة ولحالها لكن سلاحها هو دعاها ..

والسلاح هاد أقوى من ميت طبنجه وبنديقه .. سلاح فتاك يا ولدى خاف منيه  
قالت ذلك ثم خرجت وتركت "جمال" خلفها واجماً شاردأ.

\*\*\*\*\*

توقفت سياره فارهه على بداية الشارع المؤدى الى شركة الدعاية .. ما هي إلا  
لحظات حتى أنت "سهى" من بعيد تتهادى فى خطواتها .. فتحت باب السيارة  
وركبت والتفتت بجانبها وقالت مبتسمة:

-ازيك يا "سامر"

ابتسم لها قائلاً:

-ازيك انتى يا "سهى"

قالت برقه:

-كويسه الحمد لله

انطلق بسيارته ثم التفت اليها متطلعاً اليها بجرأة قائلاً:

-بس ايه القمر ده .. انتى كل مرة أشوفك فيها بتبقى أحلى من المرة اللى قبلها

ضحكت بدلال قائله:

-دى أقل حاجه عندى

صاح بمرح:

-يا جامد انت

ثم قال:

-تحبى نروح سينما .. بقالى كتير أوى مدخلتهاش

قالت مبتسمة:

-مفيش مشكلة .. نروح سينما

توقفا أمام باب السينما يتفحصان الأفلام المعروضة .. قال "سامر" رومانس

ولا أكشن ؟

التفتت اليه قائله بدلع:

-رومانس طبعاً مليش فى جو العنف ده

اقترب منها قائلاً:

-أحبك وانت رومانسي .. أنا كمان طالبه معايا رومانسية النهاردة  
قطع "سامر" التذاكر ودخلا الى القاعة وجلسا فى مقعدهما .. بدأ عرض الفيلم  
..وتشابكت الأيدي ومال بجسده تجاهها ليلتصق بها دون ممانعة منها.

\*\*\*\*\*

ساعدت جدة "مريم" فى توضيب أغراض "مريم" فى حقيبتها .. كانت "مريم"  
تشعر بالحزن والاسى لإضطرارها مغادرة بيت جدها .. اقتربت منها جدتها  
وعانقتها قائله:

-متجلىش يا بنيتي مش هنتركك لحالك .. هنيجي نزورك .. ولما الحال يهدي  
اهنه أكيد هتيجي تزورينا  
ترقرقت العبرات فى عين "مريم" وقال:

-مكنتش حابه أسيبكوا .. وياريتنى هرجع أعيش لوحدى .. لأ ده انا هعيش مع  
واحد معرفوش  
قالت جدتها بأسى:

-ربنا يريح جلبك يا بنيتي ويسعد أيامك .. معلىش ربنا وكيك  
تمتت "مريم": "  
-ونعم بالله

دخل جدها الغرفة واقترب منها مقبلاً رأسها قائلاً:  
-لو احتجتى لأى حاجه اتصلى بينا هكون عندك طوالى .. وانى كل فترة  
والثانية هتلاجيني حداكى فى مصر  
ابتسمت له "مريم" بتأثر وقالت:  
-تسلم يا جدو

عانقها "عبد الرحمن" والدموع تترقق فى عيناه وقال:  
-على عيني أتحرم منيكي يا بنيتي .. بس ان شاء الله هتلاجيني حداكى دايماً ..  
واعرفى ان اهنة ليكي عيلة وعزوه .. وهنكون جمبك دايماً .. وبيتنا مفتوح  
ليكي فى أى وجت  
تساقطت العبرات فى عينيها وهى تتعلق بثيابه كما تعلقت بها من قبل.



\*\*\*\*\*

-يعني ايه اتجوزت يا "مراد"؟!  
هتفت "ناهد" بتلك العبارة فى دهشه وهى تستمع الى خبر زواج ابنها منه عبر الهاتف فقال "مراد" بحنق:

-اللى حصل يا ماما

قالت أمه بحدده:

-يعني ايه اللى حصل .. وطالما لقيت عروسه وعجبتك ليه ما قولتليش .. وهو فى حد يكتب كتابه فجأة كده ومن غير خطوبه قال "مراد" بنفاذ صبر:

-اللى حصل .. المهم دلوقتي احنا راجعين النهاردة ان شاء الله

قالت "ناهد" بدهشة:

-انتوا مين؟

-أنا وهى

-ازاى يعني؟ .. وعمتك؟

-لا هتفضل هنا شوية

قالت "ناهد" وهى تتنهد بضيق:

-هقولك ايه يعني .. صحيح أنا كان نفسي انك تتجوز النهاردة قبل بكرة .. بس

كان نفسي أفرح بيك وأحضر كتب كتابك

صمتت قليلاً ثم قالت مستفهمه:

-كتب كتاب بس مش دخله مش كده؟

قال "مراد" بعصبيه:

-بقولك يا ماما راجعه معايا

صاحت "ناهد" بغضب:

-وكمان دخله .. ده انت بتستهبل بجد يا "مراد" .. ايه ده عمرى مشوفتش

جوازه فى كام يوم .. اهلها ازاي رضيووا بكده .. انت فى حاجه مخبيها عليا؟

قال "مراد" بنفاد صبر:

-لأ مفيش حاجة مخيبيها .. وبعدين أهلى وأهلها عارفين بعض كويس .. يعني الموضوع بالنسبة لهم مش غريب .. ويجد مش هعرف أتكلم دلوقتى لانى مشغول جداً ..أنا جاي النهاردة بالليل نبقى نتكلم براحتنا قالت وهى تحاول اخفاء ضيقها:

-ماشى يا "مراد" .. منتظراك انت وعروستك .. مش عارفه أقولك ايه .. مبروك يا ابنى .. طالما انت مرتاح ومبسوط أنا كمان هبقى مرتاحه ومبسوطه تنهد قائلاً:

-الله يبارك فيكي

أنهى المكالمة وهو يزفر بضيق .. كان يشعر بغضب شديد لهذا المأذق الذى وجد نفسه بداخله .. وهذا الزواج الذى يرفضه عقله تماماً

\*\*\*\*\*

هتفت "سارة" بدهشة:

-انتى بتتكلمى جد يا ماما .. "مراد" اتجوز ؟ قالت "ناهد" بحنق:

-أيوة اتجوز .. وجاى هو ومراته النهاردة صاحت "نرمين" بغضب:

-واحنا ايه بأه ان شاء الله .. لزمنا ايه .. هو احنا مش أهله برده .. فى واحد يسافر يومين وفجأة يتصل بأهله فى التليفون يقولهم أنا اتجوزت وراجع أنا وعروستى

قالت "ناهد" بحزم:

-بقولك ايه يا "نرمين" أنا مش عايزه مشاكل .. خلاص هو مرتاح كده خلاص .. "مراد" مش صغير وأدرى بمصلحته .. أهم حاجة انه اتجوز أنا كنت هموت وأشوف اليوم ده

قالت "سارة" باستغراب:

-بس مش غريبة ان "مراد" يغير رأيه بالسرعة دى ويقرر انه يتجوز

قالت "ناهد": "

-لأ مش غريبة .. لأن أصلاً قبل ما يسافر كان وافق انى أدورله على عروسه  
قالت "نرمين" بتهكم:

-عايزه تفهمينى انه راح النجع وشاف واحده ماشيه فى الشارع قام مشى  
وراها وعرف بيتها واتقدم لها واتجوزها  
قالت "ناهد" بنفاد صبر:

-لأ .. "مراد" قالى ان العيلتين عارفه بعض .. تلاقى عمته "بهيرة" هى اللى  
اخبارتهاله وشافها وعجبته واتجوزها  
هتفت "نرمين": "

-ماما انتى مقتنعه باللى انتى بتقوليه ده .. "مراد" شاف واحده وعجبته  
واتجوزها كل ده فى أقل من اسبوع .. "مراد" أصلاً مبيقتعش بأى بنت  
بسهولة .. وبعد جوازته الأولانيه بأه صعب جداً ومش سهل كده يتجوز فجأة  
قالت "ناهد" بنفاد صبر:

-بقولكوا ايه اللى حصل حصل .. حياته وهو حر فيها  
قالت "نرمين" شارده:

-تفتكروا هيعيش معانا هنا ولا هياخذلها بيت لوحدها  
نظرت اليها "نرمين" و "ناهد" فى حيرة .. فقالت "ناهد": "  
-مش عارفه متكلمناش فى النقطة دى  
قالت "نرمين": "

-معتقدش ان "مراد" ممكن يسيبنا عايشين لوحدها من غير راجل وكمان الفيلا  
كبيرة

قالت "سارة" بحزن:

-افرضى هى أصرت انه يسيبنا  
هتفت "سارة": "

-يعني هو هيروح آخر الدنيا يعني .. ممكن يشوفلها مكان قريب من هنا  
قامت "ناهد" قائله:

-الكلام ده سابق لأوانه لما يبقى "مراد" ييجى نبقى نفهم منه هو ناوى على  
ايه

أوقفتها "نرمين" قائلة:

-ماما أنا زى ما قولتلك خارجه النهاردة أجيب اللبس

التفتت اليها "ناهد" وقالت:

-يا بنتى استنى "مراد" أحسن

قالت "نرمين" بحنق:

-يا ماما هو أنا صغيرة .. وبعدين أنا هروح كارفور بس .. مش هلف فى حته

تانيه

صمتت "ناهد" فترجتها "نرمين" قائلة:

-يا ماما عشان خاطرى أبوس ايدك وافقى .. "مراد" راجع النهاردة بالليل

يعني مفيش فرصة أخرج فيها الا النهاردة

قالت "ناهد" محذرة:

-مش عايزه تأخير .. ساعتين بالكثير وتكونى هنا

قالت "نرمين" بحماس:

-متقلقيش وقبل ساعتين كمان

-طيب وخذى العربية بالسواق معاكى

قالت "نرمين" بسرعة:

-لأ لأ مفيش داعى .. هاخذ تاكسى عشان لو احتجتى العربية .. يلا سلام طالع

اللبس

غادرت "نرمين" بسرعة قبل أن تترك لأمها فرصة للإعتراض.

\*\*\*\*\*

توقفت سيارة الأجرة أمام أحد المطاعم الراقية .. تلفتت "نرمين" يميناً ويساراً

.. ثم أخرجت هاتفها من حقيبتها الصغيرة وهمت بأن تتصل .. سمعت خلفها

صوتاً يقول:

-أتأخرتى عليا أوى

التفتت لتفاجأ بـ "حامد" صديق أخيها .. نظرت اليه بدهشة واضطراب فابتسم

قائلاً:

-شكلك مصدومة .. ايه مكنتيش متوقعه انه أنا

أخفضت بصرها وقالت بخجل:

-لأ مكنتش متوقعه

همس قائلاً بخبث:

-طيب ايه .. عجبك ؟ .. مفاجأة حلوة يعني ولا وحشة

شعرت بالإحمرار يغزو وجنتيها ولم تستطع أن تتحدث فقال لها:

-طيب تعالى نتكلم جوه

شعرت بالتوتر الشديد والتفتت يميناً ويساراً خوفاً من أن يراها أحداً يعرفها ..

لمس "حامد" ذراعها بيده ليوجهها داخل المطعم نظرت اليه وجذبت ذراعها

بسرعة .. ابتسم قائلاً:

-طيب ادخلي انتي

دخلت "نرمين" وهي تتفحص وجوه رواد المطعم .. اختار "حامد" احدى

الطاولات فى احد زوايا المطعم .. كانت تشعر بالتوتر الشديد .. نظر "حامد"

اليها وابتسم قائلاً:

-مالك متوتره كده

قالت بصوت مضطرب:

-مفيش .. أصل دى أول مرة أخرج فيه مع واحد

ابتسم ونظر اليها نظرة أشعرها بالخجل وقال:

-أنا مش أى واحد .. خلاص احنا نعتبر مرتبطين .. باقى بس موافقة أخوكى

اقترب النادل فسألها عما تشرب .. ذهب النادل لإحضار ما طلبوا .. فهمس لها

"حامد:"

-وحشتيني أوى .. لما وافقتى انك تقابليني مكنتش مصدق نفسي .. تعرفى انى

من الصبح من ساعة ما كلمتك وأنا مش عارف أركز فى الشغل

ابتسمت بخجل فقام وجلس على المقعد المجاور لها وقربه منها شعرت بالتوتر

فابتسم قائلاً:

-ايه خايفه من ايه احنا فى مكان عام زى ما طلبتى أهو .. والناس حولينا من

كل اتجاه .. بس مش حابب أعد بعيد عنك

كانت "نرمين" متوتره للغاية ومشاعرها مضطربة مزيج من السعادة والخوف

.. همس اليها:

-ممكن أسمع صوتك .. انتى ما قولتيش حاجه من ساعة ما أعدنا  
قالت بصوت خافت:

-أنا مش هتأخر همشى بسرعة .. فقول اللى انت كنت عايز تقولهولى  
قرب رأسه منها قائلاً:

-كنت بس عايز أشوف ردك فعلك لما تعرفى أنا مين .. وأتأكد انك موافقة عليا  
.. عشان محرجش نفسي مع "مراد"  
ثم قال:

-ها .. عجبك ولا لا ؟

ابتسمت وخفضت بصرها فى خجل ..فابتسم بخبث قائلاً:  
-تمام كده السكوت علامة الرضا .. كده خدت موافقتك باقى موافقة أخوكى  
رن هاتف "نرمين" فاضطربت ونظرت الى هاتفها وقالت بتوتر:

-دى ماما

قال "حامد": "

-ردى عليها

قالت بتوتر وهى تضع هاتفها فى حقيبتها:

-لا أنا همشى أحسن

-استنى احنا ملحقناش نعد سوا

نهضت بالفعل وقالت:

-معلش فعلاً مش هينفع أتأخر أكثر من كده

حملت الأكياس التى تحوى الملابس التى اشترتها قبل القدوم الى المطعم ..

فغادر "حامد" المطعم معها قائلاً:

-استنى هوقفلك تاكسى .. مع انى نفسي أوصلك بنفسى

قالت بصوت خافت:

-مش هينفع

ابتسم وأمال برأسه اتجاهها قائلاً بخبث:

-بكره كل حاجه هتنفع

أبتعدت عنه .. فأوقف احدى السيارات .. ركبت فى المقعد الخلفى فاتحنى على

الشباك وابتسم قائلاً:

-طميننى عليكي لما توصلنى

ابتسمت له وأومات برأسها .. أخرج "حامد" بعض المال ودفع أجرة السائق ولوح لها بيده فنظرت اليها مبتسمة قبل أن تنطلق السيارة .. تابع "حامد" السيارة بعينيه وبمجرد أن رحلت التفت لأحد الرجال الواقفين فى أحد الجوانب أمام المطعم وأخذ منه هاتفه الذى كان ممسكاً به بيده .. أخذ "حامد" يشاهد الصور التى جمعتها بـ "نرمين" داخل المطعم وخارجه ثم ابتسم ولمعت عيناه خبثاً وقال :

-قشطة أوى .. تسلم يا باشا نرد هالك فى الأفراح

قال له الرجل ضاحكاً:

-انت .. ده انت شيطان .. ربنا يكفيننا شرك

نظر اليه "حامد" قائلاً بمرح:

-طيب يلا بينا نشوف أى حتة نسهر فيها .. مزاجى حلو أوى النهاردة وعايز أتبسط على الآخر

\*\*\*\*\*

-خلى بالك منيها

قالت "بهيرة" هذه العبارة بنبرة حازمة وهى تودع "مراد" أمام سيارته .. فتنهد قائلاً:

-مع السلامة يا عمتو

عانقها مودعاً .. وسلم على "سباعى" قائلاً:

-أشوفك بخير يا عمو

قال "سباعى": "

-طريح السلامة يا ولدى .. على مهلك وانت سايج .. الله معك

ركب "مراد" سيارته متوجهاً الى بيت "عبد الرحمن" .. فى بيت "عبد

الرحمن" وقفت "مريم" تودع جدها وجدتها و "صباح" بأعين دامعه .. ما هى

الا دقائق وأوقف "مراد" سيارته أمام الباب .. خرج اليه "عبد الرحمن"

ورحب به قائلاً:

-أهلاً يا ولدى اتفضل اتفضل

سلم عليه "مراد" قائلاً بإقتضاب:

-معلش مضطر أمشى دلوقتي

قال له "عبد الرحمن": "

-طيب يا ابني ثواني أنادى لـ "مريم"

وقف "مراد" أمام سيارته فى انتظارها .. دخل "عبد الرحمن" الى البيت وحمل

حقيبة "مريم" قائلاً:

-يلا يا بنتى .. جوزك بره

شعرت "مريم" بالإضطراب وبالآلم يغزو بطنها وينتشر به من فرط التوتر ..

قبلت رأس جدتها ويديها قائله:

-هتظن عليكي بالتليفون دايماً يا تيته .. وان شاء الله فى أقرب وقت هاجى

أزورك

قالت جدتها بأعين دامعة:

-ربنا ينورك طريحك يا ابني .. ويكفيكي شر ولاد الحرام .. مع السلامة يا

غالية

خرجت "مريم" تسير خلف جدتها .. التفت "مراد" وأسرع بحمل الحقيبة من يد

"عبد الرحمن" .. هم بأن يضعها فى شنطة السيارة عندما وقعت عيناه على

"مريم" .. "تسمر فى مكانه وهو يمعن النظر اليها .. هربت من عيناه ونظرت

الى يديها الممسكة بحقيبة يدها .. تعرف عليها "مراد" بمجرد أن رآها .. نعم

انها نفس الفتاة التى قابلها أمام المركز الصحى والتى كانت تنظر اليه بامعان

شديد .. وضع الحقيبة فى السيارة فالتفتت "مريم" تقبل يد جدتها قائله بصوت

مضطرب:

-مع السلامة يا جدو

قبل "عبد الرحمن" رأسها وقال:

-مع السلامة يا بني .. خلى بالك من نفسك .. ولو احتجتى أيتها حاجه

كلميني رقمى معاكى

دخلت "مريم" السيارة بجوار "مراد" وهى تشعر بتوتر لم تشعر به من قبل ..

شعرت وكأنها عاجزة عن التنفس فى فرط توترها وهى جالسة الى جواره ..



كانت تأخذ نفسها بصعوبة شديدة .. و .. انطلق "مراد" بسيارته بصحبة  
"مريم" فى طريقه الى القاهرة.

\*\*\*\*\*

طرقت "سارة" باب غرفة "نرمين" فأذنت لها بالدخول .. ووقفت "سارة"  
بجوار أختها فى الشباك قائله:  
-أعدده لوحدك ليه

قالت "نرمين" مبتسمة وهى تلعب بخصلات شعرها:  
-عادى يعنى

قالت "سارة": "

"-مراد" اتصل .. اتحرك على الطريق هو وعروسته  
قالت "نرمين" بحدده:

-أنا لسه مش مصدقه ان "مراد" اتجوز .. حاجه غريبه جداً .. مش فاهمه ايه  
سلق البيض ده .. وازاى هنعيش مع واحدة غريبة منعرفهاش  
قالت "سارة" بهدوء:

-طالما عجبت "مراد" يبأه هى أكيد بنت كويسه  
قالت "نرمين": "

-بقولك ايه متوجعش دماغى أنا مبسوطه ومش عايزه حاجه تعكنن عليا  
نظرت اليها "سارة" بامعان قائله:

-وايه اللى باسطك كده .. متفرحيني معاكى  
قالت "نرمين" بنفاد صبر:

"-سارة" روى شوفيلك حاجه اعلمها بعيد عنى  
توجهت "سارة" الى الباب قائله:

-انا غلطاناه أصلاً انى عبرتك وجيت أعد معاكى

خرجت "سارة" فارتسمت ابتسامه على شفتى "نرمين" وهى تتذكر مقابلتها لـ

"حامد" اليوم.

\*\*\*\*\*

ساد الصمت بينهما لأكثر من ساعة .. لم يتفوه أحدهما ببنت شفه .. اختلست "مريم" النظر الى "مراد" فحقق قلبها بشدة .. قالت فى نفسها : يا الله ما أشد الشبه بينهما كأننى أرى "ماجد" أمام عيناى .. بدا وكأن "مراد" الذى كان شاردأ انتبه فجأة لوجودها بجواره .. التفت وألقى عليها نظره ثم عاد ونظر أمامه مرة أخرى .. تحدث فجأة قائلاً بحزم:

-ماما واخواتى ميعرفوش بتفاصيل الجوازه دى ولا بالمشاكل اللى حصلت فى النجع .. هنفهمهم ان جوازنا طبيعى .. يعنى مش عايز حد فيهم يعرف الوضع بينا

قالت "مريم" وقد شعرت ببعض الراحة:

-هو حضرتك عايش مع مامتك واخواتك ؟  
نظر اليها شزراً وقال بإقتضاب:

-أيوه

أخذت تفكر ترى هل أخواته هو فقط أم أخوات "ماجد" أيضاً .. سألته قائله:  
-هما أد ايه ؟

رد بإقتضاب:

-بنتين

ابتسمت فى نفسها .. سألته باهتمام:

-اخوات حضرتك من نفس الأم والأب ؟

نظر اليها بدهشة وقال بحده:

-ايه السؤال الغريب ده

شعرت "مريم" بالخرج الشديد فتمتت بخفوت:

-أنا آسفه

نظر "مراد" أمامه وبدا وكأنه يجاهد ليتحكم فى أعصابه .. قال بقسوة:

-مش عايزك تختلطى بيهم ولا تتكلمى معاهم كثير طول فترة وجودك معنا ..

دول بنات محترمة ومتربين كويس .. ومش عايز حد يآثر عليهم  
شعرت "مريم" بمهانة شديدة .. وبوغز الدموع فى عينيها لكنها تماكنت نفسها  
سريعاً .. فأخر شئ تريده هو البكاء أمام هذا الرجل القاسي .. ألقى "مراد"  
نظرة عليها ثم قال ببرود:  
-جوزك اتوفى من أد ايه ؟  
نظرت اليه بدهشة قائله:  
-عرفت منين ؟

قال بسخرية:

-أكيد عرفت فى كتب الكتاب لما جدك ادى قسيمة جوازك وشهادة الوفاة  
للمأذون

صمت قليلاً ثم أعاد سؤاله ببرود:

-مات من أد ايه ؟

شعرت بالحرق لأنه يتدخل فى خصوصياتها .. فقالت بضيق:  
-من سنة

ضحك بسخرية قائلاً:

-سنة .. ولحقتى تنسيه وتدورى على غيره

شعرت "مريم" بالمهانة مرة أخرى فإسلوبه لم يكن محتملاً بالنسبة لها ..  
صكت على أسنانها وكظمت غيظها .. فأكمل "مراد" متهكماً:

-وملقتيش غير الصعيد .. أديكي اتدبستى فى جوازه

لم تتفوه "مريم" بكلمه نظر اليها فوجدها ساكنه هادئه لا تظهر أى من  
انفعالاتها الداخليه فأغاظه ذلك فأكمل ساخراً بقسوة:

-دلوقتى عرفت ليه كنتى بتبصيلي أوى ومركزة معايا أدام المركز الصحي

خفق قلب "مريم" والتفتت لتتظر اليه .. فتلاقت أعينهما شعرت بأن عيناه كعين  
الصقر مصوبتان اتجاهها وقال بوقاحه :

-اظاهر ان "جمال" مكنش مكفيكي

فاق ما قاله قدرتها على الإحتمال فصرخت فيه:

-وقف العربية .. بقولك وقف العربية

نظر "مراد" أمامه ببرود دون أن يمتثل لطلبها .. فتحت "مريم" باب السيارة

وصرخت قائله:

-لو موقفتش العربية هنزل منها وهى ماشية

صرخ فيها "مراد" بغضب:

-اقفلى الباب ده وبطلى جنان

قالت بإصرار:

-بقولك وقف العربية دلوقتى حالاً يا إما هنزل منها وهى ماشية

ضغط "مراد" على الفرامل بقوة فأصدرت السيارة صوتاً مرعباً .. توقفت

السيارة فأسرعت "مريم" بمغادرتها حاملة حقيبة يدها .. مشيت فى الإتجاه

العكسي .. فى طريقها الى النجع مرة أخرى .. نظر اليها "مراد" من مرآة

السيارة بغضب ثم انطلق بسيارته فى طريقة مرة أخرى .. مشت "مريم"

مسرعة وهى تشعر بغضب بالغ .. كان غضبها يعميها على التفكير .. لا تعلم

حتى الى أين ستذهب فى هذا الليل الذى قد أسدل أستاره .. وهى وحيدة فى هذا

الطريق الصحراوى الذى تسمع فيه من بعيد عواء الذئاب .. لكنها لم تعد تبالي

بأى شئ لا تبالي أبداً .. سارت عدة أمتار ثم فجأة وجدت سيارة قادمة من

الخلف وتقطع عليها الطريق لتتوقف أمامها .. التفتت لترتطم نظراتها بنظرات

"مراد" الغاضبة .. ران الصمت عليهما لفترة .. ثم قال "مراد" بلهجة أمره

دون أن ينظر اليها:

-اركبي

ظلت واقفه أمامه وهى فى حيرة من أمرها .. فأعاد ما قال بصوت أكثر قسوة:

-قولتلك اركبي

تهتدت "مريم" بعمق .. ثم لفت حول السيارة وأعدت الجلوس فى معقدها ..

أدار "مراد" سيارته وعاد فى اتجاه القاهرة مرة أخرى .. صمت كلاهما ..

كانت "مريم" تتنفس بسرعة وقلبها يخفق بإضطراب .. قال "مراد" بصرامة

دون أن ينظر اليها:

-اياكى تكرريها تانى

لم تجيبه .. ولم ينتظر رداً .. وأكملت طريقهما فى صمت .. صمت لم يقطعه

كلمة من أى منهما .. ولا حتى نظرة.

## الفصل الرابع عشر

بعد عدة ساعات عبرت سيارة "مراد" بوابة الفيلا .. نظرت "مريم" حولها وهي تتطلع الى الفيلا والحديقة فى ظلام الليل .. أخرجت هاتفها واتصلت بجدتها قائله:

-أيوه يا جدو .. وصلت الحمد لله

-طيب يا بنيتي طمنتيني .. خلى بالك من نفسك .. ولو احتجتى حاجه كلمينى

طوالى

نزل "مراد" من السيارة وأخرج حقيبة "مريم" وحقيبته .. مدت "مريم" يدها لتأخذ منه حقيبتها لكنه لم يلتفت اليها وصعد الدرجات الى باب الفيلا .. لم يحتاج الى اخراج مفطاحه .. فلقد فتحت أمه الباب بمجرد أن سمعت صوت السيارة .. صعدت "مريم" الدرجات خلفه ببطء وهي تشعر بتوتر بالغ .. كعابر سبيل ضل طريقه .. عانقته أمه قائله:

-حمدالله على السلامة يا "مراد" اتأخرتوا أوى كده ليه ؟

قال "مراد" بصوت متعب:

-لا اتأخرنا ولا حاجه يا ماما المسافة كبيرة أصلاً

نظرت "ناهد" خلفه تتطلع الى "مريم" الواقفه أمام الباب .. ابتسمت اليها قائله :

-أهلاً بيك .. ألف مبروك

اومأت "مريم" برأسها وقالت بتوتر بالغ:

-أهلاً بحضرتك

أشارت "ناهد" بيدها قائله:

-اتفضلى ادخلى

دخلت "مريم" وهي تشعر بالإضطراب وقفت بجوارهما وهي لا تدري ماذا تفعل وماذا تقول .. تفحصتها "ناهد" ثم رسمت ابتسامه على شفثيها قائله:

-زمانكوا تعبانين من السفر يلا اطلعوا ارتاحوا

أشار لها "مراد" باتجاه السلم الداخلى قائلاً:

-اتفضلى

صعدت "مريم" معه وهى واثقه كل الثقة أنه لم يبقى الا لحظات وتقفد وعيها من فرط التوتر .. كانت فى موقف لا تُحسد عليه .. متزوجة من رجل لا تريده ولا يريدھا .. لا تطيقه ولا يطيقھا .. ومرغمة على البقاء معه فى غرفته .. وليس هذا فحسب بل مطلوب منها أيضاً تمثيل دور العروس الجديدة أما أمه وأخواته .. فتح "مراد" باب الغرف وسبقھا فى الدخول .. وقفت أمام الباب فالتفت اليھا قائلاً بنفاد صبر:

-ادخلى واقفلى الباب .. ماما زمانها طالعه أوضتها دلوقتى دخلت "مريم" وأغلقت الباب .. تفحصت الغرفة بنظرة سريعة .. كانت تتسم بالطابع الذكوري .. لا يوجد بها أى لمسه أنثويه .. شعرت بحرج بالغ واشتعلت وجنتيها خجلاً ظلت واقفة أمام الباب المغلق تمسك حقيبته يدها بتوتر .. وضع "مراد" الحقائق بجوار الدولاب ثم التفت اليھا متفحصاً اياها ثم قال بسخريه:  
-الى يشوف كده يقول أول مرة تدخل أوضة راجل

شعرت "مريم" بالخجل والحنق الشديد .. لكنه لم يكتفى ولن يكتفى .. اقترب منها ناظراً اليھا بتهكم قائلاً بوقاحه:

-آه صحيح نسيت انك بتفضلى البيوت اللى لسه بتتبنى جديد رفعت "مريم" رأسها ونظرت اليه بشراسة كقطة بريئة تهم بالإنقضاض على فريستها لتلتهمها وقالت بغضب:

-كفاية بأه .. كفاية اهانة .. مش هسمحك تهنى أكثر من كده قال "مراد" بعنف:

-انتى اللى أهنتى نفسك .. واحدة زيك لا عندها دين ولا أخلاق المفروض تتكسف من نفسها مش ترد ببجابه قالت بحده وهى تنظر اليه بغضب:

-أنا معملتش حاجه غلط عشان أتكسف منها اللى المفروض يتكسف من نفسه هو ابن عمك الغير محترم .. وأهو ربنا خدلى حقى منه ومرمى دلوقتى فى المستشفى لان دعوة المظلوم مستجابة وابن عمك افترى عليا وظلمنى نظر اليها "مراد" بشك وهو يستمع الى كلماتها فأكملت بحزم وصرامة:  
-لو جبت سيرتى على لسانك تانى بأى كلمة تمس شرفى اتأكد ساعتها انى هدعى عليك زى ما بدعى عليه بالظبط

صمت "مراد" وهو ينظر اليها متفحصاً ثم قال ببرود:  
-الحاجة الوحيدة اللي عايزها منك انك تفضلى بعيده عنى  
قالت بعنف:

-ومين قالك انى عايزة أقرب منك أصلاً .. أنا مجبرة على الجوازة دى زى ما  
انت مجبر عليها بالظبط  
نظر اليها قليلاً ثم توجه الى فراشه وأخذ وسادة وغطاء وألقاهم على الأريكة  
الموجود فى الغرفة ونظر اليها قائلاً ببرود:  
-هتنامى هنا

شعرت "مريم" بالمهانه .. آخر ما كانت تريده هو النوم بجواره لكن إشارته  
لذلك بتلك الطريقة جعلها تشعر بالمهانه .. أكمل قائلاً:  
-وزى ما فهمتك لا عايز أمدى ولا اخواتى يعرفوا حاجه عن الوضع بينا لحد ما  
عمتو تيجى ونشوف حل للمصيبة دى  
صمت فقال وهو يغادر الغرفة:

-فى حمام فى الأوضة ادخلى غيرى هدومك لان أكيد ماما هتطلعك دلوقتى  
قال ذلك ثم خرج و أغلق الباب خلفه دون أن ينتظر ردها .. تنهدت "مريم"  
بأسى وتوجهت الى الأريكة وجلست عليها وهى شاردة وعلامات الحزن على  
وجهها .. نظرت الى ساعتها فعلت أنه لم يبقى الا نصف ساعة على آذان الفجر  
فأسندت ظهرها وجلست تنتظر ميعاد الصلاة

نزل "مراد" للأسفل فوجد والدته تهم بالصعود وهى تقول له:  
-سايب عروستك ونازل ليه  
قال بنفاد صبر:

-رايح أجيب حاجه من العربية .. انتى منمتيش ليه  
قالت أمه بعتاب:

-يعني أسيب البنت تنام من غير عشا فى أول ليلة ليها هنا .. تقول علينا ايه  
أوما "مراد" برأسه فقالت "ناهد" وهى تصعد:  
-أنا قولت لدادة "أمينة" تحضرلكم العشا وتطلعه أوصتك وهروح دلوقتى أطمئن  
عليها قبل ما أنام ..خرج "مراد" وتوجه الى سيارته وجلس أمام المقود وهو  
يزفر بضيق .. رفع نظره الى شرفة غرفته التى أصبحت محتلة.

طرقت "ناهد" باب غرفة "مريم" .. فنهضت "مريم" بتوتر وفتحت الباب ..  
ابتسمت "ناهد" قائلة:

-خفت تكونى نمتى

ابتسمت "مريم" بصعوبة وقالت:

-لا لسه

نظرت الي ملابسها وقالت:

-ولا حتى غيرتى هدومك

صمتت "مريم" فقالت "ناهد": "

-أنا معرفتش اسمك

"-مريم"

-وأنا "ناهد" مامة "مراد" طبعاً .. و "سارة" و "نرمين" كان نفسهم

يشوفوكى بس للأسف اتاخرتوا أوى وهما ناموا .. الصبح ان شاء الله تتعرفوا

على بعض

أومأت "مريم" برأسها فقالت "ناهد" قبل أن تغادر:

-دادة أمينة هت حضر العشا وتطلعك بيه .. تصبى على خير يا "مريم" أشوفك

الصبح

تمتم "مريم" بضعف:

-وحضرتك من أهل الخير

أغلقت الباب وعادت الى مكانها على الأريكة .. أذن الفجر فنهضت وتوجهت الى

الحمام وتوضأت .. احتارت كيف يكون اتجاه القبلة .. لامت نفسها لأنها لم تسأل

"ناهد" .. شعرت بالضيق والحنق .. لحظات وسمعت طرقات على الباب .. ظنت

أنه "مراد" فارتدت حجابها لتخفى شعرها .. فتحت لتجد امرأة بسيطة يبدو

عليها الطيبة ابتسمت ببشاشه وهى تدخل الغرفة قائلاً:

-أهلا وسهلاً بالغالية مرارة الغالى .. نورتى بيتك

نظرت اليها "مريم" وهى تضع الطعام على احدى الطاومات الصغيرة .. فالتفتت

لها المرأة وقالت ببشاشه:

-أنا دادة "أمينة" .. أنا اللى مربية سي "مراد" من وهو صغير .. بس واعى

تفتكرينى عجوزة لا أنا لسه شباب برده



ابتسمت "مريم" لتلك السيدة الطيبة .. فقالت "أمينة: "

-أسيبك بأه ترتاحى وتتعشى

همت بالخروج فأوقفتها "مريم" قائلة:

-بعد ادنك ممكن تعرفيني اتجاة القبلة

أرتها "أمينة" الإتجاة الصحيح وتركتها لتصلى الفجر .. وجدت "مريم" نفسها تبكى كثيراً فى السجود وهى تتضرع الى الله عز وجل أن يحفظها ويقدر لها الخير ويصرف عنها السوء وينتقم ممن ظلمها وافترى عليها .. أنهى "مراد" صلاته فى المسجد القريب وأعاد أدراجه الى الفيلا وهو واجماً .. رفع نظره الى شرفة غرفته ليجد الضوء ما زال مضاءً .. زفر بضيق وحنق .. طرق الباب عدة طرقات همت بأن تقوم لفتحه لكنه فتحه ببطء .. دخل وألقى نظرة على الطعام الذى لم تمسه .. ثم توجه الى شرفة غرفته .. كانت "مريم" تشعر بالإرهاق وبالتعب الشديد .. ولكنها خجلت من أن تنام أمام أعين هذا الرجل الغريب .. أسندت رأسها على ذراع الأريكة وظلت تقاوم النعاس الى أن غلبها .. وقف "مراد" فى الشرفة وهو يشعر بالغضب والضيق .. كان الزواج هو آخر ما يريده .. خاصة ان كان زواج بهذه الطريقة .. زواج لانقاذ الموقف .. زواج من فتاة بعيدة كل البعد عن طباعه وأخلاقه .. أكثر ما يشعره بالضيق هو اضطراره الى مشاركتها غرفته .. عالمه الخاص .. الذى يشعر فيه بالراحة والسكينة بعيداً عن اعين الناس .. هذا المكان الوحيد الذى يظهر فيه عجزه واعاقته لأنه بمفرده لا يتطلع عليه أحد .. لا يرمقه فيه أحد بنظرات الشفقة او السخرية .. هو أمام الناس شخص كامل لا فرق بينه وبين أى رجل غيره .. يسير ويتحرك بطريقة طبيعية .. لكنه بينه وبين نفسه يشعر بنقصه .. وبإعاقته .. وبذلك الفراغ فى قدمه اليمنى .. ولا يدع أحداً أبداً مهما كان أن يراه بدون ساقه الصناعية .. وبالتأكيد فأخر ما يريده هو أن يظهر اعاقته أمام تلك الفتاة الغريبة التى تشاركه غرفته رغباً عنه .. قضى ليلته على أحد المقاعد فى الشرفة .. الى أن لاح نور الصباح.

\*\*\*\*\*

-شكلها ايه يا ماما ؟

نظقت "سارة" هذه العبارة وهي جالسه مع أمها وأختها فى احدى شرف المنزل .. قالت "ناهد" وهي تحتسى من فنجان الشاى فى يدها:

-بنت عاديه .. هاديه.. ملحقتاش نتكلم كتير عشان أكون انطباع عنها  
سألت "نرمين" قائله:

"-مراد" ماقالكيش هسيب البيت ولا لأ  
قالت "ناهد": "

-لأ طبعاً ملحقتاش نتكلم فى حاجه  
ثم زفرت بضيق:

-كنت حسه بإحساس بشع وانا بسألها عن اسمها .. عروسة ابنى ومعرفش  
حتى اسمها

قالت "نرمين" بحده:

-سي "مراد" هو السبب .. حد يعمل عملته دى .. ولا كان له أهل  
نظرت اليها "ناهد" محذره اياها:

"-نرمين" مش عايزين مشاكل من أولها .. أنا ما صدقت ان "مراد" اتجوز ..  
مش عايزه أى حاجة تعكرله مزاجه فاهمة  
قالت "نرمين" بتبرم:

-طيب أنا مالى هو أنا اللي اتجوزت ولا هو .. هو حر

استيقظ "مراد" على ضوء الشمس الذى يلفح وجهه .. اعتدل فى الجلوس وهو  
يشعر بالألم بالغة فى ظهره .. نهض ودخل الغرفة فوقه نظره على "مريم"  
النائمة بكامل ثيابها على ذراع الأريكة .. فتح الدولاب وأخرج ملابسه وتوجه  
الى الحمام .. استيقظت "مريم" على صوت الدش .. قامت فزعة تنظر حولها  
بإستغراب وهي تتساءل أين هي .. ثم تذكرت فتنهدت بأسى .. توجهت الى  
حقيبتها التى وضعها "مراد" بالأمس بجوار الدولاب وأخرجت ملابسه  
وانتظرت خروجه .. خرج "مراد" وهو يرتدى حلة أنيقة .. تلاقت نظراتهما فى  
صمت ثم توجه الى باب الغرفة مغادراً اياها.

استقبلته "سارة" بالأسفل قائله بإبتسامه:

-حمدالله على السلامة يا أبيه والى مبروك

قالت "نرمين": "

-مبروك يا أبيه

رد "مراد" بإقتضاب:

-الله يبارك فيكم

قالت "ناهد" مبتسمة:

-أمال فين عروستك

قال وهو عابس:

-نازله كمان شوية

ابتسمت "ناهد" قائلة:

-توقعت انك تتأخر فى النوم رجعتوا امبارح متأخر بعد سفر طويل

قال "مراد" وهو ينظر الى ساعته ويهم بالإصراف:

-لا مضطر أخرج عشان عندى شغل

هتفت "ناهد" بدهشة:

-شغل ايه يا "مراد" .. ده انت مبالكش يومين متجوز

قال "مراد" بضيق:

-وأقول للعملا ايه يعني معلى استنوى أصلى عريس جديد

قالت "ناهد" بضيق:

-يعني هتسيب عروستك وتنزل الشغل

قال وهو ينصرف:

-هى عارفه طبيعة شغلى متشغليش بالك .. مع السلامة

زفرت "ناهد" بضيق واستغرقت فى التفكير .. قالت "نرمين" بسخرية:

-وأنا اللي كنت فاكرة الجواز هيغيره .. لا الحمد لله كده اطمنت عليه

قالت "سارة" باستغراب:

-ده غريب أوى .. ده حتى مش باين عليه انه مبسوط

قالت "ناهد" بشرود:

-يا خوفى يكون اتجوزها بس عشان يخلص من زنى عليه فى موضوع الجواز

.. لو عمل كده يبقى بيظلم نفسه وبيظلمها معاه

نهضت وقالت وهى تغادر:

-أما أطلع أشوفها

خرجت "مريم" من الحمام لتسمع طرقات "ناهد" على الباب وهي تقول:  
"مريم" انتى صاحية ؟  
قامت بسرعة بوضع الغطاء والوسادة فوق السرير وفتحت الباب .. ابتسمت لها  
"ناهد" قائله:  
-صباح الخير  
ابتسمت "مريم": "  
-صباح النور  
نظرت "ناهد" الى الطعام الذى لم يمسه أحد وقالت بعتاب:  
-ايه ده مكلتيش ليه يا "مريم"  
-معلش مكلتش جعانه  
-طيب يا حبيبتي انزلى يلا عشان نفطر سوا  
أومأت "مريم" برأسها .. خرجت خلفها وتوجهت للأسفل .. قامت الفتاتان  
لاستقبالها .. ابتسمت لها "سارة" مرحبه:  
-أهلا بيكي يا "مريم" ألف مبروك  
قالت "نرمين" وهي تتفحصها:  
-مبروك يا "مريم"  
ابتسمت "مريم" وأومأت برأسها .. التف الجميع حول طاولة الطعام .. نظرت  
"مريم" الى الفتاتان فى محاولة ايجاد تشابه بينهما وبين "ماجد" .. قالت  
"ناهد": "  
-مبتكليس ليه يا "مريم"  
التفتت اليها "مريم" قائله:  
-باكل يا طنط  
قالت "ناهد" وهي تمعن النظر اليها:  
-معلش هو "مراد" كدة بيحب شغله جداً وعلى طول مشغول .. فمتضايقيش انه  
سابق وراح الشغل  
ابتسمت "مريم" فى نفسها بسخريه والتفتت الى المرأة قائله:  
-لا أبدأ أنا مقدره ان عنده شغل  
ابتسمت "سارة" وقالت:  
-شكلك عاقلة أوى أنا لو منك كنت زعلت

قالت "نرمين" وهي تتفحص "مريم" بنظراتها:  
-أنا بأه لو منك كنت قومت الدنيا ما أعدتهاش  
التفتت "ناهد" الى الفتاتان قائله:  
-فى ايه يا بنات .. عندكوا كلمة حلوة قولوها .. مفيش يبقى اسكتوا  
التفتت "ناهد" الى "مريم" قائله:  
-برافو يا "مريم" الراجل يحب الست العاقلة اللى بتقدر ظروفه .. ربنا يبارك  
فيكي يا بنتى  
ثم نظرت "ناهد" شزراً الى الفتاتان فأكملا طعامهما فى صمت

\*\*\*\*\*

توجه "مراد" الى شركته وانغمس فى عمله ليصرف تفكيره عن تلك الفتاة  
القابعة فى عقر داره والتي تحمل اسمه رغباً عنه .. فى منتصف اليوم سمع  
طرقات على الباب ثم انفتح الباب ليدخل "طارق" هاتفاً:  
-ايه ده يا "مراد" يعنى أعرف من بره انك جيت .. مهنش عليك تديني تليفون  
حتى  
قام "مراد" وسلم عليه قائلاً:  
-معلش يا "طارق" رجعت امبارح الفجر وأول ما جيت الشركة اتلخمت فى  
الشغل  
جلس "طارق" قبالته وقال:  
-ايه التأخير ده كله من قولت يومين وهترجع  
زفر "مراد" بضيق وألقى القلم من يده بعصبيه .. نظر اليه "طارق" متفحصاً  
وقال:  
-مالك فى ايه يا "مراد"  
تنهد "مراد" بضيق وقال:  
-وقعت فى مصيبة يا "طارق"  
قال "طارق" بهلع:  
-مصيبة ايه يا "مراد"  
نظر اليه "مراد" قائلاً بحده:

-اتجوزت

نظر اليه "طارق" بدهشة مردداً:

-اتجوزت!

قال "مراد" بعصبية:

-أيوه .. اتجوزت جوازه ما يعلم بيها الا ربنا

قال له "طارق" باستغراب:

-احكي لي يا "مراد" مش فاهم حاجه

تنهد "مراد" وقال بحده:

-اختصار الكلام كان في مشاكل بين عيلتي وعيلتها وتار ودم وقتل والحل

الوحيد كان جوازي منها

قال "طارق" بدهشة:

-وبعدين؟

قال "مراد" بحنق:

-وبعدين ايه هو أنا بحكى حدوته .. جبتها معايا هنا لحد ما عمتي ترجع من

الصعيد وتشوفلي حل في المشكلة دي هي قالتلي الوضع ده مش هيستمر كثير ..

وهي لو متصرفتش أنا اللي هتصرف .. أنا معنديش استعداد أبداً استمر في

جوازه بالطريقة دي

قاطعهم طرقات السكرتيرة على الباب ودلفت تقول:

-أستاذ "سامر" بره وعايز يقابل حضرتك يا فندم

-خليه يتفضل

دخل "سامر" وسلم على الرجلين ثم جلس قبالتهم قائلاً:

-ايه يا جماعة الشغل متعطل ليه كل ده

قال "مراد" معتذراً:

-معلش يا "سامر" كنت مسافر

قال "سامر" بضيق:

-المشكلة ان التأخير ده عملنا مشاكل جامده

قال "مراد" بإهتمام:

-ايه اللي حصل؟

قال "سامر" بغضب:

-الزفت اللى اسمه "حامد" .. سرق كل الشغل اللى كنا عاملينه .. اللوجو والبروشورز وكل حاجه وغير بس اسم الشركة وسماها بإسم شركته ودخل شريك مع اتنين رجال أعمال وبينفذ نفس مشروعنا

صاح "طارق" بغضب:

-ابن التيببيبيبييت

زفر "مراد" قائلاً:

-أهو ده اللى كان ناقص

قال "سامر": "

-طبعا هنتعطل تانى لحد ما الشغل ده كله يتعمل من أول وجديد يعني مش أقل

من اسبوعين

التفت "مراد" الى "طارق" قائله:

-حالا يا "طارق" تكلم شركة الدعاية بيدأوا الشغل من جديد وهدد أنا وانت

نشوف التفاصيل الجديدة وتبلغهالهم

قال "طارق" بيأس:

-الديزاينر بتاعة حملتنا مختفية

قال "مراد" بحده:

-يعني ايه مختفية؟

-يعني محدش عارف يوصلها ولا حتى صاحبته .. تليفونها مقفول ومبتدخلىش

ايميل الشركة

قال "سامر" بسرعة:

-خلاص نشوف حد غيرها

قال "مراد" و "طارق" فى نفس واحد:

-لا

مع اختلاف أسباب كل منهما .. نظر اليهما "سامر" قائلاً:

-ليه لأ

قال "مراد" شارحاً:

-الشغل اللى سرقه "حامد" مننا كان ممتاز وأنا عايز شغل فى نفس المستوى

وأعلى كمان .. ومفيش ديزاينر غيرها بيطلعلى شغل مظبوط كده زى ما أنا عايز

بالظبط .. ده غير انها بتنجز الشغل فى وقت قياسي واحنا أى تأخير مش فى

صالحنا أبدأ

قال "طارق" مؤكداً كلام "مراد": "

-معاك يا "مراد" فى كلامك وأنا هوصلها متقلقش

خرج "طارق" و تركهما .. كان "مراد" يغلى من الغضب لفعله "حامد"  
الخالیه من الأخلاق .. والتي ستتسبب فى تعطيل أعمالهم.

\*\*\*\*\*

كانت "مریم" تتمشى فى حديقة الفيلا بمفردها .. كانت الطبيعة حولها ساحرة  
خلابة جلست على أحد المقاعد تتأمل الخضرة حولها .. ظلت ساكنه فى مكانها  
لفترة طويلة .. سرقتها الوقت فهى معتاه على البقاء بمفردها دائماً .. سمعت  
صوتاً خلفها يقول:

-أعدة لوحذك لیه .. دورت عليكى كتير

التفتت "مریم" الى "سارة" قائله بحرج:

-معلش محستش بنفسى

جلست "سارة" بجوارها وقالت مبتسمه:

-ولا يهملك .. أنا كمان بحب أعد فى الجنينة هنا وبنفسى نفسى فيها .. بحب

الهدوء زيك

نظرت اليها "مریم" قائله باهتمام:

-انتوا التلاته اخوات من نفس الأم والأب ؟

نظرت اليها "سارة" باستغراب قائله:

-أيوة

قالت "مریم" بلهفة:

-يعنى اسمك "سارة خيرى الهوارى" .. و"نرمين" كمان ؟

قالت "سارة" وهى مازالت تشعر بالدهشة:

-أيوة

نظرت اليها "مریم" بتأثر شديد .. لم تصدق أنها جالساه مع أخت "ماجد" ..

جزء منه .. أقرب الأشخاص فى هذا الكون اليه .. اغرورقت عيناها بالعبرات

رغم أنها .. قالت لها "سارة" بدهشة:



"-مريم" انتى بتعيطى ليه  
نظرت اليها "مريم" بشوق وكأنها ترى "ماجد" أمامها وقالت وهى تحاول  
التحكم فى بكانها:  
-مفيش .. حسه بس ان فى ناس وحشونى  
ابتسمت "سارة" بحزن قائله:  
-تقصدى أهلك  
قالت لها "مريم" والعبرات تتساقط من عينيها:  
-دول أكثر من أهلى .. دول جزء منى .. وحشونى أوى .. حسه انى محتجالهم  
أوى جمبي .. حسه انى ضايعة من غيرهم .. بجد وحشونى أوى  
كانت تقصد "ماجد" بكلامها .. بثت ما فى نفسها من كلمات محبوسة داخل  
صدرها .. أجهشت فى البكاء وتعالى شهقاتها .. تركتها "سارة" تفرغ ما  
بداخلها من شحنات عاطفية .. اقتربت منها وربتت على كتفها وقالت برقة:  
-متقلقيش احنا برده خلاص نعتبر أهلك .. وانا و "نرمين" اخواتك .. مش كده  
ولا ايه  
توقفت "مريم" عن البكاء ونظرت الى "سارة" وقالت بحنان:  
-انتوا أكثر من اخواتى يا "سارة"  
ابتسمت "سارة" قائله:  
-خلاص يبقى متعيطيش طالما هتعتبرينا اخواتك  
ابتسمت "مريم" وهى تمسح دموعها وتنظر الى "سارة" لا تريد مفارقتها ..  
كانت تشعر بسعادة بالغة وهى جالسه معها تنظر اليها .. لأنها أخته .. أخت  
"ماجد."

\*\*\*\*\*

"-سامر" قولتلك ميت مرة أنا مبروحش بيت حد  
قال "سامر" بضيق وهو يوقف سيارته على جانب الطريق:  
-ليه يا "سهى" .. ايه المشكلة يعنى .. ايه الفرق بين البيت وأى مكان تانى  
بنعد فيه مع بعض  
قالت "سهى" بحدده:

-ازای یعنی ایه الفرق .. طبعا فى فرق .. ازای یعنی أدخل بيتك كده .. وبأى  
صفه وكمان هتقول لأهلك ايه  
قال "سامر" بنفاد صبر:

-أنا أصلا مش أعد مع أهلى أنا ليا شقة منفصله فى عمارة بابا  
قالت "سهى" بضيق:

-وكمان عايزنى أروح شقتك اللى أعد فيها لوحك  
التفت اليها "سامر" قائلاً:

"-سهى" .. انتى مبتحبينش يا "سهى"  
اغرورقت عيناها بالعبرات وقالت:

-والله العظيم بحبك يا "سامر" بس مش عايزة أعمل حاجه غلط  
قال "سامر" برقه مقترباً منها:

-يا حبيبتى هو فى الغط ده .. ايه المشكلة يعنى لما نعد نتكلم شوية .. اعتبرى  
نفسك فى أى مكان تانى مش فى البيت .. وأعدين بنتكلم زى ما بنتكلم فى أى  
كافى .. الفرق بس اننا هنكون على راحتنا ومحدثش يضايقنا ويرخم علينا زى ما  
حصل آخر مرة

قالت "سهى" بعتاب:

-ما آخر مرة فعلاً زودناها يا "سامر" وكان شكلنا مش لطيف

قال "سامر" ببرود:

-والله أنا محدش له حاجه عندى .. اللى ليه حاجه ياخدها .. أنا وحبيبتى حرين  
مع بعض محدش يقولى يصح وميصحش

ثم أمسك يدها مقبلاً اياها وقال:

-مش انتى برده حبيبتى

ابتسمت قائله:

-طبعا يا "سامر" وانت كمان حبيبى

اقترب منها مقبلاً اياها .. وجدا فجأة طرقات على زجاج السيارة وأحد الرجال  
يصيح:

-اتقوا الله دى حتى لو مراتك ميصحش كدة فى الشارع

ثم رحل الرجل وهو يتمتم فى غضب .. فإغتاظ "سامر" وصاح:

-راجل قليل الأدب صحيح وهو ماله هو أعمل اللى يعجبنى

قالت "سهى" بتوتر:  
-طيب يلا يا "سامر" نمشى من هنا أحسن  
التفت اليها قائلاً بغضب:  
-عرفتى بأه قولتلك ليه نروح البيت أحسن .. عشان الأشكال المتخلفة دى  
ثم انطلق بسيارته فى ضيق.

\*\*\*\*\*

دخل "سباعى" الى غرفة "بهيرة" للاطمئنان عليها فوجدها ساكنة شاردة فقال  
:

-كيفك دلوجيت يا بنت بوى  
التفتت اليه قائله بضعف:  
-امنيحه يا "سباعى"  
جلس على المقعد بجوار الفراش قائلاً:  
-مالك يا "بهيرة" مش عجبانى واصل  
تنهدت "بهيرة" فى أسى وقالت:  
-حيرانه يا "سباعى" حيرانه .. معرفش أعمل ابيه .. أخبر "مراد" بكل حاجه  
ولا أسيبه اكده ميعرفش حاجه واصل  
قال "سباعى" بحدده:  
-انتى ليه بتدورى على المشاكل يا "بهيرة" ليه عايزه تفتحى فى الدفاتر  
الجديمة  
قالت "بهيرة" بحدده:  
" -مريم" كانت مرت "ماجد" يا "سباعى" .. "ماجد" أخو "مراد"  
صاح "سباعى" بدهشة:  
-بتجولى ابيه ؟ .. مرته  
قالت "بهيرة" بحزن:  
-ايوة كانت مرته .. ومات من سنة .. كان رمضان ومات  
قال "سباعى" بأسى:  
-لا حول ولا قوة الا بالله .. ربنا يرحمه هو وأبوه

التفت الى "بهيرة" وسأل باهتمام:

-و "زهرة" لساتها عايشه

نظرت اليه قائله:

-مخبرش .. آنى معرفتش أتكلم معها امنيح .. مستنية الدنيا تهدي اهنه وبعدين  
أسافرلها وأفهم منها كل حاجه .. وساعتها هقرر اذا كنت هجول لـ "مراد" كل  
حاجة ولا لأ

صمتت قليلاً ثم قالت وهى شارده:

"-مريم" في يدها الخيوط كلياتها .. وهى الوحيدة اللى تجدر توصلهم ببعض

\*\*\*\*\*

كانت "مريم" جالسه مع "سارة" و "ناهد" فى غرفة المعيشة يتبادلون  
المزاح والضحكات .. أقبلت "نرمين" وجلست معهم فالتفتت اليها "مريم"  
مبتسمة:

-انتى عندك كام سنة يا "نرمين"

قالت "نرمين" بلا مبالاة:

22-سنة

ابتسمت "مريم" بحزن وقالت:

-لو أختى الله يرحمها كانت لسه عايشة كانت هتكون أدك بالظبط

نظرت اليها "ناهد" بحنان قائله:

-حبيبتي انتى اختك اتوفت

نظرت اليها "مريم" وقالت بابتسامه حزينه:

-أيوة اتوفت فى حادثة

ثم قالت:

-مع ماما وبابا

قالت "ناهد" بأسى وقد ظهر عليها التأثر:

-لا حول ولا قوة الا بالله .. ربنا يصبرك

قالت "سارة" وقد شعرت بالحزن لأجلها:

-الله يرحمهم يا "مريم"  
ابتسمت لهم "مريم" قائله:  
-اللهم آمين

قالت "نرمين" وهى تعبت بهاتفها:

-قوليلنا بأه عرفتى "مراد" ازاي واتجوزتوا بالسرعة دي ازاي  
بلعت "مريم" ريقها وقد شعرت بالإضطراب قالت بخفوت:

-العيلتين عارفين بعض وهما اللي رتبوا الجوازه  
قالت "نرمين" بسخرية وهى تنظر اليها:

-يعني مشفتوش بعض ولا أعجبتموا ببعض قبل الجواز  
قالت "مريم" بارتباك:

-لأ شوفنا بعض مرة

قالت "نرمين" بشك:

-مرة واحدة بس ؟ .. ومن مرة عرفتى ان "مراد" هو فتى أحلامك و "مراد"  
عرف انك فتاة أحلامه

نظرت اليها "ناهد" بعتاب قائله:

"-نرمين"

قالت "مريم" مبتسمة بتوتر:

-نصيب .. ربنا قدرلنا كده

نظرت "نرمين" الى هاتفها الذى يضى ويطفى فى صمت وقالت بلهفه:  
-بعد اذنكوا

صعدت "نرمين" الى غرفتها وأغلقت الباب وردت برقه ممزوجه بالخجل:  
-ألو

-وحشتيني

ابتسمت قائله:

-ما انت لسه شايفنى امبارح

-ونفسي أشوفك كل يوم وكل ساعة

صمتت فقال :

"-نرمين" عايز أشوفك تانى

-مش هينفع

-ليه مش هينفع امبارح ملحقتش أعد معاكى سبتيني ومشيتي على طول  
قالت بأسف:

-أنا أسفة اضطريت أمشى بسرعة عشان متأخرش

-لو ليا غلاوة عندك عايز أشوفك

-قولتلك مش هينفع

-طيب اقفلى عشان هبعثلك هدية على موبايلك

قالت "نرمين" بشك:

-هدية ايه

-اقفلى بس وهى توصلك

أنهت المكالمة .. لحظات وسمعت صوت نغمة الرسائل .. لاحت ابتسامه صغيره  
على شفيتها عندما رأت صورة لـ "حامد" ومكتوب تحتها "عشان أفضل معاكى  
على طول .." كانت تشعر بسعادة غامرة .. وضعت الصورة فى أحد الملفات  
بالموبايل وأغلقتة بباسوورد .. ونزلت الى الأسفل وكان شيئاً لم يكن.

\*\*\*\*\*

عاد "مراد" الى البيت فى المساء .. فتح الباب وأرهب أذنيه فلم يسمع صوتاً ..  
لحظات وتعالى الضحكات من غرفة المعيشة .. أخذته قدماه الى هناك وأخذ  
يتطلع الى "مريم" و "سارة" الجالستان على أرض الغرفة وأمامهما لعبة بازل  
يحاولان جمعها .. كانتا منهنمكتان فلم تلاحظان دخوله .. قال بصوت رخيم:  
-مساء الخير

شعرت "مريم" بالفزع بمجرد أن رآته أمامها وهبت واقفه .. نظرت الى حجابها  
الملقى على الأريكة ودت لو امتدت له يداها لتغطى به رأسها .. لكنها لم تكن  
لتفعل ذلك تحت أنظار "سارة" حتى لا تثير شكوكها .. وعلى الرغم من احتشام  
ملابسها إلا أنها شعرت بدون حجابها وكأنها عاريه .. قالت "سارة" وهى  
ماتزال جالسها فى وضعها:

-مساء النور يا أبيه

قال "مراد" لـ "سارة" بهدوء:

-فين ماما و "نرمين"

قالت "سارة" مبتسمة:

-ماما فى المطبخ و "نرمين" فى أوضتها كالعادة  
أوما برأسه ثم غادر متجاهلاً "مريم" تماماً .. شعرت "مريم" بالتوتر .. قالت  
"سارة": "

-لو عايزة تطلعيه اطلعي ونبقى نكمل بعدين  
التفتت اليها "مريم" ورسمت ابتسامة على شفيتها قائله:  
-لأ هو أكيد هيغير هدومة وينزل .. تعالى نكمل  
جلست بجوارها مرة أخرى .. لكن هيهات .. فالشعور بالمرح انتهى بمجرد أن  
رأته أمامها.

\*\*\*\*\*

توجه "مراد" الى غرفته وأخذ شاور وغير ملابسه .. تطلع الى حقيبة "مريم"  
التي مازالت بجوار الدولاب .. نزل ليتقابل مع والدته فى آخر السلم ابتسمت  
قائله:

"-مراد" انت جيت امتى

قبلها قائلاً:

-من شوية

ابتسمت قائله بمرح:

-طيب كويس تعالى احنا لسه متعشيناش .. تعالى نتعشى كلنا سوا  
دخلا غرفة المعيشة فوجد "مريم" جالسه كما كانت بجوار "سارة" لكنها هذه  
المررة مرتدية حجابها .. قالت لها "ناهد": "

-يا حبيبتي قولتك مفيش راجل غريب هنا .. حتى كل اللي بيشتغلوا هنا ستات  
"مراد" مبيخلش راجل يدخل هنا خالص

شعرت "مريم" بالتوتر ورسمت ابتسامة على شفيتها قائله:

-لأ أنا لبسته عشان حسيت بالبرد وكسلت أطلع أجيب حاجه ألبسها  
نادت "ناهد" الخادمة لتحضر شالاً من غرفتها لـ "مريم" .. أحضرت الخادمة  
الشال .. ألبستها اياه قائله بإبتسامه:

-لو لسه بردانه روى البسى حاجة أتقل

ابتسمت "مريم" واغرورقت عيناها بالدموع بسبب تلك المعاملة الحانية التي

افتقدتها منذ أن رحل أبواها وأختها .. لكم أمضت الليالى مريضة فى فراشها لا تقوى على النهوض لإحضار كوب ماء .. لكم أمضت الليالى ساهرة من ألم فى رأسها دون أن تجرؤ على النزول ليلاً لإحضار الدواء .. أبعدت "مريم" عينيها بسرعة حتى لا يرى أحداً عبراتها التى تجمعت داخل عينيها مهددة بالإنهمار تجمعت الأسرة حول مائدة الطعام .. جلس "مراد" على رأس الطاولة و "ناهد" قبالته و "نرمين" على يمينه و "سارة" على يساره .. همت "مريم" بالجلوس بجوار "نرمين" فقالت "ناهد": "

"-نرمين" بدلي الكرسى بتاعك مع "مريم"

قامت "نرمين" متبرمة وأجلست "مريم" مكانها .. شعرت "مريم" بالخرج والضيق لجلوسها بجوار "مراد" الذى لم يعيرها أى انتباه .. نظرت "سارة" الى "مراد" قائله بمرح:

-أخيراً لقيت حد مدمن البازل زيبى .. بس "مريم" ايه ما شاء الله عليها حريفه ابتسمت "مريم" .. فالتفتت اليها "سارة" قائله بتهكم:

-اللى أعرفه ان البازل دى لعبة أطفال  
ابتسمت لها "مريم" قائله:

-لا فيها درجات صعوبة عالية متنفعش للأطفال

أومأت "نرمين" برأسها ببرود ثم عادت لتكمل طعامها .. قالت "ناهد" بمرح:  
-أنا بأه مليش روح للبازل ده .. بس عارفه يا "مريم" هوايتي المفضلة ايه نظرت اليها مبتسمه وقالت:

-ايه يا طنط

ضحكت "ناهد" قائله:

-لعبة الشطرنج .. عارفه انها لعبة رجالى بس أعمل ايه جوزى الله يرحمه خلانى أدمنها .. و "مراد" الله يسامحه بأه على طول مشغول ومحدث من

البنات بيعرف يلعبها

قالت "مريم" بمرح:

-على فكرة بأه أنا كمان بموت فيها

قالت "ناهد" بدهشة:

-بجد

-أيوة بابا الله يرحمه علمهالى وكنت بلعبها معاه



قالت "ناهد" بمرح وهي تنظر الى "مراد": "  
-ولا الحوجه ليك يا سى "مراد" خلاص معدتش هترجاج تلاعبنى شطرنج تانى  
ثم نظرت الى "مريم" قائله:  
-خلاص يبأ هطلعها بكرة من الدولاب وتوريني شطارتك .. بس خلى بالك حماتك  
جامدة أوى أنا بحذرك أهو  
ضحكت "مريم" قائله:  
-أكيد طبعا يا طنط مش هاجى جنب حضرتك حاجه  
نهض "مراد" فجأة وقال بوجوم:  
-تصبحوا على خير

خرج من الغرفة وتتبعته عيون الجميع باستثناء "مريم" .. نظرت "ناهد" الى  
"مريم" قائله:

-حبيبتى قومي شوفى جوزك ماله ..شكله مضايق من حاجه  
استثقلت "مريم" المهمة بشدة .. وودت لو قالت لها أن آخر شئ يريدُه ابنك الآن  
هو أن يرانى .. لكن ما باليد حيلة لا يمكن اخبارها بذلك .. سعدت "مريم" وهي  
تقدم رجلاً وتؤخر الأخرى .. طرقت "مريم" على الباب طرقات صغيرة .. ثم  
أتاها صوته أدناً اياها بالدخول .. فتحت الباب ببطء ودخلت على استحياء . كان  
"مراد" جالساً على فراشه ويدت ملامحه جامده .. دخلت وأغلقت الباب وجلست  
على الأريكة لا تدري ماذا تقول وماذا تفعل .. لحظات والتفت ينظر اليها قائلاً  
بعده:

-أولا شنطة هدومك بتعمل ايه جنب الدولاب  
نظرت الي حقيبتها ثم نظرت اليه قائله:  
-أمال أحطها فين ؟

قال ببرود:

-تفضى لنفسك مكان فى الدولاب وتحطى هدومك فيه .. لو ماما دخلت الأوضة  
وشافت شنطتك كده هتقول ايه  
أومات برأسها قائله باقتضاب:  
-حاضر هفضيها بكرة  
قال بتهكم:

-ثانياً الحجاب اللى انتى لبساه ده أسميه ايه بالظبط .. فى واحدة تلبس حجاب

فى بيت المفروض انه مفيهوش راجل الا جوزها  
شعرت بالتوتر وأشاحت بوجهها فقال بغلظة:

-بلاش تمثيل واقلى حجابك ده

نظرت "مريم" اليه بحده قائله:

-أنا مش بمثل

قال "مراد" بسخرية:

- عايزة تفهميني انك مكسوفه تقلعيه أدامى يعنى

أشاحت بوجهها وهى تحاول كظم غيظها فأكمل بغلظة:

-ثالثاً باه اذا كنتى فاكرة ان بقربك من ماما واخواتى ده ممكن يآثر عليا ويخلى

جوازنا يستمر تبقى غلطانه مش أنا اللى أتخط أدام الأمر الواقع

هبت واقفة وقالت:

-قصدك ايه ؟

وقف هو الآخر فى مواجهتها .. زاد فرق الطول بينهما من شعورها بضآلتها

أمامه .. كان كالأسد المهيمن على من حوله مجبراً اياهم على الخضوع لسطوته

.. قال بقسوة وهو ينظر الى أعماق عينيها:

-يعنى جوازى منك انقاذ للموقف بس .. مش أكثر من كدة .. ولا فى يوم من

الأيام هيكون أكثر من كدة .. مهما كان السلاح اللى هتستخدميه .. فمصيره

الفشل .. أنا ابتديت أفهمك كويس .. وأفهم انتى بتخطى لايه .. واللى فى دماغك

ده مش هيحصل ابدأ .. طلاقك أمر مفروغ منه .. بمجرد ما تيجي عمى وأتأكد

ان المشكلة اتحلت هتلمى هدومك وتسيبى البيت ده وتنسى انك دخلتية أصلاً

واجته "مريم" بنظراتها .. كان مصراً على اذلالها واشعارها بالمهانة فقالت له

بثقه:

- على فكرة اليوم اللى هطلق فيه منك وأسيب البيت ده هيكون يوم عيد بالنسبة

لى

قالت ذلك ثم غادرت الغرفة وأغلقت الباب خلفها بهدوء.

نزلت الدرج فقابلت "سارة" التى قالت لها:

-نزله ليه يا "مريم" .. عايزة حاجه

قالت "مريم" بتوتر:

-لا مفيش .. هروح المطبخ أشرب

ثم قالت:

-طنط و "نرمين" تحت ؟

ابتسمت "سارة" قائله:

-لأ طلعوا يناموا وأنا كمان طالعه أهو

ابتسمت "مريم" قائله:

-طيب يا حبيبتي تصبى على خير

-وانتى من أهل الخير

توجهت "مريم" للأسفل دخلت غرفة المعيشة التى لا ينيرها الا ضوء القمر المتسلل من الشرفة .. فتحت الشرفة وخرجت الى الحديقة ومشيت قليلاً ثم جلست على المقعد الذى جلست عليه فى الصباح .. أحاطت جسدها بذراعيها تلتمس الدفء .. لا تدري الى كم من الوقت بقيت جالسه هكذا دون حراك .. شعرت بالنعاس لكنها كرهت الصعود الى غرفة "مراد" والنوم أمامه .. تمددت على المقعد وتوسدت ذراعها وأحاطت نفسها جيداً بالشال وأغمضت عينيها واستسلمت للنوم.

استيقظ "مراد" على صوت منبه الموبايل منبهاً اياه لصلاة الفجر .. قام فلم يجد "مريم" على الأريكة فتوضأ وصلى .. هم بأن ينزل ليبحث عنها لكنه عزف عن ذلك .. فبالتأكيد اختارت النوم فى أى غرفة أخرى بالمنزل .. سيتركها اليوم تنام حيث تريد ثم سيلفت نظرها فى الصباح الى ضرورة النوم داخل الغرفة حتى لا يشك أحداً بأمرهما .. واستسلم للنوم مرة أخرى على فراشه الوثير.

\*\*\*\*\*

فى صباح اليوم التالى استيقظ "مراد" على صوت هاتفه .. رد على "طارق" قائلاً:

-السلام عليكم أيوة يا "طارق"

-وعليكم السلام .. انت نايم ولا ايه

قال "مراد" وهو يحاول أن يفيق:

-أيوة لسه صاحى

قال "طارق" بعجالة:

-طيب أنا هعدى عليك دلوقتى عشان فى ورق مهم لازم يتمضى قبل ما أطلع

على الجمارك

قال "مراد" وهو يجلس فى فراشه:

-طيب مستنيك

قام "مراد" ونظر الى الأريكة الفارغة والى الحقيبة التى مازالت بجوار الدولااب  
ثم زفر بضيق.

اتصل "طارق" بـ "مى" التى ردت قائله:

-السلام عليكم

قال "طارق" بلهفه:

-وعليكم السلام أخيراً فتحتى الموبايل

قالت بدهشة:

-مين معايا

-أنا "طارق" .. "طارق عبد العزيز"

خفق قلبها وشعرت بالتوتر وقالت :

-أيوة يا أستاذ "طارق"

-بكلمك بقالى يومين موبايلك مقفول حتى الشركة قالولى واخذه أجازة

قالت بصوت خافت:

-معلش كان عندى ظروف وكنت أفله الموبايل

قال "طارق": "

-مش خير ان شاء الله

-أيوة خير مفيش حاجة

قال "طارق" باهتمام:

-أنا بتصل بـ "مريم" كتير أوى بس موبايلها على طول مقفول

-أنا كمان بحاول كتير بس مش عارفة أوصلها

-طيب قوليلى اسمها بالكامل أنا ليا واحد صحبى من عيلة كبيرة فى الصعيد ..

أنا رايله دلوقتى وان شاء الله هيساعدنى أوصلها لاننا كمان محتاجينها فى

شغل مهم جداً خاص بشركتنا

-اسمها "مريم خيرى عبد الرحمن السمري"

ابتسم قائلاً:

-ما شاء الله حافظه اسم صحبتك رباعى

قالت بصوت خافت:

-احنا صحاب من زمان

ابتسم قائلاً:

-ربنا يخليكوا لبعض .. ومتشكر أوى

-العفو

فى الأسفل استيقظت "مريم" على صوت العصافير التى تغرد على الشجر .. قامت واعتدلت فى جلستها وهى تشعر بألم فى كل أنحاء جسدها وبوغز كالثوك فى حلقها ..وقفت بصعوبة وأحكمت لف الشال حولها .. توجهت الى شرفة غرفة المعيشة فوجدتها مغلقة فلم تستطع الدخول .. فدارت حول الفيلا لتدخل من الباب الأمامى .. وجدت "مراد" واقف مع رجل آخر فأخفضت بصرها .. لكنها عندما اقتربت منهما رفعت رأسها فإرتطمت نظراتها بنظرات "طارق" .. وقفت تحديق فيه بدهشة .. وبادلها هو الآخر نظراتها المندهشة التى كانت أضعاف دهشتها .. كان يبحث عنها فى كل مكان ولم يتخيل أن يجدها فى بيت صديقه .. وقف كلاهما ينظر الى الآخر فى دهشة و "مراد" يراقب نظرات الإثنان لبعضهما البعض .. لم ينطق "طارق" إلا بكلمة واحدة:

" -مريم! "

تمتت بصوت خافت:

-أهلا بحضرتك يا أستاذ "طارق"

اقترب "مراد" من "طارق" وقال وهو ينقل نظره من "مريم" اليه:

-انتوا تعرفوا بعض ؟

قال "طارق" مبتسماً وهو يشعر بالسعادة لعثوره عليها أخيراً:

-أيوة طبعاً .. دى الأنسة "مريم" الديزاينر بتاعة حملتنا

صدم "مراد" لما سمع والتفت بحدة ينظر الى "مريم" بدهشة .. اقترب

"طارق" من "مريم" قائلاً:

-كنتى فىن قلفتينى عليكى وموبايلك مقفول على طول .. حتى "مى" مش

عارفه توصلك

قالت بصوت مضطرب:

-كان عندى ظروف

ابتسم "طارق" قائلاً:

-المهم انك كويسه

بدا وكأنه انتبه لوجودها فى آخر مكان كان يتوقع أن يجدها فيه .. فقال

بإستغراب شديد:

-بس انتى بتعملى ايه هنا ؟

جاءت الإجابة من "مراد" الواقف خلفه:

-مراتى

التفت "طارق" الى "مراد" بحده وقال له:

-ايه ؟

ردد "مراد" ما قاله ببرود:

-مراتى

نظر "طارق" الى "مريم" وهو لا يصدق ما يسمع .. نظر اليها وكأنه يرجوها

أن تكذب ما قاله "مراد" .. كانا الرجلين ينظران الى "مريم" بدهشة ..

"طارق" مصدوم من كونها أصبحت زوجة لأعز أصدقائه .. و "مراد" مصدوم

من كونها ديزاينر حملته الإعلانية .. شعرت بالخجل من نظرات الرجلين اليها

فأخفضت بصرها وقالت بصوت خافت:

-عن اذنكوا

صعدت الدرج وهى لا تدرى أن الرجلين فى الأسفل كانت أعينهما متعلقتان بها

تتابعانها فى صمت.

الفصل الخامس عشر

ران الصمت عليهما وكل منهما يحاول استيعاب صدمته .. أول من فاق من صدمته هو "طارق" الذى التفت الى "مراد" ينظر اليه بحده وهو يقول:  
-انت مكنتش تعرف ان "مريم" ديزاينر حملتنا وانى بدور عليها ؟  
التفت اليه "مراد" الذى بدا شاردأ وقال له:  
-وهعرف منين انها الديزاينر اللي بندور عليها .. أنا معرفش هي بتشتغل ايه أصلاً .. ولا أعرف أى حاجه عنها  
نظر اليه "طارق" بحده وزفر وهو يحاول أن يكظم غيظه وقال:  
-انت قولتلى امبارح ان جوازك منها كان انقاذ للموقف وانك مستنى عمتك  
عشان تطلقها .. مش كدة ؟  
أوما "مراد" برأسه بصمت .. فانفعل "طارق" قائلاً:  
-حرام عليك يا "مراد" حرام عليك  
نظر اليه "مراد" بدهشة .. فأكمل "طارق" بغضب:  
-يعنى حضرتك متجوزها عشان تقضيلك معاها يومين وبعدين ترميها وتطلقها  
اتقى الله يا "مراد" ترضى يحصل لواحد من اخواتك كده .. أى ان كان سبب  
جوازك منها حرام تطلقها وتتحسب عليها جوازه  
نظر اليه "مراد" بغضب وقال:  
-ايه اللي انت بتقوله ده .. انت فاهم الموضوع غلط يا "طارق" .. أنا قولتلك  
امبارح انى اضطريت أتجوزها عشان الدم اللي كان هيسيل .. وأنا مش معتبرها  
مراى اصلاً دى مجرد واحدة أعده فترة مؤقتة وهتمشى تروح لحالها وأنا  
معرفها كدة ومتفق معاها على كدة يعنى مخدعتش حد  
صمت "طارق" وهو يفكر فى كلام "مراد" ثم قال:  
-يعنى هي عارفه انك هتطلقها ؟  
قال "مراد" بحده:  
-ايوة طبعا عارفه وده كان اتفاقى مع عمتو من الأول أكتب عليها عشان  
المشاكل مش أكثر من كده  
-تقصد انكوا عايشين منفصلين ؟  
قال "مراد" بحده:  
-ايوة أنا مش طايق أشوفها أصلاً .. كل اللي حصل انى كتبت عليها وجبتها هنا

لحد ما عمتو تتأكد ان الأمور هديت ساعتها هطلقها  
هدأ "طارق" قليلاً .. فتفرس فيه "مراد" قائلاً:  
-وانت ايه يهملك أصلاً فى الموضوع ده .. مالك انت أظلمها لا مظلمهاش  
حاول "طارق" التحكم فى أعصابه وقال ببرود:  
-لانى اتعاملت معاها كتير فى الشغل والبنيت كويسة جداً فصعب عليا انها تتظلم  
كده بس بعد ما انت شرحت الوضع .. فكده الموضوع أهون شوية  
نظر اليه "مراد" وقال باهتمام:  
-انت تعرف ايه عنها بالظبط ؟  
نظر "طارق" الى ساعته ثم قال ببرود:  
-أنا مضطر أمشى دلوقتى عشان الحق الجمارك  
لم ينتظر رداً من "مراد" وتوجه الى سيارته وانطلق بها تحت نظرات "مراد"  
المتمعنه.

انطلق "طارق" بسيارته بعصبيه وهو يشعر بغضب كبير بداخله لتلك العادات  
المتخلفة التى أجبرت "مريم" على الزواج من "مراد" .. "مراد" الذى يعلم  
جيداً بالظروف النفسية العصبية التى مر بها والتى ستجعله بالتأكد أن يكون  
قاسياً مع "مريم" ضرب المقود بيده بعصبيه وهو يتخيل المعاناة التى تشعر بها  
"مريم" فى بيت "مراد" الذى من الواضح من كلامه عنها أمس واليوم أنه لا  
يطيق وجودها فى حياته

توجهت "مريم" الى غرفتها وهى تشعر بالدوار .. لحظات وسمعت طرقات على  
الباب فتحت لتجد "سارة" مبتسمه وهى تقول:  
-صباح الخير يا "مريم" يلا عشان ناطر سوا  
ابتسمت "مريم" بتعب وقالت:  
-ماشى هغير هدومى وأنزل  
نظرت "سارة" باستغراب الى ملابس "مريم" والتى كانت نفس ما ارتدته ليلة  
أمس .. فقالت بدهشة:  
-انتى نمتى كده

قالت "مريم" بإضطراب وهى تحاول تجنب الكذب:  
-كنت الصبح فى الجينية



أومات "سارة" برأسها قائله وهى تنصرف:

-خلاص منتظرينك ان شاء الله

بدلت "مريم" ملابسها بصعوبة وهى تشعر بالوهن فى كل عضلة فى جسدها ..  
توضأت وصلت الفجر الذى فاتها وهى تشعر بالضيق الشديد لأنها لم تصلية فى  
ميعاده ..لم ترتدى حجابها لنلا تسمع تعنيفاً آخر من "مراد" .. عقصت شعرها  
للخلف وارتدت عباءة استقبال محتشمة .. فتحت الباب لتخرج لكنها فزعت  
عندما وجدت "مراد" أمامها كان يهم بطرق الباب .. ابتعدت لتفسح له الطريق  
للدخول .. همت بالخروج من الغرفة لكن "مراد" قال لها بحزم:  
-استنى عايزك

أغلقت الباب ووقفت خلفه ..وقف "مراد" فى مواجهتها وهو يتفحص وجهها  
شعرت بالخجل فأشاحت بوجهها الى أن قال:  
-انتى تعرفى "طارق" من زمان ؟

قالت "مريم" بهدوء:

-أستاذ "طارق" عميل فى شركتنا

-شركة ايه ؟

-اسمها رؤية للدعاية والإعلان

صمت "مراد" وهو مازال ينظر اليها بإمعان .. ثم قال:

-كنتى عارفه ان الحملة اللى انتى مسكاها هى حملة شركتى ؟

نظرت اليه "مريم" بدهشة وقالت:

-حملة شركتك ؟ .. لا معرفش أنا افكرتها شركة أستاذ "طارق"

أخجلها تفحصه فيها فأشاحت بوجهها مرة أخرى وقالت بإرتباك:

-أنا هنزل عشان مستيينى تحت

قال ببرود:

-اتفضلى

خرجت من الغرفة وتبعها "مراد" .. توجهت الى حجرة الطعام وجلس كل منهما  
فى مكانه .. ابتسمت "مريم" قائله:

-صباح الخير

قالت "ناهد" بمرح:

-صباح النور .. النهاردة صحيتى بدرى

قالت "مريم" وهى تشعر بوخز كالإبر فى حلقها:  
-أنا متعودة أصحى بدرى .. بس امبارح اتأخرت لانى كنت تعبانه من السفر  
قالت "سارة" التى كانت تجلس فى مواجهتها بمرح:  
-قوليلي صحيح يا "مريم" انتى بتشتغلى  
ابتسمت "مريم" قائله:  
-أيوة بشتغل ديزاينر فى شركة دعاية  
قالت "ناهد":

-بتعرفى ترسمى كويس ؟  
-أيوة يا طنط

قالت "ناهد" بمرح:  
-كويس أوى عشان ترسميني  
قالت "مريم" بتوتر:  
-معلش يا طنط أنا أسفه مش برسم أشخاص أو أى حاجه فيها روح  
قالت "ناهد" بهدوء:  
-ليه ؟

أجابت "مريم": "  
-عشان حرام .. رسم حاجه فيها روح حرام  
ألقي "مراد" نظرة عليها ثم عاد يكمل طعامه بصمت .. ابتسمت "ناهد" قائله:  
-مكنتش أعرف انه حرام  
قالت "مريم" بأسى:  
-اوعى تكونى زعلتى منى يا طنط  
طمأنتها "ناهد" قائله:

-لا يا حبيبتي أبداً .. انتى صح .. طالما حرام يباه ربنا يباركلك انك مبتعمليهوش  
عادت "مريم" لتكمل طعامها عندنا قالت "نرمين": "  
-انسى بأه موضوع الشغل ده خالص لان "مراد" مستحيل يسمحك انك  
تشتغلى  
قالت "ناهد": "

-دى حاجة متخصصكيش يا "نرمين"  
بدا "مراد" لا مبالياً وكان الحوار الدائر لا يعنيه فقالت "مريم" بهدوء:

-أنا اتفقت مع مديري انى أشتغل عن طريق النت ويحولى مرتبى على البنك  
يعنى مش محتاجة أروح الشركة  
نهض "مراد" وقال:  
-أستاذن أنا عشان اتأخرت  
رحل دون أن يلتفت ل "مريم" التى كانت "ناهد" ترمقها بأسى وهى تشعر  
بالحنق من معاملة ابنها لزوجته.

\*\*\*\*\*

لم يستطع "مراد" التركيز على عمله .. كانت هناك أسئلة كثيرة تشغل باله  
لخصوص "مريم" .. اتصل بـ "طارق" وأخبره بضرورة الحضور الى مكتبه ..  
بعد عدة ساعات حضر "طارق" الذى بدا عليه الوجوم جلس قبالة "مراد" دون  
أن يوجه له كلمة .. سأله "مراد": "  
-ايه الأخبار  
-كله تمام الحاجة فى الطريق  
-أوما "مريم" برأسه وقام ودار حول المكتب ليجلس فى المقعد المواجه لـ  
"طارق" .. نظر اليه قائلاً:  
-انت اتعاملت مع "مريم" كتير ؟  
قال له "طارق" بحده:  
-مش فاهم السؤال  
قال "مراد" ببرود:  
-أقصد كنت بتشوفها كتير لما بتروح الشركة  
قال "طارق" بهدوء:  
-تعاملى كان معاها هى بس يا "مراد" يعنى مكنتش بتعامل فى الشركة مع حد  
غيرها لانها المسؤلة عن شغلنا  
-أوما "مراد" برأسه ثم نظر اليه قائلاً:  
-متعرفش عنها حاجه .. يعنى أمور شخصية  
قال له "طارق" بنفاذ صبر:  
-لأ معرفش

ثم نهض قائلاً أنا مضطر أمشى دلوقتي عشان عندي معاد مهم  
خرج "طارق" وترك "مراد" غارقاً في شروده

\*\*\*\*\*

كانت "مريم" تشعر خلال النهار بتعب شديد لكنها كعادتها كانت تتظاهر  
بالتماسك .. ظنت أنه برد من نومها ليلة أمس في الحديقة طلبت من دادة  
"أمينة" دواء للبرد أخذته وأمضت نهارها بصحبة "سارة" و "نرمين" .. أما  
"ناهد" فقد خرجت في ذلك اليوم لزيارة أختها .. في المساء كان التعب قد أخذ  
منها مبلغه توجهت الى دادة "أمينة" مرة أخرى وأخذت منها دواء للبرد مرة  
أخرى .. ثم توجهت الى الفتاتان في غرفة المعيشة قائله:  
-أنا هطلع أنام يا بنات .. تصبحوا على خير

هتفت "سارة": "

-هتنامي بدرى كدة

قالت "مريم" بوهن:

-أيوة معلش .. هشوفكوا بكرة ان شاء الله

قالت "سارة" باهتمام:

-طيب مش هتتعشى ؟ .. لو مش عايزة تستنى "مراد" خلاص نتعشى سوا أنا  
وانتى و "نرمين"

قالت "مريم" وهى بالكاد تستطيع الوقوف على قدميها:

-لا مليش نفس .. تصبحوا على خير

-وانتى من أهل الخير

توجهت "مريم" الى غرفة "مراد" .. حاولت أن تستبدل ملابسها بملابس أكثر  
راحة لكن أقل حركة كانت تشعرها بالألم الشديد فنامت كما هى على الأريكة  
ودثرت نفسها جيداً واستسلمت للنوم العميق

قالت "سارة" ل "نرمين" بعتاب:

-ليه حساكي بارده مع "مريم" ؟

التفتت اليها "نرمين" التى كانت تعبت بهاتفها قائله:

-مش بارده ولا حاجه

أصرت "سارة": "

-لا بارده

قالت "نرمين" بنفاذ صبر:

-بصراحة حساها خنيقة أوى .. مشفتيش لبسها عامل ازاي .. فى عروسة

جديدة تلبس اللي هي لابساه ده

قالت "سارة" بحدده:

-وانتى مالك هو انتى جوزها .. هى حرة .. وبعدين يمكن عشان لسه مخدتش

علينا وهى أصلاً شكلها بتتكسف

هزت "نرمين" كتفيها بلا مبالاة قائله:

-هى حرة على رأيك أنا مش جوزها

قالت "سارة": "

-ابقى اتعاملى معاها كويس يا "نرمين" .. حرام دى يتيمة وكمان طيبة أوى

قالت "نرمين": "

-طيب مع انى حساها جد أوى وكئيبة أوى زيادة عن اللزوم وأنا بتخفق من كده

أوى

قالت "سارة" بعتاب:

-والله حرام عليكى دى عسولة أوى

قالت "نرمين" بتهكم:

-يختى مالك طالعه بيها السما كده .. أنا شايفها عادية جدا مش عارفه "مراد"

أعجب بيها ليه .. ده ان كان أعجب بيها اصلا .. بصراحة هى وأخوكى لايقين

على بعض الاتنين عينة واحدة

قالت ذلك ثم نهضت وتوجهت الى غرفتها وأغلقت الباب جيداً وجلست على

فراشها وهى تنظر الى صورة "حامد" على هاتفها وتبتسم لها.

\*\*\*\*\*

عاد "مراد" فى المساء وجلس على طاولة الطعام مع "ناهد" و " سارة" و

"نرمين" .. بدأ الجميع فى تناول الطعام .. قالت "ناهد": "

-خالتك زعلانه منك أوى يا "مراد" عشان مبتسألش عليها انت والبنات  
نظر اليها "مراد" قائلاً:

-خلاص تعالوا نروحلها آخر الإسبوع ونقضى اليوم معاها  
قالت "ناهد": "

-أنا فعلاً اتفقت معاها على كده و كمان عشان تتعرف على "مريم"  
حانت من "مراد" التفاته الى المقعد الفارغ بجواره .. ثم عاد ليكمل طعامه مرة  
أخرى .. قالت "نرمين": "

-أبيه نفسنا نخرج .. ما تاخودنا بكرة أى حتة  
قالت "ناهد" بسرعة:

-أيوه يا "مراد" ياريت تفضى نفسك يوم ونطلع كلنا أى مكان بصراحة أنا  
كمان عايضة أغير جو

أوماً "مراد" برأسه قائلاً:

-ان شاء الله أحاول أفضى نفسي يوم الإسبوع ده أو الاسبوع الجاي  
قالت "سارة" بمرح:

-كويس أوى .. بحب أوى الخروجة اللي بنكون فيها كلنا مع بعض  
نظرت اليها "نرمين" بغيظ قائله:

-على أساس اننا بنخرج لوحدها يعني .. فالتغيير اننا نخرج مع بعض  
حانت من "مراد" التفاته أخرى الى المقعد الفارغ بجواره .. ثم سأل وهو يتناول  
طعامه وكان الأمر لا يعنيه:

-هى "مريم" فين ؟

قالت "ناهد": "

-رجعت لقيت البنات بيقولولى انها نامت بدرى النهاردة

أوماً برأسه ونهض قائلاً:

-انا داخل المكتب شوية

قالت "ناهد": "

-ماشى يا حبيبي

رحل "مراد" فالتفتت اليهم "نرمين" قائله بسخريه:

-ده حالهم ولسه مكملوش اسبوع جواز آمال بعد سنة هيحصل ايه

قالت "ناهد" بنبرة محذرة:

"-نرمين" لو سمحتى متدخليش فى خصوصيات "مراد"

دخل "مراد" مكتبه وحمل أحد الكتب من المكتبة ثم توجه الى أحد المقاعد الوثيرة وأخذ يقرأ الى أن سرقه الوقت .. بعد عدة ساعات توجه الى غرفته .. طرق على الباب بخفة ثم فتحه ببطء .. استطاع أن يرى "مريم" فى ظلام الغرفة نائمة على الأريكة متدثرة بغطائها .. دخل وأغلق الباب بدل ملابسهم وهم بأن يتوجه الى فراشه عندما سمع صوت أنين .. التفت الى "مريم" فوجدها تأن بصوت خافت وبدت ملامحها كما لو كانت تعاني من خطب ما .. اقترب منها فرأى حبات العرق تنبت على جبينها سمعها تهمس بشئ ما .. فاقترب منها قائلاً :

-بتقولى حاجه

فتحت عينيها بصعوبة شديدة بدت وكأنها فى عالم آخر تمتمت بصوت متحشرج :

-عايزة "ماجد"

اقترب "مراد" منها أكثر وأرهمف سمعه قائلاً:

-بتقولى ايه ؟

أغمضت عينيها قليلاً ثم فتحتها ببطء ونظرت اليه تتطلع الى وجهه قائله

بصوت مبجوح:

-انت "ماجد" ؟

سألها باهتمام:

"-ماجد" مين ؟

أبعدت وجهها واستسلمت للنوم مرة أخرى .. وضع "مراد" يده على جبينها ووجهها ليجد حرارتها مرتفعة للغاية .. حاول ايقاظها:

"-مريم" .. "مريم"

التفتت اليه ببطء وبدا وكأنها لا تستطيع فتح عينيها .. نزل مسرعاً الى الأسفل ونادى دادة "أمينة" وأخبرها بأن حرارة "مريم" مرتفعة توجهت معه الى غرفتها وتحسستها ثم قالت:

-يا حبيبتي دى قايدة نار .. شكلها خدت دور جامد .. انا افكرته برد عادى لما

طلبت منى الدوا

قال لها "مراد" بـاهتمام وهو يلقي نظرة على "مريم": "

-هى طلبت منك دوا

قالت "أمينة" بأسى:

-أيوة قالتلى جسمها واجعها وخذت برد فادتلها دوا أنفلونزا .. لو كانت قالتلى

حرارتها عاليه كنت ادتلها خافض حرارة كمان

توجه "مراد" الى هاتفه واتصل بأحد الأرقام .. لم يجب فعاود الاتصال مرات

ومرات الى أن أجاب الطرف الآخر:

-ألو

قال "مراد" بـاهتمام:

-أيوة يا "أحمد" أنا "مراد"

قال "أحمد" بصوت ناعس:

-أيوة يا "مراد" خير فى حاجة خالتى والبنات كويسين

-أيوة بس مراتى تعبانة شوية حرارتها مرتفعة جداً ومش عارف أعمل ايه

قال "أحمد" وقد أفاق:

-طيب متقلقش أنا هلبس وأجيلك حالاً

جلست "أمينة" بجوار "مريم" تقوم بعمل كمادات لها عليها تخفض حرارتها ..

كانت "مريم" مازالت فى عالم آخر لا تعى ما يدور حولها .. قالت "أمينة": "

-هروح أعملها كوباية لمون دافيه وآجى

توجهت للأسفل .. كانت "مريم" تتمتم بكلمات غير مفهومة .. اقترب منها

متفحصاً اياها .. سمعها تقول:

"-ماجد" .. "ماجد"

ظلت تردد الإسم كل فترة وأخرى .. الى أن حضر "أحمد" ابن أخت "ناهد" .. "

فاستيقظت "ناهد" على صوت سيارته .. نظرت "ناهد" الى "مريم" بعطف

واقتربت منها لتتحسس وجهها وقالت:

-دى سخنة أوى

أخرج "أحمد" سماعته واقترب منها متفحصاً اياها .. وجد "مراد" نفسه وقد

شعر بالضيق عندما تكشف جزء من جسدها ليستطيع "أحمد" وضع سماعتها

ليتفحص رنتيها .. تعجب من هذا الشعور الذى راوده وهو الذى لا يهमे أمرها

على الإطلاق ويعتبرها مجرد ضيفة فى بيته .. قال "أحمد": "



-شكلها خدت برد جامد .. عايزكوا تحطوها زى ما هي كده تحت الدش عشان  
الحرارة تنزل شوية  
وأخذ يكتب الأدوية المطلوبه وأعطى الروشته الى "مراد" وأخرج حقنة من  
حقيبه قائلاً:

-الدوا ده تاخده هو والحقنة دي وان شاء الله الصبح هتكون أحسن  
شكره "مراد" وتوجه معه الى سيارته مودعاً .. ثم اتصل "مراد" بالصيدلية  
وطلب منهم احضار الدواء .. عاد الى الغرفة ليجد "أمينة" و "ناهد" قد أخذتا  
"مريم" ووضعها تحت الدش كما أمرهم الطبيب عادا بها الى الداخل وشرعت  
"ناهد" فى تغيير ملابسها فإلتفتت "ناهد" له قائله:  
-ساعدنى يا "مراد"

فتنح "مراد" وقال وهو يغادر الغرفة مسرعاً:

-هروح أشوف الدواء

بعد نصف ساعة تسلم "مراد" الدواء وصعد به الى غرفته ليجد "ناهد" جالسه  
بجوار "مريم" النائمة فى فراشه وتحتسى شيئاً ساخناً .. أخرج الدواء وقرأ  
الروشته ثم التفت الى أمه وأعطها التعليمات .. قالت "مريم" وهى تشعر  
بالحرج لوجودها فى فراش "مراد":

-أنا أسفه يا طنط تعبتك معايا

ابتست لها "ناهد" قائله:

-لأ أبدأ يا حبيبتي لا تعب ولا حاجه بس قلقتينا عليكى أوى ليه مقولتيش انك  
تعبانه

تمتمت "مريم" بصوت خافت:

-أنا قولت شوية برد وخلص

أعطتها "ناهد" الدواء .. ثم نهضت قائله:

-الحمد لله شكل الحقنة ريحك كثير .. نامى واتدفى وان شاء الله تكونى بكرة

أحسن .. لو احتجتى حاجه خلى "مراد" يناديلى

قالت "مريم" بتأثر:

-شكراً يا طنط

خرجت "ناهد" من الغرفة وتابعتها "مريم" بنظرها الى أن أغلقت الباب خلفها  
فأسرعت "مريم" بإزاحة الغطاء ونهضت من الفراش تحت أنظار "مراد" التى

تراقبها وأخذت أحد الأغطية ووسادة فقال لها "مراد: "  
-مفيش مشكلة خليكى نايمه هنا النهاردة

لم ترد "مريم" ولم تلتفت اليه وتوجهت الى الأريكة ونامت عليها ودثرت نفسها  
وأشاحت بوجهها عنه .. جلس "مراد" على فراشه يتطلع اليها بين الحين  
والآخر .. الى أن شعر بأنها استسلمت للنوم .. فتمدد على فراشه وظل يفكر فى  
صاحب الإسم الذى كانت تتفوه به أثناء مرضها الى أن شعر بالإرهاق فألقى  
نظرة عليها قبل أن يستسلم للنوم هو الآخر.

\*\*\*\*\*

استيقظ "مراد" من نومه فجراً كعادته أطفأ المنبه وما كادت قدماه تطأن الأرض  
حتى وقع نظره على "مريم" الساجدة فى أحد أركان الغرفة .. ظل ينظر اليها  
للحظات ثم توجه الى الحمام توضاً وخرج ليجدها وقد أنهت صلاتها وتوجهت  
الى الأريكة لتعاود النوم .. ألقى عليها نظرة قبل أن يخرج .. صلى فى أحد  
المساجد القريبه وعاد ليجدها تغط فى النوم .. جلس على فراشه وظل يتأملها  
بإستغراب .. شعر بأن هذه الفتاة كالغز الذى يكبر كل يوم شيئاً فشيئاً .. نفض  
تلك الأفكار من رأسه واستسلم للنوم.

فى الصباح استيقظ "مراد" على صوت الباب وهو يُغلق .. نهض وهو يلقى  
نظرة على الأريكة الفارغة .. نزلت "مريم" لتجد "ناهد" و "سارة" جالستان  
معا أمام التلفاز .. قامت "سارة" وتوجهت نحوها قائلة بلهفة:  
" -مريم" عاملة

قالت "ناهد" بإهتمام:

-قمتى ليه يا حبيبتي خليكى مرتاحه النهاردة  
ابتسمت "مريم" وقد سعدت لهذا الإهتمام منهما:  
-الحمد لله أنا كويسة جداً

ثم التفتت الى "ناهد" وقالت بتأثر:

-متشكره جدا يا طنط على تعبك معايا امبارح

أشارت لها "ناهد" لتجلس بجوارها .. ربتت على ظهرها قائلة:

-انتى دلوقتى عندى زى "نرمين" و "سارة" بالظبط فمتقوليش كده تانى

قالت "سارة" وهي تنصرف:

-هقول لدادة تحضرلك الفطار

التقت بـ "مراد" الذى كان متوجهاً اليهم فقالت له مبتسمة:

-صباح الخير يا أبيه كويس انك صحيت عشان "مريم" متفطرش لوحدها

قال "مراد": "

-صباح النور يا "سارة" .. هي فين ؟

أشارت "سارة" الى غرفة المعيشة وقالت:

-مع ماما بتتفرج على التى فى

دخل "مراد" الغرفة قائلاً:

-صباح الخير

ابتسمت له "ناهد" قائله:

-صباح النور يا "مراد"

ألقى "مراد" نظرة على "مريم" التى بدت أفضل حالاً قبل أن يجلس على أحد

المقاعد .. لم تلتفت اليه "مريم" وظلت تتظاهر بمتابعتها للتلفاز .. قالت "ناهد"

فجأة وهي تضحك:

-ايه ده "مراد" ملبسك الدبلة فى اليمين

اضطربت "مريم" وهي تنظر الى دبلتها .. تطلع "مراد" الى يدها فى صمت ..

قامت "ناهد" بنزع الدبلة من يدها اليمنى ووضعتها فى اليسرى قائله بمرح:

-أيوة كدة بدل ما الناس تضحك علينا

شعرت "مريم" بالتوتر وهي ترمق دبلتها التى أصبحت فى يدها اليسرى ..

دقائق وحضرت "سارة" لتخبرهما بأن فطورهما معداً .. قالت "مريم" وهي

تشعر بالضيق:

-أنا شبعانه على فكرة .. شوية ولو جعت هاكل

قالت "ناهد" بإصرار:

-لا يا حبيبتي انتى تعبانه وبتاخدى دوا تعالى على نفسك معلى .. وبعدين

"مراد" هيفطر معاكى عشان يفتح نفسك للأكل

سخرت "مريم" فى نفسها .. واضطرت مرغمة للتوجه خلفه الى غرفة الطعام ..

ران عليهما الصمت .. الى أن قطعه "مراد" فجأة:

-انتى مش المفروض كنتى متجوزة ؟

صمتت "مريم" قليلاً ثم قالت دون أن تنظر اليه:

-كان مكتوب كتابي

طال صمته وبدا عليه التفكير .. ثم قال فجأة :

-مين "ماجد" ؟

خفق قلب "مريم" بشدة وهي تنظر اليه بدهشة .. فنظر اليها قائلاً ببرود:

-كنتى امبارح عماله تقولى اسمه طول الليل

توترت "مريم" وعادت الى اكمال طعامها دون ان تجيب .. فأعاد سؤاله بتهكم:

-مين "ماجد" ؟ .. ويا ترى ده قبل "جمال" ولا بعده ؟ .. مظنش انه بعده

ملحقتيش يا دوبك عرفتى "جمال" من هنا واتدبستى فيا من هنا

نظرت اليه "مريم" وقالت بتحدى:

-وهتفرق معاك ايه عرفته قبل "جمال" ولا بعد "جمال" .. ولا حتى عرفته

وأنا عارفه "جمال" .. ما هو اللي معندهاش أخلاق لدرجة انها تسمح لنفسها

انها تعمل علاقة مع راجل غريب مش هيفرق معاها لو عملت علاقة مع راجلين

فى نفس الوقت

ثم نهضت بعصبية وفتحت باب الشرفة ووقفت فيها .. كانت تغلى من الغضب ..

ظل جالساً فى مكانه للحظات ثم توجه الى الخارج .. نظرت اليه "مريم" و هو

يفتح باب سيارته ويهم بالركوب .. حانت منه التفاته فتلاقت نظراتهما للحظات

قبل أن تتوجه "مريم" الى الداخل.

\*\*\*\*\*

-وحشتيني ونفسى أشوفك

تسللت تلك العبارة عبر الهاتف الى أذن "نرمين" فردت بضيق:

-أنا مش فاهمة انت عايز ايه بالظبط

قال "حامد" بهيام:

-نفسى أشوفك تانى يا "نرمين" بجد وحشتيني

قالت "نرمين" بحده:

-انت مش شايف ان الحكاية سخفت أوى .. قولتلى عايز أقابلك مرة عشان

مخرجش نفسي مع أخوكى .. وقابلتك رغم ان دى أول مرة أعمل حاجه زى كده

وبجد انت مش متصور أنا حسه بايه دلوقتي .. حسه انى مضايقة أوى من نفسي

قال "حامد" ببرود:

-انت معملتيش حاجه غلط احنا أعدنا فى مكان عام حتى مطولناش

قالت "نرمين" بضيق:

-بس أنا مش كده .. أنا مش بقابل حد ومش يتكلم مع حد .. ولو "مراد" عرف

انت مش متصور ممكن يعمل فيا ايه .. انت متعرفش "مراد"

قال "حامد" بسخرية:

-لا عارفه كويس .. عقليه متخلفة

قالت "نرمين" بغضب:

-لو سمحت مسمحكش تقول على أخويا كده .. "مراد" مش متخلف "مراد"

راجل وبيخاف علينا

قال "حامد" بسرعة:

-حبيبتي أنا مش قصدى أنا بس من ضيقي قولت كده

قالت "نرمين" بحزم:

-بص يا "حامد" .. أنا مش هقدر أتكلم معاك فى التليفون تانى .. لو انت فعلاً

زى ما بتقول عايز تتقدملى خلاص عندك أخويا اتكلم معاه

قال "حامد": "

-طيب عايز أطلب منك طلب واحد بس

-ايه هو

-انتى عندك ايميل ؟

قالت وهى تشعر برييه:

-أيوة

قال "حامد": "

-طيب تعالى نتكلم على الميل وافتحى الكام

قالت "نرمين" بعصبية:

-لا مش هفتح الكام ومش هكلمك على الميل

قال "حامد" بإصرار:

-عشان خاطرى مرة واحدة بس

قالت "نرمين" فى حنق:  
-قولت لأ .. ومعلش لو سمحت مضطرة أقفل  
أنهى "حامد" المكالمة و قد اغتاض مما فعلت فتمتم لنفسه:  
-مش "حامد" اللى يتقاله لأ

\*\*\*\*\*

جلس "طارق" واجماً فى مكتبه .. يشعر بالحزن والأسى .. يحاول أن يبحث عن  
مخرج لـ "مريم" من تلك الورطة .. امتدت يده الى هاتفه واتصل بـ "مى .."  
اضطربت "مى" عندما رأت رقمه وخرجت من غرفتها وتوجهت الى أمها فى  
المطبخ وقالت:

-ماما أستاذ "طارق" بيتصل

التفتت لها أمها وقالت :

-طيب ردى عليه

وقبل أن تتحدث "مى" أخذت منها أمها الهاتف وردت بدلاً منها أمام نظرات  
"مى" المندهشة:

-السلام عليكم

رد "طارق" بإستغراب:

-وعليكم السلام .. ممكن أكلم الآنسه "مى"

قالت أمها:

-حضرتك الأستاذ "طارق" مش كده ؟ .. أنا مامتها

قال "طارق" بحرج:

-أهلا بحضرتك

قالت والدة "مى": "

-لحظة واحدة

أعطت الهاتف لـ "مى" المندهشة فقالت:

-ألو

قال "طارق": "

-أيوة يا آنسه "مى" .. آسف لو كنت أز عجتك

-لا افضل

قال بحزن:

-انا عرفت مكان "مريم" وحببت أطمئنك عليها

قالت "مى" بلهفة:

-هى فين ؟

-هى فى مشكلة وبما انك صحبتها فأكيد محتجاكى جنبها أنا مش هقولك على

تفاصيل هسيبها هى تحكيك .. بس أرجوكى خليكي جنبها .. ده رقم البيت اللى

هيا فيه.....

دونت "مى" الرقم وشكرته قائله:

-متشكره أوى

تمتم بخفوت:

-العفو .. خلى بالك منها .. مع السلامه

أنهت "مى" المكالمه ونظرت الى أمها قائله بإستغراب:

-انتى ليه رديتي قبلى ؟

قالت أمها وهى تحضر الطعام:

-عشان يعرف انك مبتخبيش حاجه عن أهلك وبتقوليلهم كل حاجه مهما كانت

صغيره

ابتسمت "مى" فقالت أمها:

-كلمى "مريم" بأه وطمينى عليها عشان البننت دى قلقانى أوى

اتصلت "مى" الرقم الذى أعطاها اياه "طارق" جاءها صوت أنثوى يقول:

-ألو

قالت "مى": "

-السلام عليكم .. لو سمحتى ممكن أكلم "مريم"

-طيب ثوانى

لحظات وردت "مريم" على الهاتف وهى تشعر بالريبة فهتفت "مى": "

-انتى فين يا بنتى كنت هموت من القلق عليكى

قالت "مريم" بإستغراب:

-عرفتى رقم البيت ده منين

قالت "مى: "

-من الاستاذ "طارق "

قالت "مريم" بدهشة:

-واداهولك ليه

قالت "مى: "

-قالى انك فى مشكلة ومحتجاني جميعك .. خير يا "مريم" طمنيني عليكى

قالت "مريم" بأسى:

-مش هعرف أكلمك دلوقتي يا "مى" ولا حتى هعرف أشوفك مع انك وحشاني

أوى .. بالليل ان شاء الله هنتكلم سوا براحتنا هفتح موبايلي وأتصل بيكي على

موبايلك ماشى ؟

تمتت "مى: "

-ماشى يا حبيبتي منتظرة اتصالك

\*\*\*\*\*

" -بهيرة" يا "مراد"

تفوه "سباعى" بهذه العبارة عبر الهاتف فقال "مراد: "

-ملها عمتو

صاح "سباعى" بغضب:

-مصره تسافرلك بكرة على مصر .. والدكاتره منعينها من أجل حركة خد كلمها

اهى يمكن تسمع كلامك

قالت "بهيرة" بصوت متعب:

-اييوه يا "مراد" يا ولدى

قال "مراد" بقلق:

-انتى عاملة ايه دلوقتي يا عمتو

قالت بضعف:

-امنيحه يا ولدى امنيحه جوى وان شاء الله بكره هكون عندك فى مصر

قال "مراد" بإصرار:

-عمتو متجيش الا لما الدكاتره يسمحولك بالسفر ولما يسمحولك أنا بنفسى



هاجى آخذك

-لازمن آجى يا ولى فى حاجات كتير لازمن أعملها

قال "مراد": "

-كل حاجة تتأجل عشان صحتك يا عمتو .. وأى حاجة محتجاها تتعمل هنا

قوليلى وأنا اعملها

قالت "بهيرة" بصوت ضعيف:

-كيفها "مريم" امنيحة يا ولى؟

تمتم "مراد": "

-أيوه كويسة

قالت "بهيرة": "

-خلى بالك منيها .. البنية مظلوكه .. ولد عمك هو اللى افترى عليهايا ولى

متصدجش كلام "جمال" .. دى حكاية جديمة هبجى أحكيلك عليها لما آجى

وأتكلم مع "مريم" .. أهم حاجة عندى دلوجيت متظلمش البنيه الظلم وحش يا

ولى وأخرته سوده اسألنى أنى

قال "مراد" بضيق:

-مش فاهم ليه انتى الوحيدة اللى مقتنعه انها مظلومة على الرغم من ان فى

شهود وعلى الرغم من كلام "جمال" نفسه

قالت "بهيرة" بحزم:

-آنى حلفتها تجولى الحج وجالتلى انها مظلومة

قال "مراد" ساخراً:

-قالوا للحرامى احلف

قالت "بهيرة" بحدة:

-آنى مش بنت امبارح يا "مراد" آنى أعرف امنيح اذا كان اللى جدامى بيكذب

عليا ولا بيحول الحج

ثم تتمت بضعف:

-آنى هجفل دلوجيت يا ولى وهبجى أكلمك بعدين

قال "مراد" بقلق:

-انتى كويسه يا عمتو

قالت وهى تجاهد ليخرج صوتها متوازناً:

-ايوة امنيحه .. لو مش عايزنى آجى الا لما صحتى تتحسن يبجى تخلى بالك من  
"مريم" امنيح وتحطها جوه عنيك .. سامعنى يا ولدى  
قال "مراد" ببرود:  
-متقلقيش يا عمتو هى كويسة ومش بتأخر عنها فى حاجه  
-ربنا يبارك فيك يا ولدى .. فى حفظ الله .. أشوفك بخير

\*\*\*\*\*

فتح "سامر" باب بيته وأشار الى "سهى" قائلاً ك  
-منورة البيت اتفضلى  
دخلت "سهى" البيت وهى تبتم بتوتر .. أشار "سامر" الى أحد الأرائك قائلاً:  
-ادخلى يا بنتى مالك متخشبة كده  
دخلت "سهى" وجلست .. ذهب "سامر" الى المطبخ وأحضر كوبين عصير ..  
وجلس بجوارها قائلاً:  
-ياه أخيراً مخك لان ورضيتي تيجي  
قالت "سهى" بتوتر:  
-بصراحة أنا كنت مرعوبة كنت خايفة ان حد يشوفنى وأنا طالعة العمارة  
ضحك "سامر" قائلاً:  
-يا بنتى جمدى قلبك متبقيش خفيفة كده  
مسك الريموت وأخذ يقلب فى القنوات قائلاً:  
-ها تحبي نتفرج على ايه  
توقف عند احدى المحطات قائلاً:  
-الفيلم ده كويس هيعجبك أوى  
ابتسمت "سهى" وقد بدأ يقل توترها .. قال "سامر":  
-نطلب بأه الأكل عشان منضطرش ننزل  
بعد قرابة الساعتين من الكلام والضحك والمزاح نظرت "سهى" الى ساعتها  
وهبت واقفه وقالت:  
-ياااه اتاخرت أوى يا حبيبي .. همشى بأه  
وقف "سامر" قائلاً وعلامات الحزن على وجهه:  
-حبيبتي خليكي شوية كمان

قالت بأسف:

-معلش يا حبيبي بجد اتأخرت أوى

ابتسم لها قائلاً:

-طيب بس دى متعتبرش زيارة مستنيكي تانى بكرة

قالت بحيرة:

-بكرة

قال "سامر" بمتسماً:

-اديكي شوفتى أهو .. اعدانا هنا أحلى كتير من بره .. أعدين براحتنا ومحدث

بيضايقنا .. ولا أنا عملت حاجة تضايقك ؟

قالت بسرعة:

-لا يا حبيبي أبداً

-طيب يبقى تيجى بكرة به ان شاء الله وهكون محضر كام فيلم حلوين نشوفهم

سوا

ابتسمت قائله:

-خلاص اتفقتنا .. يلا سلام

قبلها على الباب مودعاً .. خرجت "سهى" وركبت الأسانسير .. خرجت منه

لتجد امرأة فى وجهها ظلت تتفحصها وتنظر اليها بإحتقار .. نظرت اليها

"سهى" ببرود ثم غادرت المبنى .. صعدت المرأة الى شقة "سامر" وضربت

الجرس .. فتح "سامر" قائلاً:

-ماما

قالت المرأة بحده:

-ميت مرة قولتلك متجيش الأشكال دى بيتك بطل الأرف ده يا "سامر"

متجيش بيتك يا ابنى

قال "سامر" بنفاد صبر:

-ماما بقولك ايه مش عايز عكنه .. روحى شقتك يلا

قالت أمه بغضب:

-يا ابنى اتقى ربنا بدل ما ربنا يبتليك بمرض

قال "سامر" وهى يخرج ويغلق الباب بعنف:

-سايبهالك مخضرة

نزل وعين أمه تتابعانه بأسى وهى تدعو له بالهداية.

\*\*\*\*\*

عاد "مراد" الى بيته فى وقت متأخر .. لم يسمع صوتاً فى البيت فصعد الى غرفته .. طرق الباب طرقات خفيفه ثم دخل .. لم يجد "مريم" فى الغرفة .. هم بأخذ ملبسه من الدولاب عندما سمع صوتاً قادماً من الشرفة .. اتجه الى الشرفة وأزاح الستارة قليلاً ليرى "مريم" واقفه تستند الى السور وتحدث فى الهاتف .. فتح باب الشرفة قليلاً .. فسمعها تقول بعصبيه:  
-بقولك كل حاجه حصلت بسرعة طبعا ملحقتش أصرخ .. لما حضنى أصلا  
اتخضيت لانى كنت فاكرة انى واقفه فى المكان ده لوحدى ولما حاولت أزقه لقيت فجأة رجاله حوليا وهو طلع يجري وأعدوا يسألونى انتى بنت مين  
ثم أكملت بحده:

-يعني لو أنا واحدة وحشة أكيد مكنتش هقولهم أنا مين وكنت سيبتهم وجريت ..  
لكن أنا كنت مصدومة ولما عرفوا اسمى لقيتهم فجأة بيزعقوا جريت وروحت  
البيت وجم ورايا وحصل اللى حصل

-----

-تفتكرى .. لا طبعاً مكانوش هيسيبنى أهرب واحتمال كانوا موتونى ..  
ثم قالت "مريم" بأسى:

-صعب أوى ما "مى" لما تحسى انك مظلومة والناس عماله تقطع فيكى  
بلسانها ومحدث مصدق انك بريئة .. أكثر حاجة وجعتنى لما قالى فى العربية  
متتكلميش كتير مع اخواتى دول بنات محترمة ومتربيين حسنى كأنى واحدة  
من الشارع حسيت انى عايزة أعيط بس مسكت نفسى بالعافية عشان ميشمتش  
فيا

-----

-أعمل ايه مضطرة أتحمل لحد ما عمتو تيجي وتخلصنى منه هى وعدتنى انها  
هتخليه يطلقتنى

ثم قالت بصوت كمن يوشك على البكاء:  
-أول امبارح سمعنى كلام زى السم عشان كنت بتكلم وأضحك مع مامته

واخواته فكرنى بعمل كده عشان ميطلقتيش .. قالى كلام صعب أوى خلاتى نزلت  
أنام فى الجنية مكنتش طايقة أنام معاه فى نفس الأوضة لحد ما تعبت وسخنت  
أوى

ثم أكملت بصوت مرتجف وأعين دامعه:

-تعرفى أكثر حاجه بتوجع هى انك تبقى عايشة مع حد يحسسك كل شوية انك  
واحد مش محترمة ورخيصة ودائرة على حل شعرك  
أجهشت فى البكاء قائله:

-بيقولى كلام وحش أوى يا "مى" عمر ما حد أهانى كده

وضعت "مريم" كفها على فمها تكتمه حتى لا يصل صوت بكائها لأحد فى  
المنزل .. كان "مراد" يراقبها من خلف الزجاج ويستمع الى بكائها وقد عقد ما  
بين حاجبيه ..وقف الى أن سكنت وهدأ بكائها ثم التفت وغادر الغرفة وتوجه  
الى مكتبه بالأسفل جلس شارداً يسترجع كلماتها التى بثتها منذ قليل وهو يشعر  
بمزيج من الحيرة والأسى.

## الفصل السادس عشر

استيقظ "مراد" قبل الفجر بنصف ساعة ليجد الأريكة فارغة .. توضأ وأرتدى  
ملابسه وخرج يبحث عن "مريم" .. ظن انها فعلت كما فعلت من قبل ونامت فى  
الحديقة .. نزل الى الأسفل ليسمع تمتمه من غرفة المعيشة .. اقترب ببطء فرآى  
"مريم" تصلى حاملة مصحفها .. لم يصدر صوتاً خشية من أن تنتبه اليه وتفقد  
تركيزها وخشوعها .. لا يدرى لما ظل ينظر اليها وشعور بالراحة والسكينة  
يغمر نفسه .. ظل دقائق واقفاً يراقبها .. ثم انصرف وغادر المنزل الى المسجد  
القريب .. أنهت "مريم" صلاة القيام قبل الفجر بلحظات ثم صلت الفجر وصعدت  
الى الدور العلوى طرقت باب غرفة "سارة" طرقات خفيفة .. فلم تجد استجابة  
فطرقته بقوة أكبر فتحت "سارة" الناعسة وهى تقول:  
-فى حاجه يا "مريم"؟

ابتسمت "مريم" قائله:

-أيوة الفجر أذن قومي صلى يلا

فركت "سارة" عينيها وقالت:

-ماشى يا حبيبتي كويس انك صحتيني بقالى كثير مش بصليه

قالت "مريم": "

-بس اوعى تنامى تانى

ابتسمت "سارة" ابتسامه ضعيفه وهى تقول:

-لا فوقت خلاص

فعلت "مريم" المثل مع "نرمين" التى أجابت بحده قائله:

-كنت نايمة ربنا يسامحك

قالت "مريم" مبتسمه:

-صلى وكملى نوم

قالت "نرمين" بضيق:

-لما بصحى مبعرفش أنام تانى

ابتسمت "مريم": "

-أصلاً الافضل انك متميش تانى البركة بتبقى فى الوقت ده .. يلا متكسليش

وصلى

أومأت "نرمين" برأسها فى تبرم .. توجهت "مريم" الى غرفة "ناهد" فى

تردد وطرقت الباب .. رأتها "سارة" وهى خارجة من غرفتها فابتسمت قائله:

-لا متتعبيش نفسك ماما على طول بتصلى الفجر فى معاده

فتحت "ناهد" وهى مرتدية إسدال الصلاة وابتسمت وهى تنظر الى "مريم" و

"سارة" قائله:

-ايه ده البيت كله صاحى ولا ايه

قالت "سارة": "

-آه "مريم" صحتنا عشان نصلى الفجر

قالت "ناهد" بعتاب:

-أخيراً .. طيب الحمد لله يا ست "سارة" ان فى حد قدر عليكي انتى و

"نرمين" أنا فقدت فيكوا الأمل من زمان

ابتسمت "مريم" قائله:

-خلاص يا طنط سيبى صحيانهم عليا وأهو أخذ ثواب من وراهم

قالت "ناهد" بمرح:

-ماشى يا قطة هعتمد عليكى فى الموضوع ده ربنا يعينك عليهم

عاد "مراد" من الخارج ليجد الثلاثة واقفين يتحدثون معاً فقال بإستغراب:  
-فى حاجه

توترت "مريم" لرؤيتها اياه .. رؤياه دائماً تشعرها بالتوتر والإرتباك .. فقالت  
بصوت خافت:

-تصبحوا على خير

وهربت الى .. غرفته .. شعرت بالحنق .. فلا مهرب منه الا اليه .. قالت "ناهد"  
مبتسمه:

-مراتك ربنا يباركلها كانت بتصحينا عشان نصلى الفجر .. يلا روح نام بأه  
معدش الا كام ساعة وتقوم لشغلك

تمتم "مراد": "

-تصبحى على خير

-وانت من أهل الخير

دخل "مراد" غرفته .. حيث كانت "مريم" واقفة فى الشرفة يداعب وجهها  
نسمات الصباح الباردة .. وقفت شاردة تنظرالى الحديقة وما حولها .. فتح  
"مراد" باب الشرفة وقال لها بلهجة أمره:

-ادخلى

التفتت "مريم" التى فوجئت بوجوده .. نظرت اليه دون حراك فنظر اليها وأعاد  
ما قال:

-ادخلى

امتثلت لكلامه وتوجهت الى اريكتها أغلق "مراد" الشرفة بإحكام وأحكم غلق  
الستارة جيداً .. ثم توجه الى فراشه .. نامت "مريم" وقد أولته ظهرها .. أما  
"مراد" فقد غرق فى تفكير عميق.

\*\*\*\*\*

كان "مراد" غارقاً في أعماله عندما وجد "طارق" أمامه .. شعر "مراد" بتغير صديقه فقال وهو ينظر اليه:  
-مش عاجبنى على فكرة  
قال "طارق" بتهكم:  
-ليه بأه  
ترك "مراد" القلم من يده ورجع بظهره الى الخلف ونظر الى صديقه متفحصاً وقال:  
-حسك متغير .. معرفش ليه .. فى حاجة مضيقاك يا "طارق"  
زفر "طارق" بضيق ثم قال بعصبيه وهو يتحاشى النظر الى عيني "مراد":  
-لا أبدأ بس يمكن ضغط الشغل تعبلى أعصابي شوية  
ابتسم "مراد" قائلاً:  
-ماشى هحاول أقتع نفسي بكده  
أمسك "مراد" قلمه مرة أخرى وعاود تفحص أوراقه عندما نظر اليه "طارق"  
وقال بشئ من التردد:  
-انت بأه أخبارك ايه ؟  
قال "مراد" دون أن يرفع رأسه:  
-الحمد لله  
قال "طارق" بصوت حاول أن يبدو عادياً:  
-وأخبار عمتهك ايه متعرفش هترجع امتى  
رفع "مراد" رأسه ونظر الى "طارق" بتمعن وقال:  
-لأ هى تعبانة شوية ومش هتقدر تيجي دلوقتى  
قال "طارق" بشئ من الضيق:  
-أنا مش عارف انت ليه مستنيها أصلاً يعني هى اللى هتطلق ولا انت .. طالما المشاكل فى الصعيد مش هنا خلاص طلقها وسيبها تشوف نصيبها  
قال "مراد" بحزم:  
-مستنى أتأكد ان المشاكل انتهت وان الطلاق مش هيسبب مشاكل تانية ..  
وبعدين لو سمحت يا "طارق" أنا مش حابب اسلوبك فى الكلام عن الموضوع  
ده  
قال "طارق" وهو يحاول التحكم فى أعصابه:



-معلش يا "مراد" بس البنت فعلاً صعبانه عليا وحاسسها اتظلمت  
قال "مراد" بهدوء:

-سألتك انت تعرف عنها ايه قولتلى متعرفش حاجه

قال "طارق" وهو ينهض:

-أيوة معرفش غير انها كان مكتوب كتابها وخطيبها مات

سأل "مراد" باهتمام:

-اسمه ايه ؟

قال "طارق" بتهكم وهو يغادر الغرفة:

-معرفش اسألها

\*\*\*\*\*

قال "سامر" لـ "سهى" وهما جالسان معاً فى بيته ..

-حبيبتي ايه رأيك نسافر اسبوع مع بعض

قالت "سهى" بحنق:

-انت بتستهيل يا "سامر" وأقولهم ايه فى البيت

قال "سامر" ببساطة:

-قوليلهم طالعة رحلة مع صحابك

قالت "سهى" بعصبية:

-لا طبعا مستحيل يوافقوا انى أبات بره .. أسافر ماشى لكن من غير بيات

قلها وابتسم قائلاً:

-خلاص يبأه نروح تقضى يوم فى أى مكان أنا وانت وبس يا جميل

نظرت اليه "سهى" قائله:

-وبعدين يا "سامر"

قال بدهشة:

-وبعدين ايه

قالت بأسى:

-وبعدين اخره اللي احنا فيه ده .. مش ناوى تاخذ خطوة بأه

قلها قائلاً:

-أنا عايز آخذ خطوات مش خطوة واحدة  
أبعده عنها قائله:

"-سامر" لو سمحت أنا بتكلم بجد  
زفر "سامر" بضيق واعتدل فى جلسته قائلاً:  
-مش فاهم قصدك يا "سهى"  
قالت بعصبيه:

-ايه اللي يمنع ان ارتباطنا يبقى رسمى يا "سامر" .. احنا الاتنين بنحب بعض  
ومفيش بينا مشاكل وانت ظروفك كويسة قولى بأه ايه يمنع  
قال وهو يخرج سيجارة ويشعلها:  
-للأسف يا حبيبتي مضطرين نأجل الموضوع ده شوية  
قالت بحده:

-ليه يا "سامر" نأجله ليه  
قال وهو ينظر اليها ويمرر أصابعه فى خصلات شعرها:  
-عشان فى مشاكل دلوقتي فى البيت وعندنا حالة وفاة وطبعاً مينفعش أخطب  
دلوقتي

قالت "سهى" بحزن:  
-بس أنا نفسي ارتباطنا يبقى رسمى يا "سامر" .. نفسي ما أحسش انى بعمل  
حاجه غلط  
اقترب منها أكثر وقبلها قائلاً:

-حبيبتي انتى مبتعمليش حاجه غلط وهو انتى مع واحد غريب انتى معايا انا ..  
"سامر" اللي بكرة يبقى جوزك وتبقى مراته  
قالت بلهفه:

-نفسى بأه يا "سامر" ده يحصل  
عانقها قائلاً:

-هيحصل يا حبيبتي وقريب أوى بس مش طالب منك أكثر من انك تتحمليني  
شوية وتتحملى ظروفى لحد ما أقدر أتكلم معاهم فى البيت  
ابتسمت قائله:

-ماشى يا حبيبى ولا يهكم  
نظر اليها قائلاً:

-يعني هتقفى جمبي ومش هتتخلى عنى أبداً  
قالت:

-أيوة طبعا يا حبيبي

ابتسم ونظر اليها بهيام قائلاً:

-طيب أنا عايز أطلب منك طلب والطلب ده هيثبت اذا كنتى فعلاً بتحبينى ومقدرة  
ظروفى ولا لاء  
قالت له:

-اطلب يا حبيبي

قال "سامر" وهى ينظر اليها بخبث:

-تقبلى تتجوزينى

ضحكت بسعادة قائله:

-طبعا موافقة

قال "سامر": "

-طيب قولى ورايا زوجتك نفسى على سنة الله ورسوله

ضحكت "سهى" بمرح وقالت:

-زوجتك نفسى على سنة الله ورسوله

قال "سامر" بخبث:

-وأنا قبلت زواجك

ثم قال:

-على فكرة احنا كدة خلاص يعتبر اتجوزنا

صاحت "سهى": "

-نعم .. لأ طبعا

قال "سامر" بثقه:

-لأ يعتبر اتجوزنا لأن الجواز عرض وقبول وانتى جوزتيني نفسك وأنا قبلت

قالت "سهى" بقلق وهى تبتعد عنه:

-انت بتهزر صح

-لأ طبعا مبهرش ده الكلام اللى بيقوله أى مآدون لما بيعج يجوز اتنين لبعض

واحنا قولناه يبقى خلاص متجوزين

هبت "سهى" واقفه وقالت بحده:

-انت بتستهيل يا "سامر" لا طبعا فى حاجات كتير ناقصة  
جذبها من يدها وأعدھا الى جواره ووضع ذراعه على كتفها وقال:

-طيب قوليلى ايه اللى ناقص

قالت بحيرة:

-ناقص ان يبقى فى مأذون وقسيمة جواز ويبقى فى شهود

قال "سامر": "

-حبيبتي أولا تقدرى تقوليلى الناس زمان كانت بتتجوز ازاي .. قبل ما يكون فى

مأذون وقبل ما يعملوا السجل المدنى .. هاا يعنى ايام الرسول كان فى سجل

مدنى ؟ طبعا لا .. كان فى مأذون .. طبعا لا .. كانت الناس بتتجوز بطريقتنا دي

وبيكتبوا ورقة بينهم ويبقى فى شهود وبمضوا عليها كمان

صاحت "سهى" بحدده:

-جواز عرفى ؟

قال "سامر": "

-الناس هى اللى أطلقت عليه الاسم ده لكن ده جواز طبيعى جدا

قالت "سهى": "

-لا طبعا مش طبيعى

قال "سامر": "

-يعنى عايزه تفهميني ان كل الناس اللى كانت بتتجوز من قبل ما بخترعوا

السجل المدنى كل دول جوازهم باطل ؟

صمتت "سهى" فى حيرة وهى لا تدرى ما تقول فأكمل قائلاً:

-لا طبعا .. ليه .. لان الجواز هو اللى احنا عملناه دلوقتى واحدة بتعرض نفسها

وواحد بيقبل وربنا بيكون شاهد عليهم .. وعشان حقوق الطرفين بيكتبوا ورقة

ويعملوا منها نسختين ويبكون عليها شهود وده اللى احنا هنعمله بالظبط

قالت "سهى" بأسى:

-وليه منتجوزش طبيعى زى ما كل الناس بتتجوز ونفرح أهلك وأهلى

قال "سامر" وهو يعانقها:

-حبيبتي أنا نفسي فى ده أكثر منك بس أعمل ايه فى الظروف اللى مضطرين

نستحملها احنا الاتنين .. وقريب أوى المشاكل اللى عندى فى البيت هتتحل

نظر الى وجهها قائلاً:

-هااا يا حبيبتي ايه رأيك .. أنا فكرت فى كده لما لقيتك بتضايقي من وجودك هنا  
من غير ما يكون فى بينا حاجه رسمى .. جوازنا هيقتل احساسك بالذنب لانك  
مش هتبقى بتعملى حاجه غلط .. هتكون فى بيت جوزك يعنى فى بيتك  
نظرت اليه "سهى" بحيرة وصراع نفسي كبير بداخلها .. فأكمل "سامر"  
بهمس:

-أنا لو مكنتش بحبك مكنتش أصلاً دخلتك البيت ده .. البيت ده مفيش أى واحدة  
بتدخله .. انتى الوحيدة اللى دخلته .. عارفه ليه .. لان ده بيتك يا "سهى" .. "  
بيتك انتى وأنا جوزك انتى  
نظرت "سهى" حولها تتطلع الى البيت ومازالت الحيرة فى عينيها فأكمل قائلاً:  
-لو تحبى أنا ممكن أتصل بصحابي حالياً ييجوا ويشهدوا على جوازنا  
قالت "سهى" بصوت خافت:

-لا يا "سامر" مش هينفع .. نستنى أحسن لما مشاكلك فى البيت تتحل  
ابتعد "سامر" عنها ببرود وهب واقفاً وقال:  
-يلا عشان عندى شغل ومضطر أمشى دلوقتي  
وقفت ونظرت اليه بأسى اقتربت منه وحاولت أن تلمس ذراعه فنفضه بعيداً  
عنها توجه الى باب البيت وفتحه فى انتظار خروجها اقتربت منه "سهى"  
وقالت بأسى:

" -سامر" عشان خاطرى متزعش منى .. بس مش هقدر بجد  
قال ببرود دون أن ينظر اليها:  
-يلا يا "سهى" لو سمحتى عايز أعير هدومى عشان ألحق معادى  
قالت "سهى" بصوت حزين:  
-طيب هنتقابل تانى امتى  
قال ببرود:

-معرفة على حسب ظروفى  
-طيب هكلمك أول ما أروح  
لم يجيبها .. خرجت "سهى" وهى تشعر بالحزن والأسى.

\*\*\*\*\*

-قولتك متصلش بيا تانى لو سمحت

هتفت "نرمين" بهذه العبارة وهي تتحدث الى "حامد" عبر الهاتف فقال  
"حامد" بشئ من الحده:

-متبقيش عنيدة يا حبيبتي

قالت بحزم:

-بقولك متتصلش تانى .. ومقابلة مستحيل أقابلك .. بجد أنا مش فاهمة ازي  
كنت غبية كدة .. أنا اطمنتلك لما عرفت انك صاحب "مراد" ومتخيلتتش أبداً انك  
ممكن تلعب بيا لأنك أكيد هتعمل حساب لأخويا .. بس بجد مش عارفه أقولك ايه  
أنا بجد بحتقرك أوى وبحتقر نفسي قبل منك لانى سمحتلك انك تتمادى معايا كده  
..بجد لو سمحت كفاية كدة ومتتصلش بيا تانى

قال "حامد" بغلظة:

-ماشى يا "نرمين" .. مش هتصل تانى .. بس انتى اللى هتتصلى .. سلام  
أنهت المكاملة وهى تشعر بتوتر بالغ .. جلست على فراشها مهمومة وحزينه ..  
طرقت "مريم" باب غرفتها ففتحت قائله:

-أيوة يا "مريم" فى حاجة

ابتسمت لها "مريم" قائله:

-أعده لوحدك ليه .. كلنا أعيدين تحت تعالى اعدى معانا

قالت "نرمين" شارداه:

-لا مش عايزة

نظرت اليها "مريم" وقالت بقلق:

-مالك يا "نرمين" فى حاجة تعباكى

قالت "نرمين" بسرعة:

-لا مفيش حاجة مصدعة بس

قالت "مريم" بحنان:

-طيب يا حبيبتي هنزل أجبلك حاجة للصداع

قالت "نرمين" بسرعة:

-لا أنا أخذت خلاص شكرا يا "مريم" بس عايزة أنام شوية

-ماشى يا حبيبتي

أغلقت "نرمين" الباب ورمت بنفسها على فراشها وهى تشعر بالهموم تنقل  
كتفيها

بعد ما يرقب من ربع ساعة وجدت رسالة من "حامد" على هاتفها فتحتها  
وهبت من على فراشها واقفة وهي تردد:

-يا مصيبيتي

سمعت بعدها صوت نغمة رسائل متتالية .. كانت الصور تجمعها بـ "حامد" يوم  
أن تقابلا .. لكن الصور كانت معدلة أو بمعنى آخر محرفة .. فظهرت "نرمين"  
في احدى الصورة و "حامد" ممسكاً بيدها عندما كانا جالسان معاً فى المطعم ..  
وفى صورة أخرى تُظهر "حامد" وكأنه يهيم بتقبيلها .. وصورة التاكسى وهو  
يميل برأسه من الشباك لتقبيلها .. شعرت بقلبها يقفز من مكانه من شدة الفزع ..  
أتصلت به بأصابع مرتجفة .. لم يجيب من أول مرة ولا ثانياً مرة أجاب فى  
الثالثه وقال بمرح:

-حبيبة قلبي .. كنت عارف انى مش ههون عليكى تحرمينى منك

قالت بصوت مرتجف:

-ايه الصور دى .. انت ازاي عملت فى الصور كده

قال "حامد" بمرح:

-دى صورى أنا وانتى يا حبيبتي لأول مقابلة بينا لحقتى تنسيها يا "نرمين"  
قالت بصوت أوشك على البكاء:

-بس اللي فى الصور ده محصلش .. انت عملت ايه فى الصور .. وازاي  
صورتها أصلا

قال "حامد" ضاحكاً:

-ازاي صورتها فدى استعنت فيها بصديق .. أما ايه اللي عملته فى الصور فأنا  
ضفت عليها لمساتى .. ايه رأيك مش كدة أحلى .. أه صحيح يا "نرمين" كنت  
عايز أسألك تفتكرى هتعجب "مراد"  
أجهشت فى البكاء قائله:

-حرام عليك .. أرجوك امسحهم لو "مراد" شافهم هيقطننى

قال "حامد": "

-اسمعى كلامى وأنا امسحهم

قالت من بين شهقاتها:

-مستحيل أقابلك أبدا مش هيحصل

قال "حامد: "

-وأنا مطلبتش أقابلك يا "نرمين" .. عايز منك حاجة ثانية  
توقفت عن البكاء وقالت بريبه:

-عايز ايه؟

قال "حامد: "

-مش دلوقتي .. هقولك بعدين .. سلام يا حبي  
أنهى المكالمة .. حاولت الاتصال به مرة أخرى لكنه لم يرد .. ألقت بنفسها على  
فراشها وقد أجهشت فى بكاء مرير

\*\*\*\*\*

عاد "مراد" من عمله ليجد أمه فى استقباله وهى تشير الى غرفة المعيشة قائلة  
بحزم:

-عايزاك يا "مراد"

شعر "مراد" بالقلق ولحق بها قائلاً:

-فى حاجة يا ماما .. البنات كويسين؟

وقفت أمه فى مواجهته وقد عقدت ذراعيها أمام صدرها وقالت بغضب:

-ملقتش الا بنت الراجل اللى قهر أبوك وتتجوزها يا "مراد"

صمت "مراد" قليلاً ثم قال:

-هى قالتلك

صاحت "ناهد" بغضب:

-هتقولى ازاي وانتوا من الواضح انكوا اتفقتوا مع بعض ان محدش يجبلى

سيرة .. اكنى مكنتش هعرف فى يوم من الأيام

قال "مراد" باستغراب:

-أمال عرفتى منين؟

قالت "ناهد" بحده:

-اتصلت أظمن على عمته .. مرأة "سباعى" ردت عليا ولقتها بتقولى ربنا

يكون فى عونك ازاي مستحيلة بنت الراجل اللى جوزك اتظلم بسببه

نظر اليها "مراد" وقال مستفهماً:

-قالتلك حاجة تانى؟



قالت "ناهد" ببرود:

-لا قالت كده بس واضطريت انى أعمل قدامها أكنى كنت عارفه ماهو مش معقول أحسسها انى آخر من يعلم ومش عارفه مين البنيت اللى دخلت بيتي شعر "مراد" بالراحة لأن أمه لم تعلم طريقة زوجه من "مريم" .. قال لها بهدوء:

-هى ملهاش ذنب فى اللى أبوها عمله زمان .. ربنا بيقول {وَمَا تَزُرُ وَأَزْرَهُ وَزُرَّ أُخْرَى} وحضرتك عارفه كده كويس  
نزلت "مريم" الدرج وهمت بان تتوجه الى غرفة المعيشة عندما سمعت "ناهد" تقول بضيق:

-أيوة عارفه كده .. بس كنت اتمنى أعرف ده منك بدل ما أعرف من بره ..  
وكمان مش متخيلة ان مفيش بنت عجبتك فى البلد غيرها ده انا ياما جببتك  
عرايس وتروح فى الآخر تتجوز بنت راجل زى ده  
شعرت "مريم" بالألم وهى تستمع الى تلك الكلمات .. وتوجهت مسرعة الى  
غرفة "مراد" .. جلست على الأريكة وهى تستغفر الله عز وجل والدموع فى  
عينها وتتمتم لنفسها:

-يا ربي أول ما بدأت أحس انى فى حد حنين عليا تتقلب الدنيا كده  
تتهدت "مريم" بعمق وهى تحاول أن تتخيل معاملة "ناهد" لها بعدما علمت  
بمن تكون .. كان تلاقى من "مراد" الأمرين .. شعرت بأن أعصابها لن تتحمل  
ضغوطاً أخرى .. جلست تستغفر الله عز وجل عله يفرج كربها .. دقائق ورات  
"مراد" يدخل الغرفة بعدما طرق الباب .. أغلق الباب خلفه فهبت واقفة وقالت:  
-لو سمحت .. أنا عايزة أروح أعد فى شقتى  
نظر اليها "مراد" صامتاً .. ثم قال:  
-ليه؟

قالت دون أن تنظر اليها:

-أنا غصب عنى سمعت جزء من كلام طنط "ناهد" .. مكنش قصدى أسمع ..  
وأنا شايفه ان معدش ينفع أستنى هنا  
اقترب منها "مراد" رفعت وجهها وابتعدت للخلف .. كان ينظر اليها بحده وقال  
بجدية بالغة:

-طول ما فى ورقة جواز بينا مش هسمحك تسيبي البيت ده

علمت من نظراته ونبرة صوته أن الموضوع منتهى بالنسبة له .. قالت بحنق:  
-طيب أنا كدة كدة لازم أروح هناك لانى محتاجة حاجات ليا فهروح بكرة ان  
شاء الله

قال "مراد" ببرود:

-مفيش مشكلة هروح معاكى

نظرت اليه قائله:

-لا مفيش مشكلة هروح لوحدى

قال بإصرار:

-قولت هروح معاكى .. جهزى نفسك على الضهر هرجع من المكتب أخدمك

\*\*\*\*\*

فى الصباح حاولت "مريم" تجنب ملاقة "ناهد" الى أن حضر "مراد"  
بسيارته وانطلقا معاً الى بيتها .. صعد "مراد" خلفها الدرجات المتهالكة ..  
توقفت أحد الأبواب التى يبدو عليها القدم .. دلفا معاً الى الداخل .. شعرت  
"مريم" بالتوتر الشديد لوجود "مراد" معها فى هذا المكان الخاص .. الذى  
يحوى ذكرياتها مع أسرتها .. أغلقت "مريم" الباب وقالت بتوتر:  
-هخلص بسرعة

توجهت الى غرفتها و اخذت حقيبة من تحت الفراش وأخذت فى جمع ما أرادته  
.. فوجئت بـ "مراد" واقفاً أمام باب الغرفة المفتوح .. شعرت بالإضطراب ..  
نفس الإضطراب الذى يراودها كلما نظرت اليه .. أخذت عينا "مراد" تدوران  
فى الغرفة كعين الصقر .. يتفحص كل ما فيها .. وقع نظرة على الفراشين  
المتجاورين .. فنظر الى "مريم" قائلاً:

-انتى عندك اخوات

مرت سحابة حزن أمام عينيها قالت وهى تكمل حزم أشياءها:

-أيوة .. بس متوفية

لانت ملامح "مراد" قليلاً وهو ينظر اليها .. صمت قليلاً ثم قال:

-هى مامتك فى الصعيد مع أهل باباكي ولا عايشة هنا فى القاهرة ؟

بلعت "مريم" ريقها بصعوبة .. تباً لذلك لماذا يذكرها بكل ما فقدت .. قالت

بصوت مرتجف دون أن تنظر اليه:  
-اتوفت

قال "مراد" وهو يمعن النظر اليها:  
-مامتك كمان متوفيه

أومأت برأسها فنظر اليها متفرساً:  
-وانتى كنتى عايشة هنا ولا فى الصعيد ؟  
-هنا

قال "مراد" بإستغراب:

-انتى كنتى عايشة هنا لوحدك

التفتت تنظر اليه وقالت بنفاذ صبر:

-أيوة أهلى كلهم ماتوا فى حادثة وأنا كنت عايشة لوحدى .. طبعاً زمانك دلوقتى  
بتفكر ان أكيد كل الحاجات اللى سمعتها عنى صح وانى عملت اسوأ منها كمان ..  
ما هو مفيش واحدة عايشة لوحدها تبقى محترمة وعارفة ربنا  
قالت ذلك ثم التفتت مرة أخرى توضب أغراضها .. ظلت نظرات "مراد" معلقة  
بها وشعور غريب يراوده .. أنهت ما تقوم به ثم التفت اليه قائله ببرود:  
-خلصت

سبقها الى الخارج .. أثناء نزولهما فتحت احدى الجارات الباب وقالت:

-ايه ده مش معقول "مريم" .. فينك يا بنتى قلقتينى عليكى

اقتربت "مريم" من المرأة وقبلتها قائله:

-ازيك يا طنط وحشائى أوى

قالت المرأة بطيبة:

-وانتى كمان يا بنتى وحشتينى أوى انتى قولتى هتتصلنى تطمينينى عليكى ولا

اتصلتى ولا حاجه

قالت "مريم" بأسف:

-معلش يا طنط والله حصلت ظروف واتلبخت

ألقت المرأة نظرة على "مراد" الواقف خلف "مريم" .. ثم قالت لـ "مريم":

-مين الأستاذ ؟

اضطربت "مريم" وشعرت بالتوتر .. لم يطاوعها لسانها على قول "زوجى"

حاولت النطق بها لكنها لم تستطع .. تمتعت بصوت خافت:

-قريبى

ابتسمت له المرأة قائله:

-اتفضل يا ابنى تعالوا ادخلوا شوية

قالت "مريم" بسرعة:

-معلش يا طنط عشان مستعجلين هاجى لحضرتك تانى ان شاء الله

قالت المرأة بطيبة:

-طيب يا حبيبتي ربنا يوفقك .. زى ما قولتلك لو مش هتحتاجى الشقة عرفيني

وأنا عندى اللى ياخذها

قالت "مريم" بهدوء:

-لا يا طنط محتجهاها أنا هرجع تانى بعد فترة ان شاء الله

قالت المرأة بحزن:

-ليه يا بنتى مرتحتيش مع أهل أبوكى ولا ايه

قالت "مريم" بأسى:

-يعني حصلت ظروف وهضطر أرجع تانى .. بس شوية كدة

ثم قبلت المرأة وعانقتها قائله:

-ان شاء الله هتصل أظمن عليكى .. مع السلامة

ودعتها جارتها قائله:

-مع السلامة يا حبيبتي خلى بالك من نفسك .. مع السلامة يا أستاذ

أوما "مراد" برأسه وهو ينزل الدرجات خلف "مريم" .. انطلق "مراد"

بسيارته ساد الصمت لدقائق الى أن قطعه قائلاً:

-كانت "جوزى" هتكون أفضل من "قريبى" خاصة وهى شيفانا نزلين مع

بعض من شقتك

اضطربت "مريم" وخفق قلبها بشدة .. فتمتمت بصوت مضطرب:

-كدة أحسن عشان لما أرجع مضطرش أشرحلها ليه اتجوزت وليه اطلقت

ألقي نظرة عليها ثم عاود النظر الى أمامه مرة أخرى .. أوصلها "مراد" الى

البيت ثم عاد الى مكتبه مرة أخرى.

دخلت "مريم" الفيلا وهمت بالصعود الى غرفتها عندما استوقفتها "ناهد"

قائله:

"-مريم" عايزاكي لو سمحتي

توترت "مريم" وسارت خلفها حتى التفتت اليها "ناهد" قائله:

-بصى يا بنتى انتى دخلتى البيت ده وأنا مكنتش أعرف انتى مين يمكن لو كنت  
عرفت من الأول كان هيبقى رد فعلى معاكى مختلف .. بس أنا عرفتك وحببتك يا  
"مريم" .. وبجد لما بقولك انى مش بفرقك عن "نرمين" و "سارة" فتأكدى  
انى بقول الحقيقة

اغرورقت عينا "مريم" بالعبرات وحمدت الله فى سرها فأكملت "ناهد" مبتسمه  
:

-معلش اعذريني امبارح كنت منفعله واللى زود انفعالى انكوا خبيتوا عليا ..

يعني كنت مضايقة جدا لان مرأة "سباعى" عرفتنى انتى مين وأنا اللى عايشة  
معاكى فى بيت واحد معرفش  
قالت "مريم" بسرعة:

-معاكى حق يا طنط انك تزعلى وتضايقى

ابتسم "ناهد" وربتت على ذراعها قائله:

-أنا أهم حاجه عندى سعادة "مراد" وأنا شايفاكى بنت مؤدية ومحترمة وطيبة  
ومش هلاقي لـ "مراد" أحسن منك

اتسعت ابتسامت "مريم" ومسحت العبرات التى تساقطت من عينيها رغماً عنها  
..شعرت "ناهد" بالتاثر لمرآى عبراتها فعانقتها .. أغمضت "مريم" عينيها  
ودموعها تنهمر كالشلال .. كانت تخشى أن تعاملها "ناهد" بقسوة بعدما عرفت  
من تكون .. كانت "مريم" تشعر بإفتقادها لهذا الحزن الحانى الذى يحتويها  
برقه .. رفعت "ناهد" رأسها وقد اغرورقت عيناها قائله:

-بقولك ايه أنا מבحبش العياط ماشى

ابتسمت "مريم" وهى تمسح عبراتها قائله:

-ماشى

ربتت على ظهرها قائله:

-يلا يا حبيبتي اطلعى غيري هدومي عشان تاكلى انتى خرجتى من غير ما

تفطرى

أومأت "مريم" برأسها وصعدت الى غرفتها وعينا "ناهد" تتابعانها فى حنو.

\*\*\*\*\*

-هتروح الجاليري بتاع "سامر"  
تفوه "طارق" بهذه العبارة وهو فى مكتب "مراد" الذى قال:  
-أيوة هروح عشان ميزعلش شدد عليا أوى  
قال "طارق" متكاسلاً:  
-مع انى مليش فى الرسم والمعارض بس مضطر أنا كمان أروح  
نظر اليه "مراد" قائلاً:  
-أيوة ضرورى تيجي ده أول معرض له وشدد علينا فعلاً  
-طيب خلاص نتقابل هناك  
أوماً "مراد" برأسه وعاد الى عمله.

فى المساء توجه "مراد" الى منزله وصعد الى غرفته وارتدى حلة أنيقة  
لحضور الجاليري .. أثناء نزوله توجه الى غرفة المعيشة .. فقالت "سارة"  
بمرح:

-ايه الشياكه دى يا أبيه  
التفتت "مريم" بدون قصد الى حيث تنظر "سارة" فالتقت نظراتها بنظرات  
"مراد" فأشاحت بوجهها بسرعة .. قالت "ناهد" بدهشة:  
-رايح فين يا "مراد" ؟  
قال "مراد" بهدوء:  
-فى واحد شريكى بيفتتح الجاليري بتاعه النهاردة و عزمى عليه .. يلا مع  
السلامة

التفت ليغادر فأوقفته "ناهد" قائلة:  
" -مراد"

التفت ينظر اليها فأكملت بحزم:  
-ومراتك يعنى ملهاش نفس تخرج  
شعرت "مريم" بالخرج فأسرعت تقول:  
-لا يا طنط أنا حبه أعد معاكوا  
لم تلتفت اليها "ناهد" بل أكملت وهى تنظر الى "مراد": "  
-استناها لحد ما تلبس وخذها معاك

قال "مراد" بضيق:

-أنا مستعجل يا ماما

قالت "مريم" بحرج شديد:

-أنا فعلا مش عايزه أروح يا طنط أصلا معرفش حد هناك

قالت "ناهد": "

-تتعرفى لو متعرفيش حد تتعرفى وكفاية انك راحه مع جوزك مينفعش مناسبة

زى دى يروح لوحده .. يلا قومى البسى

ثم التفتت الى "مراد" قائله:

-استناها مفيهاش حاجه لو اتاخرت شوية

التفت "مراد" الى "مريم" وقال بهدوء:

-يلا وحاولى متأخرىش

شعرت "مريم" بالضيق لوقوعها فى هذا المأذق .. نهضت متثاقله وارتدت

ملابسها ..نزلت لتجد "مراد" ينظرها فى البهو فقالت له بصوت خافت:

-أنا أسفة

لم يجيبها "مراد" ركبت بجواره وهى تشعر بالحنق والضيق الشديد لأن

"ناهد" دون أن تدري فرضتها عليه فرضاً.

أخذ "سامر" يرحب بضيوفه خاصة أولئك الذى أشادوا بلوحاته .. فجأة وجد يداً

تربت على كتفه من الخلف التفت مبتسماً ثم تلاشت ابتسامته عندما وجد

"سهى" أمامه .. قالت مبتسمه:

-مبروك يا "سامر"

قال "ببرود":

-الله يبارك فيكي

قالت بعتاب:

-ليه مبردش عليا بتصل بيك كتير يا "سامر"

قال ببرود وهو يتحاشى النظر اليها:

-كنت مشغول

-يعني مشغول لدرجة انك متردش عليا ولا حتى تتصل بيا .. دى مش عادتك يا

"سامر"

التقت اليها قائلاً بغلظة:

-اتعودى على كدة من هنا ورايح .. مش انت معتبرانى واحد غريب عنك ..  
خلاص خلينا أعراب كده

قال ذلك ثم تركها وتوجه الى احدى الفتيات ولف ذراعه حول خصرها وأخذ  
يهمس لها شيئاً بأذنها فانفجرت الفتاة ضاحكة .. ألقى "سامر" نظرة خبيثة  
على "سهى" التى وقفت تنظر اليهما وعلامات الاسى على وجهها .. اقترت  
منهما فى عصبية وقالت لـ "سامر: "

-لو سمحت يا "سامر" عايزه أتكلم معاك شوية

ترك "سامر" الفتاة متلكئاً ثم وقف أما "سهى" ينظر اليها دون أن يتحدث  
فقالته بحزن:

-ليه بتعمل فيا كده

قال "سامر: "

-انتى اللى عايزه كده .. مش انتى عايزة ميكنش فى حاجة بينا الا لما أتقدمك  
رسمى وتعاملينى زى ما بتعاملى أى راجل غريب خلاص خلينا كدة بأه لحد ما  
الظروف تتحسن

قالت "سهى" بعتاب:

-أنا ما قولتش نبعد عن بعض .. انا قولت نفضل مع بعض بس من غير الجواز  
ده

قال "سامر" بجدته:

-ما هو مش بمزاجك يا "سهى" .. يا نقرب يا نبعد معنديش حلول وسط

قالت "سهى" والدموع فى عينيها:

-انت ليه بتعمل كده

-عشان انتى لحد دلوقتى مش عارفه تحبيني يا "سهى" ولا عارفه تثقى فيا ..

انا أدامى مليون بنت لكن اخترتك انتى وانتى مش مقدرة ده

قالت برجاء:

-والله يا حبيبي مقدرة .. بس أنا...

بسبب كفه أمامها وقاطعها قائلاً:

-كلمة واحدة .. عايزة تكونى معايا ولا لا ؟

نظرت الى كفه الممدودة ثم اليه .. صمتت فحثها قائلاً:



-كلمة واحدة عايزها منك .. آه ولا لأ

حسنت أمرها بعد حيرة ومدت كفها لتتشابك أيديهما قائله:

-آه .. آه عايزة أكون معاك

ابتسم لها "سامر" مقبلاً يدها .. فى تلك اللحظة لمح "مراد" وهو يدخل من

الباب بصحبة "مريم" التى كانت تشعر بالحرج وهى تسير بجواره توجه

"سامر" بصحبة "سهى" تجاه "مراد" لكنه توقف فجأة عندما رأى "مريم"

بصحبه ونظر اليها بدهشة .. كانت دهشة "مريم" كبيرة عندما رأت "سهى"

بصحبة "سامر" فقالت بدهشة:

-سهى!

قالت "سهى" بدهشة وهى تتطلع من "مريم" الى "مراد": "

"-مريم!"

قال "سامر": "

-ازيك يا "مراد" منور .. كنت هزعل منك أوى لو مكنتش جيت

ثم وجه حديثه الى "مريم" قائلاً:

-ازيك يا آنسه "مريم" ؟

نظر "مراد" الى "سامر" بحدة ثم نقل نظرة الى "مريم" قائلاً:

-انتوا تعرفوا بعض ؟

قال "سامر" بمرح:

-أيوة طبعاً دى الأنسة "مريم" ديزاينر حملتنا

قال "مراد" بسخرية:

-اظاهر ان الناس كلها عارفه انها ديزاينر حملتنا الا أنا

كان تركيز "مريم" مع "سهى" التى كانت ملابسها ملتصقة بجسدها بشدة ..

وقد صبغت وجهها بالمكياج الصارخ ولا يخلو الأمر من ظهور جزء كبير من

شعرها مع تساقط العديد من الخصلات على وجهها .. قالت "مريم": "

"-سهى" لو سمحتى عايزاكى شوية

انزوت الفتاتان فى أحد الجوانب وعينا "مراد" تتابعانها .. نظر "مراد" الى

"سامر" قائلاً بصرامة:

-انت عرفها من زمان ؟

قال "سامر" بلا مبالاة:

-روحت مكتبهم مرة مع "طارق "

ثم ابتسم بخبث قائلاً:

-بصراحة كنت رايح أظبطها لما شوفت شغلها قولت أكيد دي فنانة

ازدادت حدة نظرات "مراد" فأكمل "سامر" وهو يطم شفتيه:

-بس بصراحة ملقتهاش استايلى خالص

قال "مراد" وهو ينظر اليه بامعان:

-يعنى ايه ؟

قال "سامر" متهكماً:

-جد أوى زيادة عن اللزوم .. متكلمتش فى كلمة واحدة بره الشغل حتى مكنش

هاين عليها بتتسم فى وشنا

ثم وكزه "سامر" بكوعه بخفه وهو يغمز له بعينه ويبتسم بخبث قائلاً:

-بس انت طلعت أسد .. عرفت توقعها .. انا كنت حاسس انك مش سهل

كانت نظرات "مراد" معلقة بـ "مريم" وقد شعر بشئ غريب يسيطر على كيانه

كله .. كانت "مريم" تتحدث الى "سهى" قائله:

-ازاى يا "سهى" تخرجى معاه

قالت "سهى" بتأفف:

"-مريم" مش عايزة مواعظ الله يخليكي أنا اللي فيا مكفيني .. كل الحكاية انى

جيت أباركله على الجاليري

قالت "مريم": "

-لما دخلت شوفتك ماسكة ايده يا "سهى" .. بس براحتك انتى أدري بمصلحتك

..بس أحب أقولك عشان أكون خلصت ضميري أدام ربنا .. ان الراجل ده من

ساعة ما شوفته قلبي اتقبض منه ومرتحتلوش أبداً فخلي بالك من نفسك

قالت "سهى" بنفاذ صبر:

-قولى لنفسك الكلام ده ما انتى داخله مع صحبك

قالت "مريم" بصرامة:

-ده مش صحبى .. ده جوزى

نظرت اليها "سهى" بدهشة وقالت:

-انتى اتجوزتى

أومأت "مريم" برأسها .. فقالت "سهى" بحدة وعصبية:

-طيب يلا عشان اتاخرنا عليهم

عادت الفتاتان .. وجه "سامر" حديثه الى "مريم" قائلاً بابتسامه:

"-طارق" كان بيدور عليكي وقلب الدنيا عليكي كنتي مختفية فين ؟

لم يترك لها "مراد" فرصة للرد وأمسكها من ذراعها قائلاً لـ "سامر": "

-عن اذنك يا "سامر "

شعرت "مريم" بالحرج فنزعت ذراعها بهدوء من يده .. وقفا أمام احدى

الصور .. تطلعت اليها "مريم" .. فى حين كان "مراد" يتطلع الى "مريم" ..

التفتت "مريم" فتلاقت نظراتهما .. كان ينظر اليها متفحصاً كما يتفحص رواد

الجاليرى اللوحات المعروضة أمامهم بأعين متفحصة .. أشاحت بوجهها خجلاً ..

رن هاتفه فسمعتة يقول:

-ماشى يا "طارق" خلاص هقوله .. لا أكيد مش هيضايق طالما الموضوع كده

.. خلاص أشوفك بكرة فى المكتب

نظر "مراد" الى "مريم" قائلاً:

-خليكي هنا راجعك

أومأت برأسها .. ذهب "مراد" ليخبر "سامر" باعتذار "طارق" عن الحضور

اقترب أحد الرجال من "مريم" التى كانت تتفحص احدى اللوحات وقال لها:

-عجبتنى أنا كمان .. رقيقة أوى مش كدة

نظرت اليه "مريم" وتمتمت بخفوت:

-بعد اذنك

تركته ووقفت أمام لوحة أخرى وهى لا تدرى بأن عينا "مراد" كانت تراقب

سكناتها قبل حركاتها.

عادا الى المنزل فى وقت متأخر لم يتحدثا معاً لا فى الحفلة ولا فى السيارة ..

كان "مراد" يبدو شاردأً متسغرقاً فى التفكير .. صعدا الى الغرفة فتوجهت الى

الحمام وغيرت ملابسها وخرجت ليتبادلا الأدوار .. نامت "مريم" و تدثرت

بغطائها وأولته ظهرها حاوت اغماض عينيها لكن النوم جفاها .. بدا على

"مراد" أيضاً عدم الرغبة فى النوم .. أزاح الغطاء وجلس على فراشه يرمق

"مريم" وقد بدا عليه التفكير العميق .. شعرت "مريم" بحركته فالتفتت لتراه

جالسا على فراشه يتطلع اليها .. شعرت بالخجل فجلست فى مكانها .. التفتت اليها "مراد" قائلاً بحزم:

-احكيلى اللى حصل فى الصعيد

نظرت اليه "مريم" بدهشة ثم قالت بسخرية:

-ليه مش حضرتك عارف كل حاجه .. كنت على علاقة بـابن عمك لحد ما الناس شافتنا سوا

ازدادت حدة نظرات "مراد" وقال بلهجة أمره:

-مبحبش أكرر كلامى مرتين .. قولت احكيلى اللى حصل فى الصعيد

بلعت "مريم" ريقها وهى لا تفهم سبب طلبه لذلك وما الفائدة ان كان لن

يصدقها أبداً .. تحاشت النظر اليه وقصت عليه ما حدث من أول خروجها مع

"صباح" حتى قدوم الرجال الى بيت جدها .. مرت لحظات صمت من كليهما ..

نهض "مراد" فجأة وأمسك بمصحفها الموضوع على الطاولة أمام الأريكة ..

جلس على الطاولة وبدا قريباً منها .. ازداد خجلها واعتدلت فى جلستها أكثر ..

أخذ "مراد" يفر صفحات المصحف ونظراته مركزة على "مريم" كنظرات أسد

يتفحص فريسته قبل الإنقضاء عليها .. قال بصوت رخيم:

-تعرفى ايه عقاب اللى يحلف بالله كذب

نقلت "مريم" نظرها من المصحف فى يده اليه دون أن تتكلم .. فأكمل وهو

مازال ينظر اليها نظرات بدت وكأنها تخترقها وتنفذ الى أعماقها:

-ده يبقى اسمه يمين غموس ..وده يمين كاذبه فاجرة .. وده من الكبائر

وملوش كفاره .. تعرفى ليه اسمه يمين غموس ؟

لم يرف لـ "مريم" رمش نظرت فى عمق عيناه بثبات فأكمل قائلاً:

-لان صاحبه بيبقى مغموس فى الإثم .. ويوم القيامة بيتغمس فى النار بسببه ..

ربنا بيقول فى سورة آل عمران { إن الذين يشترون بعهد الله وأيمانهم ثمنا قليلا

أولئك لا خلاق لهم فى الآخرة ولا يكلمهم الله ولا ينظر إليهم يوم القيامة ولا

يزكهم ولهم عذاب أليم }

ظلت تنظر اليه بثبات فأكمل "مراد" بهدوء و بحزم:

-احلفى ان اللى قولتیه دلوقتى هو الحقيقة وانك مكذبتيش فى حرف واحد

صمتت "مريم" لحظات وكلاهما يتطلع الى الآخر بثبات ثم قالت بثقه شديدة:

-والله العظيم ما كذبت فى حرف واحد ومفيش حاجه حصلت أكثر من اللى

حكيتها دلوقتي .. ولو كنت كدبت فى حرف واحد يارب أتغمس فى نار الدنيا قبل  
ما أتغمس فى نار الآخرة  
ظلت عينا "مراد" تنظرات فى عينيها والى تعبيرات وجهها بتمعن .. ثم أخفض  
بصره وقال:  
-ليه "جمال" عمل كده .. يعني لو كان عايز يتجوزك ليه ميروحش يتقدم لأهلك  
قالت "مريم" بحماس وقد شعرت بأنه بدأ يصدقها:  
-أصلاً هو ميعرفنيش عشان يتقدملى .. أنا واثقه انه كان قاصد ان ده كله  
يحصل  
نظر اليها "مراد" قائلاً وهو يفكر:  
-يمكن شافك وعجبتيه وخاف يتقدم أهلك يرفضوه عشان المشاكل بين العيلتين  
أزاحت "مريم" الغطاء وأنزلت قدمها على الأرض فقد كانت تشعر بالخجل من  
جلوسها أمامه بهذا الوضع ثم قالت بحزم:  
-أصلاً أنا مروحتش الصعيد الا قبل المشكلة دى بكام يوم لحق فين شافنى  
وعجبته واتعلق بيا لدرجة انه يعمل كل الفيلم ده عشان يتجوزنى  
قال "مراد" وهو يمعن التفكير:  
-يبأه زى ما عمتو قالتلى .. حساب قديم كان بيصفيه  
قالت "مريم" بدهشة:  
-حساب ايه  
قال "مراد" بحزم:  
-مش عارف .. بس هعرف .. لازم أكلم عمتو وأفهم منها كل حاجه  
أومأت "مريم" برأسها وشردت قليلاً .. نظرت الى "مراد" فوجدته يتطلع اليها  
بنظراته فاحمرت وجنتاها واشاحت بوجهها .. نهض "مراد" قائلاً:  
-نامى دلوقتي وأنا بكره ان شاء الله هكلم عمتو  
توسد كل منهما وسادته وكل منهما يفكر فى هذا الوضع الذى وصلا اليه .. ترى  
ماذا ستكون نهاية المطاف !؟

## الفصل السابع عشر

استيقظت "مريم" فجراً وتوضأت وارتدت اسدالها .. نظرت الى "مراد" النائم  
فى حيرة .. أتوقظه أم لا .. اقتربت منه .. يا الله ما أشد الشبه بينه وبين "ماجد"  
.. لم تكن لتجرو على النظر اليه وهو مستيقظ خشية أن يسئ تفسير نظراتها كما  
فعل من قبل .. لكنها الآن تتفرس فى ملامحه التى طالما أحببتها وعشقتها .. كان  
لديها عشرات الصور لـ "ماجد" لكن الصورة التى أمامها الآن حية تتنفس  
وتتحرك .. أخذت تتطلع الى ملامحه وهى تستعيد ذكرياتها مع "ماجد" .. وقفت  
دقائق عدة الى أن انفتحت تلك العينان لتنظران اليها فى ظلام الغرفة .. فزعت  
وانتفض جسدها ورجعت خطوة للخلف .. جلس "مراد" على فراشه وهو مازال  
ينظر اليها .. كانت تشعر بإضطراب وتوتر بالغ قالت بصوت مضطرب للغاية:  
-الفجر .. وانت كنت نايم

كانت تتلثم بشدة .. هربت من أمام ناظريه وخرجت من الغرفة وهى مغتاضه من  
نفسها بشدة .. صلت فى حجرة المعيشة وأيقظت البنات وأسرعت بالعودة الى  
الغرفة والتظاهر بالنوم قبل أن يعود "مراد" من المسجد

\*\*\*\*\*

جلس "سامر" فى حجرة الإجتماعات فى انتظار حضور "مراد" و "طارق" ..  
دخل "طارق" واقترب من "سامر" قائلاً:  
-ألف مبروك يا "سامر" وآسف جداً انى معرفتش آجى امبارح  
جلس "طارق" قباليته فابتسم "سامر" قائلاً:  
-ولا يهملك يا "طارق" .. "مراد" قالى امبارح  
فتح "طارق" أحد الملفات التى أمامه وقال:  
-ها ايه الأخبار بعث كام لوحة  
ضحك "سامر" قائلاً:  
-معظم اللوحات اللى كانت معروضة امبارح اتباعت  
ضحك "طارق" قائلاً:  
-كويس انى مجتش كان زمانك فلستنى .. أصلاً رسمك كثير بيعجبني لو كنت  
جيت كنت خدتهم كلهم

قال "سامر" بخبث:

-سيبك انت من اللوح .. هو ايه اللي بيحصل بالضبط .. المزة بتاعتك لقيتها جايه

امبارح مع "مراد"

قال "طارق" باستغراب:

-مزة مين

ابتسم "سامر" وهو يغمز بعينه قائلاً:

-الديزاينر بتاعتنا اللي كل شوية تتحجج وتروح الشركة تشوفها

أغلق "طارق" الملف بعنف وهتف بـ "سامر": "

-انت قولت لـ "مراد" ايه ؟

قال "سامر": "

-ما قولتلوش حاجه عنك قولتله بس انى كنت رايح أظبطها وبعدين معجبتيش

شعر "طارق" الضيق وهتف به:

-مكنش لازم تنطق أصلاً .. ممكن دلوقتي ياخذ عنها فكرة غلط

قال "سامر" وهو يضييق عيناه:

-هى ايه الحكاية بالضبط

قال "طارق" بضيق:

-الحكاية ان "مراد" اتجوزها

هتف "سامر" بدهشة:

-ايه .. اتجوزها .. أنا كنت فاكرها صحبتته

نظر اليه "طارق" بغيظ قائلاً:

-ليه من امتى كان "مراد" بيصاحب يعني .. انت مش عارف طبعه ولا ايه

قال "سامر": "

-ده أنا عكيت الدنيا آخر عك .. عشان كده حسيته غار لما قولته انى كنت رايح

أظبطها

سأله "طارق" بإهتمام:

-غار ازاي يعني

قال "سامر": "

-مرضاش يخليها تتكلم معايا ولا حتى رضى يقف معايا وطول الوقت وهو

واقف فى جنب معاها كانه بيحرسها .. ولما حاولت أوجهلها كلام تانى استأذن

وخذها ومشى

كان "طارق" يعمن التفكير فيما سمعه من "سامر"

كان "مراد" فى مكتبه وعلامات الالم على وجهه .. كان يشعر بألم شديد فى ساقه ..طوال الأيام الماضية لم يخلع ساقه الصناعية أبداً وذلك بسبب مشاركة "مريم" اياه غرفته .. لم يكن ليجرؤ على أن يظهر اعاقته أمامها .. كان يتحمل الألم أثناء نومه إلى أن اشتد به وأصبح لا يطاق .. فإضطر الى خلعه فى مكتبه .. وأمر السكرتيرة بإحضار "طارق" و "سامر" الى مكتبه .. بعد قليل حضر الاثنان فقال "مراد" محاولاً تجاهل الألم فى ساقه:

-خلونا نتكلم هنا

جلس الاثنان وقال "سامر: "

-طيب يا جماعة نتكلم الأول فى الماركة الجديدة والمشروع اللى متعطل ده

قال "طارق" موجهاً حديثه لـ "مراد: "

"-مريم" هتبتدى الشغل امتى الوقت مش فى صالحنا

اندهش "مراد" من شعور الضيق الذى راوده وهو يسمع اسم "مريم" من "طارق" بلا ألقاب .. ظهرت علامات الضيق على وجهه وتظاهر بالإطلاع على الملف الذى أمامه وهو يقول بجدية وحزم:

-اسمها "مدام" مريم

نظر اليه "طارق" بتمعن .. وظهر عليه الضيق هو الآخر .. فقال "سامر: "

-طيب هتبتدى الشغل امتى ؟

قال "مراد" وهو ينظر اليه:

-هتفق معاها النهاردة ان شاء الله

قال "سامر: "

-طيب تمام .. يبقى نجتمع معاها فى أقرب وقت ويفضل يكون بكرة عشان تبتدى

هى الشغل من بكرة أو بعده بالكثير

نظر اليه "مراد" بحده وقال بحزم:

-مفيش داعى تيجى الإجتماع .. نتفق احنا التلاته على اللى احنا عايزينه وأنا

هبلغها

قال "سامر" بتوتر:

-طيب تمام زى ما تحب أنا مكنش قصدى حاجه



تابع "طارق" "مراد" بعينيه والذي كان يبدو عليه العصبية ثم قال بهدوء:  
- خلاص يا "مراد" زى ما انت قولت .. وعامة زى ما انت عارف ذوقى وذوقك  
واحد يعنى اتفق معاها انت على اللي انت شايفه وان شاء الله أنا و "سامر"  
مفيش اعتراض بالنسبة لنا  
أوما "مراد" برأسه دون أن ينظر اليهما .. وانتهى الإجتماع .. خرج "سامر"  
أولاً وقبل أن يخرج "طارق" بدا عليه التردد ثم التفت الى "مراد" قائلاً:  
- اسمه "ماجد"

رفع "مراد" رأسه بحده ونظر الى "طارق" .. فأكمل "طارق" بهدوء:  
- عامة هتلاقى عندك فى قسيمة الجواز كل بياناته لازم المأذون يكون كاتبها  
قال ذلك ثم انصرف وترك "مراد" شاردأ .. اذن فالإسم الذى كانت تردده  
"مريم" أثناء مرضها كان اسم زوجها .. ثرى أحبته لدرجة أن تذكر اسمه فى  
مرضها وهو الذى توفى منذ أكثر من عام ! .. أيعقل انها مازالت تحبه حتى الآن  
؟ .. !أخذت الأسئلة تلاحقه دون أن يجد لها أى اجابه..

\*\*\*\*\*

طرقت "ناهد" باب غرفة "نرمين" فتحت "نرمين" فى وجوم فقالت "ناهد"  
وهى تنظر اليها بامعان:  
" -نرمين" مالك .. بقالك يومين أعدة فى أوضتك ومش راضية تنزلى تعدى  
معانا .. فى ايه  
قالت "نرمين" محاولة اخفاء ما تشعر به:  
-مفيش يا ماما .. مصدعة شوية  
اقتربت منها "ناهد" وتفحصت حرارتها وقالت:  
-حرارتك عادية .. أمال من ايه الصداع اللي بقاله يومين ده  
قالت "نرمين" بنفاذ صبر:  
-خلاص يا ماما شوية وهيروح أنا هنام دلوقتى  
قالت "ناهد" بحنان:  
-طيب يا حبيبتى ولما "مراد" ييجى هخليه ياخذلنا معاد من الدكتوراة ونشوف  
سبب الصداع ده ايه

قالت "نرمين": "

-ماما مفيش داعى أنا كويسة

قالت "ناهد" بإصرار:

-حبيبتي لازم نعرف سبب الصداع ده ايه ده بقاله يومين مش بيروح .. يلا نامى

دلوقتي ولما ييجى "مراد" هصحيكى

دخلت "نرمين" وألقت بنفسها على الفراش وتركت لعبراتها العنان وهى تعلم

جيداً أنه لا يوجد دواء فى العالم باستطاعته أن يريحها ويشفى ما ألم بها.

\*\*\*\*\*

-كيفك يا ابنيتي وكيف جوزك

تلقت "مريم" اتصالاً من جدتها وجدتها فكانت سعادتها غامرة وقالت:

-الحمد لله بخير يا جدو ازيك وازى تيته .. وعمو أخباره ايه دلوقتي

قال "عبد الرحمن": "

-امنيح يا بنيتي لا تجلجى .. من آخر اتصال بيناتنا وهو عم يتحسن يوم بعد يوم

الحمد والشكر ليك يا رب

قالت "مريم" بتأثر:

-وحشتنى أوى يا جدو انت وتيته .. وازى "صباح" عاملة ايه

قال "عبد الرحمن": "

-امنيحه الحمد لله .. وانتي يا بنيتي وحشانا كتير ربنا يطمنا عليكي دايماً

اغرورقت عينا "مريم" بالعبرات بعدما أنهت المكالمة .. لكم اشتاقت اليهما

بشدة ..

قال "عبد الرحمن" لزوجته:

-الحمد لله اطمنا عليها

قالت "زوجته": بأسى:

-وحشتنى جوى جوى يا حاج .. ياريت نبجى نروح نزورها جريب .. احنا علينا

ليها حج بردك

قال "عبد الرحمن" وهو يتنهد بحسره:

-حج ليها ولأبوها .. ظلمته كثير جوى .. لولا ظلمي ليه كان زمانى عارفها من زمان .. ياريتنى كنت حوطت على "خيري" ولدى زى ما "سباعى" و "بهيرة" حوطوا على "خيري الهوارى" .. كان زمانى متحرمتش منه ومن ولاده

قالت زوجته بحزن:

-ياما جولتلك يا حاج .. "خيري" راجل ويعرف ربنا بلاش تجسى عليه .. بس انت مكنتش بتسمع لحدا واصل قال "عبد الرحمن" بأسى:

-كان الغضب والشك عميني .. والكلام اللى كنت عم بسمعه مكنش جليل .. كان لازم أعرف انه بجه راجل وادرى بصالحه .. كان لازم أبجى واثج فيه أكثر من اكده

قالت زوجته:

-خلاص يا حاج اللى فات مات .. ربنا يسامحنا كلياتنا .. كلياتنا أسأنا الظن فيه .. ربنا يجدرنا ونعوض بنته عن اللى عيملناه فى أبوها الله يرحمه

\*\*\*\*\*

دخل "سباعى" حجرة "جمال" بالمشفى وهتف قائلاً:

-كيفك دلوجيت يا ولدى

قالت زوجته الجالسه بجوار "جمال" تطعمه بيدها:

-امنيح يا حاج .. الحمد لله

قال "جمال" مبتسماً:

-امنيح يا بوى .. بس الوكل اللى عم توكلنى اياه أمأى هو اللى هيچصف

عمرى عن جريب

هتفت أمه فى عتاب:

-اكده يا "جمال" ده أنى عملالك الوكل ده بيدي ومرضيتيش حد يمد يده فيه

غيري

قال "جمال": "

-تسلم يدك يا أمأى

التفت "جمال" الى والده وقال:

-لسه مليجيوش اللي عيمل اكده يا بوى  
قال "سباعى" وهو يجلس على أحد المقاعد:  
-انى لسه جاى من الجسم دلوجيت .. وعرفت انهم ليجيو سلاح مرمى فى  
صندوق الزبالة اللي جنب البيت .. عم يدوروا دلوجيت السلاح ده بتاع مين  
وبيجولوا هيبعتوه المعمل الجنائي عشان يعرفوا الرصاصة انطخت منيه ولا لا  
قال "جمال" بغل:

-آه لو أعرف مين اللي طخنى كنت جتلتة بيدي  
قال "سباعى" نحذراً:

-سيب الحكومة تتصرف يا ولدى هما أدرى بشغلهم .. ولما يعرفوا اللي طخك  
هما اللي هيجيبوك حجك منييه محناش عايشين فى غابة عاد  
صمت "جمال" وهو يفكر بالتوعد لمن جرؤ وأطلق عليه النار يوم عرسه

\*\*\*\*\*

\*

عاد "مراد" فى المساء حاملاً أحد الملفات فتح الباب وتوجه أولاً الى مكتبه ..  
وضع الملف على المكتب وأخذ فى البحث عن قسيمة الزواج التى وضعها فى  
أحد أدراج المكتب .. قاطعه فجأة اتصال هاتفى ينبئه بخبر زرفت له عيناه  
الدموع .. وبكى قلبه ألماً وحسرة ... موت عمته "بهيرة"  
شعر "مراد" بالأمل فى قلبه وروحه لقد افتقد حضاناً حانياً لا تقل محبته لها عن  
محبة "ناهد" .. استرجع وقال:

-انا لله وانا اليه راجعون اللهم اجرنى فى مصيبتى واخلف لى خيراً منها  
قال "سباعى" بصوت باكى:

-الله يرحمها كانت ست مشفتش زييها .. الله يغفرلها ويرزقها الجنة  
قال "مراد" وهو يحاول أن يفيق من صدمته:

-هجيلكوا حالا يا عمى

قال "سباعى":

-بلاش تيجي يا ولدى .. عيلة المنفلوطي هيكون عينيهم مصحصحه لانهم  
هيبجوا عارفين ان أكيد "خيري" أو ولاده هيكونوا فى الدفنه

قال "مراد" بحزم:

-لازم أحضر دفنة عمتي يا عمى .. أنا جاي حالا

أغلق "مراد" الهاتف وهو يشعر بالحزن والأسى .. حملته قدماه بصعوبة الى أن توجه الى غرفة المعيشة حيث اجتمع الجميع وأنبأهم بهذا الخبر .. فتعالت الشهقات بالبكاء المرير .. كانت "مريم" تبكى تلك السيدة الطيبة من أعماق قلبها فالقد أحببتها ليس فقط لكونها أنقذتها من الزواج من "جمال" بل لأنها عمه "ماجد" لمست طيبتها وحنيتها فشعرت وكأنها افتقدت أمها للمرة الثانية .. أصرت "ناهد" على السفر مع "مراد" .. على الباب وقفت "سارة" تودعهما فالتفت "مراد" الى "سارة" الباكية قائلاً:

-مش هنتأخر يا "سارة" ان شاء الله هنرجع بكرة بالليل .. خلى بالك من أختك صمت قليلا ثم قال:

-ومن "مريم"

أومأت "سارة" برأسها والدموع تنهمر من عينيها..

دخلت "مريم" غرفة "مراد" وانهارت على الأريكة .. كانت تبكى "بهيرة" وتبكي الوضع الذى أصبحت فيه بمفردها .. فها هى منقذتها من هذا الزواج قد رحلت عن الدنيا .. جلست تسترجع وتدعو لها بالرحمة والمغفرة .. لم تشعر "مريم" بمضى الوقت وهى جالسه على الأريكة تحتضن قدميها الى صدرها .. أمسكت هاتفها الموضوع بجواها ونظرت الى الساعة التى تشير الى الثانية عشر الا خمس دقائق .. ياااه كم هى الآن فى أمس الحاجة لكلمة واحدة من كلمات "ماجد" .. تلك الكلمات التى تبث فيها الأمل وتحثها على الصبر وتطيب جروح روحها .. نظرت بلهفة الى تلك الأرقام وهى تتبدل كل دقيقة الى أن أتت اللحظة المنشودة .. قامت بلهفة وتوجهت الى الحقيبة الصغيرة التى تخفيها بين ملابسها فى الرف المخصص لها بالدولاب .. بحثت عن الخطاب الذى يحمل الرقم التالى .. أخذته بلهفة وجلست على الأريكة تحتضنه بين كفيها وتتعلق به كالغريق الذى يتعلق بقشة فى وسط بحر عميق مظلم .. همت بفتح الخطاب .. لكن يداها توقفت فجأة وتسمرت مكانها عندما وقع نظرها على الدبلة التى نقلتها "ناهد" من يدها اليمنى الى يدها اليسرة .. رفعت نظرها لتتنظر الى فراش

"مراد" وكأنها تنظر الى "مراد" نفسه .. توقف عقلها عن العمل للحظات ثم عاد ليعمل بسرعة جنونية .. أمن حقها أن تفتح هذا الخطاب ؟ .. هل هذا أمر صحيح ؟ .. أتعد هذه خيانة ؟ .. كيف خيانة وهذا ليس بزواج طبيعي ؟ .. حتى ولو لم يكن زواج طبيعي فهذا زواج أمام الله عز وجل ؟ .. هل لـ "مراد" عليها حقوق الزوج أم لا ؟ .. أليس من حق الزوج أن تحفظه في نفسها ؟ .. أيصح أن تكون متزوجة من رجل وتقرأ خطابات رجل آخر ؟ .. هل هذه خيانة ؟ .. ظلت الأسئلة تقفز الى عقلها بسرعة لدرجة لم تستطع معها الإجابة على أى منها .. كيف لا تقرأ خطابات "ماجد" ؟ كيف تحرم منها ؟ .. تلك الخطابات هي سلواها الوحيدة في هذه الدنيا؟ .. كيف تستطيع منع نفسها من فتح هذا الخطاب ومعرفة ما بثها اياه "ماجد" ؟ .. كيف تمنع نفسها من الشئ الوحيد الذى أبقاها محتفظة بعقلها بعدما ألم بها من مصائب ؟ .. كيف تمنع نفسها من الشئ الوحيد الذى يجعلها تتواصل مع "ماجد" كما لو أنه مازال حيا ؟ .. لكن كيف تخون "مراد" أمام الله إن كانت هذه بالفعل تعد خيانة ؟ .. أهذا فعلا محرم ؟ .. أهذه خيانة ؟ .. لا ولم ولن تكون خائنة .. تلك الكلمة القاسية لن تسمح بأن تتحدر لمستواها يوماً .. ظلت تحتضن الخطاب بين كفيها وفي عينيها ألم وحيرة كبيرة .. تقافزت العبرات من عينيها كل عبرة تصارع الأخرى لتسقط قبلها .. ظلت جالسه تحتضن الخطاب وهي لا تدري ماذا تفعل .. وأخيرا حسمت أمرها ونهضت وأعدت الخطاب مرة أخرى الى الحقيبة بأيدٍ مرتعشة دون أن تقرأه .. أغلقت الدولاب ووقفت أمامه تسند جبينها اليه وقلبها يعتصر ألماً وقهراً وهو يقول : أسفة حبيبي لم يعد يحل لى قراءة خطاباتك الآن لأننى أصبحت زوجة لآخر.

دُفنت "بهيرة" وقد زرفت عليها دموع الرجال والنساء .. كانت "بهيرة" تتمتع بالحكمة ورجاحة العقل والطيبة وكان لها شعبية كبيرة وسط القبيلة .. صلى الجميع صلاة الجنازة وشيعوا جثمانها .. شارك "مراد" فى دفن عمته وقلبه يبكى قبل عيناه .. ظل يدعو لها ويستغفر لها الى أن حثه "سباعى" على مغادرة المقبرة .. توجه الجميع الى بيت "سباعى" كبير عائلة الهوارى .. قدم "عبد الرحمن" واجب العزاء وجميع أفراد عائلة السمرى الذين أحزنهم فقد تلك المرأة .. تجمعت النساء أيضاً فى بيت "سباعى" وقامت زوجته بواجب الضيافة .. بكت الكثير من النساء لفقدائها فكل منهن تتذكر موقفاً طيباً من تلك المرأة فلکم

ساعدت المحتاجين ورفقت بحال المظلومين ونصرت المستضعفين فكانت مثلاً  
للمرأة الصالحة .. فانهالت الدعوات لها بالرحمة والمغفرة

\*\*\*\*\*

أمضت "مريم" ليلها ساهرة وقد جفاها النوم .. خرجت فى الصباح لتجد  
"نرمين" و "سارة" جالستان فى الحديقة فلحقت بهما .. وجلست بجوارهما ..  
قالت "نرمين" بصوت باكى:  
-مش قادرة أصدق انها ماتت واننا مش هنشوفها تانى  
تمتت "سارة" باكية:

-ربنا يرحمها

قالت "مريم" بتأثر:

-اللهم آمين .. بجد كانت ست طيبة أوى

ثم التفتت الى الفتاتان قائله:

-لازم تعملولها صدقة جارية يا بنات .. هو ده اللي هينفعها دلوقتى

وأمأت الفتاتان برأسيهما فى صمت .. قالت "مريم":

-بتصل بطنط "ناهد" كتير موبايها مقفول .. هقوم أتصل بجدو وأشوف الأخبار

ايه

قالت "سارة":

-اتصلى بـ "مراد"

نظرت اليها "مريم" وأمأت برأسها بتوتر .. فهي لا تعلم رقم "مراد" وحتى

لو علمت فما كانت ستجرو على الإتصال به .. اتصلت بجدها وعرفت منه أنهم

انتهوا من دفنها .. لحظات واتصل "مراد" بـ "سارة" واخبرها أنهم

سيضطرون للمبيت وسيحضرون فى الغد .. واتصل بمكتبه وأخبر سكرتيرته

بسفره اليوم وبأن تعمل على الغاء كل مواعيده واجتماعاته لهذا اليوم..

\*\*\*\*\*

-البقاء لله يا حبيبتي

قال "حامد" ذلك على الهاتف فهتفت "نرمين" بغضب وهي تغلق باب غرفتها جيداً:

-أفندم عايز ايه

قال "حامد": "

-تؤ تؤ اتكلمى معايا بإسلوب أحسن من كدة وإلا انتى عارفه كويس ايه اللى ممكن يحصل

أجهشت "نرمين" فى البكاء وقالت:

-انت عايز منى ايه حرام عليك .. "مراد" لو عرف هيقتلنى ويقتلك

قال "حامد": "

-وعشان ميعرفش هتعملى اللى هقولك عليه دلوقتى خاصة ان "مراد" مسافر يعني هتقدرى تتحركى بحرية

قالت برييه:

-اعمل ايه

قال "حامد": "

-هتدخلى زى الشاطرة مكتب أخوكى هتلاقى عليه ملف اسمه "دراسات مصنع

الملابس" هتجيبلى الملف وهكون مستنيكى فى العربية ادم الفيلا تيجي

تسلميني الملف وامسح أدامك الصور ولا من شاف ولا من درى

قالت "نرمين" وهي تعاود البكاء:

-انت عاوزنى اسرق اخويا

-تؤ تؤ عيب عليكى دى مش سرقة

قالت "نرمين" بحده:

-لو لقي الملف مش موجود هيسألنا كلنا

قال "حامد": "

-متقلقيش يا قلبى انا هاخذ منه نسخه وأرجعها لك تانى

قالت "نرمين" باكية:

-مش هقدر اعمل كده

قال "حامد" بغضب:

-طيب حلواوى سلام بأه عشان عايز ابعث رسالة مهمة لآخوكى تجيبه من

الصعيد على ملى وشه



هتفت "نرمين" بلهفه:

-لا استنى ارجوك اوعى تبعت حاجه لـ "مراد" ده هيموتنى

قال "حامد" ببرود:

-هستناكى ادم باب الفيلا الساعة خمسة .. خمسة ودقيقة هبعت صورك

لاخوكى .. سلام يا حبي

أجهشت "نرمين" فى البكاء وهى لا تدرى ماذا تفعل اتلبي طلبه منها .. أم  
تخاطر بأه يرى "مراد" تلك الصور التى تم التلاعب بها والتى بالتأكد ستثير  
جنونه!؟

\*\*\*\*\*

فى الخامسة الا ربع فوجئت "نرمين" برسالة من "حامد" يذكرها بموعدهما  
أمام الفيلا .. وأرفق مع الرسالة احدى الصور التى تم التلاعب بها فأجهشت فى  
البكاء وهى تقول:

-حسبى الله ونعم الوكيل

كان خوفها من رد فعل اخيها أكبر من حذرها وأكبر من قدرتها على التفكير  
بوضوح .. فدخلت المكتب وأخذت تبحث عن الملف المطلوب .. لم تستغرق وقتاً  
فى البحث فقد كان الملف موضوعاً فوق المكتب وهو أول ما وقعت عليها عيناها  
..أخذت الملف بأيدي مرتجفة .. وغادرت الفيلا دون أن يراها أحد .. مشيت فى

اتجاه البوابة وقدها تصطكان ببعضهما من شدة الخوف .. كانت تعلم بأنها  
تضيف الى رصيد أخطائها خطأ جديداً لكنها كانت تشعر بأنه ليس فى يديها حيلة  
فهى لن تخاطر بأن ينفذ "حامد" تهديده ويرسل الصور لـ "مراد" .. خرجت  
من البوابة لتجده قد اصطف سيارته على بعد أمتار جالساً أمام المقود وينظر  
اليها مبتسماً .. شعرت بالكره الشديد له .. وانقلبت كل ذرة اعجاب له فى قلبها  
الى احتقار .. توجهت الى السيارة وهى تنظر حولها خشية ان يراها أحد ثم  
فتحت باب السيارة ومدت يدها بالملف .. أمرها قائلاً:

-اركبي لحد يشوفك

قالت له بتوتر:

-لا خد الملف وامسح الصور

أخرج هاتفه وقال:

-اركبي هتخلى الناس تاخذ بالها مننا  
نظرت حولها وركبت خشية ان يراها أحد فى مثل هذا الوقت .. بمجرد ان دخلت  
السيارة أحكم اغلاق الأبواب آلياً .. فزعت "نرمين" وحاولت فتح الباب ففشلت  
نظرت اليه برعب فضحك قائلاً:

-وقعت فى المصيدة يا جميل

أجهشت "نرمين" فى البكاء وهى تحاول فتح الباب قائله:

-افتح الباب .. ارجوك افتح الباب

قال "حامد" وهو يخرج من جيبة قطعة قماش مغمورة بسائل مخدر:

-أخوكى خسرنى صفقة بالملايين كل ده عشان بوست موظفه عنده طيب يشوف  
بأه اللى هيحصل فى أخته .. أخته الحلوة اللى أنا واثق انها هتخاف تفتح بقها  
بكلمة واحدة

كانت كلماته مفعمة بالكرة والبغض .. أخذت "نرمين" بالصراخ لكن قبل أن  
تصل صرخاتها الى أحد أطبق على فمها وأنفها بالمخدر ففقدت وعيها .. أدار  
السيارة وانطلق بها...

لم تسير السيارة الا عدة أمتار ليضطر "حامد" الى الضغط على المكابح بعدما  
ظهرت أمامه "مريم" تمنعه من التحرك بسيارته وتضرب بيدها على السيارة  
من أمام وتصرخ مستجدة بالناس .. لم يستطع التحرك الى الأمام فحاول  
الرجوع الى الخلف لكن صرخات "مريم" قد لفتت انتباه أحد المارة فأقبل على  
السيارة من الخلف فصرخت به قائله وهى تشعر بالإهيار التام:  
-أرجوك الحقنى .. الراجل ده خاطف اختى

انضم اليهما أحد المارة فلم يستطع "حامد" التحرك بسيارته .. فبحركة سريعة  
فتح الباب ودفع "نرمين" منه فتحركت "مريم" من مكانها أمام السيارة وأخذت  
تبعد "نرمين" عن عجلات السيارة فإطلق "حامد" بأقصى سرعة .. جلست  
"مريم" بجوار "نرمين" تحمل راسها وهى تبكى:

"-نرمين" .. انتى كويسة .. ردى عليا عمل فيكى ايه

قال الرجل:

-شكلها اغمى عليها

حاولت "مريم" افاقتها ففشلت .. ساعدها الرجل على حملها داخل الفيلا شكرته  
وصرفته سريعاً .. فزعت "سارة" لرؤية "نرمين" فى هذه الحالة:

"-نرمين" .. ايه اللي حصل يا "مريم" .. أغمى عليها ولا ايه ؟

قالت "مريم" بلهجة امرأة:

-خليكي معاها هقفل البوابة وأرجعك

خرجت "مريم" مسرعة وتأكدت من غلق البوابة جيداً ثم عادت ادراجها .. قالت لـ "سارة": "

-الدكتور اللي جالى يوم ما تعبت ده قريبكوا مش كدة

قالت "سارة" وهى تبكى:

-أيوة قريينا ده "أحمد" ابن خالتي

قالت "مريم" لهفة:

-بسرعة اطلبه خليه ييجي

بعد فترة بدأت "نرمين" فى الإفاهة نظرت الى ما حولها بفرع وأخذت تصرخ وتبكي أخذتها "مريم" فى حضنها قائلة:

-متخفيش يا حبيبتي انتى فى البيت

قالت "سارة" باستغراب:

-هى ملها مفزوعة كدة

قالت "مريم": "

"-سارة" روى هاتيلها كوابية مائة لو سمحتى

تعلقت "نرمين" بـ "مريم" وكأنها تخشى عودة "حامد" من جديد .. هدأت "مريم" من روعها وقالت:

-الدكتور قريبكوا جاى دلوقتى .. هنقوله ان اغمى عليكى .. ماشى .. متجبيش

سيرة عن اللي حصل لحد ما أفهم منك الموضوع

أومات "نرمين" برأسها .. بعد نصف ساعة حضر "أحمد" .. كان شاباً فى الخامسة والعشرين متوسط الطول ابيض البشرة ذو عينين رماديتين .. قالت له "مريم": "

-عايزين بس نطمن عليها لانها تعبت شوية واغمى عليها

نظر "أحمد" الى "نرمين" التى يبدو عليها آثار البكاء فشرحت له "مريم" قائلة:

-هى زعلانه على موت عمته الله يرحمها

أجهشت "نرمين" فى بكاء حار فجلست "مريم" بجوارها وعانقتها .. فقال

"أحمد: "

-متقلقيش هي بس تريح نفسها وتأخذ الدواء ده وان شاء الله هترتاح كتير

أخذت "مريم" منه الروشته وشكرته .. فقال:

-هو "مراد" لسه فى الصعيد مش كدة

أومأت برأسها فقال:

-لو تحبوا أستنى معاكوا هنا .. لولا ان ماما تعبانه ونايمة فى السرير كنت

كلمتها تيجي تعد معاكوا

قالت "مريم" بسرعة:

-لا مفيش داعى وكمان بلاش تقلق طنط .. هي "نرمين" شوية وهتبقى كويسة

أوما برأسه ونظر الى "نرمين" بقلق ثم قال:

-طيب لو احتجتونى فى أى وقت كلمونى

قالت "مريم": "

-شكراً

أوصلته للبوابة وأغلقتها خلفه جيداً .. وعادت الى "نرمين" .. كانت "سارة" "

بجوارها جلست "مريم" أمام "نرمين" وهما يتبادلان النظرات .. قالت "مريم" "

بهدوء:

-احكىلى اللى حصل بالظبط

نظرت اليها "نرمين" قائله بصوت مضطرب:

-انتى شوفتيني ؟

قالت "مريم": "

-كنت واقفة فى البلكونة وشوفتك وانتى خارجة من البوابة ولقيتك بتركيبي

العربية معاه جريت ساعتها عشان أشوف مين ده اللى خرجتني تركبي معاه ومن

غير ما تقولى لحد انك خارجة .. اول ما خرجت من البوابة شوفته وهو بيخدرك

فجريت على العربية واعدت اصرخ لحد ما اتنين كانوا مشيين جم وساعتها هو

خاف ورماكى من العربية

شهقت "سارة" وهى تقول:

-الكلام ده صح يا "نرمين" ؟

اجهشت "نرمين" فى البكاء وهى تقول:

-انا فى مصيبة .. "مراد" هيقتلنى

جلست "مریم" بجواها وعانقها قائله:

-حبيبتي اهدى واحكيلى كل حاجة عشان نقدر نتصرف

قصت عليهما "نرمين" كل شئ بالتفصيل من اول مكالمات "حامد" وخروجها معه الى ابتزازه لها بالصور .. ثم أضافت باكية:

-والله العظيم اللي فى الصور ده محصلش .. انا معرفش هو ازاي عمل كدة  
قالت "مریم" باهتمام:

-وريني الصور كدة

قالت "نرمين": "

-مسحتها

ثم قالت فجأة:

-لأ استنى آخر صورة اللي بعتهالى النهاردة ممسحتهاش

أخذت "مریم" تنظر الى الصورة جيداً بنظرات خبيرة ثم قالت بحزم:

-على فكرة واضح جداً انها متفبركة ده شغل فوتوشوب وشغل هواه كمان مش  
بروفيشنال

قالت "نرمين" وقد شعرت بالأمل:

-بجد يعني واضح انها مش حقيقية ؟

قالت "مریم" بثقه:

-ايوة لو دقتى فيها هتعرفى انها مش طبيعية .. وكمان انتى نسيتى ان أنا

ديزاينر يعني اقدر بسهولة اميز الفرق بين الصورة الأصلى واللى داخل عليها  
تعديلات

قالت "نرمين" باسى:

-بس "مراد" لو شافها مستحيل يصدق انها متعدلة

قالت "مریم" بحزم:

-انتى ليه فكرتى بالشكل ده يا "نرمين" .. ليه فكرتى انه هيقتلك وليه فكرتى

انه مش هيصدق .. أظن اخوكى عارفك كويس وعارف اخلاقك .. ايوة انتى

غلطتى وكان المفروض تعترفى بالغلط ده بدل ما تصلحى الغلط بغلط اكبر ..

الراجل ده كان هيفضل يبتزك طول عمرك ومكنش هيقف عند حده أبداً .. عارفه

ليه ؟ .. لانه عرف واتأكد انك ضعيفة وجبانة ونقطة ضعفك هى خوفك من

أخوكى .. عشان كدة قدر يستغل نقطة ضعفك دى كويس .. أما لو كنتى من

البداية لما عرفتى انك غلطى جيتى لـ "مراد" واعترفتيله بكل حاجة مكنش  
الراجل ده قدر يبتزك وكان "مراد" قدر يوقفه عند حده .. لكن للاسف انتى  
بضعفك وبخوفك سمحتيله انه يتحكم فيكى ..الحل كان فى انك تعترفى بغلطك  
وستحملى عقاب اخوكى ساعتها .. كان الموضوع هيكون أسهل بكتير أوى من  
كل اللى حصل ده ..

قالت "نرمين" بأسى:

-انا كنت خايفة .. كنت خايفة "مراد" يعرف

قالت "مريم" بحزم:

-وخوفك ده خلاه يتحكم فيكى أكثر وطلباته تزيد أكثر وخلاكى تسرقى ملف من  
مكتب اخوكى وخلاكى تروحي تقابليه أدام الفيلا وتركبي جمبه فى العربية ..  
وأظن انتى عرفتى دلوقتى ايه اللى كان ناوى يعمله .. ولو كان ده حصل كان  
هيفضل برده يبتزك لانه عرف انك ضعيفة وهتخافى تحكى لاخوكى وكنتى  
هتفضلى فى الدوامة دى طول عمرك .. يبأه ايه الأسهل ..؟؟ انك تعترفى بغلط  
صغير وتحملى عقابك عليه .. ولا تتمادى وتصلحى كل غلطة بغلطة أكبر وأكبر  
؟؟ وتضيعى نفسك وحياتك وتسمحي لواحد حقير زى دة انه يتحكم فيكى؟؟

قالت "سارة" بقلق:

-طيب والحل دلوقتى

قالت "مريم" بحزم:

-لازم اخوكوا يعرف .. محدش هيوقفوا عند حده غيره

قالت "نرمين" باكية:

-طيب نحاول نحل الموضوع مع بعض وانتى يا "مريم" ممكن تتصلى بـ

"حامد" وتهدييه

قالت "مريم" بصرامة:

-اللى زى ده عايز راجل يقفله .. لو أنا اتصلت هيعرف ان أنا كمان خايفة من

"مراد" .. وهيعرف انه قدر يلمس نقطة ضعفنا كلنا .. ومستحيل هيتراجع ..

وحتى لو تراجع .. اللى زى ده لازم يتربى .. لازم يعرف ان مش من الساهل انه

يتعدى على حرمة غيره .. مينفعش واحد زى ده نسكت عليه .. لازم يتربى

ويتعلم الادب

نظرت الى "نرمين" قائله:

-نامى دلوقتى وبكرة لما "مراد" ييجى انتى بنفسك هتحكيله كل حاجة  
قالت "نرمين" بضعف:

-مش هقدر احكيه .. قوليله انتى يا "مريم"

نظرت اليها "مريم" وقالت بإصرار:

-لا يا "نرمين" انتى اللى هتحكيله .. يسمع منك احسن ما يسمع منى أو من أى  
حد تانى

دثرتها "مريم" وبقيت بجوارها الى ان نامت .. ودخلت غرفة "مراد" وهى  
تفكر فى هذا المأذق الذى وقعت فيه "نرمين."

\*\*\*\*\*

فى اليوم التالى اتصل "مراد" بـ "سارة" ليخبرها بأنه و "ناهد" فى طريقه  
الى القاهرة .. ظلت "نرمين" تبكى طوال الوقت "وسارة" و "مريم" بجوارها  
يهدونها .. انتفضت بفرع عندما سمعت صوت سيارة "مراد" .. نزلت "مريم"  
وفتحت البوابة التى تغلقها طول الوقت بإحكام .. توقف "مراد" بسيارته ونظر  
اليها قائلاً:

-قافلين البوابة بالنهار ليه

قالت "مريم" وهى تتحاشى النظر اليه:

-عادى

سبقها "مراد" بسيارته التى اوقفها أمام باب الفيلا نزلت "ناهد" وسلمت عليها  
"مريم" قال "مراد" وهو يعود لركوب سيارته:

-انا راجع المكتب يا ماما

لفت "مريم" بسرعة حول السيارة وقالت له:

-لا .. لو سمحت فى حاجه لازم نتكلم فيها

تركتهما "ناهد" يتحدثان معاً وصعدت الى غرفتها .. نظر اليها "مراد" بقلق  
وقال:

-فى ايه

بلعت "مريم" ريقها بصعوبة كانت تخشى تلك المواجهة ولكنها تعلم أنها شئ  
لابد منه .. قالت بهدوء:

-ممکن نتکلم فى مکتبک لو سمحت-

نزل "مراد" من السیارة وهو یرمقها بنظرات متفحصه .. سبقها الى المکتب فقالت:

-ثوانى وراجعہ

لم يتکلم "مراد" بل سدد اليها نظرات تريد اختراقها لتصل الى معرفة ما يحدث .. سعدت "مریم" الى غرفة "نرمين" وقالت:

-يلا يا "نرمين" .. أخوكى مستتينا فى المکتب

قالت "نرمين" بفرع:

-قولتيله حاجه

قالت "مریم" وهى تنظر اليها بشفقة:

-لا يا حبيبتي قولتلك الاحسن انتى اللى تحكيه بنفسك

امسكتها من يدها وسحبته ورائها .. كانت "نرمين" تشعر بأن قبلها على وشك

التوقف من شدة الرعب .. دخلتا الى غرفة المکتب وأغلقتہ "مریم" خلفها ..

نظرت "مریم" الى "مراد" الذى وقف وقد شبك يديه خلف ظهره وأخذ ينقل

نظره بينهما فشعرت بالرعب هى الاخرى وعذرت "نرمين" فى خوفها .. لم تعد

قدما "نرمين" قادرتان على حملها فجلست .. قال "مراد" بصرامة:

-فى ايه .. ايه اللى بيحصل بالطبط

اقتربت منه "مریم" وقالت بهدوء وهى تحاول أن تخفى توترها:

"-نرمين" عايزة تقولك حاجه .. بس لو سمحت خليك هادى واسمع كل كلامها

للاخر .. هى هتحكىك بنفسها .. يعنى محدش فتتك عليها .. لا .. هى اللى جتلك

تتکلم بنفسها

التفتت "مریم" لتتصرف فنادتها "نرمين" قائله بصوت باكى:

-لا يا "مریم" عشان خاطرى متمشيش

اعادت "مریم" ادراجها .. نظر "مراد" الى "نرمين" وقال بقلق:

-فى ايه يا "نرمين"

نظرت "نرمين" الى "مریم" التى أومات برأسها تشجعها على الكلام .. فاخذت

نفساً عميقاً وهى تحاول التماسك .. واخذت تقص عليه كل شئ بصوت مرتجف

مبحوح من كثرة البكاء .. انتهت من كلامها واران الصمت فى الغرفة لا يسمع

فيها الا صوت عقارب ساعة الحائط .. ما هى الا لحظات من السكون قبل أن



تهب العاصفة .. صاح "مراد" وهو يمسكها من ذراعها ليووقفها بقوة:  
-بتقولى ايه .. ايه اللى انتى بتقوليه ده  
اسرعت "مريم" تحاول نزع ذراعها من يده وهى تقول بلهفه:  
-براحة عليا .. هى غلظت ومعرفه بده وجت حكيتك بنفسها  
بدا وكان "مراد" لم يسمع كلمة مما قالتها "مريم" واشتدت قبضته على ذراع  
"نرمين" الى ان صرخت وبكت من الألم وهو يصرخ قائلاً:  
-دى التريبة اللى انت اتربتيها .. دى الاخلاق اللى علمنهاك .. مش مكفيكى  
مقابلتك له راحه كمان تركبى معاه العربية .. افرضى كان قدر الحقيير ده انه  
يخطفك .. عارفه كان هيحصل فيكى ايه يا "نرمين"  
بدا وكأنه سيهم بضربها .. بكت "مريم" وهى تحاول تخليصها من قبضته وهى  
تقول:

"-مراد" لا يا "مراد" عشان خاطرى .. هى غلظت بس عشان خاطرى  
متضربهاش .. هى جت اعترفلك هى لو كانت وحشة مكنتش اتكلمت .. سيبها  
بأه عشان خاطرى  
كانت نيران الغضب تشتعل داخل عيناه .. دفعته "مريم" بقدر ما استطاعت  
وخلصت "نرمين" من قبضته وقالت لها بلهفه:  
-بسرعة اطلعى على أوضتك  
خرجت "نرمين" مسرعة وهى تبكى استقبلتها "سارة" بالخارج وأصعدتها الى  
غرفتها ..وقفت "مراد" وبدا وكأنه يوشك على الفتك بشخص ما .. قالت له  
"مريم" وهى تتحدث بسرعة:  
-فكر قبل ما تعمل اى حاجه .. ما تأديش نفسك مامتك واخواتك ملهمش غيرك  
..لو اشتكيتته انا هشهد عليه ودول كذا قضية فى بعض خطف وابتزاز يعنى  
هيورح فى داهية ان شاء الله  
بدا وكأنه لم يسمع كلمة مما قالت .. كانت تعبيرات وجهه تشع غضبا ويضم  
قبضتى يده بقوة .. ثم خرج مسرعاً متوجهاً للخارج .. شعرت "مريم" بالفرع ..  
خشت أن يتهور ويقتل "حامد" .. أسرع خلفه بعدما أخذت طرحة لها كانت  
تركتها فى غرفة الجلوس لفت بها شعرها ونزلت مسرعة وفتحت باب السيارة  
وركبت بسرعة قبل أن ينطلق .. كانت عيناه تشعان غضباً بدا وكأنه لا يشعر  
حتى بوجودها معه .. خرج من البوابه وانطلق بسيارته كالسهم .. توقف





أومات برأسها قائله:

-طبعاً بحبك يا "سامر"

قبل يدها وأخرج هاتفه واتصل بصديقين له ثم التفت اليها قائلاً:

-حالا وهيكونوا هنا

وبالفعل كما لو كان قد اتفق معهما مسبقاً .. لم يمضى الكثير من الوقت حتى أتى صديقه .. ليشهدان على ما أسموه زواجاً .. وتركوا الإثنين لينعمان بليتهما الأولى فى هذا الزواج الباطل والذى افتقد شرطين مهمين من شروط الزواج الصحيح .. الشرط الاول هو الاشهار بين الناس والذى لم يتحقق فى هذا الزواج السري الذى اخفياه عن أعين الجميع .. وأما الشرط الثانى هو اذن الولى .. فلا يجوز للمرأة ان تزوج نفسها بنفسها فلا بد لها من ولى كآب أو أخ أو عم أو خال حتى ولو كانت المرأة بالغة .. فقد قال رسول الله صلى الله عليه وسلم (أيما امرأة نكحت بغير إذن وليها فنكاحها باطل فنكاحها باطل فنكاحها باطل) كررها ثلاث مرات .. وقال الله عز وجل فى سورة النساء (فَاتَّخِذُوهُنَّ بِإِذْنِ أَهْلِهِنَّ) .. لم يكن الشيطان ثالثهما فحسب .. بل كان الشيطان متوغلاً فى أعماق كل منهما يزين لهما المعصية فتتحول النار الى جنة .. والخطأ الى صواب .. والحرام الى حلال .. والقذارة الى لذة

\*\*\*\*\*

أوقف "مراد" السيارة أمام قسم الشرطة تحت انظار "مريم" التى أخذت تنظر الى ملابسه الممزقة الدامية وهى لا تدرى اهذه دمائه أم دمء "حامد" .. كانت تشعر بالفزع لكنها خشيت الحديث معه وهو فى هذه الحالة .. خرج من السيارة دون أن يلتفت اليها وأحكم اغلاق السيارة .. ظلت قابعه فى السيارة لأكثر من ساعة الى أن رآته يعود أدراجه بعدما قدم البلاغ .. سار بالسيارة فى صمت .. التفتت تنظر اليه بدا أهدأ وان كانت مازالت علامات الغضب على وجهه .. توقف بالسيارة فى مكان خالى تجهله .. ساد الصمت .. لم تحاول قطع هذا الصمت .. نزل من السيارة ووقف يستند على مقدمتها وقد أولاها ظهره .. تركته لفترة طويلة واقفاً هكذا .. ثم نزلت من السيارة وتقدمت منه ببطء وحذر .. وقفت بجواره .. ثم قالت بصوت هادئ:

-انت كويس

لم يجيبها ولم يلتفت اليها .. فقالت:

-ممكن لو سمحت موبايلك أطمئنهم علينا زمانهم قلقانين  
بدا وكأنه لم يسمعها .. ثم بعد لحظات .. أخرج هاتفه من جيبه وأعطاه لها دون  
أن ينظر اليها .. أخذت الهاتف وبحثت فى سجل المكالمات الصادرة فقد تذكرت  
انه اتصل بـ "سارة" وهو على الطريق .. ثم ابتعدت قليلاً واتصلت بها:  
-أيوة يا "سارة"

- .....

-أنا معاه

- .....

-ايوة كويس

-.....

-راح للرجال ده وبعدين راح القسم قدم بلاغ

- .....

-طيب ماشى لو فى جديد هبلغكوا .. بس طمنى طنط "ناهد" زمانها قلقانه

- .....

-ماشى .. مع السلامة

أنهت "مريم" المكالمة وعادت لـ "مراد" مدت يدها بالهاتف .. فلم يلتفت اليها  
..أعادت يدها الممدودة وهى تتطلع اليه .. كانت تعلم بأنه يشعر بشعور قاسى  
للغاية .. صدمته فى تصرفات أخته و فى تصرفات هذا الرجل الذى يقول أنه  
صديق "مراد" .. بالتأكيد لم يكن ليتخيل ان يصدر منه شئ كهذا .. ثم خوفه  
وفزعاه على اخته وما كان سيحدث لها لولا ان نجاها الله وحفظها .. ظلت واقفه  
بجواره ساكنه للحظات .. ثم تركته وعادت الى السيارة وهى تشعر بالوهن  
والإرهاق من تلك الاحداث المتلاحقة .. امضى عدة دقائق واقفاً ساكناً .. ثم رأته  
يلتف ويركب بجوارها .. ظنت بأنه سينطلق بالسيارة .. لكنه نظر اليها وتطلع  
الى ملابسها قائلاً بصوت هادئ:

-انت ازاي خرجتى كدة ؟

نظرت "مريم" بإضطراب الى ملابسها .. فقد كانت ترتدى عباءة استقبال داكنة  
اللون .. تصلح لأن ترتديها أمام الناس لولا أنها مخصرة قليلاً فأبرزت القليل من  
تفاصيل جسدها الأنثوى .. قالت بتوتر:

-دى عباية .. يعني فى ناس بتلبسها عادى  
قاطعها "مراد" قائلاً:

-ضيقة متخرجيش بيها تانى

تلاقت نظراتهما .. لمحت نظرة غريبة فى عيناه لم تألفها من قبل .. أشاحت  
بوجهها بسرعة وهى تشعر بقلبها تتعالى دقاته .. فعل المثل وأشاح بوجهه  
ونظر أمامه وانطلق فى طريقه الى البيت.

## الفصل الثامن عشر

سبقته الى الداخل .. استقبلتها "ناهد" قائلة بلهفه:

-ايه اللي حصل يا "مريم"

قالت "مريم" وقد بدا عليها الإرهاق:

-تعالى نطلع فوق يا طنط وهحكيك انتى والبنات

دخل "مراد" البيت ودون أن يتفوه بكلمة دخل مكتبه وأغلق الباب خلفه ..

صعدتا الى غرفة "نرمين" حيث كانت "سارة" جالسة بجوارها على الفراش ..

قالت "نرمين" بلهفه:

-ايه اللي حصل يا "مريم"؟

جلست "مريم" على أحد المقاعد وقالت:

-خرج من هنا وهو تعصب جداً كنت خايفة يتهور أو يعمل حاجة غلط .. معرفش

لقيت نفسي بجرى وراه وبركب معاه العربية .. راح للراجل ورجع بعد فترة

وهدومة مبهدة وعليها دم بس أعتقد ده دم الراجل مش دمه هو

ححتها "ناهد" قائلة:

-هااا وبعدين

قالت "مريم": "

-راح بعدها القسم يعني أكيد قدم بلاغ فيه

قالت "ناهد" بحرقة:

-حسبي الله ونعم الوكيل فيه .. أنا مش عارفه "مراد" عرف الأشكال دى منين  
قالت "سارة": "

-ما هو يا ماما الرجل ده بيبان محترم وابن ناس .. "مراد" هيعرف منين يعني  
ان أخلاقه كده .. أنا واثقه لو "مراد" كان عرف مكنش اتعامل معاه أبداً  
التفتت "ناهد" الى "نرمين" قائله بأسى:

-آخر حاجه كنت أتوقعها يا "نرمين" هى انك تعملى كده وتخونى ثقتنا فيكي  
بالشكل ده

انفجرت "نرمين" باكية وهى تقول:

-والله معرفش عملت كده ازاي .. أنا فعلا غلظت جامد .. عشان خاطرى  
متزعلش منى يا ماما مش هيبقى انتى كمان كفايه "مراد"  
اقتربت منها "ناهد" وأخذتها فى حضنها قائله:

-المهم انك تكونى عرفتى غلطتك يا "نرمين" ومهما حصل متكرريهاش تانى  
أبداً .. أنا عارفه ان "مراد" شديد عليكوا بس ده لمصلحتكوا يا بنتى .. الدنيا  
معدتش أمان .. ودلوقتى متقدريش تميزى بسهولة بين الكويس والوحش .. ربنا  
يحفظكوا يا بنتى انتوا وبنات السلمين  
رفعت "نرمين" رأسها وقالت بأعين دامعه:

"-مراد" عمره ما هيسامحنى أبداً

ربتت "ناهد" على رأسها وهى تقول:

-اصبري عليه اكيد اللي حصل مكنش سهل عليه

قامت "مريم" لتتوجه الى غرفة "مراد" .. ما كادت تدخل الغرفة حتى انتبهت  
أنها مازالت تحمل هاتف "مراد" فى يدها .. فتركته فوق الكودينو .. ودخلت  
لتأخذ دسماً عليها تريح أعصابها قليلاً .. خرجت وهى تفكر فى الأحداث التلاحقة  
التي حدثت فى اليومين الماضيين .. توقفت أمام هاتف "مراد" الذى يضى  
ويطفئ فى صمت .. ترددت للحظة ثم أمسكته وتوجهت الى الأسفل .. طرقت  
الباب بهدوء .. لم تسمع صوتاً .. همت بالمغادرة عندما فتح الباب .. نظرت اليه  
كانت تبدو علامات التعب واضحة جلية على وجهه .. وكأنهما كبيراً يؤرقه ..  
قالت بصوت خافت وهى تمد يدها بالهاتف:

-موبايلك

أخذه "مراد" منها وقال وهو يفسح لها الطريق:

-ادخلى عايزك

توجست خيفه ودخلت وهى تشعر بالتوتر .. سبقها وجلس الى أحد الأرائك أمراً  
اياها أن تغلق الباب .. فعلت فأشار لها بالجلوس على مقعد أمامه ففعلت وهى  
تشعر بالتوتر .. نظر اليها قائله:

-عايز أسمع منك اللى حصل بالتفصيل

قالت "مريم": "

"-نرمين" قالت كل حاجه

قال بحزم:

-عايز أسمع منك انتى

تحدثت "مريم" وروت له كل ما حدث وكل ما أخبرتها به "نرمين" .. ساد  
الصمت بينهما الى أن قال:

-انتى واثقه انه معملهاش حاجه

قالت "مريم" بسرعة:

-أيوة واثقه أنا كنت شيفاهم من فوق .. وأول ما لقيتها خرجت من الفيلا وبتفتح  
باب العربية نزلت جري .. وأول ما خرجت من البوابة شوفته وهو بيخدرها  
وساعتها جريت وقففت أدام العربية وصرخت لحد ما فى اتنين كانوا ماشيين  
ساعدونى

كان "مراد" يستمع اليها وهو يعنى النظر اليها .. ثم قال وكأنه يلوم نفسه:  
-دى غلظتى انى مش حاطط سيكيوريتى على البوابة

قالت "مريم": "

-قدر الله وما شاء فعل .. الحمد لله ان الموضوع جه على أد كده

أوماً "مراد" برأسه فقالت "مريم" بشئ من التردد:

-تسمحلى أقول حاجة

نظر اليها وأوماً برأسه .. فقالت:

-أنا معاك ان "نرمين" غلظت وغلظت جامد كمان .. بس ده ميمعش انك

مشترك معاها فى الغلط ده حتى لو كان بنسبه بسيطة

عقد "مراد" ما بين حاجبيه قائلاً:

-ازاى يعنى؟



قالت "مريم" بثبات:

-أنا عارفه انك بتخاف على اخواتك البنات ومعاك حق فى كدة .. بس مبتصاحبهمش ليه بدل ما تخليهم يخافوا منك بالشكل ده .. "نرمين" كانت مرعوبة منك وخايفه انك تموتها .. أيوة لازم تخاف منك وتحترمك بس مش لدرجة الرعب اللى هى عايشة فيه ده .. انت لو كنت صاحبته كانت حكتك ومخافتش أوى من رد فعلك .. كانت هتحس انك هتتفهمها وتعرفها غلطها .. انت بتتعامل مع اخواتك بطريقة ناشفة أوى .. هما بنات وتقدر تكسبهم بسهولة لو بقيت لين شوية معاهم  
انهت كلامها وهى تشعر بالتوتر غير قادرة على تنبؤ ردة فعله .. بدا وكأنه يفكر فيما تقول .. فأضافت:

-أنا اسفه لو كنت اتدخلت فى حاجه متخصصيش .. بس أنا بحب "سارة" و "نرمين" جداً ويهمنى مصلحتهم  
قال فجأة وهو ينظر اليها ويضيق عيناه:  
-ليه؟

قالت بدهشة:

-ليه ايه؟

قال "مراد": "

-ليه بتحبهم أوى كدة لدرجة انك تعملى كل ده عشان "نرمين"؟

قالت "مريم" بصدق:

-لانى بحس انهم اخواتى فعلا .. وبعدين أنا معملتش حاجه .. أى حد مكاتى كان اتصرف كده

أسند "مراد" ذراعيه الى قدميه وأمال بجسده مقترباً منها ناظراً اليها بتمعن قائلاً:

-أيوة كان أى حد هيتصرف زيك لو شاف "نرمين" واحد بيخطفها .. لكن أنا مش بتكلم عن كده .. أنا بتكلم عن انك دريتي عليها أدام "أحمد" وفهمتيه انها أغمى عليها .. واهتميتي بانها تحكيلى بنفسها اللى حصل عشان عقابها يكون أقل وعشان وقع الأمر عليا يكون أخف لما أسمعته منها هى صمتت ولم تدرى ما تقول فأكمل:

-معقول حبتهم الحب ده كله وخوفتى عليهم كده وانتي مبقالكيش اسبوع فى

البيت ده .. ده غير ان المعاملة اللي عاملتهاك كانت ممكن تخليكي تتصرف في العكس عشان تبينيلي ان أختي مش محترمة زي ما كنت فاكتر  
قالت "مريم" بحماس:  
" -نرمين" محترمة فعلاً .. هي غلظت أيوة بس عرفت غلظها واتراجعت عنه .  
بلاش تقسى عليها  
لمحت في عيناه نفس النظرة التي رأتها في السيارة فأشاحت بوجهها بسرعة ..  
لحظات وقال بصوت هادئ:  
-اطلعي نامي انتي تعبتى النهاردة  
خرجت "مريم" من الغرفة وعينا "مراد" تتابعانها الى أن أغلقت الباب .. قضى  
"مراد" ليلته ساهراً في غرفة المكتب الى أن حان موعد صلاة الفجر فصلى  
وصعد الى غرفته .. كانت "مريم" قد أنهت صلاتها وجلست في الشرفة تقرأ  
وردها .. سمعت صوت خلفها فالتفت لتجد "مراد" حاملاً ملف في يده وهو  
يقول:  
-لقيت الملف ده على السرير  
قالت "مريم": "  
-أيوة دة الملف اللي "نرمين" خدته من مكتبك  
قال باستغراب:  
-مش "حامد" خده منها ؟  
نهضت ووقفت قبالة قائله:  
-لأ لما زقتها من العربية الملف كان معاها ووقع منها .. ولما فاقت وحكتلى على  
اللى حصل قولت أكيد الملف ده مهم فنزلت جيبته والحمد لله كان لسه على  
الأرض محدش أخده  
لمحت "مريم" شيئاً لم تعتاد رؤيته من "مراد" .. رأت شبح ابتسامه على  
شفتيه .. ترى هل يبتسم لها حقاً أم خُيل لها .. لم ينطق بشئ .. توجه الى الداخل  
وأخذ دشاً وغير ملابسه وخرج متوجهاً الى سيارته تابعته "مريم" بعيناها وهو  
ينطلق بسيارته وهي تشعر بشئ غريب يراودها .. شئ جعلها تعقد ما بين  
حاجبيها في ضيق.

\*\*\*\*\*

داعبت نسمات الهواء شعر "سهى" الواقفة على ظهر اللانش .. فاقترب منها "سامر" وأحاطها بذراعيه .. ابتسمت مجاملة له .. لكن كان فى قلبها حيرة وخوف وقلق ليس له مثيل .. كانت تظن أنها ستتعلم بالراحة والسعادة عندما تتزوج من تحب .. لكن الله نزع البركة من هذا الزواج الذى يغضبه .. فكانت السعادة والراحة أبعد ما يكون عنها .. نظرت الى "سامر" الذى تشى تعبيرات وجهه بسعادة تفتقدها .. التفتت اليه قائله:

"-سامر" امتى هتيجي تتقدملى ؟

تغيرت ملامح وجهه فى لحظة .. من السعادة الى الضيق والحنق وأجاب بحده:  
"-سهى" فى ايه .. ده موضوع تفتحيه على الصبح كده فى أول يوم جوازنا نظرت اليه بقلق قائلاً:

-أنا خايفة أوى يا "سامر"

اقترب اليها قائلاً:

-حبيبتي ازاي تخافى وأنا معاكى .. مش عايزك تخافى من أى حاجة طول ما أنا جمبك

قالت له بلهفه:

-بجد يا "سامر" .. يعني مش هتبعد عنى أبداً

قبلها قائلاً:

-حد يقدر يبعد عن روحه .. انتى روحى يا "سهى"

ابتسمت له وهى تكذب شعور القلق الذى يخفق به قلبها وهى تحاول أن تفرض على قلبها السعادة فرضاً.

\*\*\*\*\*

-السلاح اللى تم استخدامه فى الجريمة مرخص بإسمك يا حاج "عبد الرحمن"  
قال وكيل النيابة هذه العبارة فى مكتبه .. فقال "عبد الرحمن" بفرع:

-كيف يعني .. كيف حوصل اكده

قال وكيل النيابة:

-ده اللى أثبتته المعمل الجنائي .. الرصاصة اللى انطخ بيها "جمال" كانت من

مسدسك اللي لجيناه مرمي فى صفيحة زباله جنب البيت  
قال " عبد الرحمن " بغضب:

-لا حول ولا قوة الا بالله .. كيف يعني .. أنى مستخدمتش السلاح ده واصل .. ولا  
أعرف كيف وصل لصفحة الزباله زى ما بتجول يا حضرة الظابط  
قال وكيل النيابة:

-ياريت تقول كل اللي تعرفه يا حاج عبد الرحمن .. انت بتعرف امنيح ان حاجه  
زى اكده ممكن توجع العيلتين فى بعض ويبجى الدم للركب  
هتفت " عبد الرحمن: "

-يمين بالله مخبرش كيف ده حوصل .. السلاح ده كان فى بيتي .. ومفيش راجل  
غريب هوب حدانا .. كيف يعني ده حوصل  
قال وكيل النيابة:

-يبجى ابنك " عثمان " هو اللي طخ " جمال "  
صاح " عبد الرحمن " قانلاً:

-كيف يعني .. وجات ما " جمال " انطخ كان " عثمان " جمبه .. كيف يعني  
هيطخه وسط الخلع دى كلياتها ومحدش هيشوفه  
قال وكيل النيابة:

-الشهود بيحولوا انك أول ما اجه المأذون وجبل ما ينطخ جمال سبتهم ومشيت  
..روحت فين يا حاج " عبد الرحمن "  
قال " عبد الرحمن بسرعة:

-روحت آخذ موافجة العروسة .. بنت ولدى  
قال وكيل النيابة:

-فى شهود على اكده

قال " عبد الرحمن " بحيره:

-مخبرش .. مخبرش حدا شافنى وأنى داخل البيت ولا لا .. بس ملحجتش أطلع  
حدا الحريم .. وسمعت ضرب النار فرجعت تانى ولجيت " جمال " غارج بدمه  
قال وكيل النيابة:

-للأسف هنضطر نحجزك عندنا يا حاج " عبد الرحمن " لحد ما نخلص تحجيج

هتف " عبد الرحمن: "

-لا حول ولا قوة الا بالله



صمت "سباعى" وهو يفكر فى كيفية الخروج من هذا المأذق والذى سيتسبب فى نشوب حرب ضروس بين العائلتين

\*\*\*\*\*

عاد "مراد" وقت الغداء على غير العادة .. فسعدت "ناهد" لرؤيته وقالت:  
-ايه ده مش متعودين نشوفك فى الوقت ده يعني  
قال "مراد": "

-سهرت طول الليل فقولت آجى أريح شوية  
ربتت "ناهد" على كتفه قائله:

-طيب كويس عشان نتغدى سوا

دخل "مراد" مكتبه .. أمرت "ناهد" بتجهيز الطعام . ثم نادى لـ "مراد" ..  
توجه "مراد" الى غرفة الطعام ليجد "سارة" فقط الجالسه .. جلس قبالة  
"ناهد" .. ثم ألقى نظرة على المقعدين الفارخين بجواره .. ونظر الى أمه قائلاً:  
-طبعا "نرمين" مش قادرة توريني وشها  
قالت "ناهد": "

-أيوة .. بتقولى مش عارفه ازاي هحطى عيني فى عينه بعد كده  
قال "مراد" بحزم وهو يبدأ فى تناول طعامه:

-أحسن خليها تتربى

صمت قليلاً ثم قال وهو يتحدث بلا مبالاة وكأن الأمر لا يعنيه:  
-فين "مريم" ؟

قالت "سارة": "

-بتتغدى مع "نرمين" فى أوضتها عشان متاكلش لوحدها  
عاد "مراد" الى اكمال طعامه ويبدو عليه التفكير والشروود

فى غرفة "نرمين" .. قالت بأسف:

"-مريم" لو تحبى تنزلى تتغدى معاهم انزلى  
ابتسمت "مريم" قائله:

-لا بالعكس أنا مبسوطة كدة .. عشان أعرف آكل براحتى

قالت "نرمين" باستغراب:

-بس مفيش حد غريب تحت

ثم قالت:

-ولا انتى لسه معتبرانى أنا وماما و "سارة" أغراب

شعرت "مريم" بالتوتر ودت لو قالت لها .. أخوكى هو الغريب بالنسبة لى  
وليس أنتن .. لكنها قالت:

-لا طبعاً أنا بحس معاكوا انى بين عيلتى .. ومش حساكوا غرب أبداً  
ابتسمت "نرمين" قائله:

"-مريم" لو كنت عملت أى حاجة تزعلك منى قبل كدة ياريت تسامحيني عليها  
ابتسمت لها "مريم" وقالت:

-لا أبداً يا حبيبتي معملتيش أى حاجة ضايقتنى  
قالت "نرمين" وهى تنظر اليها باعجاب:

-بجد يا "مريم" أنا بحبك أوى .. وقفى جمبي ولا كائنك أختى بجد ..دى لو  
كانت "سارة" مكنتش هتعرف تتصرف زيك كدة وتخرجنى من المشكلة دى  
قالت "مريم" مبتسمه:

-معملتش حاجة .. انتى أختى يا "نرمين" انتى و "سارة" وبجد بحبكوا أوى  
نظرت اليها "مريم" بحنان ودت لو قالت لها يكفينى أنك أخت "ماجد" لأعتبرك  
أنتى وأختك أختاى من دى ولحمى .. وأخاف عليكما مثلما أخاف على نفسى ..  
تحولت نظرات "مريم" الى الآسى وهى تتذكر أنها لن تلبث أن تضطر الى  
مغادرة هذا البيت .. والإبتعاد عن تلك الأسرة التى تشعر بأنهم أهلها وبأنها  
واحدة منهم.

\*\*\*\*\*

بعد الغداء .. جلس "مراد" مع "ناهد" و "سارة" فى الشرفة يحتسون الشاى  
الساخن .. بدا على "مراد" شئ من القلق .. ثم قال وهو يرشف من فنجانة:

-هى "نرمين" ناوية تزنب "مريم" جمبها ولا ايه  
قالت "ناهد" لـ "سارة":

-اطلعي شوفيها يا "سارة" وخليها تنزل تشرب الشاى معنا  
نهض "مراد" وهو يترك فنجانة قائلاً:

-لا خليكي أنا أصلاً طالع

صعد "مراد" للطابق العلوى .. هم بأن يطرق باب غرفة "نرمين" لكنه عزف عن ذلك وتوجه الى غرفته ليجد الشرفة مفتوحة .. اقترب منها ليجد "مريم" جالسة مستغرقة فى قراءة أحد الكتب حتى أنها لم تنتبه لوجوده خلفها .. كانت تضع بجوارها على المقعد الكبير كتاباً آخر .. انتفضت عندما رأت يد "مراد" تمتد لتمسك بالكتاب الموضوع بجوارها وأخذ يتفحص الغلاف .. لحظات .. ثم رفع نظره اليها قائلاً:

-أجاثا كريستى!

أشاحت "مريم" بوجهها وقد شعرت بالإرتباك .. فأكمل قائلاً:

-اختيار موفق .. أصلاً تشبهيها كثير

التفتت ورفعت رأسها تنظر اليه بتحدى قائله:

-تقصد انى عقلية اجرامية ؟

ضحك "مراد" حتى بدت نواجزه .. كانت تلك المرة الأولى التى تراه فيها ضاحكاً

وتسمع فيها صوت ضحكاته فبدا لها مشهداً غريباً فظلت تتطلع اليه .. انتهت

ضحكته بابتسامه صغيره وهو ينظر اليها قائلاً:

-لا أقصد غامضة ومليانه أسرار

خفضت بصرها وأعدت النظر الى الكتاب بيدها .. ظل واقفاً خلفها .. شعرت

بتوتر بالغ .. حاولت التظاهر بأنه غير موجود .. لكن عيناها كانتا تمر على

السطور دون أن تقرأها .. قال فجأة:

-خطيبك كان اسمه "ماجد" مش كده ؟

التفتت تنظر اليه وقد شعرت بخفقات قلبها المتسارعه .. أومأت برأسها بصمت

.. فسألها قائلاً:

-انتى قولتلى اتوفى من سنة مش كدة ؟

أومأت برأسها مرة أخرى وهى لا تدرى سر اهتمامه بمعرفة ذلك .. فسألها:

-و أهلك اتوفوا امتى ؟

نظرت "مريم" أمامها وقد ظهر فى عينيها سحابة حزن .. قالت بصوت خافت:

-من ٣ سنين

ظهر شئ من الحنان فى صوته وهو ينظر اليها قائلاً:

-ليه عيشتى لوحداك ؟ .. ليه ماعيشتتش مع أهلك فى الصعيد ؟

قالت "مريم" وهى تنظر اليه:



-مكنتش أعرفهم ومكانوش يعرفونى .. لا عمرنا زورناهم ولا عمرهم زارونا  
قال "مراد" باستغراب:

-ليه؟

ردت بحيرة:

-معرفش

أوما برأسه وترك الكتاب بجوارها كما كان وخرج من الشرفة ليتركها غارقة فى  
بحور ذكرياتها.

\*\*\*\*\*

عادت "سهى" الى منزلها ودخلت غرفتها وألقت بنفسها على الفراش وانفجرت  
باكية ..كانت تشعر بمشاعر كثيرة متضاربة .. لكن شعورها الأكبر والطاغى  
كان الخوف .. كانت تشعر بأنها أجمت فى حق نفسها .. حاولت كثيراً اخماد  
صوت الضمير بداخلها والذي تنجح دائماً فى اسكاته .. لكن هذه المرة فشلت فى  
اسكاته .. بل تعالى صوته أكثر فأكثر يشعرها بمدى جرمها فى حق ربها وحق  
نفسها وحق أهلها .. تعالى صوت هاتفها معلناً عن اتصال من "سامر" .. كانت  
تشعر بأنها لا تطيق مجرد سماع صوته .. لا تعلم كيف تولد هذا الكره والحقد  
اتجاهه بداخلها .. كيف وهى بالأمس كانت بين ذراعيه .. أغلقت هاتفها وجلست  
على فراشها تبكى كما لم تبكى من قبل.

\*\*\*\*\*

عاد "عثمان" من النيابة فاستقبلته والدته و "صباح" بلهفه .. قالت "صباح"

:

-ظمنى يا خوى .. بوى كيفه .. هيخرج امتى

قال "عثمان" وهو يجلس بتعب ويضع يده على مكان جرحه:

-معرفش هيخرج امتى .. ومانعيين زيارته .. أنا سيبتله اللبس والوكل مع

عسكري وجالى هيوصلهمله

هتفت أمه بحسرة:

-كان مستخبيلنا ده كله فين .. ابيه العمل دلوجيت يا ربي

قال "عثمان" بغیظ:

-أموت وأعرف كيف يعني "جمال" ينطخ بطبنجة أبوى .. كيف اللي طخ  
"جمال" جدر يدخل بيتنا وياخد الطبنجة منبيه  
ثم قال:

-كلمت المحامى .. بيجول انهم دلوجيت خدوا بصمات بوى وهيشوفوا هيا اللي  
كانت على الطبنجة ولا لا .. وخدوا بصماتى آنى كمان .. وخدوا بصمات ناس  
كثير من عيلتنا وعيلة الهواري  
قالت أمه بحرقه:

-أشوف فيه يوم اللي عيمل اكده ولبسها للراجل الغلبان ده .. ده راجل حجانى  
ويعرف ربنا يترمى فى التخشيبية اكده .. حسبي الله ونعم الوكيل  
قامت "صباح" مسرعة وتوجهت الى غرفتها وهى تشعر بالخوف والحيرة

\*\*\*\*\*

دخلت "ناهد" مكتب "مراد" وجلست أمامه قائله بجدية:

"-مراد" عايزين نتكلم شوية

أمال على المكتب ونظر اليها بإمعان قائلاً:

-خير يا ماما

صمتت "ناهد" قليلاً وأخذت تنقر على المكتب بأصابعها بعصبيه ثم نظرت اليه  
قائله:

-أنا عرفت انت اتجوزت "مريم" ليه يا "مراد"

رجع "مراد" بظهره الى الخلف وقال ببرود:

-ليه؟

هتفت "ناهد" بتوتر:

-عشان موضوعها هى و "جمال" .. والمشكلة اللي كانت هتحصل بين العيلتين

بدا عليه التفكير ثم نظر اليها قائلاً بثقه:

-كل اللي سمعته ده مش مظبوط

قالت "ناهد" بإستغراب:

-ازای یعنی

قال "مراد" بحزم:

-يعني الكلام اللي اتقال على "مریم" مش مضبوط .. دی لعبة من "جمال"  
هتفت "ناهد" بدهشة:

-لعبة ازای یعنی .. وهيستفاد ايه من كدة

قال "مراد" بضيق:

-معرفةش .. بس عمتو قالتلى كدة .. وللأسف الله يرحمها ماتت قبل ما أعرف  
منها كل حاجة

فكرت "ناهد" قليلاً ثم قالت:

-بس انت وهى مش متجوزين برضاكم .. مش كدة يا "مراد" ؟

قال "مراد" بهدوء:

-أيوه احنا الاتنين اضطرينا نتجوز عشان المشاكل اللي كانت هتحصل  
تفرست أمه فيه قائله:

-دلوقتي بدأت أفهم

قال "مراد" بدهشة:

-تفهمني ايه ؟

قالت أمه بضيق:

-أفهم ليه انت ومراتك بعيد عن بعض .. وبتتعامل معاك بحذر أكنك واحد غريب  
عنها .. وانت بتتعامل معاها أكنها واحدة متخصصكش  
ثم أضافت بعصبية:

-وناويين بأه التمثيلية دي تستمر لحد امتى ؟

زفر "مراد" بضيق وقال بنفاد صبر:

-ماما مش وقت الكلام ده دلوقتي .. لو سمحتى نأجل الكلام ده بعدين .. أنا اللي  
فيا مكفيني

قالت "ناهد" وهى تنهض:

-ماشى يا "مراد" براحتك .. مش عارفه هلاقيها منك ولا من اخواتك

قال "مراد" يوفقها:

-ماما

التفتت "ناهد" فقال "مراد" بتعبيرات جامدة:  
" -مريم" متعرفش بموضوع رجلى  
تجمدت "ناهد" فى مكانها وهى تنظر اليه .. فأكمل قائلاً بحزم شديد:  
-ومش عايزها تعرف .. أبداً  
أومأت برأسها بحزن والدموع تتلألأ فى عينيها .. خرجت وتركت "مراد" غارقاً  
فى التفكير.

\*\*\*\*\*

قامت "مريم" من على الفراش فى حجرة "نرمين" قائله بصوت ناعس:  
-أنا هدخل أنام بأه  
قالت "نرمين" برجاء:  
-خليكي شوية يا "مريم"  
قالت "مريم" وهى تفتح عينيها بصعوبة:  
-بجد خلاص جبت أخرى أول مرة أسهر كدة  
ثم أضافت ضاحكة:  
-يلا تصبى على خير أشوفك بكرة أحسن شكلى هنام زى الحصان وأنا واقفة  
ابتسمت "نرمين" قائلاً:  
-وانتى من أهل الخير  
توجهت "مريم" الى غرفة "مراد" .. رأت الضوء يتسرب من تحت الباب  
فطرقت الباب الى أن أذن لها بالدخول .. دخلت "مريم" وأغلقت الباب خلفها  
لتجده جالساً مكانها على الأريكة يقرأ أحد الكتب فى يده .. وقفت مكانها وهى فى  
حيرة من أمرها .. رفع رأسه ونظر اليها قائلاً:  
-ازى "نرمين" دلوقتى ؟  
قالت "مريم": "  
-كويسة الحمد لله .. أحسن كثير  
أوما برأسها ثم عاد ينظر الى كتابه متجاهلاً اياها تماماً .. قالت "مريم": "  
-على فكرة فى حاجه جت فى بالى النهاردة  
رفع عينه اليها يحثها على الكلام فأكملت:

-اللى اسمه "حامد" ده .. ايه اللى خلاه يعرف انك مسافر الصعيد فى اليوم ده  
الذات .. وكمان الملف اللى طلبه من "نرمين" عرف منين ان الملف ده فى  
البيت مش فى الشركة

بدا على "مراد" التفكير ثم نظر اليها قائلاً:  
-تقصدى ايه ؟

قالت "مريم": "

-أظن والله أعلم فى حد بيساعده وبينقله أخبارك

قال "مراد" شارداً:

-والأغرب من كده ان الملف ده بالذات جفته معايا البيت فى آخر يوم كنت فيه  
فى الشركة قبل ما أسافر  
قالت "مريم" بحماس:

-كده يبقى أكيد فى حد بيساعده

أوماً "مراد" برأسه وقد بدا عليه أنه اقتنع بكلامها وقال:

-بكرة هشوف الموضوع ده

عاد ينظر الى كتابه وكأن شيئاً لم يكن .. قالت بتوتر:

-فى حاجة تانية كنت عايزة أتكلم فيها

رفع نظره اليها مرة أخرى .. فقالت "مريم" بثبات:

-دلوقتى عمتو "بهيرة" الله يرحمها .. هى اللى كانت هتحل مشكلتنا دى .. وأنا  
كنت منتظرة انها ترجع القاهرة عشان الموضوع ده يتحل .. أقصد يعنى الوضع  
اللى احنا فيه ده

بدا وجهه خالياً من أى تعبير فأكملت قائله بتوتر:

-أنا شايفه ان خلاص كده .. نخلص من الموضوع ده .. من غير ما حد من

أهالينا فى الصعيد يعرف حاجه .. وأرجع بكرة على بيتي

ظلت نظرات "مراد" اليها جامدة .. احتارت فى تفسير معناها .. وأخيراً تحدث  
قائلاً:

-لا لسه شوية

قالت بحزم:

-لا مفيش داعى نستنى أكثر من كدة .. وطالما أهالينا مش هيعرفوا حاجة يبقى

خلاص مفيش مشاكل

قال "مراد" وهي يعاود النظر الى كتابه:  
-لا مش دلوقتي لما أتأكد ان مفيش مشاكل هتحصل  
قالت بحماس:

-مفيش مشاكل هتحصل .. طالما محدش منهم هيعرف حاجه  
قال "مراد" بحزم وهو ينظر اليها:

-قولتلك مش دلوقتي أنا مش هخاطر ان مشكلة تحصل .. الأفضل نأجل  
الموضوع ده شوية

تهدت "مريم" بضيق .. تابعها "مراد" بنظراته المتفحصه .. قالت "مريم"  
بحده:

-طيب لو سمحت عايزة أنام

ظهر المرح فى عيني "مراد" وقال بخبث:

-عايزانى أنيمك يعني ؟

نظرت اليه بدهشة وقد احمرت وجنتاها خجلاً وهتفت قائله:

-أقصد الكنبه .. انت أعد على الكنبه

اختفى المرح من عينيه وقال ببرود وهو ينظر الى كتابه:

-نامى على السرير

نظرت الى السرير بدهشه ثم عادت تنظر اليه هاتفه بحده:

-لا

قال "مراد" بإصرار:

-قولتلك نامى على السرير

شعرت "مريم" بالإضطراب والتوتر كيف بإمكانها النوم في فراشه .. شعرت  
بالضيق فحملت أحد كتبها ودخلت الى الشرفة تحت أنظار "مراد" التي تتبعها ..  
جلست على المقعد الكبير بالشرفة ورفعت قدميها بجوارها وأسندت رأسها الى  
ذراع المقعد وهي تقرأ كتابها .. لا تدري كم مر عليها من الوقت قبل أن يغلبها  
النعاس وتغط في نوم عميق .. نهض "مراد" من مكانه وتوجه الى الشرفة ليجد  
"مريم" نائمة وهي تحتضن الكتاب المفتوح .. اقترب منها بحذر وأخذ الكتاب  
من بين يديها برفق شديد .. كانت "ناهد" تهتم بغلق نافذة غرفتها عندما رأت  
"مراد" داخلاً الشرفة وهو يحمل غطاءه وغطاء "مريم" وأخذ يدثرها بهما  
جيداً وبرفق خشية ايقاظها .. أحكم وضع الغطاء عليها وهو يرمقها بنظرات

حانيه .. أزاح بأصابعه خصلة من شعرها سقطت على وجهها بنعومة .. ثم أرجع ظهره للخلف يستند به على سور الشرفة وظل ينظر اليها ويتأملها نائمه ..  
اغرورقت عينا "ناهد" بالعبرات .. وهى ترى ابنها يعامل "مريم" بتلك الرقه  
التي تنافى طباعه الجامدة الصارمة .. كانت تشعر بالصراع الكبير الذى يشعر به  
ابنها بداخله .. كانت تعلم أن بداخله خوف كبير .. خوف من الحب .. خوف من  
الرفض .. خوف من أظهار اعاقته .. خوف من أن تتخلى عنه حبيبته مرة أخرى  
.. خوف من أن يُجرح فؤاده مرة أخرى .. خوف من أن يسمح للحب بدخول قلبه  
.. حتى لا يتألم عندما يحين وقت الخسارة.

## الفصل التاسع عشر

استيقظت "مريم" فجراً .. لتجد نفسها نائمة فى الشرفة ومدثرة بالأغطية  
أزاحتهم وهى تنظر اليهم بدهشة .. قامت وهى تحملهم وتوجهت الى الداخل  
لتجد "مراد" نائماً على الأريكة بلا غطاء .. وقفت تنظر اليه بدهشة .. لحظات  
وانطلق منبه هاتفه .. فتركت الأغطية على الفراش ودخلت لتتوضأ .. خرجت  
لتجده مستيقظاً تجنبت النظر اليه تماماً .. قام وتوضأ ونزل للصلاة .. عاد  
"مراد" من المسجد ليجد "مريم" نائمة على الأريكة وقف بجوارها قائلاً  
بصرامة:

-مش قولتلك نامى على السرير

قالت دون أن تلتفت اليه:

-لا

أزاح الغطاء عنها فالتفتت اليه بحده .. فأشار الى السرير قائلاً:

-هتقومى ولا أشيلك

نظرت اليه بدهشة .. فتحرك وكأنه سيهم بحملها فانتفضت تقوم بسرعة من  
مكانها وتوجهت الى الفراش فى تبرم وضيق .. تمت بصوت منخفض:  
- عنيد

التفت اليها "مراد" قائلاً:

-بتقولى حاجه

نظرت اليه قائلاً:

-لأ

احتاجت لبعض الوقت قبل أن يستطيع النعاس أن يغلبها.

\*\*\*\*\*

فى الصباح التقى الجميع على طاولة الطعام بإستثناء "نرمين" .. قالت "ناهد"  
برفق:

"-مراد" خلاص بأه .. خليها تعد تاكل معانا

قال "مراد" وهو يتفحص جريدته الصباحية:

-هو أنا قولتلها متعدش

قالت "ناهد": "

-هى مضايقة من نفسها ومكسوفة منك

قال "مراد" دون أن يرفع رأسه:

-والمطلوب منى ايه

قالت "ناهد" برجاء:

-اتكلم معاها

طوى "مراد" الجريدة ونهض قائلاً:

-لما أرجع ان شاء الله .. أنا خارج .. مع السلامة

قالت "ناهد": "

-مع السلامة

كانت "مريم" شاردة تماماً .. فظلت "ناهد" تنظر اليها بامعان .. الى أن قالت:

-فى حاجه يا "مريم"

التفتت اليها "مريم" وابتسمت قائله:

-لا يا طنط مفيش حاجه

أومأت "ناهد" برأسها وغرقت فى شرودها هى الأخرى

\*\*\*\*\*



- واثقة ان "حامد" متصلش بيكي وأنا مسافر ولا انتى اتصلتى بيه ؟  
ألقي "مراد" هذا السؤال على مسامح سكرتيرته التى وقفت أمامه متوترة ..  
فقالت:

- أيوة واثقة يا فندم

قال "مراد" وهو يتفرس فيها:

- عارفه لو اكتشفت ان ده حصل منك هعمل فيكي ايه

قالت بإضطراب شديد:

- صدقتى يا أستاذ "مراد" متكلمتش مع أستاذ "حامد" ولا عرفته أى حاجه

عن حضرتك

ظل "مراد" تنظر اليها بشك ثم صرفها قائلاً:

-طيب اتفضلى على مكتبك

خرجت السكرتيرة مسرعة .. التفت "طارق" الى "مراد" قائلاً:

-انت شاكك فيها ؟

قال "مراد": "

-أيوة .. مفيش حد غيرها يعرف انى خدت ملف مصنع الملابس معايا البيت فى

اليوم ده بالذات

قال "طارق": "

-طيب هتعمل ايه

قال "مراد" بثقه:

-متشغلش بالك أنا هعرف أتصرف

قال "طارق" بدهشة:

-بس أنا مش فاهم انت بتقول ان فى حد بينقل لـ "حامد" أخبارك .. طيب هو

أصلاً كان هيقدر ياخذ الملف ازاي من جوه بيتك ؟ .. واياه اللى عرفك انه عارف

أخبارك ؟

قال "مراد" وهو يعود لعمله:

-متشغلش بالك يا "طارق" .. بس ركز مع "سامر" لانى شاكك فيه هو كمان

قال "طارق" وهو لا يفهم شيئاً:

-طيب .. مش هقول أى معلومات مهمة أدامه

خرج "طارق" من مكتب "مراد" .. فترك "مراد" ما بيده .. أسند ظهره الى المقعد وقد بدا عليه التفكير .. أخرج هاتفه وبدا عليه التردد قليلاً .. ثم اتصل بـ "سارة" قائلاً:

"- سارة" بقولك ايه

-أيوة يا أبيه

-تحبوا تخرجوا النهاردة ؟

قالت "سارة" بفرح:

-أيوة طبعاً نحب أوى .. نروح فين ؟

قال "مراد": "

-زى ما تحبوا

قالت "سارة" بسعادة:

-خلاص هتكلم معاهم هنا فى البيت ونتفق على المكان وأتصل بيك يا أبيه

-تمام يا "سارة" .. هستنى اتصالك

انتهت "سارة" المكالمة ثم توجهت الى الحديقة حيث يجلس الجميع وقالت بفرح :

-مش هتصدقوا .. "مراد" اتصل بيا وقالى هنخرج كلنا سوا وقالى كمان احنا

اللى هنختار المكان

هتفت "نرمين": "

-تبهرجى .. يعنى مي جيش يفسحنا الا وأنا وهو متخاصمين

قالت "سارة" بمرح:

-كويس هتبقى فرصة حلوة عشان تعتذريه وتصالحيه .. المهم دلوقتى هنروح

فين

قالت "ناهد" لـ "مريم": "

-تحبى تروحي فين يا "مريم" ؟

قالت "مريم" بمرح:

-زى ما تحبوا انتوا

هتفت "نرمين" بمرح:

-بصوا بأه أنا شايقة اننا نستغل الفرصة دى أسوأ استغلال ممكن .. أصلها

مبتكررش كتير

قالت "سارة" ضاحكة:

-نعمل ايه يعني؟

قالت "نرمين": "

-بصوا مش هو قال احنا اللي نختار المكان .. خلاص نقوله اننا عايزين نقضى  
يومين فى العين السخنة

قالت "سارة": "

-بتهرجى يا "نرمين" مستحيل يرضى طبعاً .. هو أكيد قصده انه هيفضلنا  
ساعة ولا اتنين ونخرج فى أى حته هنا

قالت "نرمين": "

-يا عبيطة نقوله كده مش هيرضى فنقول حاجه أقل .. أما لو طلبنا الأقل على  
طول هيخليه هو أقل من الأقل بتاعنا .. فهمتوا حاجه

قالت "مريم" ضاحكة:

-تقصدى تعلقى صقف تطلعاتك عشان لما يختار حاجه أقل تكون زى ما انتى  
عايزاها

قالت "نرمين" بمرح:

-عليكى نور .. هو ده اللي أقصده

قالت "ناهد" ضاحكة:

-شكلكوا هتخلوه يندم انه فكر يخرجكوا

قالت "نرمين" لـ "سارة" بلهفه:

-يلا يا "سارة" اتصلى قوليله عايزين نقضى يومين فى العين السخنة أكيد

هيقولك لا مش هينفع .. تقومى قايلاله خلاص يوم واحد هيقولك برده مش

هينفع قوليله خلاص هتخرجنا من دلوقتى لحد ما نتعب ونقولك خلاص كفاية

قالت "سارة": "

-انا مالى يختى قوليله انتى كده

قالت "نرمين" برجاء:

-عشان خاطرى يا "سارة" بأه انتى عارفه انى مش هعرف أتكلم مع "مراد"

واحنا متخاصمين

أعطت "سارة" الهاتف لـ "مريم" قائله:

-قوليله انتى يا "مريم"

هتفت "نرمين" بلهفه:

-أيوة قوليله انتى يا "مريم"

قالت "مريم" بخرج شديد:

-لا مش هينفع قولوا انتوا

طلبت "سارة" الرقم ووضعت الموبايل على أذن "مريم" قائله:

-لا محدش هيكلموا غيرك بس نفذى الخطه اللى قولناها عشان يخرجنا اليوم

كله بدل ما يضحك علينا بساعة ولا اتنين

شعرت "مريم" بالتوتر وهتفت قبل أن يرد:

"-سارة" كلميه انتى .. أنا مش هعرف.....

لم تستطع أن تنهى جملتها لأنها سمعت صوت "مراد" يقول:

-أيوة يا "سارة"

نظرت "مريم" الى "سارة" برجاء وأبعدت يديها الممسكة بالهاتف .. لكن

"سارة" أعادته الى أذنها مرة أخرى . كانت "ناهد" تتابع ما يحدث بصمت ..

أمسكت "مريم" الهاتف ونظرت الى الجميع ثم قامت لتبتعد قليلاً فما كانت

ستستطيع التحدث أمامهم حتى لا يلاحظ أحداً منهم مدى ارتباكها .. قال "مراد"

:

-ألو "سارة"

قالت "مريم" وهى تنظر خلفها الى العيون المتطلعة اليها:

-أيوة .. أنا "مريم"

انتظرت أن يتحدث لكنه لم يفعل .. فقالت بتوتر:

-البنات أصروا انى أنا اللى أكلمك ومعرفتش أهرب

بقى صامتاً فأكملت بتوتر بالغ:

-هما بيقولوا انهم عايزين يطلعوا يومين العين السخنة

كانت تشعر بسخافة ما تفعل لكنها مضطرة حتى لا ينكشف أمرها أمام أخوته

وأمام "ناهد" .. فأكملت قائله:

-هما أصلا عارفين انك هترفض بس هما.....

قاطعها "مراد" قائلاً:

-خلاص مفيش مشكلة جهزوا نفسكوا وأنا هخلص اللى ورايا وأكلمكوا

قالت بدهشة:

-يعني أقولهم انك موافق

قال بهدوء:

-أيوة

صمت كلاهما .. ثم قال:

-أنا مضطر أقفل دلوقتى عشان معايا تليفون تانى

قالت "مريم" بسرعة:

-تمام .. وأنا هبلغهم

أنهت "مريم" المكالمة وتوجهت اليهم فقالت "نرمين" بلهفه:

-ها .. اوعى تكونى منفذتيش الخطه

قالت "مريم" مبتسمه:

-لا نفذتها

صفتت "سارة" بيديها بمرح طفولى قائله:

-يبأه هنخرج طول اليوم .. يلا نفكر هنروح فين

قالت "مريم" مبتسمه:

-مش انتوا قولتوا عايزين يومين فى العين السخنة

نظر الجميع اليها بصمت فُشعرت بالتوتر وقالت:

-قالى انه موافق وجهزوا نفسكوا على ما يخلص اللي وراه

ساد الصمت لحظة والكل ينظر اليها بعدم تصديق ثم صاحت "نرمين": "

-انتى بتهرجى صح .. "مراد" هيسفرنا .. هيسيب شغله ويسفرنا

أومأت "مريم" برأسها وقالت بهدوء:

-هو قال كده

تعالت الضحكات الفرحة وأخذت يتحدثن عن ترتيبات الإستعداد لهذه الرحلة ..

وعيون "ناهد" مسلطة على "مريم" والابتسامه على شفيتها

\*\*\*\*\*

قال "طارق" بإستغراب:

-مش مصدق .. "مراد" هيسيب الشغل يومين ومش بس كده هيسافر يتفسح

كمان .. ده انت مبتغيش من الشغل الا فى الشديد الأوى

قال "مراد" وهو يسرع من انهاء الأوراق التي أمامه:  
-البنات بقالهم كثير مخرجوش .. وهما اللي اختاروا العين السخنة  
نظر "طارق" الى "مراد" بأعين متفحصه وقال بخبت:  
-البنات برده  
رفع "مراد" رأسه ونظر اليه قائلاً:  
-قصدك ايه  
قال "طارق" مبتسماً:  
-ربنا يهنيك يا "مراد"  
نظر اليه "مراد" دون أن يتكلم فأكمل "طارق": "  
-بجد بدعيلك من قلبي .. لانك راجل محترم وتستاها كل خير  
صمت "مراد" قليلاً ثم قال:  
-انت فهمت الموضوع غلط  
نظر "طارق" فى عين صديقه قائلاً:  
-لا أنا فاهم صح .. وصح أوى  
هرب "مراد" من عيني صديقه .. فقال "طارق" بهدوء:  
-متخفش منها .. دى بالذات متخفش منها  
نظر "مراد" اليه وقد بدا فى عينيه حيرة كبيرة .. فأكمل "طارق": "  
-بس خلى بالك .. اللي أعرفه انها كانت بتحب خطيبها أوى .. وانها من يوم ما  
اتوفى وهى رافضة الإرتباط تماماً .. وانها مش من السهل انها تحب غيره  
ثم أكمل:  
-أنا مش بقولك كدة عشان أحبطك .. لا أنا بقولك كدة عشان أعرفك الوضع  
عامل ازاي .. عشان تتصرف على الأساس ده  
ظل "مراد" محتفظاً بصمته فنهض "طارق" قائلاً:  
-يلا أسبيك تخلص اللي وراك .. ومتقلقش سافر وانت مطمئن أنا هبقى هنا فى  
الشركة  
ابتسم له "مراد" قائلاً:  
-تسلم يا "طارق"  
خرج "طارق" وترك "مراد" ومشاعر كثيرة متضاربة تعتمل داخل صدره ..  
وحيرة كبيرة وخوف أكبر بداخله

\*\*\*\*\*



Fatakat.com

انطلق "مراد" بهم فى طريقهم الى العين الساخنة .. وصلوا الجميع الى الفندق الذى حجز فيه "مراد" لمبيتهم .. كانت "مريم" سعيدة للغاية وهى تتطلع الى الطبيعة الساحرة حولها .. فلم يسبق لها أن غادرت القاهرة يوماً الا عندما ذهبت الى أهل والدها فى الصعيد .. لم تكن "سارة" و "نرمين" أقل سعادة من "مريم" .. حجز "مراد" حجرة للفتاتان وحجرة لوالدته وحجرة له ولد "مريم" ..ودت "مريم" البقاء مع الفتاتان لكنها لم تستطع البوح بذلك



صعد الجميع الى غرفهم اتفقوا أن يستريحوا من عناء السفر قليلاً ثم ينزلون لتناول طعامهم فى مطعم الفندق .. دخلت "مريم" الغرفة والتي كانت تحتوى على فراشان .. وتوجهت الى الشرفة كانت تنظر الى ما حولها وهى تردد:  
-ما شاء الله .. سبحان الله  
وقف "مراد" خلفها يتطلع اليها الى أن انتبهت والتفتت فأشاح بوجهه عنها بسرعة .. ووقف على بعد خطوات منها يطالع المشهد بدوره .. التفت اليها قائلاً  
:  
-جيتي هنا قبل كدة ؟  
قالت "مريم" مبتسمة:  
-أنا مخرجتش من القاهرة الا عشان أروح الصعيد  
قال وهو بنظر أمامه:  
-البلد هنا هتعجبك أوى فيها أماكن خطيرة  
ابتسمت وهى تتطلع الى الشمس التى بدأت فى الغروب .. خطفها المشهد فظلت



تتطلع اليه ناسية كل شئ حولها .. التفت "مراد" يتطلع الى تلك النظرة فى  
عينها والابتسامه الصغيرة على شفيتها .. بدا مستمتعاً بمشاهدتها بقدر  
استمتاعها بمشاهدة الغروب .. التفتت اليه فجأة فأشاح بوجهه بسرعة .. وقال  
وهو يدخل الغرفة:

-هشوف ماما والبنات هينزلوا امتى  
توجه الجميع الى مطعم الفندق .. كانت "نرمين" تتطلع الى "مراد" بحزن وهى  
تتمنى اذابة الجليد بينهما .. أنهى الجميع تناول طعامه وقرروا التنزه فى القرية  
والتمتع بجمال وسحر الطبيعة ليلاً



فى صباح اليوم التالى .. استيقظ "مراد" ونظر الى فراش "مريم" ليجده فارغاً  
ومرتباً .. نهض ليجدها فى الشرفة .. وقفت "مريم" تستمتع بجمال المنظر فى

الصباح .. دخل "مراد" الشرفة بعدما ارتدى ملابسه وسمعته يقول:

-صباح الخير

التفتت تنظر اليه وهي تشعر بالدهشة فهذه هي المرة الأولى التي يلقي عليها تحية الصباح .. تمتت بخفوت:

-صباح النور

دخل الشرفة ووقف على بعد خطوات منها واستند الى سور الشرفة .. شعرت بالحرع فهمت بالدخول .. أوقفها قائلاً:

"-مريم"

راودها شعور غريب وهي تستمع الى اسمها بصوته الرخيم .. وقفت تتحاشى النظر اليه فقال:

-بخصوص الحملة الإعلانية بتاعة شركتنا .. كان المفروض أتكلم معاكى فى الموضوع ده من فترة بس كل شوية تحصل حاجات تخلىنى أأجل الكلام ..بس احنا فعلاً مستعجلين جداً .. فياريت أول ما نرجع القاهرة تبتدى فيها نظرت اليه "مريم" قائله بجديه:

-مفيش مشكلة .. عرفنى ايه اللي محتاجه بالظبط وأنا أبتدى فى الشغل أول ما ارجع

قال لها:

-تمام .. طيب تحبى أتكلم مع مديرك .. ولا الاتفاق بيكون معاكى انتى

قالت "مريم" باستغراب:

-مديري ؟ .. ليه ؟

قال "مراد": "

-عشان تكاليف الحملة

قالت "مريم" بجديه:

-لا طبعاً مش هاخذ فلوس على شغلى

نظر اليها "مراد" قائلاً:

-ازاى يعنى مش هتاخذى فلوس على شغلك

قالت "مريم": "

-انا أعدة فى بيتك وانت متكفل بمصاريف أكلى وشربى واقامتى .. ازاى عايزنى

أخذ منك فلوس تمن شغلى فى حملتك

قال "مراد" بحزم:

-دى حاجة ودى حاجة .. متدخليش الأمور فى بعض .. أنتى ملزمة منى طالما  
انتى على ذمتى .. أى ان كان سبب جوازنا .. انتى مراتى وكل حاجة تخصك  
ملزمة منى أنا

شعرت "مريم" بشعور غريب يغمرها وهى تستمع الى كلماته .. تجاهلت  
شعورها تماماً وقالت بهدوء:

-برده مش هينفع آخذ فلوس على شغلى

قال "مراد": "

-تمام يباه هتكلم مع مديرى وهو اللى هيوصلك فلوسك عن طريق البنك زى ما  
اتفق معاكى

قالت "مريم" وهى تتطلع اليه:

-انت ليه عنيد كده

نظر فى عينيها بثبات قائلاً:

-انتى اللى عنيده

ظلا ينظرات الى بعضهما للحظات .. بدا وكأن كل منهما يحاول أن يسبر أغوار  
الآخر .. ويغوص فى أعماقه ليستكشفه .. أشاحت "مريم" بوجهها فجأة وقالت

:

-هشوف البنات صحيووا ولا لسه

تزل الجميع لتناول الفطار .. بدأوا فى التنزهة بالقريه وعلى شاطئ البحر



استنشقت "مريم" النسمات المنعشة التي تهب من البحر في اتجاهها في سعادة .. كانت القرية شبه خاليه في هذا التوقيت من العام .. فشعرت "مريم" بالراحة أكثر وهي تقف أمام البحر والسماء وكأنه لا يوجد شئ في الدنيا سواهما .. شعرت بالسكينة تغمرها .. خلعت حذاءها لتضرب مياة البحر أقدامها برقه .. ابتسمت وهي تستمتع بمداعبة الماء بقدميها .. كانت "سارة" و "نرمين" تسيران معاً على الشاطئ .. و"ناهد" جالسه بجوار "مراد" .. التفتت لتتطلع اليه لتجد أنظاره معلقة بـ "مريم" .. شعرت بالأسى وهي تنظر اليه في صمت .. ثم قالت له بحنان:

-أنا حبتها أوى يا "مراد"

التفت "مراد" اليها بحده وقال بإستغراب:

-تقصدى مين؟

قالت أمه:

"-مريم"

نظر "مراد" الى البحر صامتاً .. فأكملت أمه:  
-البنيت كويسة فعلاً .. ليه متحاولش انك...  
قاطعها "مراد" وعلامات الضيق على وجهه:  
-ماما لو سمحتى .. ياريت متفتحيش الموضوع ده تانى  
قالت "ناهد" بشئى من العناد:  
" -مراد" بالله عليك انت مش حاسس بحاجة نحيتها .. أنا أمك وأكثر واحدة فى  
الدنيا دى تحس بيك .. أنا عارفه ان مشاعرك بدأت تتحرك نحية "مريم"  
التفت اليها "مراد" وقال بعنف:  
-لا طبعاً مين اللي قالك كده  
قالت "ناهد" بعناد:  
-مش محتاجه حد يقولى أنا ليا عنين بتشوف  
نظر اليها "مراد" قائلاً بحده:  
-لا مش حاسس بحاجة نحيتها .. ولا هحس فى يوم من الأيام .. ريحي نفسك  
بأه يا ماما  
نهض من مكانه فى عصبية وأخذ يسير على غير هدى

\*\*\*\*\*

قال المأمور للظابط الجالس أمامه:  
-جضية غريبة .. أنى مخبرش كيف اللي طخ "جمال" جدر ياخذ طبنجة "عبد  
الرحمن" اللي بياكد انها كانت فى بيته وان محدش غريب دخل البيت  
قال الظابط بثقه:  
-أنى بعرف الحاج "عبد الرحمن" امنبيح مستحيل يعمل اكده يا فندم .. وبعدين  
ايه مصلحته فى طخ "جمال" يوم كتب كتابه على حفيدته .. أنى متأكد ان اللي  
يعمل اكده عايز ينتجم من "جمال" ومش رايد الجوازه دى تتم  
قال المأمور:  
-تفتكر المعلومات اللي جتلنا عن علاقة "جمال" بـ "صباح" بنت الحاج "عبد  
الرحمن" صوح  
قال الظابط:

-لازم نأخذ أذن من النيابة ونأخذ بصماتها .. مش بعيد تكون هى اللى طخته  
عشان تنتجم منيه .. ده لو المعلومات اللى وصلتنا فعلا صوح وفي حاجة بيناتهم  
قال المأمور وهو يرفع سماعة الهاتف:  
-النهاردة أذن النيابة هيكون عنديك .. الجضية دى لازم تنتهى فى أجرب  
وجت جبل ما العيلتين يجعوا فى بعض

\*\*\*\*\*

جلست "مريم" على احدى الصخور أمام البحر تتطلع اليه بإستمتاع حينما  
اقتربت منها "سارة" قائله:  
-أعد معاكى ولا هتضايقي  
التفتت اليها "مريم" قائله بسرعة:  
-لا طبعا يا حبيبتى اعدى  
جلست "سارة" بجوارها وهى تتطلع الى البحر هى الأخرى .. ظلت الفتاتان فى  
حالة شرود .. قالت "مريم":  
-المكان هنا حلو أوى  
ابتسمت "سارة" قائله:  
-فعلاً يأخذ العقل  
قالت "مريم" وهى تتطلع الى البحر فى هيام:  
-عارفه نفسي فى ايه  
-ايه ؟  
-نفسى أخذ مركب وأمشى بيها فى البحر ومرجعتش للشط أبداً  
ابتسمت "سارة" ووكزتها فى كتفها قائله بخبث:  
-و "مراد" معاكى طبعاً  
أخرجتها كلمات "سارة" من حالة الإستمتاع التى كانت تشعر بها .. نظرت مرة  
أخرى الى البحر صامته واجمة .. قالت "سارة" وهى تتطلع الى البحر بدورها:  
-أنا كمان نفسي أخذ مركب وأمشى بيها فى البحر ومرجعتش للشط أبداً  
قالت "مريم" بخبث:  
-لوحدك ؟

ابتسمت "سارة" بحزن .. تأملتها "مريم" قائلة:

-شكلك كدة بيقول مش لوحديك

قالت "سارة" بوجوم:

-لا لوحدي .. هيكون مع مين يعني

استمرت "مريم" فى النظر اليها وقالت:

-طيب عيني فى عينك كده

قالت "سارة": "

-سيبك .. كبرى

ثم تركتها وأخذت تتمشى على الشط

اقتربت "نرمين" من "مراد" الجالس على أحد الكراسي أمام البحر .. رفع

"مراد" رأسه لينظر اليها ثم يعود ليتطلع الى البحر مرة أخرى .. جلست

"نرمين" على المقعد المجاور له .. بدا عليها التوتر .. ثم حسمت أمرها قائلة

دون أن تنظر اليه:

-عارفة انى غلظت .. غلظت أوى .. أنا آسفه أوى يا أبيه

ظل يتطلع الى البحر .. فأجهشت فى البكاء وهى تقول:

-أنا عارفة انى صغرت فى نظرك أوى .. بس والله العظيم أنا محترمة .. أنا مش

عارفه ازاي عملت كدة

تطلع اليها "مراد" لفترة ثم قال:

-كنتى بتحبيه ؟ ولا كان تسليه ؟ ولا كان ايه بالظبط ؟

شعرت بالخجل .. فقالت بصوت خافت:

-أنا كنت حسه انه انسان كويس وكان الموضوع بالنسبة لى جد يعني مش

تسلية .. بس بعد كدة فكرت بعقلى وقولت لو كان كويس كان جه كلمك على طول

ومكنش عمل حاجه من وراك .. عشان كدة قولتله مش هرد عليك تانى

ومتصلش بيا تانى وعندك أخويا كلمه .. ساعتها هددنى بالصور

ثم نظرت اليه وهى تبكى قائلة:

-والله قابلتة مرة واحدة بس واعدت معاه عشر دقائق .. أنا مش بقول ان ده

صح .. بس بقولك عشان تعرف ان ده بس اللى أنا عملته ومعملتش أكثر من

كده .. حتى طلب يتكلم معايا على النت وأفتحله الكام وأنا رفضت

قام "مراد" وجذبها من يدها أوقفها أمامه وهي تنظر الى الأرض باكية وقال:  
-مش عايزك تخبي عنى أى حاجة تانى يا "نرمين" .. أنا أخوكى الكبير وأنا  
أكثر واحد فى الدنيا دى بيحبك وبيخاف عليكي  
قالت "نرمين": "

-عارفه يا أبيه .. أنا أسفه أوى .. عشان خاطرى سامحنى  
قربها "مراد" منه وعانقها .. فأجهشت مرة أخرى فى البكاء وتعالت شهقاتها ..  
مسح على رأسها قائلاً:

-خلاص يا "نرمين" أنا هنسى الحكاية دى كأنها حصلتش .. بس توعديني  
انك متخبيش عنى حاجة تانى ولو أى حد كلمك تعرفيني  
رفعت "نرمين" رأسها قائله بحماس:  
-أوعدك يا أبيه .. أوعدك  
ابتسم لها قائله:

-طيب يلا امسحى دموعك دى وناديلهم خلىنا نروح نتغدى ونشوف مكان تانى  
نتفصح فيه مش هنفضل مقضينها اعدا على البحر  
ابتسمت "نرمين" ومشت فى اتجاه أمها وأختها و "مريم."

\*\*\*\*\*

كانت "سهى" جالسه بين ذراعي "سامر" على ظهر اللانش .. كانت شاردة  
واجمة نظرت الى هاتفه الذى يمسكه بيده ويتصفح النت من خلاله فقالت بتبرم:  
-انت على طول كده نت مبتفصلش

قال "سامر": "

-شيفانى بشيت يعني

قالت "سهى": "

-مش وقت جيم .. دى كلها ساعة وماشية

قال لها:

-متخليكي بايته معايا النهاردة

قالت "سهى" بضيق:

-مش هينفع المرة اللي فاتت نفدت منهم بصعوبة .. ده غير الكلام اللي بابا



سمعهولى

قال "سامر" وهى يمت شفتيه:

-برحتك

رفعت "سهى" رأسها وقالت بضيق:

"-سامر" هى الظروف اللى عندكوا فى البيت هتطول يعنى

أغلق "سامر" هاتفه وصاح غاضباً:

-انتى يا بنتى غاوية عكنه .. مزاج عندك أول ما تشوفينى مبسوط تروحي

فاتحه أم الموضوع ده

قالت "سهى" بحنق:

"-سامر" انت ليه مش حاسس بيا ومش مقدر مشاعرى

قام "سامر" من مكانه ونظر اليها قائلاً بحدده:

-بصى يا بنت الناس .. لو جيتى تانى سيرة الجواز أنا من سكة وانتى من سكة

أنا مش ناقص خنقة

دخل الكبينه وتركها والدموع فى عينيها وفى داخلها ندم كبير .. لن تتمكن من

تجاهله أبداً.

\*\*\*\*\*

انتهت "مريم" من فرش أسنانها وخرجت لتجد "مراد" نائماً على فراشه ملتفأ

بلحافه وينظر الى سقف الغرفة .. توجهت الى فراشها وأخذت أحد الكتب

وأضاعت المصباح بجوارها وشرعت فى القراءة .. شعرت بنظراته مصوبة

تجاهها فالتفتت تنظر اليه قائله:

-لو النور مضايقتك أطفيه

هز رأسه نفيأ فعادت الى كتابها .. سأله قائلاً:

-أجاثا كريستى برده ؟

ابتسمت قائله:

-لا

اتكأ على مرفقه ومد يده الأخرى اليها .. نظرت الي يده الممدوده ثم أغلقت

الكتاب ومدت يدها به اليه .. تفحص الغلاف و المقدمة ثم قال:  
-استمتع بحياتك!

قالت "مريم": "

-بحبه أوى ما بملش من قرائته أبدأ

قال "مراد" وهى يفر صفحات الكتاب:

-قرأت كتير لدكتور محمد العريفي بس الكتاب ده مقرأتوش

قالت بحماس:

-لو قراته مرة هتدمنه الكتاب فعلاً روعة

نظر اليها قائلاً:

-خلصيه وهاتيهولى أقرأه

قالت له:

-مفيش مشكله أقرأه .. انا اصلا قراته كتير قبل كده .. وبعدين معايا كتب تانية

ممكن أقرأها

نظر اليها "مراد" متفحصاً:

-شكلك بتحبي تقرى كتير

قالت مبتسمة وهى تنظر أمامها:

-بابا الله يرحمه كان بيحب يقرأ كتير .. وعودنى على كده

ابتسم "مراد" قائلاً:

-أنا كمان خدت العادة دى من والدى الله يرحمه

حملت "مريم" أحد الكتب بجوارها وشرعت فى قرائته .. الى أن غلبها النعاس

فوضعتة على الكمودينو وأغلقت المصباح وأولت "مراد" ظهرها ونامت .. ظل

"مراد" ساهراً يستمتع بقراءه الكتاب الذى شعر بأنه يستحق القراءة بالفعل ..

أثناء قراءته عندما أوشك على تقليب احدى الصفحات وجد ورقة تسقط من

الكتاب .. أمسك الورقة ونظر الى "مريم" النائمة .. ثم نظر الى الورقة المطوية

فى تردد .. لكن فضوله غلبه .. ترك الكتاب من يده وفتح الورقة ليجد فيها:

-حبيبتي "مريم" .. بل مهجتي "مريم" .. بل نور عيني ونبض قلبي .. انت

قمر فى سماى .. ونوراً فى دنياى .. وبحر شوق فى عيناى .. ورحيق حبك هو

مرساى .. أحبك يا من توغل حبك الى كل كيانى .. وملك روحي وأبعد عنى

أحزانى .. وجعلنى فى بحار عينيك أغرق .. وبلمسة يديك أهرب .. من نار الدنيا

الى جنتك .. فلا تحرميني أبداً من بسمتك .. يا أرق "مريم" فى حياتي .. يا كل  
حياتي .. حبيبك "ماجد."

قرأ "مراد" تلك الكلمات وهو يشعر بحرقه فى قلبه امتدت لجسده لتحواله الى  
جمرة مشتعله .. ألقى نظرة نارية على "مريم" النائمة .. وهو يشعر بغصة فى  
حلقة .. وضع الورقة فى الكتاب وأغلقه بعصبيه وألقاه على الكمودينو بجواره ..  
ثم نام على ظهره واضعاً يديه أسفل رأسه وهو يفكر وعلامات الضيق على  
وجهه

\*\*\*\*\*

استيقظت "مريم" من نومها لتجد "مراد" غير موجود فى فراشه .. بعد نصف  
ساعة طرقت "سارة" الباب لتخبرها بأنهم سيتجمعون فى الأسفل لتناول الفطار  
.. حانت من "مريم" التفاته الى "مراد" الذى بدى واجماً .. اخذت تتسائل عن  
السبب فلقد كان يبدو مرتاحاً بالأمس .. نفضت تلك الأفكار من رأسها وقالت  
لنفسها: وما شأنى ان كان مرتاحاً أم متضايقاً هذا أمر يخصه هو وأموره ليست  
من شأنى .. توجه الجميع الى البحر ومعهم مضارب الراكيت .. بدأت "سارة" و  
"نرمين" فى اللعب معاً وأخذا يضحكان ويمزحان فقد كانتا كلتاهما سيئتان جداً  
فى ضرب الكره وفى صدها .. قالت "سارة":  
-تعالى يا "مريم" .. "نرمين" دى عاهة مش عارفه ألعب معاها  
صاحت "نرمين" بغیظ:

-أنا عاهة أمال انتى ايه يا "سارة" مفيش مرة حدفتك الكورة وعرفتى تصديها  
قالت "سارة":

-ما انتى اللى مش عارفه تحدفىها  
وقفت "مريم" وأعطتها "نرمين" المضرب وأخذت تلاعب "سارة" .. كانت  
ضربات "مريم" موفقه لولا خبرة "سارة" الضئيلة فى اللعب .. قالت "سارة"  
بعد فترة وهى تنهج:  
-تعبت

قالت "مريم" بحماس:  
-لا عشان خاطرى نكمل لعب

قالت "سارة": "

-بتلعي حلو اتعلمتيها فين؟

قالت "مريم": "

-كنت دائماً بلعب أنا وأختي في نادى قريب من البيت .. مش قادرة أقولك أنا

بعشق الراكيت أد ايه

ثم صاحت بطريقة طفولية:

- عشان خاطرى يا "سارة" العبي شوية كمان

قالت "سارة": "

-لا يا ستى ايدي وجعتنى .. خلى "مراد" يلعب معاكى .. "مراد" .. "مراد" ..

تعالى اللعب مع "مريم"

شعرت "مريم" بالخرج وهمت بأن تترك المضرب .. لكن "مراد" نهض وأخذ المضرب من "سارة" ووقف أمام "مريم" .. نظرت "مريم" اليه لترى نظراته الحادة المصوبة تجاهها .. وبدأ اللعب .. كانت ضربات "مراد" قوية وكأنه ينتقم

من الكره .. أمسكت "مريم" الكره ووقفت تنظر اليه بثبات وتقابل نظراته المتحدية بثقه .. ثم قالت فى نفسها .. حسناً تريدها تحدى فليكن .. كانت ضربات "مريم" قوية بقدر ما كانت ضربات "مراد" قوية بدا وكأنهما لا يلعبان بل

يفرغان شحنة بداخل كل منهما .. كان كل منهما يضرب الكره وكأنه يضرب كل ما يغضبه ويضايقه .. كانت ضرباتهما قوية قاسية واثقة تعرف وجهتها جيداً .. أخذت "ناهد" تتابع اللعب مع "سارة" و "نرمين" .. هتفت "نرمين" بدهشة :

-ايه ده ملهم بيلعبوا بعنف كده

قالت "سارة" وهى تنقل نظرها مع الكره:

-بس جامدين جداً فى اللعب هما الاتنين

أول من رفعت راية الإستسلام هى "مريم" التى شعرت بألم فى ذراعها .. رفعت كفها معلنة انتهاء اللعب .. فاقترب منها "مراد" قائلاً:

-بتلعي حلو

قالت وهى تنهج بقوة وحببات العرق تتصبب منها:

-انت كمان بتلعب حلو

تلاقت نظراتهما للحظات .. ثم ترك "مراد" المضرب وتوجه الى حيث يجلس

الجميع وعينا "مريم" تتابعانه.  
أصر الجميع على "مراد" على أن يمد اقامتهم يومين آخرين .. فما استطاع  
تحت هذا الإلحاح من الجميع إلا أن يوافق.

\*\*\*\*\*

فى المساء أخذت "مريم" قلم وبعض الأوراق وجلست على الأريكة تبدأ فى  
التخطيط والرسم الخاص بحملة "مراد" .. استغرقها الوقت حتى قال لها  
"مراد" .. "الجالس على أحد المقاعد بجوارها يشاهد التلفاز:  
-كفاية كدة وقومى نامى  
قالت دون أن تنظر اليه:  
-لا لسه شوية  
قام من مكانه وأحضر الكتاب ووضعها أمامها على المنضده .. نظرت الى الكتاب  
ثم اليه وقالت:  
-عجبك ؟  
قال "مراد" وهو يجلس مكانه وينظر اليها ببرود:  
-آه كويس  
قالت "مريم" بإستغراب:  
-كويس بس .. افكرته هيعجبك  
التفت اليها "مراد" وقال بنفس البرود:  
-أنا ما قولتش معجبنيش  
قالت "مريم": "  
-شكلك بيقول انه معجبكش  
قال "مراد" بتهكم وهو يتفرس فيها:  
-بتحسى بيا للدرجة دى  
شعرت "مريم" بالخجل والضيق من كلماته الساخرة وعادت الى رسمها مرة  
أخرى .. قام "مراد" وغادر الغرفة وأغلق الباب خلفه بحده .. نظرت "مريم"  
بإستغراب الى الباب المغلق وهى تحاول أن تصرف ذهنها عن التفكير فى  
"مراد" وتصرفاته



- هو أنى جليل فى البلد دى ولا ابيه يا "عبد الرحمن"  
قال "عبد الرحمن" بوهن:

- أنى محجوجك يا "سباعى" واللى انت رايده هيكون  
قال "سباعى" بضيق:

- أنى مش عارف هلجيه منين ولا منين الخلج أول ما هيعرفوا هتجوم جومتهم  
.. ربك يسترها يا "عبد الرحمن"

\*\*\*\*\*

جلست "مريم" على احدى الصخور فى البحر تراقب الأسماء الصغيره التى  
تسبح تحت المياة الشفافة الصافية .. اقتربت منها "سارة" وجلست بجوارها ..  
ابتسمت الفتاتان لبعضهما البعض .. قالت "سارة": "

-تعرفى يا "مريم" أنا و "نرمين" كنا خايفين "مراد" يتجوز واحدة تخليه  
يسيبنا تانى ويبعد عنا

قالت لها "مريم" بدهشة:  
-تقصدى ايه

قالت "سارة": "

-مش عايزة أضايقك وافكرك بحاجه أكيد مش حابه تفتكريها .. بس فعلا مرآة  
"مراد" الأولانىه مكناش بنحبها خالص

شعرت "مريم" بالدهشة وهى تسمع لأول مرة بأن "مراد" كان متزوجاً من قبل  
فأكملت "سارة": "

-أصرت عليه ياخذها فيلا بعيد عنا .. هو عمل اللى يريحها بس برده كان كل  
يوم عندنا .. خاصة ان مفيش معانا راجل .. أنا عارفه انه مكنش حابب يبعد بس  
هى كانت مصره

شردت "مريم" فى كلمات "سارة" اذن "مراد" كان متزوجاً من قبل .. ثرى  
أين ذهبت أنتهى زواجهما بالموت مثلها أم بالطلاق .. أخرجتها "سارة" من  
حيرتها قائله:

-بعد ما اطلقوا "مراد" تعب أوى .. واتغير معانا .. بقه صعب أوى .. بس احنا  
برده بنحبه هو شاف كتير .. وعشان كدة فرحنا ان ربنا عوضه خير ورزقه بيكى

..وانك موافقه تعيشي معانا ومأصرتيش انه يسيينا وتعيشوا لوحدكوا

كانت "مريم" تستمع لكلماتها فى شرود فأكملت "سارة": "

-انا بحبك بجد يا "مريم" وبحس فعلا انك أختي

التفت لها "مريم" مبتسمه:

-صدقيني أنا كمان بحبكوا جداً يا "سارة"

بدا على "سارة" التردد ثم قالت:

-فى حاجة عايزة أحكيلك عنها يا "مريم" بس ياريت الموضوع يفضل بينا

ومتجيبش سيرة لـ "مراد" أبداً

قالت "مريم": "

-متقلقيش يا حبيبتي أى كلمة تقوليهاالى مستحيل أقولها لأخوكى أبداً

ابتسمت "سارة" واطمننت وقصت عليها مشكلتها .. واعجابها بـ "طارق"

صديق "مراد" .. واشتكت لها من كونه لا يعيرها أدنى اهتمام ثم اختتمت

حديثها قائله بـرجاء:

-قوليلي أعمل ايه يا "مريم" ..ألفت انتباهه زى ما "نرمين" قالتلى ؟

فكرت "مريم" قليلاً ثم قالت:

-بصى يا "سارة" لازم تعرفى وتتأكدى انك مش هتاخذى غير الراجل اللى ربنا

كاتبهولك .. مهما عملتى مش هتاخذى حد غيره .. فلانم أى تصرف تعمليه

تشوفى اذا كان صح ولا غلط .. حلال ولا حرام .. لانك كدة كدة مش هتقدرى

تغيري قدر ومكتوب

ثم قالت:

-رأىي متعمليش حاجة أكثر من انك تدعى ان ربنا يرزقك الراجل اللى يسعد قلبك

..متدعش انه يرزقك بـ "طارق" بالذات .. لا ادعى انه يرزقك بالراجل اللى

يحافظ عليكى واللى يكون مناسب ليكي .. اللى فهمته من كلامك انك متعرفيش

الأستاذ "طارق" أصلاً .. يعنى محصلش أى حوار بينكوا ولا أى حاجة توضحلك

شخصيته .. مجرد انه صاحب أخوكى وعارفه شكله .. وده مش كفاية عشان

تحببه .. انتى الاحساس اللى جواكى تعلق مش أكثر .. اتعلقتى بحد عارفه انه

كويس .. بس مهما كان انتى متعرفيش شخصيته .. ويا ترى هيكون مناسب

ليكي ولا لاء .. عشان كدة قولتلك لما تدعى ادعى ان ربنا يرزقك الراجل

المناسب ليكي اللى يحافظ عليكى ومتدعش انه يرزقك بـ "طارق" بالتحديد



لانك متعرفيهوش أصلاً .. ادعى ان ربنا يختارك وخليكي واثقة ان اختيار ربنا ليكي هيكون أحسن مليون مرة من اختيارك لنفسك  
أنهت "مريم" كلامها ونظرت الى "سارة" التي بدا عليها الإرتياح بعدما استمعت لتلك الكلمات .. قالت "سارة" مبتسمة:  
-ياريتي كنت كلمتك من زمان كنتي خرجتيني من حيرتي دي ابتسمت "مريم" وقالت:  
-اديننا اتكلمنا أهو .. بس يارب فعلا يكون كلامي فادك عاقتها "سارة" وقالت:  
-فادنى كتير .. تسلمى يا "مريم"

\*\*\*\*\*

استطاع كبار العائلتين التحدث مع المأمور الذى كان يرغب أكثر منهما فى حل تلك القضية ودياً .. لأنه يعلم المشاكل التي كانت واقعة بين العائلتين منذ الأزل والتي تنتظر شرارة صغيرة لتبدأ نار الثأر فى الإشتعال مرة أخرى .. انتهت جلسة الصلح ب:  
-قبلتُ زواجها

والتي قالها "جمال" بحنق وضيق ويده موضوعه فى يد "عبد الرحمن" وهو يعلم جيداً فى قرارة نفسه أنه وقع فى شر أعماله وبأن الله أعطاه ما يستحق

\*\*\*\*\*

فى المساء اجتمع الجميع امام حمام السباحة فى الفندق والذى كان فارغاً فى مثل هذا الوقت .. قامت "مريم" لتتمشى قليلاً فقالت "ناهد":  
-متأخرين يا "مريم" .. "مراد" زمانه جاى وهنتطلع كلنا بالعربية نتمشى شوية

أومات "مريم" برأسها وسارت وهى تتهادى فى خطواتها وتتطلع الى الطبيعة يميناً ويساراً .. كانت مستغرقة فى التفكير فى حالها وفي مستقبلها الذى تجهله .. كانت تشعر فى قرارة نفسها بمشاعر غريبة عليها .. مشاعر متضاربة احتارت فى تفسيرها وفى فهمها .. لا تدري الى كم من الوقت سارت .. لكنها نظرت فجأة حولها لتجد نفسها فى مكان تجهله .. كانت تحمل بيدها هاتفها لكنها

لا تعرف الا رقم "ناهد" الذى حاولت أن تتصل به كثيراً دون رد .. ظلت تدور حول نفسها وهى تحاول تبين طريقها دون جدوى .. كان المكان حولها خالياً فلم تستطع أن تجد من يدلها على الطريق .. رأت البحر أمامها فسارت بمحازاته وهى تنظر الى الأنوار المضاءه على يسارها عليها تتبين مكان تعرفه .. عاد "مراد" ليجد "ناهد" تهتف بقلق:

"-مراد" اتصل بـ "مريم" محدش في البنات معاه رقمها وموبايلى مش لاقياه تسمر "مراد" فى مكانه .. فهو الى الآن لا يعرف رقم هاتفها .. قال "مراد" وهو يتطلع الى الفتاتان ليتأكد من أنهما لا تستمعان اليه:  
-مش معايا رقمها  
هتفت أمه بحنق:

-ازاى يعنى مش معاك رقمها

عادت الى مكانها تبحث مع الفتيات عن هاتفها .. ثم قالت بلهفه:  
-هطلع أشوفه فوق يمكن نسيته فى الأوضة

أخذ "مراد" يسير على غير هدى وعيناه تبحث عن "مريم" بلهفه ويسأل عنها كل من يجده أمامه .. شعر بالقلق من سيرها بمفردها فى هذا الليل وفى هذا المكان المنعزل .. خشى أن يصيبها مكروه .. فحث قدماه على السير وعيناه على البحث .. خفق قلبه بخوف وهو يتخيل أحد الأشخاص وهو يضايقها وهى تصرخ مستجده دون أن يسمعها أحد .. اتصل بوالدته دون رد .. اتصل بـ "سارة"  
وقال بحدده:

-أيوه يا "سارة" لسه ملقيتوش موبايل ماما ؟

-لا يا أبيه بندور عليه

صاح بغضب:

-هيكون فين بس دوروا كويس .. وأول ما تلاقوه كلميني

كانت "مريم" تنظر الى ما حولها وهى تشعر بالرعب كان المكان موحشاً .. وحتى الأنوار المضاءة على اليسار لا تشير الى أى مكان تعرفه .. تعالى صوت البحر الهادر ليزيد من خوفها .. اتصلت بـ "مى" قائله بلهفه:

"-مى" ازيك

هتفت "مى" بفرح:

"-مريم" ازيك أخبارك ايه

قالت "مريم" بلهفه:

"-مى" معاكى رقم استاذ "طارق"

قالت "مى" بدهشة:

-عايزاه ليه

قالت "مريم" وهى تتلفت حولها خوفاً:

-بصى أنا و "مراد" وعيلته سافرنا العين السخنه .. وأنا تهت ومش معايا غير

رقم مامته ومبتردش عليا .. عايزاكى تتصلى بأستاذ "طارق" تجبيلى منه رقم

"مراد"

قالت "مى": "

-طيب يا حبيبتي ثوانى وهكلمك

اتصلت "مى" بـ "طارق" وشرحت له الوضع وقالت:

-فلو سمحت اديني رقم أستاذ "مراد" عشان أبعته فى رسالة لـ "مريم"

قال "طارق": "

-لا مفيش داعى .. انا هكلمها

شعرت "مى" الضيق وقالت:

-ماشى .. مع السلامة

أنهت "مى" المكالمة وهى تشغر بغيرة شديدة .. اتصل "طارق" بـ "مريم"

وطمأنها قائلاً:

-متخفيش يا مدام "مريم" اوصفيلي بس المكان اللى انتى فيه وأنا أقولك

ترجعى ازاي .. انا اللى حاجز لـ "مراد" فى المكان ده وعارفهكويس

قالت "مريم" وهى تلتفت حولها:

-مش عارفه أنا جمب البحر بس معرفش أنا فين بالظبط

قال "طارق": "

-طيب مفيش أى حد أدامك تسألبيه

التفتت حولها وقالت بخوف:

-لا مفيش خالص

قال "طارق" مطمئناً اياها:

-طيب متقلقيش أنا هكلم "مراد" وأديله رقمك .. بس متخفيش ان شاء الله

"مراد" هيلاقىكي

اتصل "طارق" بـ "مراد" وأملاه الرقم فقال "مراد" بدهشة:  
-انت عرفت منين؟

قال "طارق": "

-مش وقته يا "مراد" .. كلمها شوف هي فين باين عليها انها مرعوبة أوى  
اتصل بها "مراد" فأجابت بصوت قلق:  
-أيوة

قال "مراد" بلهفه:

"-مريم" انتي كويسة

قالت بصوت مضطرب:

-أيوة كويسة

قالت "مراد": "

-انتى فين اوصفيلي المكان اللي انتى فيه

كان "مراد" يسير أثناء التحدث اليها وعيناه تبحث عنها .. نظرت حولها  
وأجابت:

-أنا ورايا البحر .. بس مش عارفه أنا فين بالضبط

قال بلهفه:

-طيب لما خرجتى من حمام السباحة مشيتى ازاي؟

قالت بصوت مضطرب:

-معرفش مكنتش مركزة

هتفت قائلاً بعصبية:

-ازاي يعني مكنتيش مركزة

أجابت بصوت كمن يوشك على البكاء:

-كنت سرحانه ومخدتش بالى

حاول "مراد" التحكم فى أعصابه وقال بصوت أهدأ:

-أنا آسف .. بس أنا عايز أعرف مكانك .. حاولى توصفيلي المكان حواليكى

لكن "مراد" هتف فجأة:

-خلاص يا "مريم" شوفتك

هتفت غير مصدقة:

-بجد .. الحمد لله

أغلقت الخط وبحثت حولها لتجد "مراد" قادماً اتجاهها .. شعرت بالفرحة بمجرد أن رآته وابتسمت وقالت بأعين دامعه:  
-كويس انك لاقيتنى .. كنت خايفة أوى  
نظر اليها بلهفه بأعين متفحصه وقال:  
-انتى كويسة

أومأت برأسها وهى تمسح العبرات الى تساقطت من عينيها رغماً عنها ..نظر اليها بحنان قائلاً:  
-طيب يلا نرجع الفندق ..  
رن هاتفه فقال:

-أيوة يا ماما .. خلاص لقيتها .. أيوة احنا فى الطريق .. ماما الموبايل هيفصل شحن حالياً

وبالفعل لحظات وانقطع شحن الهاتف .. قال "مراد" بجدية:  
-بعد كدة لما تمشى وتحسى انك توهتى اقفى فى المكان اللى انتى فيه  
ومتمشيش أكثر عشان متتوهيش أكثر  
أومأت برأسها مد يده وأمسك بهاتفها تحت نظراتها ..تلامست أيديهما فشعرت بالإضطراب وأبعدت يدها سريعاً .. دون رقمه وسجله بإسمه على هاتفها وقال:  
-لما نرجع الدينى رقمك .. مينفعش نبقى مش عارفين أرقام بعض  
أعطاها هاتفها فأخذته .. كانت "مريم" تسير معه وهى تحاول أن تهدئ من خفقات قلبها التى كانت تتسارع من شدة الخوف .. التفت اليها "مراد" قائلاً:  
-أحسن دلوقتى

قالت بصوت أكثر ثباتاً:

-أيوة الحمد لله

سارا عدة دقائق قبل أن يظهر لها المكان الذى تعرفه .. كان مقبلاً اتجاههما مجموعة من الفتيات الاتى يضحكن ويتمازحن وهن مرتدات ملابس غير محتشمة .. رغماً عنها التفتت "مريم" تجاه "مراد" لتتبع نظراته .. كان ينظر بجواره فجذبت انتباهه الضحكات فنظر أمامه لحظة قبل أن يخفض بصره أرضاً .. تسلل اليها شعور بالسعادة .. لحظات قبل أن تشعر بالضيق من نفسها وأخذت تحدث نفسها .. ما شأنك أنتِ يا "مريم" نظر أم لم ينظر ما شأنك به لماذا تهتمين ما يخصه ليس من شأنك .. عقدت ما بين حاجبيها فى ضيق أفاقت من

شرودها على صوت الهاتف فى يدها .. رأت رقم "طارق" الذى اتصل منه منذ قليل ..نظر "مراد" الى هاتفها فالتفتت اليه ومدت له يدها بالهاتف قائله:  
-ده الأستاذ "طارق" .. ممكن يكون كلمك ولقى موبايلك مقفول  
أخذ "مراد" الهاتف من يدها ورد:  
-أيوة يا "طارق" .. فصل شحن .. أيوة لقيتها خلاص .. لا كله تمام .. متشكر يا "طارق" .. سلام  
أنهى "مراد" المكالمة وهى ينظر الى "مريم" بإمعان قائلاً:  
-انتى اتصلتى بيه لما تهتى  
قالت "مريم" بسرعة:  
-لا اتصلت بـ "مى" صحبتى وهى زميلتى فى الشركة .. قولت لها تتصل بيه  
صمت "مراد" ثم عاد يتفرس فيها قائلاً:  
-رقمك معاه من زمان  
قالت "مريم" وهى تنظر اليه:  
-لأ أنا مدتهوش رقمى اصلاً .. ومبديهوش لأى عميل .. ممكن يكون خده من "مى"  
أوماً "مراد" برأسه .. تلاقى أنظارهما فى صمت .. كل منهما ينظر الى عين الآخر بحذر وقلق وخوف .. كانت نظرات كل منهما تصرخ فى الآخر قائله ..  
ابتعد عنى لن اسمح لك بإختراق أسوار قلبي .. لكن نفس السؤال أخذ يتردد فى أعماق كل منهما .. ترى هل سأستطيع حقاً الصمود ؟

## الفصل العشرون

- أنا كنت شاكك فيها من الأول -  
: "قال" مراد " هذه العبارة بعصبية .. فقال "طارق  
وايه مصلحتها فى كدة -  
: قال "مراد" بغضب  
الهائم أكيد كانت بتاخذ منه فلوس .. ماهى مش هتعمل كده لله فى الله -  
: قال "طارق" بحده  
حسبى الله ونعم الوكيل فيها .. انسانه معندهاش ضمير -  
: قال "مراد" بحنق  
لولا التسجيل اللى حطيته فى المكتب مكنتش اكتشفت ان سكرتيرتى عميلة عند -  
"حامد" وبتنقله كل تحركاتى  
: قال "طارق" بحنق  
بس يا "مراد" مكنش المفروض تكتفى بطردها .. كان المفروض توديها فى -  
ستين داهية بالتسجيل اللى معاك

: "قال" مراد

- هى بنت برده .. صحيح تتساهل قطم رقابتها عشان خاينة للأمانة بس برده -  
بنت مينفعش أبلغ عنها وأدخلها اقسام  
: قال "طارق" وهو ينهض  
طيب هروح أشوف مكتب توظيف محترم بيعتلنا سكرتيرة محترمة -  
زفر "مراد" بضيق .. فأكثر ما يكرهه فى حياته .. الخيانة .. بكل أشكالها  
وأنواعها

\*\*\*\*\*

: دخل "جمال" منزله وعلامات الضيق على وجهه فإستقبلته "صباح" قائله  
"كنت فين يا "جمال" -

: قال "جمال" بضيق

"كنت بشم هوا يا "صباح -

: قالت بعتاب

فى عريس يسيب مرته فى البيت ويخرج ولسه مفاتيش اسبوع على جوازهم -

: هتف "جمال" بغضب

كانت جوازه ما يعلم بيها الا ربنا -

: هتفت "صباح" بحنق

ليه بجه ان شاء الله .. مش انت اللى كنت بتجولى انك نفسك فى اليوم اللى -

تتجوزنى فيه يا "جمال" نسيت كلامك الحلو اللى كنت بتسمعهولى

: قال "جمال" بتهكم

كنت مغفل يا "صباح" .. ياريتنى كنت انشكيت فى لسانى جبل ما أجول كلمة -

"واحدة منه يا "صباح

قال ذلك ثم زفر بضيق ودخل حجرة النوم يشاهد التلفاز تحت نظرات "صباح"

الغاضبة

\*\*\*\*\*

أمسكت "سهى" هاتفها الذى لم يفارق يديها الا نادراً طيلة اليومين الماضيين

لكن كالعادة رفض "سامر" الإجابة على أى من اتصالاتها .. كآخر حيلة ..

لديها اتصلت بمكتبه فأخبرتها السكرتيرة أنه منشغل ولديه اجتماع .. فقالت

: بصوت كمن أوشك على البكاء "سهى"

طيب لو سمحتى لما يخلص اجتماع قوليله "سهى" اتصلت بيك وعيازك -

ضرورى

حاضر يا فندم -

: أنهت السكرتيرة المكالمة وتوجهت الى مكتب "سامر" قائله

الآنسه "سهى" اتصلت يا فندم وقولتلها زى ما حضرتك قولتلى -

: قال "سامر" بلامبالاة

طيب لو اتصلت تانى قوليلها سافر يومين ولو سألتك فين قوليلها متعرفيش -

حاضر يا فندم -



\*\*\*\*\*

عاد "مراد" الى البيت فى المساء ليجده ساكناً .. توجه الى غرفة المعيشة ليجدها فارغة .. صعد الى غرفته وطرق الباب ليجد "مريم" جالسه على الأريكة تتطلع الى حاسوبها الموضوع على قدميها :

السلام عليكم -

: نظرت اليه قائله

وعليكم السلام -

: أغلق الباب وهو يتطلع اليها قائلاً

أمال فين ماما واخواتى ؟ -

: قالت "مريم" بهدوء

راحوا لخالتك .. هما كلموك أدامى انت نسيت -

: قال "مراد" وقد بدا عليه التذكر

أيوة أيوة .. معلىش نسيت -

عادت "مريم" الى عملها مرة أخرى أمام الحاسوب .. دخل "مراد" الحمام : وأخذ دشاً واستبدل ملابسه ثم نظر اليها قائلاً

اتغديتي -

: قالت

أيوة -

: أخرج هاتفه يتفحصه .. فنظرت اليه "مريم" قائله

لو مكنتش اتغديت أقول لدادة "أمينة" تحضرلك الغدا -

: نظر اليها مبتسماً

محبش أكل لوحدى .. لو هتاكل معايا ماشى -

: قالت بحرج

انا اتغديت -

: قال وهو يغادر الغرفة

أنا نازل المكتب -

توجه "مراد" الى مكتبه .. بعد ما يقرب من ساعة ذهبت اليه "مريم" وطرقت

: الباب أذن لها بالدخول .. وقفت أمامه قائلاً

- خلصت تصميم اللوجو ياريت تشوفه عشان لو محتاج تعديل أعدله قبل ما -

أحطه على البروشورز وباقي التصميمات

أشار "مراد" الى المنضدة أمام الأريكة فوضعت عليها حاسوبها وجلس

: "مراد" ينظر الى التصميم .. تابعت تعبيرات وجهه بإهتمام وقالت

لو محتاج أى تعديل مفيش مشكلة قولى وأنا أعدله -

: قال "مراد" دون أن ينظر اليها

لا ممتاز .. بجد ممتاز -

: ابتسمت "مريم" وقد أسعدها اطراءه .. رفع رأسه ونظر اليها مبتسماً

شكلى هستغلك وأعمل تجديد لكل تصميمات الشركة والمصنع -

: قالت بحماس

- ما فيش مشكلة ... أصلاً أنا بحب شغلى جداً وبعتبره هواية مش حاجة -

مفروضة عليا

: "سألته" مراد

اتعملتى فين ؟ -

: قالت "مريم" وقد اختفت ابتسامتها

جوزى الله يرحمه هو اللى علمنى -

اختفت ابتسامه "مراد" هو الآخر وأشاح بوجهه عنها .. لاحظت "مريم"

: التغيير الذى طرأ عليه واستغربت من ذلك .. حملت الحاسوب قائله بتوتر

هبتدى فى البروشورز من النهاردة ان شاء الله وما أخلصها هوريالك -

: قال "مراد" دون أن ينظر اليها

ارتباطكوا استمر أد ايه ؟ -

: بلعت "مريم" ريقها بصعوبة وقالت بصوت خافت

سنتين -

: نظر "مراد" اليها متفرساً فيها وقال

وليه متجوزتوش .. ليه استنتيتوا ده كله ؟ -

: قالت "مريم" بشئ من الضيق  
حصلت ظروف خلطنا نضطر نأجل جوازنا -  
: هربت من نظراته المتفحصه قائله  
بعد اذنك -

غادرت "مريم" غرفة المكتب لتترك "مراد" غارقاً فى التفكير .. ثرى الى أى  
مدى أحبته ؟ .. أحبته الى درجة أن تخلص له حتى بعد موته ؟ .. ثرى لماذا  
أحبته ؟ .. كيف جعلها تحبه لدرجة ألا تستطيع رؤية رجلاً غيره ؟ .. لم ينسى  
ما أخبره اياه "طارق" من رفضها الزواج بسبب حبها لخطيبها الراحل .. ثرى  
هل من الممكن أن يدق قلبها للحب مرة أخرى ؟ .. هل من الممكن أن تقبل  
العيش مع رجل ..... !! .. عند هذه النقطة أرغم عقله على التوقف عن  
الإسترسال و قام الى مكتبه وجلس يطالع أوراقه وملفاته ليصرف عقله عن  
التفكير فيها وفيما يخصها .

صعدت "مريم" الى غرفة "مراد" وجلست على الأريكة وهى غارقة فى التفكير  
هى الأخرى .. ثرى لماذا حدث الطلاق بينه وبين زوجته ؟ .. ثرى كيف كان  
أحبها ؟ .. لماذا اذن انفصلا ؟ .. هل مازال يتذكرها ؟ .. أيتمنى .. شكلها ؟  
العودة اليها ؟ .. كم دام زواجهما ؟ .. ومنذ متى انفصلا ؟ .. ظلت الأسئلة  
تتقافز على عقلها الى أن أرغمت عقلها عن الإنشغال بعملها الذى بين يديها

: عاد الجميع الى البيت والتفوا حول طاولة الطعام .. قالت "نرمين" بمرح  
"كانت أعدة حلوة أوى يا ريتك كنتى جيتي معانا يا "مريم" -

: قالت "مريم" مبتسمة

معلش كان عندى شغل -

: "قالت "سارة" لـ "مراد

خالتو عزمنا كلنا يا أبيه آخر الاسبوع .. حاول تفضى نفسك -

: قالت "سارة" بحماس

وأنا يا أبيه حاول تفضيلي نفسك عايزه أشتري لبس جديد وشوية حاجات كدة -

عشان الكلية

: "قال "مراد

- خلاص نخرج بكرة ان شاء الله تشتري انتى حاجتك وكمان "سارة" و -  
 "مريم" يخرجوا ويغيروا جو  
 : قالت "سارة" بحماس  
 تمام أوى .. بس خلى بالك يا أبيه أنا ليا زى ما "نرمين" هتشتري بالظبط .. -  
 مش معنى انى خلصت كلية انى مش هتشتري لبس جديد  
 : ابتسم "مراد" قائلاً  
 ماشى يا "سارة" عنيا ليكي -  
 ابتسمت "مريم" وهى تراقبهم .. سعدت كثيراً للعلاقة الودودة بينهم .. قالت  
 : "ناهد" مبتسمة  
 أنا بأه بتخفق من اللف كتير سييونى بأه أنعم بيوم من الراحة والإستجمام -  
 : قالت "نرمين" ضاحكة  
 تقصدى يا ماما ان احنا عملينك ازعاج يعنى .. ده احنا التلاته قطط صغنه -  
 : ضحكت "ناهد" قائله  
 مريم" آه قطة .. أما انتى و "سارة" لما بتتجمعوا مع بعض بتقلبوا ببغانات " -  
 وبتصدعولى دماغى  
 : قال "مراد" لأمه  
 متيجي معانا يا ماما -  
 : "قالت "ناهد"  
 لا يا حبيبي اخرجوا انتوا واتبسطوا -

\*\*\*\*\*

- دخلت "صباح" غرفة النوم وجلست بجوار "جمال" الذى بدأ مندمجاً فى  
 : مشاهدة أحد الأفلام .. اقتربت منه وقد تزينت وتعطرت .. قالت له  
 متجفل البتاع ده يا "جمال" وتيجى نجعد نتكلم شويه -  
 : قال "جمال" وهى ينظر اليا شذراً  
 هتكلم في اييه يعنى .. خلىنى مع الفيلم أحسن -  
 : قالت "صباح" بحنق  
 يجطع الفيلم على بيتفرجوا عليه .. أنى عروسة يا "جمال" المفروض تهتم -

بيا أكثر من اكده

: "صاح" جمال

يجطع الجواز على البيتجوزوا .. آنى دماغى مش فىا يا "صباح" روحى -  
شوفيلك حاجة تشغلك بعيد عنى أحسن العفارىت بتتنطط أدام عيني السعادى  
: قالت "صباح" بغضب

ماشى يا "جمال" بكرة تندم وتجول آنى معرفتش أجدر جيمتها -

: قام "جمال" من مكانه ووقف بجوار الفراش قائلاً بتهكم

حوش حوش .. ليه ان شاء الله فاكده نفسك مين يا "صباح" السفيرة عزيزة -

ده لولا انى اتنازلت عن المحضر وجفلنا على الجضية كان زمانك دلوجيت ..

نايمة فى البورش يا "صباح" والبراغيت بتشغى فى جتتك

: وقفت "صباح" بمواجهته قائله بغضب

ماهو لو مكنتش انت ناجص وجليل الأصل مكنش ده كله حوصل .. جولتلك يا -

جمال" مش "صباح" اللى يدحك عليها .. ده آنى ألفك البحر كعب داير "

وأرجعك عطشان

: دفعها بيدها الى الفراش قائلاً

"طيب اكنمى .. اكنمى أحسن أديكى كف يكتمك للأبد يا "صباح" -

\*\*\*\*\*

فى اليوم التالى خرج "مراد" مع الفتيات الى أحد المولات التجارية .. تقدمت

: الفتاتان فالتفتت "مريم" قائله لـ "مراد" بخرج

أسفه انك اضطريت تاخذنى معاك -

: قال "مراد" وهو ينظر اليها

مين قالك انى واخذك معايا غصب عنى -

: قالت بارتباك

يعنى .. المفروض كنت تخرج مع اخواتك بس .. لولا انهم الصبح أصروا انى -

أخرج معاهم

: قال "مراد" ببرود

أظن انا من بالليل وأنا قايل انك هتخرجى معانا -

: أشار بيده قائلاً

اتفضلى -

أخذت الفتاتان وقتاً طويلاً فى المشاهدة والشراء توجه "مراد" الى الملابس

: المعروضة وانتقى بعضها وحملها بيده ثم توجه الى "مريم" قائلاً

ادخلى قيسيهم -

: نظرت "مريم" اليه بدهشة وخرج قائله

لا شكراً أنا مش عايزة أشتري حاجه -

: قال "مراد" بحزم

محبش أكرر كلامى مرتين -

: قالت "مريم" بحنق

و أنا مش عايزة أقيسهم -

: قال بعند

هتقيسيهم -

زفرت بضيق .. لاحظت أن البائعة تقف بجوار "مراد" فلم ترد التماذى أكثر فى

هذا النقاش فأخذتهم من يده وتوجهت الى أحد الكباتن المخصصة للبروفة

: وبمجرد أن أغلقت الستارة فتحها "مراد" فنظرت اليه بدهشة .. فقال بحزم

قيسيهم فوق هدومك .. متقلعش هدومك لأن فى ناس مغدهاش ضمير بتحط -

فى البروفة كاميرات مراقبة

أومات برأسها وهى تشعر بشعور غريب يسيطر عليها وهى ترى هذا الحرص

والإهتمام منه .. أغلقت الستارة مرة أخرى ونفذت ما قال .. خرجت بعد عدة

: دقائق قائله

أيوة مظبوطين .. بس لو سمحت أنا اللى هدفع تمنهم -

: نظر اليها بحده وأخذهم منها وأعطاهم للبااعة قائلاً

هناخد دول كمان -

شعرت "مريم" بالضيق فلا ينقصها الا أن يدفع ثمن ملابسها أيضاً .. وقف

الجميع فى الخارج يتفقون على المكان التالى الذى سيذهبون اليه .. كانت

"مريم" شارده فلم تتابع حديثهم .. مر من خلف "مريم" بعض الشباب الذين "

كانوا يتحدثون ويمزحون معاً .. فرجع أحد الشباب الى الخلف وهو يضحك مع

أصدقائه ولم ينتبه الى أنه سيصطدم بـ "مريم" التى توليه ظهرها .. فجأة مراد" يحيطها بأحد ذراعيه ويجذبها اليه بقوة فارتطمت " "وجدت "مريم بصدره وهى تشعر بالدهشة مما فعل .. وبيده الأخرى دفع الشاب الذى كان مازال يرجع للخلف دون أن ينتبه .. التفت الشاب بعدما ارتطم بيد "مراد" : ونظر اليهما قائلاً

أنا آسف والله مخدمتس بالى .. معلى أنا آسف -

: قال "مراد" بجديه

خلى بالك وانت ماشى -

: تتمم الشاب مرة أخرى

أنا آسف معلىش -

شعرت "مريم" بالخرج من وجودها فى أحضان "مراد" بهذا الشكل فابتعدت عنه ودفعته عنها بشكل أثار انتباه "سارة" و "نرمين" .. كانت تشعر بإرتباك : "فقال "مراد" ..شديد

يلا تعالوا على العربية وبعدين نبقى نشوف هنروح فىن تانى -

.. سعدت "مريم" بجوار "مراد" فى السيارة وهى تتحاشى النظر اليه

\*\*\*\*\*

: قال "حامد" للظابط الذى يحقق معه فى البلاغ الذى قدمه "مراد" ضده

نرمين" هى اللى ركبت معايا بمزاجها يا حضرة الظابط" -

: قال الظابط

بس يا "حامد" بيه فى شاهد شافك وانت بتخدرها فى العربية -

: "قال "حامد

شاهد مين ؟ -

: قال الظابط

زوجة "مراد" بيه .. هى اللى شافتك وانت بتخدر الآنسه "نرمين" وبتفقدوها -  
الوعى

: قال "حامد" ببرود

كدابه .. وبتحاول تدارى على أخت جوزها .. "نرمين" أغمى عليها فى -

العربية وكانت راكبة معايا بمزاجها

: قال الظابط

طيب ليه زقتها ووقعتها من العربية ومشيت -

: "قال محامى "حامد

محصلش .. كل الحكاية ان مرآة أخوها لما شافتها أغمى عليها فى العربية و -

حامد" بيه بيحاول يفوقها أصرت انه ينزلها وفعلا نزلها من العربية وشالها "

لحد ما دخلها الفيلا وبعدين مشى

: قال الظابط بشك

أمال ليه "مراد" بيه قدم البلاغ ده -

: قال المحامى

غيرة ومنافسة غير شريفه .. لأن "حامد" بيه خرج من الشراكة معاه وشارك -

رجال أعمال تانيين .. فحب "مراد" بيه يرد هاله بسبب الخسارة اللى خسرها

من انسحاب "حامد" بيه

\*\*\*\*\*

جلست "مريم" فى المساء مع "ناهد" فى حجرة المعيشة يلعبان الشطرنج ..

: صاحت "مريم" مبتسمه

كش ملك -

: "قالت "ناهد

ياربى .. مفييش ولا مرة أكسبك فيها -

: ضحكت "مريم" قائله

قولت لحضرتك انى بعرف ألعبا كويس -

: قالت "ناهد" ضاحكة

مش محتاجة تقولى أدينى شوفت بنفسى -

: ثم قامت قائله

ظبطيهم تانى مكانهم على ما أروح أعمل فنجان قهوة -

: نهضت "مريم" قائله



خليكي يا طنط وأنا هروح اعملها لحضرتك -

: قالت "ناهد" مبتسمة

لا دى قهوة عربي مش هتعرفى تعملها .. يلا رتبي اللعبة على ما أرجلك -

جلست "مريم" تعيد القطع الى مكانها على لوح الشنطرنج .. دخل "مراد"

: الغرفة ونظر اليها والى ما تفعله .. ثم قال

بيقولوا بتعرفى تلعبى كويس -

: ابتسمت ابتسامه صغيره وقالت

يعني .. بيقولوا -

: فوجئت به يجلس قبالتها على الأريكة قائلاً بتحدى

طيب وريني شطارتك -

تلاقت نظراتهما للحظات قبل أن تخفض "مريم" بصرها وتبدأ اللعب .. عادت

"ناهد" لتجد "مراد" جالساً قبالة "مريم" يلعب معها فأبتسمت وانسحبت الى "

غرفتها بهدوء .. بعد فترة من اللعب كانا كلاهما ينظر الى لوح الشنطرنج

: ويركز تركيزاً شديداً .. قال "مراد" دون أن يرفع رأسه

انتى ملكيش صحاب ؟ -

: اندهشت "مريم" لسؤاله ونظرت اليه قائله

أيوه ليا -

: قال "مراد" وهو ينظر الى القطع المرصوفة أمامه بتركيز

أصلك لا طلبتى تزوريهم ولا طلبتى يزوروكى -

: قالت "مريم" بحرج وهى تنظر اليه

- اتكسف اطلب انهم يجولى هنا .. وبعدين هى واحدة بس هى اللى قريبة منى -

وصحاب من زمان

: "قال "مراد

سهى" ولا "مى" ؟" -

: اندهشت "مريم" لتذكره أسم الفتاتين فقالت بهدوء

"مى" -

: رفع "مراد" رأسه ونظر اليها قائلاً

و "سهى" ؟ -

: قالت "مريم" بهدوء

زميلتى فى الشركة ومع بعض فى نفس المكتب بس مش صحاب أوى -

: أوما برأسه وأعاد النظر الى اللعبة .. قال "مراد" بهدوء

تحبى تزوريها ؟ -

: ابتسمت "مريم" قائله

أكيد .. دى "مى" وحشتنى أوى بجد -

: نظر اليها "مراد" مراقباً ابتسامتها وهو يقول

عندها اخوات شباب ؟ -

: "قالت" مريم

لا هى بنت وحيدة -

: "قال" مراد

طيب ممكن أخذك ليها بعد بكرة لو تحبى -

: قالت بسعادة

خلاص تمام وأنا هتفق معاها على كدة -

: صمت "مراد" قليلاً ثم قال

مع انى شايف ان الأحسن هى تجيلك وممكن أبعثها العربية بالسواق يجيبها -

لحد هنا ويوصلها تانى .. أقصد عشان تكونى أعدة براحتك معاها .. وأساسا أنا

طول اليوم مش موجود يعنى محدش فى البيت الا ماما والبنات

: ثم قال وهو ينظر اليها بحنان

عشان أكون مطمئن عليكى -

شعرت "مريم" بخفقات قلبها تتسارع وهى تتطلع الى تلك النظرة الحانية فى

: عينيه .. وجدت الخوف يتسلل الى قلبها .. نهضت مسرعة وقالت

أنا تعبت وعايزة أنام تصبح على خير -

غادرت الغرفة ونظرات "مراد" تتابعها .. لم تشعر برغبة فى النوم .. فوقفت

فى الشرفة شاردة وهى تشعر بالضيق من نفسها ومن تلك المشاعر التى

تعترىها بين الحين والآخر .. توجه "مراد" الى مكتبه وهو يفكر فى "مريم"

وفى ردود أفعالها تجاهه .. حانت منه التفاته الى الدرج الذى يحوى قسيمة

فتحه وأخرج القسيمة وفتحها وهو شادراً وأخذ يتطلع اليها لأول مرة .. الزواج منذ أن استلمها من المأذون .. كانت عيناه تمر على الكلمات فى تكاسل .. وفجأة اتسعت عيناه وتجمدت ملامحه وأخت دقات قلبه تتعالى بسرعة .. مرر عينيه على أحد السطور مرات ومرات الى أن تأكد بأن تلك الكلمات مكتوبة بالفعل وليس محض تهيآت .. هب من مقعده فجأة توجه الى غرفته وأغلق مریم" لا تزال فى الشرفة دخلت فزعة من صوت "الباب خلفه بعنف .. كانت : الباب الذى انغلق بقوة .. نظرت الى "مراد" قائله

فى ايه ؟ -

نظر اليها "مراد" بحدة شديدة ورفع الورقة أمام عينيه دون أن يتفوه بكلمه ..

: قالت "مریم" بدهشة

ايه ده ؟ -

: قال "مراد" بصوت يشوبه الغضب

قسيمة جوازنا -

شعرت "مریم" بالخوف الشديد .. أيقنت بأنه اكتشف حقيقة كونها كانت زوجة لأخيه .. اقترب منها وعيناه تلمع غضباً .. رجعت للخلف فى خوف فقال بصوت هادر :

ماجد خيرى الهوارى" .. انتى كنتى مراة أخويا ؟ .. مراة "ماجد" أخويا ؟ -

: صمتت وهى لا تدرى ما تقول فصاح بغضب

انطقى .. انتى كنتى عارفة ان "ماجد" أخويا ؟ -

: أومأت برأسها ايجاباً فازداد اشتعال النار فى عينيه وصرخ قائلاً

وليه ما قولتلىش من الأول انك كنتى مراته -

: قالت "مریم" بإضطراب شديد وهى على وشك البكاء من شدة الخوف

عمتو .. عمتو "بهيرة" قالتلى متكلمش الا لما هى ترجع من السفر .. قالتلى -

مجبلكش سيرة أبدأ عن الموضوع ده وهى هتقولك بنفسها

أخذ "مراد" يتطلع الى القسيمة مرة أخرى .. وكأنه لا يصدق ما يرى .. ولا

: يصدق ما يسمع .. قالت "مریم" بصوت خافت

أنا مش فاهمة هى ليه قالتلى مجبلكش سيرة .. بس حسيت ان فى حاجه -

خطيرة فى الموضوع وعشان كدة متكلمتش

: ثم أكملت

انت كنت تعرف ان عندك أخ ؟ -

: نظر اليها "مراد" بحده وقال بعنف

أيوة كنت عارف ان عندى أخ -

: صمت قليلاً ثم قال بجمود

بس اللي أعرفه انه مات من زمان .. من واحنا صغيرين -

: نظرت اليه "مريم" بدهشة وقالت

مين قالك كده .. مين قالك انه مات وهو صغير -

: قال "مراد" بحيرة مشوبة بالحدة

بابا اللي قالى كده .. وعمتى كمان قانتلى كده .. اللي أعرفه ان عندى أخ -

ومات واحنا صغيرين

: شعرت "مريم" بالدهشة .. نظر اليها "مراد" قائلاً

كان عايش مع مين طول السنين اللي فاتت ؟ -

شعرت "مريم" بالتوتر .. ترى أتخبره الحقيقة أم لا ؟ .. أتخبره بأمر أم

ماجد" الموجودة حالياً فى دار المسنين ؟ أم تخبره بالسراياكب والذى لم "

تطلع عليه أحد حتى الآن ؟ .. ترى لماذا أخفوا عليه أمر أخوه ؟ .. لماذا

.. أخبروه بأنه مات وهو صغير ؟ .. لماذا تجاهلوا وجوده وكأنه لم يولد أصلاً؟

ألهذا الأمر علاقة بوالدها ؟ .. قالت فى نفسها لا لن أخبره بأنى أعرف مكان أم

"ماجد" ولن أخبره عن سرى الذى أحتفظ به لنفسى الى أن أفهم جيداً ما يدور

حولى .. أخشى أن أخبره بكل ما أعرف فتنقلب الطاولة ضدى وأنا لا أفهم شيئاً

مما يحدث .. لماذا كل هذه الأسرار؟ .. لا بد من وجود سبب .. سبب جعل عمته

تشدد عليها ألا تخبر "مراد" بنفسها عن أمر أخيه .. يجب أن أسبر أغوار

الحقيقة وأصل اليها .. يجب أن أكشف كل تلك الأسرار التى تحيط بـ "مراد" و

: عائلته .. قالت بتوتر وهى تتحاشى النظر الى عينيه

معرفش كان عايش مع مين وهو صغير .. بس لما عرفته كان عايش لوحده -

.. أوماً "مراد" برأسه وأشاح بوجهه عنها .. بدا وكأنه لا يستطيع النظر اليها

يشعر .. غادر الغرفة .. وغادر المنزل كله .. ركب سيارته وهو يشعر بالإختناق

.. بشئ ثقيل يجثم على صدره .. الفتاة التى تزوجها هى زوجة أخيه الراحل

أخيه الذى ظن أنه مات وهو صغير .. لماذا أخفوا عنه أنه مازال على قيد الحياة .. لماذا يشعر بأن "مريم" مازالت تخفى عنه الكثير .. لماذا شعر وهو ينظر فى عينيها بأن هناك سر خطير تخفيه .. سر أكبر من أمر أخوه الذى لم يعلم عنه شيئاً طول تلك السنوات التى ظن فيها أنه ميت .. يجب أن يكتشف الحقيقة .. يجب أن يرغم "مريم" على اخباره بكل ما تعرفه .

\*\*\*\*\*

أوقف "مراد" سيارته أمام النيل ولم يشعر بنفسه الا واذان الفجر يصل الى مسامعه .. صلى الفجر وتوجه الى البيت .. كان الجميع نيام .. هم بالصعود الى غرفته لكنه أحجم عن ذلك توجه الى غرفة المكتب وافترش الأريكة ونام فوقها فى الصباح التف الجميع حول طاولة الطعام .. كان "مراد" يتحاشى النظر .. مريم" الجالسه بجواره ويبدو على وجهه علامات الضيق .. أخذت "الى : "مريم" تختلس النظر اليه الى أن قام فجأة وقال

أنا ماشى -

فى المكتب شعر الجميع بتوتر "مراد" وعصبيته فى القاء الأوامر على : "الموظفين .. حتى "طارق" لم يسلم من تلك العصبية .. صاح "مراد يعي ايه الشحنة تتأخر فى الجمارك .. أمال بس فالح سافر يا "مراد" وأنا فى - "الشركة بدايلك يا "مراد" : قال "طارق" بهدوء

انا مليش ذنب يا "مراد" وبعدين راجلنا اللى فى الجمارك بيقول ان التأخير - على الكل

: صاح "مراد" بغضب وهو يلقي بأحد الملفات على المكتب بعصبيه وراجلنا ده مش قادر يتصرف .. وهى دى أول مرة نشحن فيها .. عمرنا ما - اتأخرنا كده .. هو لو مش عارف يعمل شغله يقول واحنا نشوف حد غيره يعرف يمشى الشغل

: نظر اليه "طارق" قائلاً

مراد" انت مالك فى ايه بتشاكل دبان وشك ليه .. الراجل مغلطش وقولتلك " -

## التأخير على الكل

صمت "مراد" قليلاً ثم أخذ مفاتيحه وهاتفه وغادر المكتب فى عصبية .. توجه الى سيارته ومشى بها على غير هدى .. كان يسير بسرعة عالية وهو يشق طريقه بين السيارات .. كان يشعر بغضب وضيق كبير بداخله .. شعر بأنه ناقم !..... مريم" بشدة .. لأنها لم تخبره بأمر زواجها من أخيه .. وتركته يـ"على حرك رأسه لينفض تلك الأفكار منه .. ظل يردد لنفسه .. هى كغيرها لا تساوى عندى شيئاً .. لا فرق عندى بينها وبين أى فتاة أخرى .. لم ولن اشعر باى شئ تجاهها .. قلبي كما هو لم يمسه أحد .. ولن يستطيع أحد اقتحام أسواره

\*\*\*\*\*

مرت عدة أيام كان يتحاشى فيها "مراد" ملاقة "مريم" أو الحديث معها أو حتى النظر اليها .. وذات مساء عاد "مراد" الى البيت ودخل غرفة المكتب : وأغلق الباب خلفه .. قالت "ناهد" بدهشة

مش عارفه ماله بقاله كام يوم عصبى جداً ومش طايق حد -

: "قالت "نرمين

أنا كمان لاحظت كده -

: "قالت "سارة

أكيد مشاكل فى الشغل .. انتوا عارفين "مراد" أى حاجه تهمة بياخذها على -  
أعصابه

شردت "مريم" وهى تشعر بالضيق .. ترى لماذا هو غاضب .. أغاضب لأنه لم يكن يعلم بأمر أخيه وبأنه مازال على قيد الحياة ؟ .. أم غاضب لأن "مريم" كانت زوجة أخيه الراحل ؟ .. ثم ما شأنه ان كانت زوجة أخيه أم لا .. فزواجها مراد" مؤقت وليس زواجاً حقيقياً .. نهضت "مريم" وأحضرت حاسوبها "ب- كانت توجل تلك المحادثة لكن الوقت قد حان ويجب أن تنهى عملها الذى طلبه : منها .. طرقت باب غرفة المكتب فظنها والدته فقال

اتفضلى يا ماما -

ظهرت الحدة فى نظراته عندما رفع رأسه ليجد "مريم" واقفه أمامه .. قالت

: "مريم" بصوت حاولت أن يبدو ثابتاً

انا خلصت الشغل ياريت حضرتك تشوفه قبل ما نوديه المطبعه -

مد يده فأعطته الحاسوب وضعه على المكتب أمامه وظل ينظر اليه بعينان بدتا

: وكأتهما لا تريان ما أمامها ثم قال بقسوة

زى الزفت -

شعرت "مريم" بالضيق من تعليقه الخالى من الذوق وقالت وهى تحاول التحكم

: فى أعصابها

ايه بالظبط اللي مش عاجبك فيه -

: قال "مراد" بعنف وهو ينظر اليها

كله .. كله مش عاجبنى -

: تنهدت "مريم" وحاولت كظم غيظها وقالت

يعني تحب أغير التصميم كله من أوله لآخره ؟ -

: قال ببرود

أيوة .. واللوجو كمان -

: نظرت اليه "مريم" بحده وهى تقول

بس حضرتك قولتلى من كام يوم ان اللوجو ممتاز -

: قال "مريد" بعناد

غيرت رأيي .. عيدي كل حاجة تانى -

: صاحت "مريم" بحنق

وطالما مكنش عاجبك قولتلى ممتاز ليه كنت قولى انه وحش -

: قال "مراد" بحده

انتى مش هتعمليني أقول ايه وما أقولش ايه -

: قالت "مريم" بعصبيه وهى تحمل حاسوبها من أمامه

شوفلك ديزاينر غيري -

: نهض "مراد" من مكانه وأمسكها من ذراعها بعنف وصاح بغضب

يعني ايه أشوف ديزاينر غيرك وهو لعب عيال -

: قالت "مريم" بغضب مماثل وهى تتطلع الى عينيه

انتى ليه بتتعامل معايا كده .. مش ذنبى انى كنت مرآة أخوك -  
ازدادت قوة قبضته على ذراعها الى أن ظهر الألم على ملامحها .. لحظات  
وخفف من قبضته ثم أزاحها تمام وتوجه الى مكتبه وجلس عليه وهو يسند  
رأسه الى قبضتى يده .. قال بحزم

اخرجى لو سمحتى -

غادرت "مريم" المكتب وهى تشعر بالأسى صعدت الى غرفته فما كادت تفتح  
الشرفة لتقف فيها الا ووجدت "سهى" تتصل بها وتهتف وهى تبكى بحرقة

"أنا ضعت يا "مريم" -

: هتفت "مريم" بدهشة

سهى " بتقولى ايه" -

: قالت "سهى" وشهقات بكائها تتعالى

أنا اتجوزت "سامر" عرفى -

: "صاحت "مريم

"يا مصيبتى .. بتقولى ايه .. عرفى يا "سهى" -

: "قالت "سهى

المصيبة انه منفضلى خالص وبيخلى السكرتيرة تقولى انه مش فى المكتب -

ومسافر مع انى استنيتته تحت الشركة وشوفته وهو بيركب العربية

: ثم أخذت تصرخ وتصيح وقد بدا أن أعصابها قد انهارت تماماً

أنا ضعت يا "مريم" ضعت خلاص .. مش هيرضى يتجوزنى -

كانت "مريم" تشعر بالألم وهى تستمع الى صرخات "سهى" وبكائها فأخذت

: العبرات تسقط على وجنتيها وهى تقول

حبيبتى اهدى هيصلك حاجة -

: صاحت "سهى" وهى تصرخ

أنا مش عارفه أعمل ايه .. اعمل ايه دلوقتى .. لو أهلى عرفوا هيموتونى -

: قالت "مريم" بأسى

طيب انتى فين وأنا أجيلك -

: قالت "سهى" بصوت منهار

أنا خلاص قررت أموت نفسى فى المكان اللى ضيعنى فيه "سامر" .. هحرق -



اللائش اللي حياتي ادمرت عليه .. اللائش اللي قالى انه اول مكان يشهد حبنا  
".. ده مكنش حب يا "سامر" ضحكت عليا يا "سامر"

: ثم قالت بصوت باكى

ياريتنى كنت سمعت كلامك من زمان مكنش ده كله حصل .. ادعيلى يا -

"مريم" ان ربنا يرحمنى ويغفرلى .. بالله عليكى ادعيلى

: أنهت "سهى" المكالمة فشعرت "مريم" بالفزع وأخذت تردد

"سهى" -

عاودت "مريم" الإتصال بها بأصابع مرتجفة لكنها على ما يبدو أغلقت هاتفها  
: .. نزلت "مريم" ببسرة واقتحمت مكتب "مراد" وهتفت وهى تبكى

مراد "الحقتى" -

: هب "مراد" وقفاً والتف حول المكتب ووقف أمامها قائلاً

مالك يا "مريم" فى ايه ؟ -

: قالت وهى تبكى

"سهى" زميلتى فى المكتب كلمتنى وقالتلى انها هتموت نفسها .. أنا خايفة " -  
أوى

: قال "مراد" وهو يحاول استيعاب ما قالت

تموت نفسها .. ازاي يعنى -

: قالت "مريم" بأسى

سامر "صحبك اتجوزها عرفى" -

: شعر "مراد" بالصدمة مما سمع فأخذت "مريم" تقول

قالتلى ان عنده لائش أخذها عليه وهى هتروح هناك دلوقتى وتولع فيه وفى -  
نفسها

: ثم قالت باكيه

أرجوك يا "مراد" ساعدنى -

: جذبها "مراد" من ذراعها وأمرها قائلاً

"طيب اطلعى بسرة غيرى هدومك على ما أتصل بـ "سامر" -

حاول "مراد" الاتصال بـ "سامر" مرات عديدة دون جدوى .. نزلت "مريم"

: مسرعة فقالت بلهفه

رد عليك -

: "قال" مراد

لا .. بس أنا عارف مكان اللانث بتاعه خدنا هناك قبل كده -

انطلق "مراد" بسيارته وبصحبه "مريم" التي أخذت تستغفر ربها وتدعوه أن  
سهى" وينجيهها .. كانت مضطربة للغاية وترتجف من شدة الخوف "يحفظ  
: والفرع .. التفت اليها "مراد" يتطلع اليها .. أمسك كتفها بيده قائلاً

متخافيش هنلحقها ان شاء الله -

أومات برأسها وهي مازالت تدعو الله عز وجل .. سار "مراد" بأقصى سرعة  
الى أن وصل الى المرفأ .. أوقف سيارته فى الخارج ومن حسن حظهما أن  
"مراد" كان يمتلك زورقاً فى هذا المرفأ فأظهر التصريح للمسؤل ودخل الإثنان  
: وهما يسرعان الخطى نظر "مراد" يمينا ويساراً ثم قال

مش فاكرك هو يمين ولا شمال -

: قالت "مريم" بسرعة

كل واحد فينا يروح من طريق -

نظر "مراد" الى "مريم" التي تبعد وهو يشعر بالضيق لإضطراره تركها  
ولكن حياة انسانه فى خطر ويجب انقاذها قبل فوات الأوان .. أخذت .. بمفردها  
تتطلع الى الزوارق واللانثات على جانبيها وهي تبحث بعينيها عن ""مريم  
"سهى" .. الى أن توقفت فجأة .. كانت "سهى" واقفة على ظهر اللانث  
: "وتنظر الى البحر وتوليها ظهرها .. تمتمت "مريم

الحمد لله .. الحمد لله -

: "نادتها" مريم

"سهى" .. "سهى" -

لم تلتفت اليها "سهى" بل بدت وكأنها لا تسمعها

قفزت "مريم" بحذر الى ظهر اللانث وهي تشم رائحة نفاذه تبعث من اللانث  
: اقتربت من "سهى" قائله ..

"سهى" -

لكن كل شئ حدث فى لحظه .. فى لحظة تركت "سهى" عود الثقاب المشتعل  
الذى تحمله لتحيط النيران باللانث من جميع الجهات وتتوسطه "سهى" و

"مريم" التى أخذت تنظر الى النيران المشتعلة على حواف اللانث والتى  
: توجهت "مريم" مسرعة الى "سهى" وصاحت .. تمنعها من المغادرة  
"ايه اللى عملتية ده يا "سهى" -

جذبتها "مريم" من ذراعها وصعدت لها الى سطح اللانث العلوى .. أمسكتها  
: "مريم" من ذراعيها وصرخت فيها قائله

هو ده الحل فى نظرك .. انك تموتى بالشكل ده .. بدل ما تحاولى تستغفرى -  
"ربنا وتكفرى عن ذنبك .. عايزة تنتحرى يا "سهى

بدت "سهى" وكأن قواها قد خارت من شدة البكاء فصاحت بها "مريم" وهى  
: تقربها من الحافة

يلا نطى .. نطى بسرعة اللانث بيولع -

فى تلك اللحظة اقترب "مراد" من اللانث ليرى "مريم" و "سهى" واقفتان  
على ظهر اللانث الذى تشتعل النيران به من جميع الجهات .. قفز قلبه من  
مكانه وشعر بالهلع وهو يرى "مريم" وسط النيران .. جرى فى اتجاه اللانث

: وهو يصيح

"مريم" .. "مريم" -

: "صاحت "مريم" فى "سهى

"نطى يا "سهى" -

نظرت اليها "سهى" بأسى ثم نظرت الى المياة وقفزت فيها ثم سبحت الا أن  
استطاعت الخروج من الماء

: وقف "مراد" أمام اللانث الذى يحترق وهو يصيح بـ "مريم" الواقفة بالأعلى  
"نطى فى البحر يا "مريم" -

نظرت اليه "مريم" ثم الى البحر تحتها .. شعرت بالخوف الشديد .. فهى لا  
تعرف السباحه .. وتخشى الماء .. ظلت متجمدة مكانها وهى لا تدرى ماذا تفعل  
النيران تحيط باللانث وتمنعها من الخروج .. وان لم تقفز فستطال النيران ..

: الدور العلوى الذى تقف فيه .. صاح "مراد" فيها

مريم" .. نطى بسرعة" -

: نظرت "مريم" مرة أخرى الى البحر المظلم تحتها وهى تبكى بصمت وتمتم

يارب ساعدنى -

تقدمت خطوة لكنها خافت ورجعت الى الخلف وهي تمسك فى أحد الأعمدة  
نظر "مراد" حوله فلم يجد أحداً يستجد به .. ثم نظر الى "مريم" .. وتبكي  
التي تقف تستند الى العمود باكيه .. ثم نظر الى النيران المشتعلة والتي كان  
أهون عليه من فقدانها .. خلع الجاكيت وغمره فى الماء ثم أمسكه من الخلف  
ورفعه الى رأسه يحتمى به ثم قفز وسط النيران المشتعلة والتي تتصاعد  
ألسنتها الى عنان السماء .. صعد الى الدور العلوى واقترب من "مريم" التي  
: كانت ترتجف خوفاً .. نظرت اليه "مريم" بدهشة وتوقف بكائها وهي تقول  
انت ازاي نطيت للمركب -

: وأمسك "مراد" رأسها بين كفيه ونظر اليها بفرع وقال لهفه  
انتى كويسة ؟ -

أومات برأسها وعيونها معلقة به لا تصدق أنه قفز فى النار من أجلها ..  
: وجهها الى الحافة قائله  
"نطى يا "مريم" -

: قالت بخوف وهي تعاود البكاء  
أنا خايفة .. مبعرفش أعموم -

: أحاطها "مراد" بذراعيه وطمأنها قائلاً  
متخفيش أنا معاكى .. هنعد ل ٣ وننط سوا -

: قبل أن يبدأ بالعد .. تمسكت به بشدة ونظرت اليه بخوف قائله  
اوعى تسيبنى -

قفز كلاهما الى الماء ثم أوقفها "مراد" وأحاطها بذراعه الى أن خرجت من  
الماء وقد تبللت ملابسهما تماماً .. أدارها اليه وصاح فيها بغضب وصدرة يعلو  
: ويهبط بسرعة

انتى مجنونة ازاي تعملى كده ؟ -

: قالت بضعف وبصوت مرتجف ومازال قلبها يخفق بجنون  
أنا طلعت المركب قبل ما هى تولع فيه .. مكنتش أعرف انها رشت فيه بنزين -  
ومخدتش بالى من الكبريت اللى هيا مسكاه

: قال "مراد" بألم وهو ينظر الى عينيها وقد غشت عيناه الدموع  
مفكرتيش هعمل ايه لو كان جراك حاجه .. مفكرتيش فيا -

تطلعت اليه "مريم" ترقب تعبيرات وجهه الخائفه المتألمه ونظرات عينيه المصوبه تجاهها والتي تتأمل وجهها فى لهفة ونبرة صوته المضطربه وقطرات الماء التى تتصبب من وجهه .. فجأة وجدت نفسها بين ذراعيه يضمها اليه بشدة كما لو كان يخشى أن تفلت منه .. شعرت بدقات قلبه المتسارعه : وبأنفاسه المتلاحقه .. سمعته يتمتم بصوت خافت  
الحمد لله .. الحمد لله -

حاولت "مريم" التحرر من بين ذراعيه لكن "مراد" كان يطبق عليها بشدة ويداه تتشبثان بها بإحكام .. شعرت "مريم" بمشاعر كثيرة متضاربة .. لكنها أسكتت كل تلك المشاعر وسمحت لشعور واحد فقط أن يطفو ويسيطر على كل كيائها .. شعور الأمان الذى شعرت به وهى بين ذراعيه .. أغمضت عينيه لتتعم بهذا الشعور الذى لطالما افتقدته.

## الفصل الحادى والعشرون

مفكرتيش هعمل ايه لو كان جراك حاجه .. مفكرتيش فيا -  
تطلعت اليه "مريم" ترقب تعبيرات وجهه الخائفه المتألمه ونظرات عينيه المصوبه تجاهها والتي تتأمل وجهها فى لهفة ونبرة صوته المضطربه وقطرات الماء التى تتصبب من وجهه .. فجأة وجدت نفسها بين ذراعيه يضمها اليه بشدة كما لو كان يخشى أن تفلت منه .. شعرت بدقات قلبه المتسارعه وبأنفاسه : المتلاحقه .. سمعته يتمتم بصوت خافت  
الحمد لله .. الحمد لله -

حاولت "مريم" التحرر من بين ذراعيه لكن "مراد" كان يطبق عليها بشدة ويداه تتشبثان بها بإحكام .. شعرت "مريم" بمشاعر كثيرة متضاربة .. لكنها أسكتت كل تلك المشاعر وسمحت لشعور واحد فقط أن يطفو ويسيطر على كل كيائها .. شعور الأمان الذى شعرت به وهى بين ذراعيه .. أغمضت عينيه لتتعم

## بهذا الشعور الذى لطالما افتقدته

طال عناقهما وكان الوقت قد توقف وخلقى العالم الا منهما .. لم يشعران إلا بالأمان الذى يشعر به كل منهما فى حضان الآخر .. لم يقطع عليهما تلك اللحظة : الا صوت حراس المرفأ القادمون بإتجاه الحريق وأصواتهم تتعالى

هاتوا طفاية الحريق بسرعة -

حد يتصل بالمطافى يا شباب -

شعرت "مريم" بالفزع عندما سمعت تلك الأصوات التى تعالت فجأة بالصياح .. مراد" الى الخلف حيث الرجال مقبلون فى اتجاههم ثم نظر اليها قائلاً "نظر

:بحنان

متخفيش -

شعرت "مريم" بالإضطراب وبالخرج الشديد ابتعدت عنه وابتعد عنها .. التفت

: "مراد" يتحدث الى الرجال وهو يطبق على ذراع "مريم" بيده

اللانث بتاع واحد صاحبى أنا هكلمه حالا -

: التفت الى "مريم" وأعطاهم مفاتيح السيارة قائلاً

اعدى فى العربية انتى وهى واقفلوها عليكموا كويس -

أومأت برأسها وتوجهت الى "سهى" التى تجلس على أرض المرفأ تبكى ..

وجدبتها من ذراعها وتوجهت بها الى السيارة تحت أنظار "مراد" الذى أخذ

يساعد الرجال فى اطفال الحريق حتى لا يمتد الى اللانثات المجاورة له

أغلقت "مريم" السيارة من الداخل كما أمرها "مراد" ثم التفتت الى "سهى"

: التى جلست بجوارها فى المقعد الخلفى وقالت

انتى كويسة ؟ -

: قالت "سهى" والدموع تتساقط من عينيها

ياريتك كنتى سبتيني أموت -

: هتفت "مريم" بحده

حياتك مش ملكك عشان تنهيهما وقت ما تحبى .. حياتك دى ملك لربنا .. ربنا -

حرم علينا اننا ننهى حياتنا بايدينا .. ربنا بيقول فى سورة النساء : "يا أيها

الذِينَ آمَنُوا لَا تَأْكُلُوا أَمْوَالَكُمْ بَيْنَكُمْ بِالْبَاطِلِ إِلَّا أَنْ تَكُونَ تِجَارَةً عَنْ تَرَاضٍ مِّنْكُمْ

وَلَا تَقْتُلُوا أَنْفُسَكُمْ إِنَّ اللَّهَ كَانَ بِكُمْ رَحِيمًا .. انتى بتهرىبى من ايه لايه يا  
لا يا "سهى" فى .. "سهى" .. انتى فافكره بعد ما تموتى خلاص كده هترتاحى ؟  
حياة تانية بعد الموت .. حياة أبدية .. هتتحاسبى فيها عن كل اللى عملتية فى  
الدنيا .. النبي صلى الله عليه وسلم قال : " مَنْ تَرَدَى مِنْ جَبَلٍ فَقَتَلَ نَفْسَهُ فَهُوَ فِي  
نَارِ جَهَنَّمَ يَتَرَدَى فِيهَا خَالِدًا مَخْلَدًا فِيهَا أَبَدًا ، وَمَنْ تَحَسَّى سَمًّا فَقَتَلَ نَفْسَهُ فَسَمُّهُ  
فِي يَدِهِ يَتَحَسَّاهُ فِي نَارِ جَهَنَّمَ خَالِدًا مَخْلَدًا فِيهَا أَبَدًا ، وَمَنْ قَتَلَ نَفْسَهُ بِحَدِيدَةٍ  
فَحَدِيدَتُهُ فِي يَدِهِ يَجَأُ بِهَا فِي بَطْنِهِ فِي نَارِ جَهَنَّمَ خَالِدًا مَخْلَدًا فِيهَا أَبَدًا " .. وقال  
" كمان : " مَنْ قَتَلَ نَفْسَهُ بِشَيْءٍ فِي الدُّنْيَا عَذَبَ بِهِ يَوْمَ الْقِيَامَةِ

: صممت "مريم" قليلاً ثم قالت

ليه تموتى على ذنب كبير زى ده .. انتى مش عارفه ان من مات على شئ بُعث -  
عليه يوم القيامة ؟

: قالت "سهى" وهى تبكى

ازاى أعيش بعد اللى حصل ده يا "مريم" أنا اتفضحت خلاص وحياتى ضاعت -  
: "قالت" مريم

أنا مش هقولك ازاى عملتى كده .. وازاى رخصتى نفسك كده .. وازاى سبتى -  
واحد يضحك عليكى كده .. بس هقولك حاجة قولتهاك قبل كده يا "سهى" انتى  
بعيد عن ربنا .. قربي منه ومش هتخسرى .. قربي منه يا "سهى" لان سعادتك  
فى القرب منه مش فى البعد عنه

: قالت "سهى" ودموع الندم تغرق وجهها

أعمل ايه يا "مريم" قوليلى أعمل ايه -

: "قالت" مريم

استغفرى ربنا وتوبى يا "سهى" وعاهديه انك مش هتغلطى تانى أبداً مهما -  
لو توبتى بجد هتخسرى ان نارك بردت شويه .. عارفه ان اللى حصل .. حصل  
بس انتى غلطتى يا "سهى" والغلط له تمن .. وغلطتك كبيرة .. مش سهل  
وعشان كده تمنها غالى .. بس اخلصى التوبة وخليكى مع ربنا .. وهو مش  
هيضيعك لو كنتى فعلاً معاه بقلبك وبكل جوارحك .. ربنا كبير ورحيم .. بس لازم  
تكونى صادقة فى توبتك .. وصادقة فى لجونك له .. وصادقة فى ندمك وفى  
دموعك وفى دعائك

انتفضت "مريم" وهى تسمع طرقات على الزجاج خلفها .. التفتت لتجد "مراد"

فتحت الباب فأعطاها غطائين واحد لها وواحد لـ "سهى" .. قال لها وهو يلقي

: "نظرة على "سهى

الأمور تمام ؟ -

أومأت برأسها فقال برقه وهو يتطلع الى عينيها بنظرة جعلت وجنتيها تحمران

:خجلاً وتهرب بعينيها

اقفلى الباب زى ما كان -

أغلقت باب السيارة من الداخل .. وتابعته بعيناها الى أن اختفى عن أنظارها ..

: أفاقت من شرودها على "سهى" تقول

تفتكرى لو استغفرت ربنا هيسامحنى .. تفتكرى ممكن يسامحنى على كل -

"الحاجات الغلط اللي عملتها .. انا غلظت كتير أوى يا "مريم

: قالت "مريم" بحنان

ربنا كبير أوى يا "سهى" وبيسامح ويغفر .. تعرفى ان ربنا بيتجلى فى -

السماء الدنيا وبينادى فى الثلث الأخير من الليل ويقول : "من يدعوني

فأستجيب له من يسألني فأعطيه من يستغفرنى فأغفر له" .. متخيله ده ..

متخيله ان ربنا سبحانه وتعالى هو اللي بيسأل مين عايز يستغفرنى عشان

أغفر له ! .. ومحددش عن أى ذنب بيستغرفه .. يعنى الكلام عام وشامل أى حد

بيستغفر مهما كان الذنب اللي أذنبه

لفت "مريم" أحد الأغطية حول "سهى" والغطاء الآخر حولها .. كانت أسنانها

تصطك ببعضها من شدة البرد وهى الجالسه فى السيارة .. أخذت تفكر رغباً

عنها فى "مراد" الواقف فى هذا البرد وملابسه مبتله تماماً .. حاولت أن تبحث

عنه بعينيها لكنها لم تكن تراه من مكان جلوسها فى السيارة .. فجأة وجدت

: تقول بخوف ""سهى

"سامر" -

تتبع "مريم" نظرات "سهى" التى كانت مصوبة على "سامر" الذى أوقف

سيارته على مقربه من سيارة "مراد" وأسرع الخطى الى داخل المرفأ

: اقترب "سامر" من "مراد" قائلاً فى لوعة

"ايه اللي حصل يا "مراد" -

نظر "سامر" مصدوماً الى اللانش المحترق والذى خمدت ناره بمساعدة



: "مراد" و الحرس .. فهتف فى الحرس بغضب

مين اللى عمل كده .. ازاي يبقى اللانش فى حراتكوا ويحصل كده .. اتصلولى -  
حالا بالمدير بتاعكوا .. انا هوديكموا كلكموا فى ستين داهية

: قال "مراد" بحزم

سامر " ملوش داعى الكلام ده " -

:جذبه "مراد" من ذراعه ليبتعد عن أسماع الرجال فقال "سامر" بغضب

أنا هوديهم كلهم فى ستين داهية -

: قال "مراد" بصرامة

سهى " هى اللى حرقت اللانش " -

: نظر "سامر" الى "مراد" بدهشة وقال

"سهى" -

: قال "مراد" بحده

أيوه ولعت فى اللانش وهى جواه -

: نظر اليه "سامر" مصدوماً وقد أجم لسانه .. فقال "مراد" بعنف

- أنا عارف ان تصرفاتك مش صح بس متخيلتش انها توصل للجواز العرفى -

: قال "سامر" ببرود

دى حياتى وأنا حر فيها -

: قال "مراد" بحده

- اتفضل انهى الموضوع مع الحرس .. مش معقول هتعملها مشاكل ويحبسوها -

: أخذ "سامر" ينظر الى لانشه المحترق بغيظ شديد وهو يقول

استفادت ايه دلوقتى لما حرقته .. غبية -

عاد "مراد" الى السيارة وركب خلف المقود .. وانطلق بسيارته .. سألته

: " "مريم

ايه اللى حصل -

: نظر اليها فى مرآة السيارة قائلاً

قولت لـ "سامر" انها هى اللى حرقته وكانت عايزه تنتحر .. وهو هيجل -

المشكلة مع الأمن

كانت "سهى" قد هدأت تماماً وألقت رأسها للخلف وقد خارت قواها .. مسحت

مريم " على شعرها فى حنان .. التفتت لترى عيني "مراد" مركزتان عليها فى "

: "المرآة .. شعرت بالخجل الشديد وهى تتذكر عناقهما منذ قليل .. قال "مراد على فين ؟ -

: نظرت "مريم" الى "سهى" بشفقه وقالت

تحبي نروحك البيت يا "سهى" ؟ -

: قالت "سهى" بضعف

أيوة ياريت تروحونى -

: قالت "مريم" باهتمام

وهتقولى لأهلك ايه وهدومك مبلوله كده -

: قالت "سهى" بإبتسامه ساخرة حزينه

ده لو خدوا بالهم منى أصلاً .. زمانهم دلوقتى فى سبع نومه وفاكرين انى -  
نايمه فى أوضتى

شعرت "مريم" بالأسى عليها .. أوصلها "مراد" الى بيتها .. فقالت لها

: "مريم" محذره

مش عايزة تصرفات مجنونة تانى يا "سهى" فكرى فى كلامنا كويس -

: قالت "سهى" بضعف

"متخفيش .. ومعلش تبعتك معايا يا "مريم" -

: ثم نظرت الى "مراد" قائله

"أسفه على تعبك يا أستاذ "مراد" -

أوما "مراد" برأسه .. نزلت "سهى" من السيارة ودخلت بيتها .. ونزلت  
لتركب بجوار "مراد" وتركت الغطاء بالخلف .. فجذبه "مراد" ولفه ""مريم  
شعرت بالحرى وتحاشت النظر اليه .. وصلا الى البيت .. كانت .. على كتفيها  
"مريم" تشعر بالتعب والإرهاق .. كان الجميع نيام .. صعدا الى الغرفة فحملت  
: ملابسها وهمت بأن تتوجه الى الحمام بالخارج فأوقفها "مراد" قائلاً ""مريم  
لا خليكي انتى هنا -

حمل ملابسها وخرج من الغرفة .. أخذت دسأً وتوجهت الى الفراش وهى تجد  
صعوبة فى ابقاء عينيها مفتوحتان .. عاد "مراد" ليجدها تغط فى نوم عميق ..  
اقترب من الفراش مبتسماً ومسح بيده على شعرها برقه ودثرها جيداً .. ثم  
توجه الى الأريكة وهو يشعر بألم شديد فى ساقه .. نام على الأريكة وألقى نظره  
مريم" النائمة ثم خلع ساقه الصناعية بعدما اشتد به الألم وأصبح غير "على

محتمل لكنه تركها مكانها تسد فراغ ساقه تحت الغطاء .. وغط في نوم عميق ..  
بعد عدة ساعات شعرت "مريم" بشئ يداعب وجنتها فاستيقظت وفتحت عينيها  
: مراد " واقفاً بجوارها ويبتسم قائلاً " بصعوبة لتجد  
الفجر أذن يا كسلانه -

لم تستطع فتح عينيها فأغمضتهما مرة أخرى وعادت للنوم .. وجدته يربت على  
: كفتها برفق قائلاً

مريم " قومي صلي ونامي تاني " -  
استيقظت هذه المرة .. وخرجت من الفراش بتكاسل تروضات وصلت ثم عادت  
الى النوم مرة أخرى تحت نظرات "مراد" الحائيه

\*\*\*\*\*

في الصباح استيقظ "مراد" وهو يشعر بنغزات كالأشواك في حلقة وظل يعطس  
كانت "مريم" مازالت تغط في النوم .. اقترب منها وأخذ ينظر اليها .. كثيراً  
طويلاً ثم ارتدى ملابسه وتوجه الى الخارج .. جلس على الطاولة مع أمه في  
: الحديقة قائلاً

هما البنات لسه نايمين -

: " قالت " ناهد

أيوة محدش منهم بيصحى بدرى كده .. واضح ان "مريم" كمان لسه نايمة -  
: قال "مراد" وهو يهم بالإصراف

أيوة نايمة .. أنا ماشى يا ماما عايزة حاجه -

: قالت له بإستنكار

مش هتفطر -

: " قال "مراد

هفطر فى الشركة عندى شغل كثير النهاردة -

: عطس مرتين فنظرت له أمه بتفحص قائله

خد حاجة للبرد يا "مراد" شكلك بردت امبارح كان الجو برد -

: لوح لها قائلاً

حاضر .. يلا سلام -

توجه "مراد" الى شركة "سامر" وطلب مقابلته فأذت له السكرتيرة بالدخول

: استقبله "سامر" وعلامات الإرهاق على وجهه قائلاً  
معرفتش انام طول الليل وجيت هنا المكتب ألهى نفسى بأى حاجة وأول ما -  
كلمتنى الصبح استنيتك ومرضتش أمشى  
: قال "مراد" وهو يجلس أمامه  
سامر " ايه الحكاية بالظبط" -  
: قال "سامر" بتبرم  
مفيش اتجوزت عادى يعنى .. دى كل الحكاية -  
: قال "مراد" باستنكار  
هو العرفى بأه عادى دلوقتى ؟ .. ده مش جواز أصلاً -  
: قال "سامر" بضيق  
أنا بعتبره جواز -  
: قال "مراد" بحزم  
البنيت كانت هتموت نفسها امبارح .. ده مأثرش فيك خالص كده ؟ -  
: هتف "سامر" بغضب  
واحدة غبية هعملها ايه يعنى .. حد يعمل عملتها السوداء دى -  
: تنهد "مراد" قائلاً  
هى طبعاً غلطانه .. غلطانه انها حاولت الانتحار وغلطانه انها سلمتك نفسها -  
بورقة ملهاش أى قيمة .. بس انت مشترك معاها فى الغلط ده وبتتحمل جزء من  
المسؤولية .. حاول تراجع نفسك يا "سامر" .. وتصلح الغلط اللى حصل ده

\*\*\*\*\*

: "استيقظت "مريم" ووجدت الأريكة فارغة حملت هاتفها واتصلت بـ "سهى"  
"صباح الخير ازيك يا "سهى" -  
: قالت "سهى" بصوت مجهد  
"ازيك يا "مريم" -  
: قالت "مريم" بقلق  
عاملة ايه دلوقتى -  
: تنهدت "سهى" قائله  
كويسة يا "مريم" .. كويسة متقلقيش نفسك -

طيب يا حبيبتي أنا كنت بظمن عليكى .. مش عايزة حاجة منى ؟ -  
تسلمى يا "مريم" ربنا يباركلك انتى بجد بنت جدعة أوى ياريتتى صاحبتك من -  
زمان وسمعت كل اللى قولتیهولى

: "قالت" مريم

الوقت لسه مفاتش يا "سهى" فى ايدك تغيري كل حاجة وتخليها أحسن .. -  
هقوم أفوق كده وأفطر وأرجع أكلمك تانى  
ماشى يا "مريم" هستنى اتصالك -

ماشى يا حبيبتي مع السلامة خلى بالك من نفسك -  
نهضت "مريم" متكاسله .. بدلت ملابسها ونزلت للأسفل لتجد "سارة" و  
: "نرمين" و "ناهد" فى غرفة المعيشة

صباح الخير يا جماعة -

صباح النور -

: "قالت" نرمين

"هقول لدادة" أمينة" تحضر الفطار كنا مستنيينك أنا و "سارة" -  
: ابتسمت "مريم" وجلست فالتفتت لها "ناهد" قائله  
شكلك مرهق -

: ارتبكت "مريم" قائله

يعنى شويه -

: "قالت" ناهد

مراد" برده كان شكله تعبان وهو نازل النهاردة وأعد يعطس كتير" -  
شعرت "مريم" بالحزن لعلمها بأنه مريض .. وأخذت تفكر فى أحداث الأمس  
ووقوفه بملابس مبتلة فى الهواء الطلق بالتأكد أصابته نزلة برد .. وودت لو  
اتصلت به لتطمئن عليه لكنها ما كانت لتجرو على فعل ذلك

\*\*\*\*\*

توجهت "مريم" الى المطبخ حيث كانت دادة "أمينة" واقفة تؤدى عملها ..  
: قالت لها

تحبى أساعدك -

: التفتت "أمينة" ونظرت الى "مريم" مبتسمة وقالت

"متحرمش منك يا ست "مريم -

: جلست "مريم" على الطاولة الصغيرة فى منتصف المطبخ وقالت لها

انتى عايشة هنا من زمان يا دادة -

: قالت "أمينة" بمرح وهى تكمل عملها

.. يووووه من زمان أوى .. من أول ما سي "خيرى" الله يرحمه اشترى الفيلا -

أنا اللى مربية سي "مراد" و "سارة" و "نرمين" .. دول ميقدروش يستغنوا

عنى أبدأ ولا أنا أقدر استغنى عنهم

: ابتسمت "مريم" وقالت

ربنا يخليكي ليهم -

: التفتت "أمينة" اليها قائلة

حتى لما الظروف داقت بيهم بعد موت سي "خيرى" الله يرحمه مرضتتش -

أسيبهم أبدأ حتى وقت ما كانوا مش قادرين يدفعولى مرتبى والفيلا دى كانت

مرهونه وخسروا كل حاجة

: عقدت "مريم" حاجبيها وهى تستمع باهتمام فأكملت "أمينة" بحماس

قولت أبدأ لو هشتغل بأكلى وشربى بس مش مهم المهم مبعدهش عنهم أبدأ -

مهما اتعرض عليا من فلوس فى بيوت تانية

: ابتسمت "مريم" لإخلاق المرأة فأكملت "أمينة" بفخر

سي "مراد" هو اللى رجع كل حاجة زى ما كانت .. طبعاً راجل من ضره -

وقدر يقف على رجله ويرجع الفيلا دى ملكهم وقدر يكبر الشركة لحد ما .. راجل

بقت حاجة كبيرة أوى

ابتسمت "مريم" وهى تلاحظ اعجاب "أمينة" بـ "مراد" الذى ربتة وكبرته ..

: قالت "أمينة" كمن تبوح بسرأ

بصراحة لما عرفت ان سي "مراد" اتجوز فرحت أوى أوى ده كان مقاطع -

الجواز ومبيطقش سيرته

ضيقت "مريم" عينيها وهى تحاول استنباط ما ترمى اليه المرأة .. سألتها

: "مريم" باهتمام

هو "مراد" ومراته الأولانيه اطلقوا من امتى ؟ -

: "قالت "أمينة

اطلقوا من ست سنين -

شعرت "مريم" بالدهشة ست سنوات ولم يفكر فى الزواج مرة أخرى .. ترى  
أكان يحبها الى هذه الدرجة ؟ .. لماذا طلقها اذن ؟ .. كانت تفكر فى اجابات لتلك  
: الأسئلة فى حيرة عندما أخرجتها "أمينة" من حيرتها قائله

ربنا يسامحها بأه سابته وراحت اتجوزت واحد تانى .. بس هى الخسرانه -  
عمرها ما هتلاقى حد زى سي "مراد" لا فى أخلاقه ولا فى حنيته .. هى اللى  
مش وش نعمه

فكرت "مريم" .. اذن فزوجته هى التى تركته .. ترى لما فعلت ذلك .. لم ترد  
سؤال "أمينة" أكثر حتى لا تشك فى الأمر .. فهى زوجته وهى أكثر شخص من  
المفترض أن يعرف كل شئ عنه .. شردت وهى تحاول أن تخمن اجابات الأسئلة  
التي تدور فى رأسها

\*\*\*\*\*

عاد "مراد" من الخارج وهو يشعر بأن التعب قد أخذ منه مبلغه .. ازداد  
: قائله "العطس وازدادت ارتاجفة جسده وشعوره بالوهن .. اتقبلته "ناهد"  
شكلك تعبان أوى -

: قال "مراد" معانداً

لا أنا كويس هاخذ حاجة للبرد وأدخل أنام -

: هاتفت "ناهد" قائله

انت لسه مخدمتش حاجه للبرد .. بتستهبل يا "مراد" ما أنا قايلالك الصبح -

: قال "مراد" وهو يصعد الدرج

نسيت كنت مشغول هاخذ دلوقتى -

: توقف والتفت الى أمه قائلاً

فين "مريم" ؟ -

: قالت "ناهد" وهى تنظر اليه بامعان

فى المطبخ -

: نظر "مراد" فى اتجاه المطبخ ثم التفت الى أمه وقال بصوت هادئ

هى كويسة ؟ يعنى مش تعبانة ؟ -

هزت "ناهد" رأسها نفيًا وهي مازالت تنظر اليه الى أن صعد الدرج الى غرفته : دخلت "ناهد" المطبخ لتجد "مريم" جالسه تتحدث مع "أمينة" فقالت لها ..

"أمينة" لو سمحتي هاتي حاجة للبرد عشان "مراد" -

: شعرت "مريم" بالقلق وقالت

هو تعبان أوى -

: نظرت اليها "ناهد" قائله

أيوة شكله تعبان أوى وكالعادة نسي ياخذ الدوا طول اليوم -

: "خفق قلبها قلقاً .. قالت "أمينة

ربنا يشفيه ويعافيه ياخذ الدوا ده ويتدفى وهيبقى الصبح زى الفل -

اخذت "ناهد" الدواء وصعدت الى غرفة "مراد" أمرته بالنوم على الفراش وأن

: "يتدفى جيداً .. قال "مراد

حاضر -

: قالت "ناهد" وهي تتحسس جبينه

"حرارتك عالية أوى يا "مراد" تحب أتصل بـ "أحمد -

: قال وهو يعطس

لا أنا كويس -

: قالت "ناهد" بحنق وهي تشير للفراش

طيب لو سمحت نام وريح نفسك على ما أعملك شوربه دافيه -

: توجه "مراد" الى الأريكة وهم بالنوم فوقها فقالت "ناهد" باستنكار

هتنام على الكنبه -

نظر اليها نظرة ذات معنى فامتقع وجهها بعدما فهمت ترتيبات النوم الخاصة

بهما .. همت بالخروج من الغرفة فوجدت فى وجهها "مريم" التي شعرت

بالقلق يراودها وأرادت الإطمئنان على "مراد" .. خرجت "مريم" وأغلقت

: الباب خلفها وهي ترمقهما بنظراتها .. ابتسم لها "مراد" قائلاً

انتى كويسه ؟ -

: نظرت اليه بأسف قائله

أنا آسفه على اللى حصل ده .. كل ده بسببي -

: ظل محتفظاً بابتسامته وقال وهو يرمقها بحنان

فداكى -



: شعرت بالخجل وتعاليت خفقات قلبها وقالت بإرتباك

تحب أعمك حاجة -

: قال "مراد" وهو يرمقهما بنظرات التي لم تبعد عنها لحظه

تعرفى تعملى لمون سخن -

: ابتسمت قائله

أيوة أعرف -

: ابتسم قائلاً

لو مش هتعبك اعمليلي كوباية -

أومأت برأسها وتوجهت الى المطبخ .. رأت "ناهد" تعد لـ "مراد" طبق حساء

فتوجهت الى الثلاجة واخرجت الليمون وشرعت فى اعداد كوب الليمون الساخن

نظرت "ناهد" الى ما تفعله وابتسامه صغيره على شفيتها فتعمدت ان تتلأ ..

فى اعداد الحساء .. صعدت "مريم" الى غرفة "مراد" الذى سمعته يعطس

بقوة فشعرت بالحزن لأجله .. أعطته الكوب فاعتدل قليلا فى جلسته وأخذ

خجلت من الوقوف امامه فى مرمى نظراته هكذا فالتفتت .. يرمقها بنظراته

:لتخرج .. أوقفها قائلاً

راحه فين -

: قالت بإرتباك وهى تتحاشى النظر اليه

نازله تحت -

: صمت قليلاً ثم قال

طيب براحتك -

: نظرت اليه قائله

لو عايز حاجه عرفنى -

: قال "مراد" بتردد

يعني لو كنتى فاضية ومكنش يضايك اعدى نتكلم سوا -

: جلست "مريم" على الفراش قبالتها .. أخذ رشفه من كوبه قائلاً

زميلتك عامله ايه دلوقتى -

: تنهدت "مريم" بأسى وقالت

كويسه .. اتكلمت معاها الصبح وكلمتها تانى من شوية -

: قال "مراد" بحنق

مش عارف ازاي في بنات ساذجين للدرجة دي -

: قالت "مريم" بحزن

- نصحتها كتير .. بس هيا كانت بتسمع من غير ما تنفذ .. هي مش وحشة من جوه هي مشكلتها انها جاهلة بأمور دينها .. وأى حد يقولها حاجة بتصدقها تذكرت "مريم" كيف قصت عليها "سهى" اليوم ما حدث من "خالد" و :  
"سامر" وكل تفاصيل علاقتها بهما .. قال "مراد

- أنا اتكلمت مع "سامر" بس واضح ان الموضوع بالنسبة له مكنش أكثر من مجرد نزوه

: قالت "مريم" بحدده

- بس حرام عليه هو فهمها ان ده جواز وانه حلال لحد ما يتقدملها ويكتب عليها - بجد حرام عليه هي صدقته .. غلطانه ومليون غلطانه بس هو كمان مكنش .. أمين معاها من الأول وأقنعها بحاجة غلط وحرام .. حرام عليه بجد

: ثم قالت برجاء

- مينفعش تتكلم معاها تانى وتحاول تقنعه بموضوع الجواز .. أنا عارفه ان الموضوع مش في ايدك وانه مش سهل .. بس بطلب منك بس انك تحاول معاها تانى

: قال "مراد" بجديه

هعمل اللي هقدر عليه بس مش هقدر أوعدك بحاجة -

: قالت "مريم" بلهفه

ان شاء الله كلامك معاها تانى يجيب نتيجة -

: أخذ "مراد" يتأمل ملامحها بامعان فأبعدت عينيها عنه .. سألها فجأة

كان شكلى ؟ -

نظرت اليه بدهشة .. ثم ما لبثت أن فهمت الى ما يرمى .. "ماجد" .. فقالت

: بتوتر

ليه بتسأل السؤال ده ؟ -

: قال بهدوء

سؤال وخلص جاوبيني عليه -

لم تدر كيف تجيبه .. أنقذتها "ناهد" التي طرقت الباب ففتحت لها "مريم" ..

: دخلت حاملة طبق الحساء قائله

عايزه الطبق ده يخلص كله .. ومش عايزه أسمع كلمة مش عايز دى خالص -  
: ابتسم "مراد" قائلاً

مش هفكر أقول مش عايز لاني عارف انك مش هتسمحيلي أقولها أصلاً -  
انتهى "مراد" من شرب حسائه وأخذ ادويته وخرجت "ناهد" من الغرفة .. هم  
: بالنوم فقالت "مريم" بإستحياء

تعالى نام على السرير أحسن -  
التفت "مراد" ينظر اليها فى ظلام الغرفة التي لا يضيئها سوى نور القمر وقال  
: بحنان

لا أنا كده كويس -

: "قالت" مريم

عشان تكون مرتاح أكثر -

: ابتسم "مراد" قائلاً

لو أنا نمت على السرير وانتي على الكنبة مش هكون مرتاح بالعكس -  
دخلت "مريم" الى الفراش وهي تلقي نظرة عليه كل فترة وأخرى .. الى أن  
شعرت أنه استسلم للنوم .. أخذت تنظر اليه الى أن نامت هي الأخرى فكان هو  
. آخر ما رأيته قبل أن تغمض عيناها

\*\*\*\*\*

عايز أعرف كل حاجه عن اللي اسمها "مريم" دى .. من يوم ما اتولدت لحد -  
النهاردة

: قال "حامد" هذه العبارة لمحامييه فى مكتبه .. فقال المحامى بثقه

- متقلقش يا "حامد" بيه .. خلال يومين تلاته بالكثير وهيكون عندك كل

المعلومات عنها

: قال "حامد" بضيق

على آخر الزمن أدخل اقسام الشرطة ومتهم كمان -

: قال المحامى بسرعة

- متقلقش يا "حامد" بيه ان شاء الله الموضوع هينتهى بدرى بدرى -

: قال "حامد" بغل

- مراد" التبيييييييبييت ده لازم أدفعه تمن اللي عمله " -



: قالت "مريم" بأسى

خايفة من اليوم اللي هضطر فيه أمشى من هنا .. انا اتعلقت بيهم أوى -

: التفتت اليها "مى" قائله

احكىلى يا "مريم" اليه آخر الأخبار -

: "قصت عليها "مريم" ما فات "مى" من أحداث فهتفت "مى

يعنى خلاص عرف انك كنتى مرأة اخوه -

: "قالت "مريم

أيوة عرف .. بس اللي هيجتنى ليه قالوله ان أخوه مات وهو صغير .. ليه -  
كذبوا عليه .. وكمان ليه عمتو قالتلى مجبش سيرة لـ "مراد" عن أخوه وانها

هى اللي هتتكلم معاه بنفسها .. حاسه ان فى حاجة غامضة

: قالت "مى" وهى تفكر بامعان

- فعلا حسه ان فى حاجة غامضة -

: ثم سألتها

- طيب انتى ليه ما قولتيش لـ "مراد" ان مامه "ماجد" موجودة وانها فى دار -

المسنين

: قالت "مريم" بحيرة

- مش عارفه يا "مى" خوفت أقوله .. لازم أفهم الأول ايه اللي بيحصل -

: ثم تنهدت قائله

- فى حاجات كتير مش قادرة أفهمها -

: قالت "مى" بإهتمام

- .....طبعا ما قولتيلوش ان مامه "ماجد" دى -

: قاطعتها "مريم" قائله

- لا طبعا ما قولتيلوش .. خفت من رد فعله .. أصلاً مشوفتيش كان عامل ازاي -

لما عرف بموضوع "ماجد" وانى كنت مراته وانه كان عايش ومماتش صغير

".. عاملنى معاملة صعبة جداً .. فخوفت أقوله على موضوع ماما "زهرة

: تنهدت "مى" قائله

- وهتعلمى ايه دلوقتى -

: تطلعت "مريم" الى ما أمامها وهى تقول بحيرة

- مش عارفه .. بجد مش عارفه -

\*\*\*\*\*

تفتكرى لي بابا وعمتو خبوا عليا ان أخويا "ماجد" عايش ؟ -  
التي تجلس على الفراش تتطلع اليه وهي "وجه" مراد" هذا السؤال لـ "ناهد"  
: مصدومة مما تسمع وقالت

مش عارفه .. أنا بجد اتصدمت .. يعني "ماجد" كان عايش ومكنش ميت من -  
زمان زى ما باباك قالنا

: ثم سألته باهتمام

و كان عايش مع مين طول السنين اللي فاتت ؟ -

: قال "مراد" بحيرة

سألت "مريم" وقالت متعرفش -

: ثم قال بإصرار

مع انى حاسس انها عارفه حاجه ومخبياها عليا .. بس مسيري هعرفها -

: قالت "ناهد" وهي مازالت تحت تأثير الصدمة

مش قادرة أصدق .. أخوك كان عايش وكمان "مريم" كانت مراته .. مش -

قادرة أصدق

: قال "مراد" بضيق

مكنتش مراته .. كانت خطيبته .. كانوا كاتبين كتابهم بس -

: تطلعت "ناهد" الى "مراد" بخبث وقالت بتحدى

وايه الفرق يعني خطيبته ولا مراته ولا حتى مرأة واحد غيره انشاله تكون -

متجوزة عشرة قبل كدة مش هتفرق معانا فى حاجة

: نظر اليها "مراد" بحده .. فأكملت قائله بتحدى

وأساساً بعد ما انت تطلقها أكيد هتتجوز بسرعة البنت كويسة ومحترمة -

ومؤدبة وملتزمة يعني أكيد فى حد معاها فى الشغل حاطط عينه عليها خاصة

انها هتخرج من الجواز دى صاغ سليم

: ازدادت حدة نظرات "مراد" وقال بغضب

ماما انتى عايزه ايه بالظبط -

: قالت "ناهد" بخبث وهي تنهض لتغادر الغرفة

هعوذ ايه يعني .. أما أروح أشوف الغدا -

\*\*\*\*\*

حضر "أحمد" ابن أخت "ناهد" للإطمئنان على صحة "مراد" بعدما علم

: بمرضه .. قال "مراد" وهو يستقبله فى حجرة الصالون

مكنش فى داعى تتعب نفسك يا "أحمد" الموضوع مش مستاهل -

: ابتسم "أحمد" قائلاً

"ازاى يعنى .. متقولش كدة يا "مراد" -

: "جلسا قبالة بعضهما البعض .. قال "أحمد

بس انت باين عليك انك كويس أمال خالتى بتقول انك تعبان أوى ليه -

: ابتسم "مراد" قائلاً

ما انت عارف ماما يا "أحمد" لو حد فينا عطس تعلن حالة الطوارئ فى البيت -

: ابتسم "أحمد" قائلاً

ربنا يباركلكوا فيها -

: ثم تنحج قائلاً

"بصراحة فى موضوع كنت حابب أتكلم معاك فيه يا "مراد" -

: قال "مراد" بأهتمام

"خير يا "أحمد" -

: قال "أحمد" بحرج

بصراحة أنا كنت عايز أكلّمك من زمان بس كنت بتردد .. بس قولت خلاص -

لازم أتكلم لانى خايف تضيع منى

ضيق "مراد" عينيه وهو يحاول أن يعرف مقصد "أحمد" .. تنحج "أحمد"

: مرة أخرى قائلاً

"أنا عايز أطلب منك ايد الأنسه "نرمين" -

: لم يبدى "مراد" رد فعل فقال "أحمد" بتوتر

أنا من زمان وأنا عايز أفتحك .. بس قولت أستنى لما العيادة بتعتى تجهز -

عشان أتقدم بقلب جامد

: ابتسم "مراد" قائلاً

ايه ده العيادة جهزت .. طيب الحمد لله ألف مبروك يا "أحمد" انت تستاهل كل -  
خير

: ابتسم "أحمد" وقد استبشر خيراً وقال

الله يبارك فيك يا "مراد" .. طيب قولت ايه -

: قال "مراد" مفكراً

- ان كان عليا فمعديش أى اعتراض انت شاب محترم ومؤدب ومن العيلة وأنا -  
مش هلاقي لـ "نرمين" أحسن منك .. بس باقى رأيها ورأى ماما طبعاً

: ابتسم "أحمد" قائلاً بحماس

ان شاء الله خير انا متفائل -

: نظر اليه "مراد" قائلاً باهتمام

انت اتكلمت مع "نرمين" فى حاجة -

: قال "أحمد" بسرعة

- لا والله أبداً يا "مراد" انت أول حد أتكلم معاه بعد ما فاتحت ماما فى الموضوع -  
.. حتى خالتي ما قولتلهاش حاجة ونبهت على ماما متجبلهاش سيرة الا لما أتكلم

معاك الأول

: ابتسم "مراد" وهو يقول

"طول عمرك تعرف الأصول يا "أحمد" -

: قال "أحمد" مبتسماً

- ربنا يكرمك يا "مراد" وانتوا طول عمركوا بيت أصول وعشان كدة أنا عارف -  
ومتأكد انى مش هلاقي لـ نفسي زوجة أحسن من "نرمين" أحتك

: قال "مراد" بمرح

- خلاص اتفاقنا يا دكتور .. هتكلم معاهم وان شاء الله خير .. وانت متناش صلاة -  
الإستخارة

\*\*\*\*\*

: طرقت "مريم" باب غرفة المكتب فأذن لها "مراد" بالدخول .. ابتسمت قائله

هعطلك عن حاجة -



: ابتسم لها قائلاً

لا أبدأ اتفضلى -

: دخلت "مريم" وهي تحمل حاسوبها وقالت

كنت عايزة أوريك الشغل اللي خلصته -

توجه "مراد" الى الأريكة وجلس عليها وأخذ منها الحاسوب ووضعها على

: المنضدة أمامه وقال

وريني كده -

: جلس "مراد" بتفحص التصميمات ثم قال

ممتاز طبعاً -

: قالت له بعتاب

يعني أحسن من الزفت اللي كان قبله ؟ -

: رفع نظره اليها وابتسم ابتسامه خفقت لها قلبها بشدة وتطلع اليها قائلاً

شغلك دائماً بيعجبني -

: نظر مرة أخرى الى الحاسوب وأشار الى نقطة به وقال

بس مكان اللوجو هنا مش مرتاحله ممكن نخليه يمين بدل شمال -

وقفت "مريم" بجواره لتتمكن من مشاهدة التصميم فأمرها بالجلوس .. جلست

بجواره بحرج وقد تركت مسافة بينهما .. قالت "مريم" وهي تشير الى التصميم

:

مفيش مشكلة .. بسيطة .. نخليه يمين -

: أشار "مراد" الى الخط المكتوب به احدى الجمل وقال

ولو ينفع الفونت ده يتغير ويكون أوضح شوية -

: قالت دون أن تنظر اليه وهي تنظر الى التصميم باهتمام

تمام مفيش مشكلة -

كانت عينا "مراد" مسلطتان عليها .. يتأمل ملامح وجهها بعينان تلمعان

: بنظرات حانية .. أكملت وهي مازالت تتطلع الى التصميم

ممكن أعمل أكثر من نسخة لكذا فونت وتختار اللي شكلها يعجبك أكثر -

كانت نظرات "مراد" مازالت مسلطة عليها .. لم يشعر بنفسه الا وهو يرفع يده

ليحتضن بين أصابعه احدى الخصلات المتساقطة على وجهها .. التفتت اليه

لترى تلك النظرة الغربية فى عينيه .. والتي لم تعادها منه .. شعرت ""مريم

بقلبها يخفق بجنون .. لمس بأصابعه وجنتها ومررها عليه فى رقه .. انتفضت  
فجأة وقد تدرجت وجنتاها خجلاً هبت واقفه وقالت وهى تغادر مسرعه  
ثوانى وراجعه -

عبرت الغرفة بخطوات متسارعه وعينا "مراد" ترمقائها بنظرات نارية ..  
خرجت لتتركه يغلى من الغضب .. أخذ يفكر فى رد فعلها وردود أفعالها السابقة  
.. أخذ يلعب بأصابعه فى الحاسوب وهو شاردأ و غير منتبه بالفعل لما يفعل ..  
أفاق من شروده عندما وجد أمامه أحد الملفات المكتوب عليها "حبيبى" ..  
ضاق عينا بشدة و فتح الملف ليجد به العديد من الصور المصغرة .. كبرها  
وأخذ يتطلع اليها .. شعرت بصدمة شديدة تجتاح كيانه .. يالله كأنه ينظر فى  
رجلاً يشبهه الى حد بعيد يقف بجوار "مريم" محيطاً كتفيها بأحد .. المرأة  
ذراعيه ويبتسمان معاً للكاميرا .. أخذ يقلب فى الصور وينقل من صورة لأخرى  
وشرارة الغضب بداخله تزداد حتى صارت كالبركان الذى على وشك القاء حممه  
التي تتأجج بداخله .. كان يتطلع الى الصور بحيرة بألم بيأس بلهفه بغضب  
مشاعر كثيرة مختلطة ومتضاربة شعر بها تجاه الاثنان .. بضيق بغيرة بحب  
الذنان يقفان معاً فى جميع الصور وعلامات الفرح والبهجة والحب على وجه كل  
منهما .. توقف عند الصورة التي تجمع "ماجد" بـ "مريم" وكلاهما يرتدى  
أغلق شاشة الحاسوب بعنف .. تذكرها .. تلك الدبلة .. دبلة فى اصبعه اليمنى  
التي مازالت تزين أصابعها حتى الآن .. والتي نقلتها "ناهد" من يدها اليمنى  
الى اليسرى ظناً منها انها لـ "مراد" .. نهض "مراد" وهو يحمل الحاسوبه  
وخرج لبحث عن "مريم" حتى وجدها فى غرفته جالسه على الأريكة شاردة ..  
هبت واقفه بمجرد أن رآته وبلعت ريقها بصعوبة وهى تشعر بالخوف من  
فتح "مراد" الشاشة فظهرت .. نظراته التي كانت كالرصاص المصوب تجاهها  
أمامها آخر صورة كان يشاهدها .. نظرت الى الصورة وقلبها يخفق بعنف .. تلك  
الصورة التي لم تراها منذ أن وطأت قدمها هذا البيت .. ألقى "مراد" الحاسوب  
: على السرير بعنف وهو يقول

نسخة منى .. اخويا كان نسخة منى .. عشان كدة كنتى بتبصيلي واحنا فى -  
المركز الصحى فى الصعيد مش كدة ؟؟ .. لانى نسخة منه .. فكرتك بيه مش كده  
الشبه اللى بينا هو اللى خلاكى تعرفى انى أخوه .. عشان كده وافقتى ..  
تتجوزيني أنا مش "جمال" مش كدة ؟؟ .. عشان أنا شكل أخويا اللى حبيتيه

"واتجوزتية وفقدتية.. صح يا "مريم"

: تطلعت اليه "مريم" باعين دامعة فأكمل يقول بقسوة

كنتى بتعوضى شوقك له بيا .. أما بتبصيلي بتشوفى مين يا "مريم" .. -  
مين اللى سبتى نفسك فى حضنه .. "ماجد" ولا "مراد" .. بتشوفيه هو .. صح  
وعشان كدة كنت بصحى .. من يومين ؟ .. "ماجد" مش "مراد" مش كده ؟  
ألاقيكي بتبصيلي .. وكانت نظراتك بتكون غريبة ومكنتش قادر اعتهها فسر  
كنتى بتبصيله هو لمامحه هو .. مش كده ؟ .. معناها  
انهمرت الدموع من عينيها بصمت وتمتمت بصوت خافت جداً لم يستطع سماعه

:

ده فى الأول بس -

: نظرت اليه بألم فصرخ بعنف و بغضب شديد

كنتى طول الوقت ماسكه اللاب وأعدة أدامه وتقوليلى شغل .. كنتى بتشوفى -  
صوركوا سوا مش كدة .. كنتى عايشه معاه طول الوقت .. متعرفيش انك كده  
تبقى بتخونينى اى ان كان سبب جوازنا انتى كده بتخونينى

: صاحت "مريم" والدموع تغرق وجهها

لا أنا مخنتكش .. انا مشوفتش صورته ولا مرة من ساعة ما دخلت البيت ده -  
نظر اليها "مراد" بإحتقار وعدم تصديق .. لم تتحمل تلك النظرة فى عيناه  
فتوجهت الى الدولاب وأخرجت منه الحقيبة التى تحوى رسائل "ماجد" ..  
:أخرجت الرسائل وأمسكتها ولوحت بها أمامه قائله بحده بصوت مرتجف  
دى رسائل "ماجد" .. كان كاتبهاالى قبل ما يموت .. كان مريض بالكاتسر -  
وكان المرض فى مراحلته الأخيره .. كتبلى الجوابات دى وقالى أقرأ جواب كل  
اسبوع فى نفس اليوم ونفس المعاد .. كان عارف انى مليش حد غيره .. أهلى  
كلهم ماتوا فى حادثه .. ماما و بابا و أختى .. كنت هموت لولا "ماجد" وقف  
جمبي وساعدنى انى أخرج من محنتى .. وكتبنا كتابنا كان كل حاجة ليا عوضنى  
عن كل أهلى اللى راحوا منى فجأة .. كان هو الهوا اللى بتنفسه .. كان مالى  
حياتى كلها مكنش ليا غيره

: ثم انهمرت الدموع من عينيها كالشلال تغرق وجهها

لما عرفت انه مريض .. كنت هموت .. اتمنيت فعلاً انى أكون مكانه وان -  
المرض ده يجيلى أنا وهو يفضل سليم .. كنت بموت وأنا عارفه انه بموت

أدأى ببطة وانى هخره زى ما خسرت أهلى كلهم .. هو كان عارف موته  
عشان كده كتبلى الجوابات دى تصبرنى لو حصله حاجه .. أنا .. هيعمل فى ايه  
بقالى أكثر من سنة من يوم ما مات عايشه على جواباته وكلامه المكتوب فيهم  
.. بفتح الجواب كل اسبوع فى نفس المعاد

: ثم قالت بألم

بس والله من يوم ما دخلت البيت ده وأنا مقرأتش حرف واحد .. عارف معناه -  
ايه انى مقراش جوابات "ماجد" وانى أمتع نفسي عنها .. بس أنا أجبرت نفسي  
على كده لانى مش خاينة وبكره الخيانة .. لانى عارفه انى مادمت على ذمتك  
مش من حقى انى أقرأ جوابات واحد تانى

انتهت من كلامها وساد الصمت الا من صوت شهقاتها الخافته .. بدا وجه  
جامداً وهو ينظر الى الخطابات فى يدها .. والى الخطابات العديدة التى ""مراد  
مازالت فى الحقيبة التى تحملها بيدها .. تحدث أخيراً .. بصوت هادئ صارم

: وتعبريات جامدة كالحجر

مكنتش أعرف انى معذبك كده .. وان جوازك منى ألمك بالشكل ده -

: تلاقت نظراتهما طويلاً .. الى أن قال بصوت مرتجف متقطع

- بكره جهزى نفسك عشان هنروح للمأذون .. عشان أخلصك من الحبل -

الملفوف على رقبتك

: نظرت اليه مصدومه فأكمل قائلاً بنبرة حازمة لم يستطع اخفاء الألم فيها

عشان ترجعى لحبيبك وصوره وجواباته اللى حارمه نفسك منها بسببي -  
قال ذلك وخرج من الغرفة وهى تتطلع اليه وعلامات الصدمة على وجهها

\*\*\*\*\*

فى الصباح الباكر .. سمعت طرقاته على الباب دخل بهدوء وقال دون أن ينظر

: اليها

- جاهزة ؟ -

: قالت دون أن تنظر اليه وهى تتظاهر بالثبات

- أيوة -

حمل حقيبتها وسبقها الى الأسفل .. كانت تشعر بشعور غريب .. كانت تشعر وكأنها تعيش حلماً ستستيقظ منه بعد قليل .. سارت مسلوياً الإرادة الى السيارة سارة" و " .. بدا جامداً وبدأت جامدة .. لم تتح لها الفرصة لتوديع "ناهد" و "نرمين" . فضلت هي ذلك حتى لا يكون الوداع مؤلماً .. سار بسيارته وقد ران بينهما الصمت وحالة غريبة تعترى كل منهما .. نزلا من السيارة وتوجها الى مكتب المأذون وكل منهما يشعر بأنه مسلوب الإرادة وكأن قوة خفية تحركهما .. جلسا متواجهان وهما يستمعان الى كلمات المأذون التي يحاول بها اثناهما عن هذا القرار .. كان كل منهما يطرق برأسه وينظر الى الأرض .. وتعبيرات جامدة تظهر على وجه كل منهما .. لا تستطيع أن تتبين كيف يشعر أى منهما بالنظر الى وجهه .. حانت اللحظة .. وأخبر المأذون "مراد" أن يلقي بكلمة الطلاق على مسامح "مريم" .. ساد الصمت للحظات .. بدا وكأن لسانه يعصيه .. وقلبه يثنيه .. لكن عقله أرغمها على طاعته .. قال وهو ينظر أرضاً بصوت مرتجف بنبره :  
متقطعه وكأن روحه تفارق جسده

انتى طالق -

لحظات مرت ورفع رأسه يلقي عليها نظرة .. بدت جامدة كالتمثال لا حياة فيه ولا روح .. أنها معاملات الطلاق وخرجا معاً .. فتح لها باب السيارة وهو يتحاشى النظر إليها .. ركبت وقد بدا عليها التماسك وكأن ما حدث منذ قليل كان حلماً سيفيق كلاهما منه قريباً .. أوصلها الى شقتها .. صعد خلفها حاملاً حقيبتها .. هم بالدخول فوضعت ذراعها أمام الباب تمنعه .. لم يعد يحل له الدخول .. لم يعد نظر إليها نظرة أخيرة .. يحل له أى شئ .. ولا لها .. وضع الحقيبة فى الخارج مودعه ثم هرب مسرعاً من أمامها وكأنه يخفى ما لا يريد أن يظهر للعيان .. أدخلت حقيبتها وأغلقت الباب .. وقفت خلفه تتطلع الى بيتها .. الذى فارقه .. وها هي تعود اليه مرة أخرى .. لكنها شعرت بأنها ليست "مريم" التى فارقت هذا البيت .. لقد عادت "مريم" أخرى .. تغير فيها الكثير .. تطلعت الى البيت عندئذ تحطم التمثال ليظهر القلب .. مرة أخرى ولأول مرة تشعر فيه بالغربة الذى ينبض بداخله .. انهمرت الدموع المحبوسه داخل عينيها وجلست على الأرض خلف الباب المغلق تحتضن قدميها الى صدرها بقوة لتوقف ارتعاشة . وكل ذرة فيها تصرخ بألم .. جسدها

## الفصل الثاني والعشرون

عاد "مراد" الى بيته واجماً صعد الى غرفته وجلس على الأريكة واضعاً رأسه ظل جالساً فى مكانه طويلاً الى أن فتح عينيه ونظر .. بين كفيه ومغمضاً عينيه الى الفراش أمامه .. بدت تعبيرات الألم على وجهه وهو يتذكر محادثتهما بالأمس واكتشافه الشبه الكبير بينه وبين أخيه .. كان الألم يغمره لشعوره بأن .. "مريم" ترى فيه أخاه ليس أكثر من ذلك .. فهو بديل حى عن زوجها المتوفى ربما لو لم تتحرك مشاعره تجاهها لما أهمه ذلك .. لكن مشاعره تحركت من جمودها واتجهت اليها بشوق .. لتتحطم آماله على صخرة ماضيها .. نهض و غادر الغرفة وكأنه لا يطيق المكوث فيها .. بعدما رحلت عنها

قامت "مريم" من على الأرض أمام الباب ودخلت الحمام وأخذت دشاً ساخنأً وقفت كثيراً تحت الماء الساخن المنهمر على جسدها .. ودت لو يستطيع الماء المنهمر غسل روحها كما يغسل جسدها .. تمنت لو كان للماء قوة لإزاحة ما انتهت من حمامها ولفت نفسها المنشفة وتوجهت الى حقيبتها ..بها من آام بجوار الباب ودفعتها الى الفراش وفتحتها لتخرج ملابسها .. نظرت بأسى الى الدبلة التى تزين يدها اليسرى .. حاولت نزعها من ذلك الإصبع .. لكنها ما كادت تلمس الدبلة حتى انهمرت دموعها .. وجلست على فراشها تبكى بحرقة .

\*\*\*\*\*

جلس "مراد" فى حديقة الفيلا شاردأً ووجهه يشع حزن وأسى .. اقتربت منه : والدته قائله

مراد" صباح الخير .. كنت فىن انت و "مريم" خبطت عليكوا كثير الصبح "

محدث رد فتحت الباب لقيتكوا مش موجودين

لم يلتفت "مراد" اليها ولم يبد اى رد فعل .. راقبته "ناهد" بأعين متفحصه

: وقالت بشك

مراد" انت كويس ؟" -

: صمت ولم يجيب .. وقفت أمامه لتضطره أن ينظر اليها وسألته بلهفة  
"فين "مريم -

: صمت .. طال صمته .. ثم تحدث أخيراً قائلاً بصوت هادئ  
مشيت -

: قالت "ناهد" باستنكار  
يعني ايه مشيت ؟ -

: قال "مراد" بصوت حاول أن يوقف ارتعاشته  
طلقتها -

: صمتت "ناهد" تحاول استيعاب صدمتها ثم هتفت قائلة  
طلقتها ؟ .. ليه يا "مراد" .. ليه كده يا ابني -

: دمعت عيناها وهي تقول  
ليه يا "مراد" .. ليه تحرم نفسك منها .. أنا عارفه انك بتحبها .. وهي كمان -

.....

: قاطعها "مراد" بجدده

وهي كمان ايه ؟ .. ماما "ماجد" كان نسخه منى .. عارفه يعني ايه .. يعني -  
لو حسيتي في أي وقت ان "مريم" حسه بحاجه نحيتي فتأكدى ان ده بس  
عشان أنا شكل جوزها .. اللي هو أخويا الله يرحمه

: هتفت "ناهد" قائلة

انت غبي يا "مراد" ؟ .. انت مشوفتش كانت قلقانه عليك ازاي لما تعبت .. -  
قلقت عشان انت شبه أخوك ؟ ولا عشان كانت خايفة عليك انت ؟

: قال "مراد" بحزم

وانها لو .. مفيش داعى للكلام ده .. انا اتكلمت معاها وانا أكدت انها لسه بتحبه -  
وافقت تستمر معايا في يوم من الأيام فده هيكون بس عشان أنا شكل أخويا ..  
ودي حاجة مستحيل أقبليها أبداً

: قالت "ناهد" بأسى

وهي فين دلوقتي ؟ -

: قال "مراد" بصوت مرتجف

في بيتها .. وصلتها بعد ما روحنا للمأذون -

: قالت "ناهد" بحنق وهى تنصرف  
غلطان يا "مراد" .. غلطان أوى وبكرة تندم انك سيبتها تضيع من ايدك -

\*\*\*\*\*

: "قال الظابط للمحامى "حامد  
خلاص القضية شكلها هتتحول للنيابة -

: قال المحامى بسرعة

مفيش قضية ولا حاجة يا حضرة الظابط .. اللي قالته مدام "مريم" ده افتراء -  
على "حامد" بيه وبلاغ الأستاذ "مراد" بلاغ كيدي .. وعملوا فيلم خطف أخته  
عشان يداروا على البلاغ اللي قدمناه فى أستاذ "مراد" وفى تهجمه على  
بيه فى شركته وضربه والتسبب فى تكسير أسنانه ومعانا تقرير بحالته ""حامد  
الصحية بعد الضرب وكل ده قدمناه لحضرتك

: قال الظابط

جميل بس دول كدة قضيتين مش قضية واحدة وبلاغين مش بلاغ واحد يعنى -  
كل قصة هتمشى فى اتجاه

: قال المحامى

ان شاء الله هخلى حضرتك تتأكد انه بلاغ كيدي وان مفيش داعى نوصله -  
للنيابة وتبقى قضية .. بعد اذنك

\*\*\*\*\*

.. توجه "مراد" الى شركته وكأنه يتحرك آلياً .. لم يستطع التركيز فى أى شئ  
ظل عقله منشغلاً بها .. وفى شعوره تجاهها .. تُرى أيستطيع نسيانها كما لو  
أنها لم تدخل حياته قط .. تُرى أيستطيع تحمل فراقها .. قاطعه عن الإسترسال  
: فى تلك الأفكار دخول "طارق" المكتب وهو يقول

مراد" فى ايه بينك وبين "حامد" بالظبط ؟" -

: قال "مراد" باستغراب

ليه بتسأل -



: قال "طارق" بإستنكار

لانى عرفت انه مقدم فيك بلاغ بيتهمك فيه انك اعتديت عليه فى مكتبه -

وضربته .. ده تلفيق مش كده ؟

: قال "مراد" ببرود

لا .. كلامه مضبوط .. ده حصل فعلاً -

: قالت "طارق" بدهشة

ليه عملت كده يا "مراد" .. ليه ضربته ؟ -

: قال "مراد" بضيق

- موضوع خاص يا "طارق" مش هقدر أحكيه .. وممكن لو سمحت تسيبنى -

دلوقتي .. بجد تعبان ومش قادر أتكلم فى حاجة

: نظر اليه "طارق" بقلق قائلاً

مالك يا "مراد" فى ايه ؟ .. فى حاجة حصلت ؟ -

: قال "مراد" وهو يزفر بضيق

لا مفيش .. أنا كويسه -

: قال "طارق" بشك

مش باين كده خالص -

: ثم قال

فى ايه قولى يمكن أقدر أحل مشكلتك -

: قال "مراد" بشرود وهو يمسك قلمه يقلبه بين يديه

أنا طلقت مراتى -

: هتف "طارق" بدهشة

ايه بتقول ايه ؟ .. طلقتها ؟ .. ليه ؟ -

: نظر اليه "مراد" ببرود قائلاً

ايه اللى ليه .. طلقتها .. أصلاً جوازنا كان مؤقت أنا قولتلك كده من زمان -

: قال "طارق" وهو يتفحص وجه "مراد" جيداً

أيوة فعلاً قولتلى كده .. بس أنا حسيت انك ابتديت تميل ليها -

قال "مراد" بعند وهو يمسك قلمه ويتظاهر بالإنشغال فى مطالعة الأوراق التى

: أمامه

لا .. احساسك غلط -

: "صاح به "طارق

حرام عليك يا "مراد" ليه بتعمل كده فى نفسك .. قولتلك متخافش منها .. دى -

مش ممكن تجرحك

: صاح به "مراد" بعنف

"انت مش فاهم حاجة يا "طارق" -

: قال "طارق" بحدده

"طيب فهمنى .. فهمنى يا "مراد" -

قص عليه "مراد" ما حدث بينهما ليلة أمس .. ران الصمت الى أن قطعه

: "طارق" قائلاً

انت واثق ان مشاعرها نحييتك بس عشان انك شبه أخوك الله يرحمه -

: قال "مراد" بألم

أيوة واثق -

: ثم قال بتهكم

ده غير طبعاً موضوع اعافتى اللي هى لسه متعرفوش .. وأنا واثق انها لو -

كانت وافقت تعيش معايا رغم رجلى المبتورة فده بس هيكون عشان أنا شبه

..... وبفكرها بيه .. أنا مش ممكن أستحمل ده أبداً .. لأنى ""ماجد

: صمت "مراد" ولم يكمل .. فقال "طارق" مكماً كلامه

لأنك بتحبها مش كده ؟ -

: لم يتحدث "مراد" لكن عيناه فضحت كل شئ .. تنهد "طارق" قائلاً

فكر تانى يا "مراد" .. يمكن تكون هى كمان بتحبك -

: قال "مراد" بسخريه وفى عينيه نظرة ألم

هى فعلاً بتحبنى .. بتحب ملامحى اللي بتفكرها بحبيبها .. مش أكثر من كده -

نظر "طارق" الى "مراد" بأسى وهو يشعر بالحزن من أجله

\*\*\*\*\*

نامت "مريم" على فراشها بعدما أرهاقها كثرة البكاء .. استيقظت وهى تشعر

بالوهن فى جسدها كله .. نظرت حولها لتجد نفسها فى غرفتها .. تمننت لو كان  
ما مرت به بالأمس مجرد حلم .. لكن هيهات .. توضأت وصلت وجلست  
تستغفر الله عز وجل

.. عاد "مراد" الى بيته فى المساء وتوجه الى غرفته دون أن يتحدث مع أحد  
راقبته أمه وهو يصعد الى غرفته بأعين ممتلئة بالحزن والحسرة .. دخل  
غرفته وأغلق الباب .. ظل يتطلع الى كل شئ فيها .. كل شئ يذكره بها "مراد"  
.. سريره الذى نامت عليه "مريم" .. وعلى تلك الأريكة كانت تجلس حامله  
حاسوبها على قدميها .. وتلك الشرفة كانت تقضى فيها الساعات مستندة الى  
سورها .. توجه الى الدولاب لإحضار ملابسه فتح الدولاب ليجد الرف الذى كان  
فارغاً الا من الملابس التى اشتراها لها "مراد" .. حمل "مخصص لـ"مريم  
تلك الملابس بين ذراعيه وتوجه بها الى فراشه يجلس عليه .. أخذ يتحسس  
ملابسها وكأنه يفرغ بها شوقه الى "مريم" قرب تلك الملابس من وجهه  
ليتشم رائحتها .. شعر بالألم فى قلبه .. ثرى ماذا تفعل الآن ؟ .. هل حزنت  
لفراقه ؟ .. هل هى بخير؟ .. هل تحتاج لشيء ؟ .. هل هى بمأمن فى هذا البيت  
هل تتمنى العودة ؟ .. هل تتطلع الى صور .. بمفردها ؟ .. هل تشعر بالوحدة ؟  
مراد" الحبل الذى كان يكتف به يديها ؟ "ماجد" وخطاباته بعدما مزق  
شعر وكأنه سيجن لعدم استطاعته ايجاد اجابات لأى من اسئلته .. شعر بحنين  
.. جارف اليها .. أمسك هاتفه وأغمض عينيه .. تمنى لو استطاع الإتصال بها  
وسماع صوتها الذى افتقده .. والإطمئنان عليها .. لكنه لم يستطع .. لم تعد  
. تحل له .. ولا هو يحل لها .

\*\*\*\*\*

: قالت "سارة" بحزن شديد

مش قادرة أصدق ان "مراد" طلق "مريم" وانها خلاص معدتش هتعيش -  
معانا تانى

: قالت "نرمين" بحنق

مش فاهمة ازاي يعنى ده حصل فجأة .. يعنى المشكلة بينهم ظهرت فجأة -

وكبرت فجأة لدرجة انه يطلقها .. واياه دى المشكلة اللي تخلى "مراد" يطلق  
"مريم"

كانت "ناهد" تستمع الي حديثهما فى صمت .. فقالت "سارة" موجه حديثها  
اليها :

مقالكيش ايه سبب طلاقهم "ماما" .. "مراد" -

: تنهدت "ناهد" قائله

"دى حاجة تخصهم يا "سارة" -

: قالت "نرمين" بحده

بس احنا برده من حقنا نعرف .. ليه يحرمننا من "مريم" .. والله عمره ما -  
هيلاقى زيها

: قالت "سارة" بحزن

"يمكن هي اللي سابته يا "نرمين" -

: قالت "نرمين" بدهشه

"ليه يعنى ايه اللي يخليها تسيب "مراد" -

: قالت "سارة" فى حيرة

مش عارفه .. بس شوفتى "مراد" عامل ازاي .. قافل على نفسه ومبيكلمش -  
حد .. لو هو اللي طلقها بمزاجه ايه اللي يخليه يضايق كده

: قالت "نرمين" بتصميم

خلاص نكلم "مريم" ونحاول نصلح بينهم -

: تدخلت "ناهد" قائله

ملكوش دعوة باللى بين "مراد" و "مريم" مش عايزة حد يتدخل لو سمحتوا -  
.. انتوا متعرفوش حاجة

\*\*\*\*\*

: أمسك "سامر" هاتفه وهو ينظر اليه فى تبرم ثم رد قائلاً

"أيوه يا "سهى" -

: قالت "سهى" بلهفة وكأنها لا تصدق أنه أخيراً رد عليها

سامر " أخيراً رديت " -

: قال ببرود

كنت مشغول .. خير فى حاجة -

: قالت برجاء

عايزة أتكلم معاك شوية -

اتفضلى سامعك -

: قالت "سهى" بصوت حزين

سامر " أنا بس عايزة أسألك انت ليه لعبت بيا كده .. ليه عملت كده واقنعتنى " -  
ان ده جواز وحلال وانك هتتقدملى لما مشاكلك فى البيت تتحل .. ليه عملت كده  
؟

: قال "سامر" بنفاد صبر

بصى يا "سهى" انتى كنتى واحدة ساذجة أوى وسهله أوى .. بجد .. وانتى -  
غلطانه زي زيك لانك كنتى متساهله معايا حتى من قبل ورقة العرفى

: قالت "سهى" بأسى

بس يا "سامر" انت وعدتنى انك تتجوزنى وقولتلى انك بتحبنى ومش -  
هتسيبنى أبداً

: قال "سامر" بضيق

الوضع اتغير -

ايه اللى اتغير يا "سامر" ؟ .. طيب انت ليه مش عايز تتجوزنى .. خلاص -  
يعني معدتش بتحبنى

: قال "سامر" بهدوء

بصراحة ومن الآخر عشان منتعش بعض .. مش ممكن أتجوزك يا "سهى" -  
.. مش ممكن أثق فيكي أبداً

: قالت وهى تحاول أن تتمالك نفسها

ليه يا "سامر" ليه متثقش فيا ؟ -

: "قال "سامر"

لأنك خنتى ثقة أهلك فيكي أضمن منين انك بعد الجواز متخيش ثقتى فيكي يا -  
سهى" .. أضمن منين انك متكونيش سهلة مع غيري زى ما كنتى سهلة معايا"

لم تستطع التحمل ولا التظاهر بالتماسك أكثر فأجهشت فى البكاء وتعاليت  
: شهقاتها قائله

بس انت عارف انك اول راجل فى حياتى -

: قال بنبره منخفضه

بردة مستحيل أثق فيكي -

: مرت فترة لا يُسمع فيها الا صوت شهقاتها الى أن قالت بحزم

دى مش غلطتك لوحديك .. دى غلطتى أنا كمان .. زى ما انت قولت أنا كنت -

سهله أوى .. من قبل حتى الورقة اللي كتبناها .. وكان لازم دى تكون نهايتي

.. أنا خلاص معدتش هطلب منك حاجه .. أنا هطلب من اللي أكبر منك ومن

أسفة طلبت الرقم غلط .. اللي أقوى منك

قالت ذلك ثم أنهت المكالمة .. أغلق "سامر" هاتفه وهو يحاول أن يخمن معنى

كلماتها

\*\*\*\*\*

جلس "مراد" فى مكتبه يمسك أحد الكتب بيده لكن عيناه زائغة فى فراغ الغرفة  
أذهله هذا الشعور بالحنين الذى شعر به منذ أن رحلت عن البيت .. طوال ..  
الإسبوع وهو يشعر وكأنه فقد جزء من روحه .. جزء من نفسه .. حاول كثيراً  
أن يعود "مراد" القاسى متحجر القلب كما كان لكن هيهات .. القلب الذى دق  
من جديد لم تكفى قوته لإخماده واسكاته مرة أخرى .. أكثر ما كان يؤلمه هو  
رغبته فى الإطمئنان عليها .. لو علم فقط أنها بخير وسعيدة فى حياتها لربما  
ارتاح قلبه قليلاً وخف عذابه .. لكن عدم معرفته بحالها كاد أن يصيبه بالجنون  
أخذ يفكر فى آخر محادثة بينهما .. وفى كلماتها عن "ماجد" .. وعن الحب ..  
الكبير الذى جمعهما .. وعن ذكرياته التى تحملها له فى قلبها .. وعن كونه كان  
الحضن الدافئ لها بعدما فقدت كل عائلتها .. كان الدعامة التى ارتكذت عليها  
ومنعته من الإنهيار .. كان يملء فراغ وحدتها القاتله .. أخذ يقارن بين ما  
فعله هو وما فعله أخوه .. هو تركها فريسة للوحدة .. طردها من بيته وأرغمها  
على البقاء فى عزلتها .. حرماها من صحبة أمه وأخواته وهو واثق تمام الثقة

أنها أحبتهم حباً خالصاً من قلبها .. تركها فى بيتها بمفردها وهو لا يعلم أتخاف  
من البقاء بمفردها أم انها اعتادت الوحدة .. اتخاف من النوم بمفردها ليلاً ..  
أتسيطر عليها هواجس بإقتحام لص لمنزلها .. كيف تقضى طلباتها .. كيف  
تقضى أوقاتها .. رغماً عنه شعر بالخوف يجتاح كيانه .. خوف عليها ومنها ..  
أراد أن يهرع اليها ويعانقها ويدخلها سجن ذراعيه قسراً وألا يتركها أبداً ..  
لكنه تذكر كيف كانت تصر على طلب الطلاق .. كيف أوضحت له مدى عذابها  
بابتعادها عن ذكريات حبيبها الراحل .. كيف أنها مرغمة على هذه الزيجة وأنها  
تود الخلاص منها والعودة لبيتها .. اذن فهي سعيدة .. سعيدة بهذا الطلاق الذى  
أراحها من حمل أثقل كاهلها .. سعيدة لأنها تخلصت منه ومن كل ما يمت له  
بصله .. لكن لماذا لم يرى السعادة فى عينيها وهما ذاهبان للمأذون .. لماذا لم  
لماذا لم يرى تلك ..ير تلك السعادة بعد أن ألقى على مسامعها كلمة الطلاق  
السعادة على وجهها وملامحها وفى عيناها وهو يودعها أمام باب بيتها .. إن  
!! كانت سعيدة حقاً لماذا لم يبدو ذلك عليها

\*\*\*\*\*

جلست "مريم" على أريكتها تشاهد التلفاز .. شعرت بألم فى بطنها فتذكرت  
بأنها لم تتناول شيئاً منذ يومين .. قامت بتكاسل الى المطبخ وفتحت الثلاجة  
.. لتجدها فارغة .. تذكرت أن طعامها نفذ ونسيت أن تشتري ما تسد به جوعها  
ذهبت الى غرفتها وارتدت ملابسها بأليه وكأنها آله نفذ منها الوقود وتحتاج  
اليه فقط لتستمر فى العمل .. بلا أى شعور بالإستمتاع .. ولا بالحياة  
أوقف "مراد" سيارته على بعد عدة أمتار من بيتها .. أوقف عمل المحرك  
ورفع رأسه لينظر الى شرفة بيتها المظلمه .. نظر الى الشباك المجاور للشرفة  
ليجد النور مضاعاً .. اذن فهي فى البيت .. ترى ماذا تفعل الآن .. لا يعلم لماذا  
جاء هنا .. وماذا يفعل هنا .. وماذا يريد .. كل ما يعلمه هو أنه شعر أنه يجب  
أن يكون هنا .. حيث هي .. لا يراها لكنه يشعر أنه بالقرب منها .. وهذا  
الشعور يريح قليلاً قلبه المكثوم .. لم يصدق عينيها وهو يراها تخرج من بوابة  
البيت .. ظن بأنها هلاوس بصرية من كثرة تفكيره بها .. لكن دقق النظر  
.. ليحدها هي .. "مريم" .. ترى أيتخيل أنها فقدت وزنها أم أنها ضعفت بالفعل

..كانت واجمة تنظر يمينا ويساراً لتعبر الطريق ونظرة حزن عميقه فى عينيها  
شعر وهو ينظر اليها بمدى شوقه لرؤيتها .. للحديث معها .. حتى ولو كان  
شجاراً .. حتى ولو كان صراخاً .. افتقد صوتها افتقد عينيها افتقد ابتسامتها  
التي قلما رآها .. عبرت الطريق لتتوجه الى السوبر ماركت أمامه .. أدار  
المحرك ورجع بسيارته الى الخلف ليخفيها خلف سيارة أخرى مرصوه على  
جانب الطريق .. راقبها وهي تخرج من السوبر ماركت وهي ترقب الطريق مرة  
أخرى لعبوره .. ود لو خرج من سيارته وتوجه اليها .. لكن بأى صفة  
وماذا سيقول لها .. قبل أن تهم بدخول البوابة أوقفها رجل ما .. سيتحدث معها  
ينظر اليهما بامعان محاولاً معرفة ما يحدث .. بالطبع لم يسمع " .. ظل "مراد

: الحوار الدائر بين "مريم" والرجل الذى قال لها

..... لو سمحتى يا آنسه تعرفى فين صيدلية -

: قالت "مريم" بهدوء وهي تشير بيدها لتريه الطريق

أيوة حضرتك ادخل الشارع ده وبعدين ادخل أول يمين -

: قال الرجل لها شاكرأ

متشكر أوى -

شعر "مراد" بالغيرة والغضب بداخلة لحديثها مع رجل آخر .. كان من الواضح  
أنها تصف له طريق شئ ما .. ولم تتحدث الا لثوانى معدودة .. لكنه شعر  
بالغيرة الشديد لان حتى تلك الثوانى هو محروم منها .. دخلت البيت وأنظاره  
مثبتته عليها الى ان اختفت

\*\*\*\*\*

عاد "مراد" الى بيته فخرجت "ناهد" من غرفة الجلوس تستقبله بعدما سمعت

: صوت السيارة .. عقدت ذراعها أمام صدرها وقالت ببرود

ان شاله تكون مبسوط ومرتاح -

: نظر "مراد" اليها شذراً .. فقالت

هتتعشى ولا زى كل يوم ؟ -

: قال "مراد" ببرود



مليش نفس -

: قالت "ناهد" بحنق

والله .. ليه .. انت مش عملت اللي انت عايزه وارتحت -

: قال "مراد" بحده

عملت اللي هي عايزاه مش اللي أنا عايزه -

: هتفت "ناهد" غاضبه

بص يا "مراد" أنا ليا عينين بشوف بيهم وبحس باللى أدامى ده غير ان -  
ميفهمش الست الا الست .. "مريم" كانت ابتدت تحس بحاجه نحيثك بس باللى  
انت عملته ده هديت كل حاجه

: صمت "مراد" وهو غير مقتنع بكلام أمه فأكملت قائلاً بحزن

بالله عليك مش صعبانه عليك .. دى يتيمه ولو حدها .. كانت عملاك ايه يعنى -  
كانت مضايقاتك فى ايه .. دى يا حبيبتي مكنش حد بيحس بوجودها .. ..  
ومكنتش بتضايق حد .. والبنات حبوها أوى وهى كمان كانت بتحبهم أوى ..  
.. "سايبها تعيش لو حدها ليه .. ما كانت عايشة وسطنا يا "مراد"  
انهت كلامها والدموع فى عينيها .. شعر "مراد" بقلبه ينزف دماً وقال بصوت  
مضطرب :

مكنش ينفع الوضع يستمر كده .. هى برده من حقها تعيش حياتها مع الراجل -  
اللى تختاره .. مش جوازه مفروضه عليها

: قالت "ناهد" بحزن

طيب لو سمحت خدنى ليها بكرة عايزه أزورها .. موباييلها مقفول من ساعة -  
ما سابت البيت .. غلبت مكالمات ليها ورسايل بس شكلها مش بتفتحه خالص  
.. وقلبي واجعنى عايزه أطمئن عليها

: قال "مراد" بصوت خافت

متقلقيش هي كويسة -

: قالت "ناهد" وهى تنظر اليه بتمعن

عرفت منين ان هي كويسة ؟ -

: قال "مراد" وهو يتحاشى النظر اليها

لسه شايفها من شوية -

: قالت أمه بدهشة

شايفها فين ؟ -

: قال "مراد" بضيق

شايفها أدام بيتها -

: رفعت "ناهد" حاجبها بدهشة وقالت بتهمك

وانت ان شاء الله ايه اللي موديك نحية بيتها ؟ .. صدفة ولا الهوا رماك ؟ -

نظر اليها "مراد" بحدة ثم توجه الى السلم ليصعد الى غرفته و"ناهد" ترمقه

بغیظ

\*\*\*\*\*

: هتف "حامد" بفرحه

المعلومات دى أكیده ؟ -

: قال المحامى الخاص به مبتسماً

طبعاً أكیده يا "حامد" بيه هو أنا عمرى قولتك حاجة وطلعت غلط -

: ضحك "حامد" ملء فمه وهو يقول

يعني عايشة لوحدها وملهاش حد لا أب ولا أخ ولا أى حد وكل أهلها فى -

الصعيد وسايبنها هنا لوحدها وكمان "مراد" طلقها من ١٠ أيام .. حلو أوى

أوى أوى

: ابتسم المحامى قائلاً

ناوى على ايه يا باشا ؟ -

: قال "حامد" بخبث وابتسامته تملء وجهه

ناوى ألعب على المكشوف مادام القطة معدتش فى حماية الأسد -

\*\*\*\*\*

طلبين مدام "مريم" تانى فى القسم -

: قال محامى "مراد" هذه العبارة فأجابه "مراد" على الهاتف بحنق

وليه عايزنها تانى هى مش خلاص قدمت شهادتها -

: قال المحامى

- محامى "حامد" بيقول انك انت اللى خليتها تشهد وتقول الكلام ده وانها كانت خايفة منك وعشان كده قالته بس هى دلوقتى اطلقت ومعدتش خايفة منك وهتغير أقوالها

: قال "مراد" بغضب وضيق

وهما لحقوا عرفوا اننا اطلقنا -

: قال محاميه

أكيد طبعاً ما هيصدقوا يمسكوا فى أى حاجة -

: قال "مراد" بضيق

مش عايزها تدخل القسم تانى .. حاول تشوف حل تانى -

: قال المحامى

لو كان فى مكننش اتاخرت .. بس طلبين يسمعوا شهادتها تانى -

: زفر "مراد" بضيق وقال

امتى تروحلهم ؟ .. طيب أنا هتكلم معاها -

: قال المحامى

طلب الاستدعاء خلاص طلع يعنى المفروض تروح من بكرة -

: "قال" مراد

طيب خلاص هبلغها -

حاول "مراد" الاتصال بها دون جدوى .. كان هاتف "مريم" مغلق .. حمل نفسه الى سيارته وتوجه الى بيتها .. طرق الباب عدة طرقات قبل أن يسمع

: صوتها من خلف الباب

مين ؟ -

:صمت لحظة ثم قال

"مراد" -

ارتجف قلبها وهى تسمع صوته .. تسمرت مكانها للحظة وهمت بان تفتح لكنها تذكرت أنه لم يعد يحل له رؤية شعرها .. أصبح كالغريب تماماً .. الباب ارتدت اسدالها وفتحت الباب .. وقع نظرها على صفحة وجهه .. شعرت

بإشتياق شديد لتلك الملامح التي افقدتها .. ذكرت نفها بأنه رجلاً غريباً عنها  
لم يعد يحل لها النظر اليه هكذا فأشاحت بوجهها .. تأملها "مراد" للحظة ثم  
: خفض بصره قائلاً

انتى كويسه ؟ -

: قالت بصوت منخفض دون أن تنظر اليه

الحمد لله -

: صمت كلاهما .. قالت باضطراب وهي تتطلع الى أعلى السلم

لو سمحت مينفعش وقفنا كده .. انا عايشه لوحدى -

: ألمه كلامها الذى ذكره بأنه لم يعد يحل له منها شئ .. أى شئ .. فقال بهدوء

أنا جيت بس أعرفك انهم محتاجين شهادتك تانى فى القسم -

: نظرت اليه "مريم" قائله

أنا افكرت خلاص مش هروح تانى الا لو القضية وصلت للمحكمة -

: قال "مراد" بأسف

أنا كمان كنت فاكرك كده .. بس محتاجين يسمعوا أقوالك تانى -

: أوامأت برأسها قائله

مفيش مشكلة .. أروح امتى -

: "قال" مراد

بكرة ان شاء الله .. ومتروحيش لوحدك أنا هاجى آخذك -

: نظرت اليه "مريم" بتحدى قائله

شكراً يا أستاذ "مراد" .. أنا هروح لوحدى -

: رمقها "مراد" بنظرات نارية وهو يسمع منها كلمة "أستاذ" .. فقال بحنق

مش هتعرفى الطريق -

: قالت بعند

لا هعرف أنا مش صغيره وبقالى أكثر من ٣ سنين عايشة لوحدى -

: ثم قالت بتحدى

يعني أقدر أتصرف كويس ومش محتاجه لحد يساعدى فى حاجه -

: تطلع اليها "مراد" وقد ألجمه كلامها فتمتم بحزم وهو يغادر

براحتك .. ياريت تروحي على الساعة ١٠ -

: قالت ببرود

هكون هناك فى المعاد -

ألقى عليها نظرة ثم توجه منصرفاً .. أغلقت "مريم" الباب لتتحول نظرتها المتحديه الى نظرة حزن .. دخلت غرفتها وجلست على فراشها واجمة .. مازالت تشعر بخفقات قلبها التي تسارعت منذ أن سمعت صوته .. كانت تشعر بالضيق الشديد .. ضيق من نفسها .. أخفت وجهها بين كفيها وهي تسأل ماذا يحدث لك يا "مريم" .. لماذا تشعرين بالضيق كلما ابتعد .. نفسها بحده وبالآمان كلما رأيته .. هو أخو زوجك .. اخو حبيبك .. أفيقي يا "مريم" .. .. "ماجد" "مراد" أخو

قبل الفجر بعدة ساعات قامت من نومها فرعة .. شعرت شئ ثقيل يجثم على صدرها يخنقها تذكرت كلماتها لـ "سهى" وهي تذكرها بأن الله عز وجل يتجلى فى السماء الدنيا فى الثلث الأخير من الليل ليستجيب لدعاء من يدعوه ويفرج كرب من يلجأ اليه .. تذكرت الآية التي تقول " أتأمرون الناس بالبر وتنسون استغفرت ربها ونهضت من فراشها بحماس توضأت ووقفت بين .. " أنفسكم : يدى الله تبت له شكوها وتناجيه كانت تردد كثيراً

يارب أنا مش عارفه أنا عايزه ايه ولا عارفه ايه اللي يريحنى يارب انت عالم -  
بيا أكثر من نفسي يارب يريحنى  
ظلت تبكى كثيراً فى سجودها وجسدها يرتجف بشدة .. انهدت صلاة الفجر وهي تشعر بأن قواها قد خارت تماماً نامت على الأرض حيث هي فوق سجادة الصلاة .

\*\*\*\*\*

: قال أحد رجال "حسن المنفلوطى" بثقه

أيوة طبعا متأكد يا "حسن" ببيه .. "خيري السمري" مات ومعدوش الابنت -  
واحدة .. و"خيري الهواري" مات وعنديه ولدين واحد مات والتانى لساته  
عايش

: ابتسم "حسن" بتشفى وعياه تضيقان خبتاً هو يقول

وهيحصل أخوه جريب جوى -

: ثم التفت الى الرجل قائلاً

- عايزك تجبلى كل المعلومات عن ابنه .. كل صغيرة وكبيرة لازم أعرفها ..

فاهم

: قال الرجل بحماس

- فاهم يا "حسن" ببيه .. هعرفك كل حاجة عنه .. انت تأمر يا "حسن" ببيه -

المهم انت تبجى راضى عيننا

: ابتسم "حسن" وهو يربت على رأس الرجل قائلاً

حلاوتك محفوظة متجلجش -

\*\*\*\*\*

سمعت جارة "مريم" التى تسكن تحتها طرقات فى الصباح الباكر .. فتحت

: الباب بحذر لتجد رجلاً لا تعرفه فقالت

خير يا ابنى فى حاجة -

: قال الرجل وهو يلقي نظرة من فوقها على البيت من الداخل

هى مش مدام "مريم" ساكنه هنا -

قالت المرأة وهى تنظر اليه وتضيق عينيها بسبب ضعف بصرها وهى تحاول

: تبين من هو وماذا يريد

- أيوة ساكنه هنا بس فى الشقة اللى فوقى على طول -

: قالى وهو يهم بالصعود

شكراً يا حجه -

: نظرت اليه المرأة وهو يصعد وقالت بفضول

انت مين يا ابنى ؟ -

: التفت اليها ورسم ابتسامه على شفثيه قائلاً

أنا من طرف أستاذ "مراد" .. طليقها -

: صعد وترك المرأة فاتحة فمها دهشة .. ثم قالت لنفسها

! طليقها -

انتهت "مريم" من ارتداء ملابسها وهمت بحمل حقيبتها للذهاب الى قسم  
بالأمس .. عندما سمعت طرقاتاً على باب شقتها .. "الشرطة كما وعدت "مراد

: اقتربت قائله

مين ؟ -

: سمعت صوتاً يقول

أنا سواق أستاذ "مراد" باعتنى عشان أوصل حضرتك بالعربية -  
شعرت بالحنق .. لماذا لا يتركها وشأنها .. لم يعد لها حقوق عليه .. وليس  
: ملزماً بإرسال سيارته الخاصه لإحضارها .. فتحت الباب وقالت للرجل

ثانية واحدة هجيب شنطتى -

..التفتت لتحضر حقيبتها .. لكنها شعرت بالرجل يطوقها بذراعه من الخلف  
وقبل أن تصرخ كتم فمها بقطعة قماش موضوع عليها أحد أنواع الأدوية  
لحظات وفقدت وعيها .. حملها الرجل ونزل بها مسرعاً بمجرد أن ..المخدرة  
: خرج من البوابة أخذ يصرخ فى المارة قائلاً

حد يفتحلى باب العربية بسرعة .. البنيت أغمى عليها وجتلها غيبوبة سكر -

: قال أحد المارة

لا حول ولا قوة الا بالله -

قام أحد المارة على الفور بفتح المقعد الخلفى للسيارة

: تتمم آخر

بسرعة يا ابنى على أقرب مستشفى -

: وقال آخر

لا حول ولا قوة الا بالله شكلها صغير .. استر يارب -

صعد الرجل بسرعة خلف المقود وانطلق بالسيارة وبصحبه "مريم" فاقدة  
الوعى على المقعد الخلفى

\*\*\*\*\*

ظل "مراد" ينظر الى ساعته وهو ينتظر "مريم" أمام قسم الشرطة .. على

الرغم من طلاقهما مازال يشعر بداخله أنها ملزمة منه .. وكان شئ خفى  
شئ أقوى من الكلمة التى قالها لتقطع أى وصال بينهما .. حاول .. يربطه بها  
: الاتصال بها لكن كالعادة هاتفها مغلق .. زفر بضيق قائلاً  
افتحيه بأه -

زاد قلقه عندما ازداد تأخرها .. ركب سيارته وتوجه الى بيتها .. ظل يطرق  
الباب كثيراً دون رد .. حاول الاتصال بها دون جدوى .. ظل يفكر .. معقول أنه  
.. جاء من هنا لتذهب هى من هنا .. لكنه شعر بشئ ينبئه بأن مكروهاً قد حدث  
: سمع من الأسفل امرأة تقول  
مين ؟ .. انت عايز مين ؟ -

: نزل "مراد" ليجد الجارة التى تحدثت معها "مريم" من قبل فقال لها بلهفه  
متعرفيش هى "مريم" فين ؟ .. بخبط عليها ومحدث بيرد -  
: قالت المرأة وهى تنظر اليه وتدقق نظرها

آه فى راجل خبط عليها من ساعتين كده وقال انه من طرف طليقتها -

: قال "مراد" باهتمام

طليقتها ؟ .. راجل ؟ .. قال ايه بالظبط ؟ -

: قالت المرأة وهى تحاول التذكر

قال انه من طرف واحد اسمه "مراد" وانه طليقتها .. أنا اصلا مكنتش أعرف -  
انها اتجوزت تانى

فجأة اتسعت عينا المرأة وهى تنظر الى "مراد" وتقرب وجهها منه قائلة بفرع

:

بسم الله الرحمن الرحيم .. مش انت "ماجد" اللى مات -

: قال "مراد" بحنق

لا أنا "مراد" .. أخوه -

: قالت المرأة وهى مازالت مصدومة

أخوه .. سبحان الله .. انت أخو جوزها ولا جوزها ولا طليقتها ولا ايه بالظبط -

: قال "مراد" بنفاذ صبر

شكله ايه الراجل ده -

: قالت الجارة وهى مازالت تتطلع الى وجهه



كان شكك بالظبط سبحان الله -

: قال "مراد" بضيق

- مش بتكلم عن أخويا .. يا حجة ركزى .. بتكلم عن الراجل اللي قال انه من طرفى

:قالت المرأة وهى تحاول التذكر

- والله ما أعرف يا بنى مش فاكرة .. أهو جدع كده طول بعرض .. وشكله كده - متجوز

: نظر اليها "مراد" بغیظ

- أعمل أنا ايه بمتجوز ولا مش متجوز .. مفيش أى حاجة مميزه فيه ؟ -

: قالت المرأة وهى تفكر

- حاجة مميزة ؟ .. ازاي يعنى .. لا هو كان زى الفل -

: ثم صاحت بحدده

- وبعدين انت مين عشان تسأل كل الأسئلة دى .. أنا ايه يضمئلى ان "مريم" -

تعرفك وانك طليقتها بجد مش يمكن بتضحك عليا

: "قال" مراد

- يا حجه أنا كنت مع "مريم" المرة اللي فاتت لما سلمت عليكي -

: قالت المرأة بحزن

- معلش يا ابنى أصلك كنت واقف بعيد وأنا نظرى على أدى -

: قال "مراد" وهو يعطيها ورقه كتب بها رقمه

- ده رقمى يا حجة لو "مريم" جت كلميني على طول .. ماشى -

: قالت المرأة وهى تأخذ منه الورقة وتقول بثقه

- حاضر يا ابنى ومتقلقش أنا على طول أعدة ورا الباب ومحدش بيطلع ولا -

بينزل غير لما بعرف

: قال "مراد" وهو يرمقها بنظراته

- ما هو واضح -

ثم غادر مسرعاً

\*\*\*\*\*

أفاقت "مريم" لتجد نفسها فى غرفة جيدة الأثاث نظرت حولها فى ربيبه ثم : انتبهت الى يديها الموثوقتان خلفها وقدميها الموثوقتان .. أخذت تصرخ قائله :  
الحقونى .. الحقونى .. حد يساعدى -

فجأة انفتح الباب ليخذ منه الرجل الذى رآته على باب شقتها فأخذت تصرخ فيه :  
قائله :

أنت ايه اللى انت عملته ده أنا هوديك فى ستين داهية -

: قال الرجل

اهدى يا مدام ثوانى و "حامد" بيه هيجي .. هيتكلم معاكى بس مش أكثر من -  
كده

: صاحت بغضب

مين "حامد" ده .. وازاى تعمل كده .. انت خطفتنى غصب عنى .. انت ازاي -  
تعمل كده

خرج الرجل دون أن يرد عليها .. حاولت الوقوف لكنها لم تستطع الحركة بسبب قدميها .. جلست على الفراش تتأمل الغرفة وقلبها يخفق بهلع بعد عدة دقائق انفتح الباب ووجدت "حامد" أمامها وخلفه الرجل الذى خطفها .. توجه :  
الى مقعد امامها وقال "حامد"

أسفين يا مدام .. بس ملقتش طريقة غير كدة أقدر أتكلم معاكى بيها .. -  
والوقت سرقتى وكان لازم نتكلم قبل ما تروحي القسم

: قالت "مريم" بحزم

فكنى وسبنى أمشى .. كدة هيبقوا قضيتين خطف مش قضية واحدة -  
: وضع "حامد" ساقاً فوق ساق وأخرج غليونه يشعله وقال بثقه مبتسماً  
لا ان شاء الله مفيش قضية ولا حاجة -

أخذ ينفث دخانه وهو ينظر اليها بجرأة شعرت بالغضب بداخلها .. تحدث أخيراً :  
وقال :

أنا عرفت حاجات كتير عنك وأهمها ان "مراد" طلقك ورماكى ورجعتى بيتك -  
القديم اللى عايشه فيه لوحداك من يوم ما أهلك ماتوا فى حادثه عربية من ٣  
سنيين

: شعرت "مريم" بالدهشة لعلمه بكل تلك التفاصيل عنها فأكمل قائلاً

طبعا دى فرصة عشان تنتقمى من "مراد" وترديله القلم -

: قالت بثقة

الطلاق كان باتفاق بينا .. وان كنت فاكرا انى هأدى "مراد" تبقى غلطان -

: أمر الرجل الواقف بجواره قائلاً

فكها -

اقترب الرجل منها فشعرت بالخوف .. أخذ يفك قيدها وهى تحاول قدر الإمكان

: "الابتعاد عنه وعدم الإحتكاك به .. قال "حامد

شوفتى أنا طيب معاكى ازاي .. أنا مش عايز أذيكى .. عايز بس منك خدمة -

صغيره

: قالت بشك وهى تفرق رسيها بكفيها

خدمة ايه -

: "قال "حامد

هتروحي القسم وتقولى ان كل اللي شهدتى بيه قبل كده كلام "مراد" مش -

كلامك وانك اضطريتى تقولى كده لانه هددك وخوفك .. وممكن كمان تسبكى

الحكاية بانك تقولى ان ده سبب طلاقك منه لانك اكتشفتى انه راجل معندوش

ضمير

: قالت "مريم" بتهكم

بتحلم .. لو فاكرا انى هشهد زور يبقى بتحلم .. ولو فاكرا انى ممكن أذى -

"مراد" يبقى بتحلم

: كانت تنظر اليه بثقة شديدة .. ضاق عيناه وهو يقول

تقدرى تقولى و انتى عايشة لوحدك كده مين اللي هيحميكي منى ؟ -

: شعرت "مريم" بالخوف فأكمل وهو ينظر اليها بشراسه

تقدرى تقولى ازاي هتحمى نفسك لو بعثلك واحد من رجالتى جوه بيتك -

يقتلك و انتى نايمة أو يعمل اللي أسوأ من كده ؟

: أخافتها نظراته بقدر ما أخافتها كلماته .. قالت بصوت مضطرب

ربنا معايا -

: قال "حامد" بتحكم

ممكن أنفذ ده دلوقتى ومستناش انك تروحي بيتك -

نظر الى الرجل الواقف بجواره وأشار له بعينه تجاه "مريم" .. أقبل الرجل :  
تجاهها فقامت من مكانها وانذوت فى أحد أركان الغرفة وهى تبكى قائله بفرع

حرام عليك اتقى ربنا -

: التصقت بالحائط خائفة مرعوبة فقال "حامد" للرجل قبل أن يصل اليها

استنى يمكن تكون عقلت -

: ثم التفت الى "مريم" قائلا

ها يا قطة عقلتى ولا لسه ؟ -

: قالت وهى تبكى بحرقة

حسبي الله ونعم والوكيل فيك انت ايه معندكش ضمير مش خايف من ربنا ؟ -

: قال "حامد" بتهمك

أنا قلبي ميت مبخفش من حاجه -

: قالت "مريم" وهى تنظر اليه باحتقار

فعلاً انت قلبك ميت -

أشار "حامد" بعينه الى الرجل ليتقدم باتجاه "مريم" هم الرجل بلمسها فأنزوت :  
أكثر لتبعد نفسها عنه وهى تصرخ قائله

خلاص موافقة -

توقف الرجل ونظر الى "حامد" ينتظر اشاره منه فأشار له "حامد" بالتراجع

: ووقف واقترب من "مريم" قائلاً بحزم

خليكي فاكرة يا قطة ان مش "حامد" اللي يضحك عليه .. لو بتقولى كده -

عشان تخلصى منى وتبلغى عن اللى حصل أول ما توصلى القسم تبقى بتلعبى

ولو روحتى فين هجيبك يعني هجيبك .. فى عداد عمرك

: ثم قال بشراسة

وساعتها مش هعتقك .. فاهمانى .. مش هتعتك -

أومأت "مريم" برأسها ودموعها تنهمر على وجهها وجسدها يرتجف خوفاً ..

حامد" من ذراعها ليخرجها فجذبت ذراعها بعنف فأشار للباب ساخراً "أمسكها

:

اتفضلى يا مدام المحامى منتظرك تحت عشان يروح معاكى القسم -

نزلت "مريم" للدور الأرضي من الفلينا وهي تراقب ما حولها .. كان رجلاً فى  
: انتظارهم بالأسفل فقال "حامد" للرجل

خلاص مدام "مريم" اعترفتلى بكل حاجة وحابه تريخ ضميرها وتقول -  
الحقيقة

ثم غمز لها وهو يبتسم بخبث فأشاحت بوجهها عنه وهي لا تطيق مجرد النظر  
: "سبقها المحامى الى السيارة وقبل أن تهم بالركوب قال لها "حامد .. اليه

حفظتى اللى هتقوليه ؟ -

: قالت دون أن تنظر اليه

أيوة -

: قال بنبره محذره

أى غلطة عارفه ايه اللى هيحصل -

: تنهدت قائله

عارفه -

ركبت مع المحامى فى السيارة التى انطلقت بهما الى قسم الشرطة

\*\*\*\*\*

: كاد "مراد" أن يفقد عقله وهو يبحث عن "مريم" اتصل بـ "طارق" قائلاً

أرجوك يا "طارق" اتصل بـ "مى" صحبتها يمكن تكون عندها -

: "قال "طارق"

حاضر يا "مراد" متقلش -

: اتصل "طارق" بـ "مى" التى قالت له بهلع

لا مجتش عندى ومتكلمناش مع بعض وأول مرة أعرف بموضوع الطلاق ده -

: قال "طارق" بقلق

ياريت لو كلمتك أو عرفتى أى حاجة عنها تعرفيني لأن "مراد" هيتجنن عليها -

: قالت "مى" وهي تشعر بالخوف هي الأخرى

حاضر بس ياريت لو حضرتك وصلت ليها تعرفنى لأنى أنا كمان قلقانه أوى -

: "قال" طارق

خلاص ماشى اللى يعرف حاجة الأول يكلم التانى -

كان "مراد" فى حالة يرثى لها وهو يسير فى الشوارع بسيارته هائماً يبحث عنها بعينيه .. يعلم بأنه لا يستطيع تقديم بلاغ عن اختفائها .. أخذ عقله يفكر بسرعة وهو يحاول أن يجد حلاً .. لا يمكنه الجلوس والانتظار حتى تظهر أو : حتى يمر ٢٤ ساعة ليستطيع تقديم البلاغ .. اتصل بأمه فقالت لا مكلمتنيش ولا كلمت حد من البنات .. لا حول ولا قوة الا بالله .. أنا خايفه -

عليها أوى

: "قال" مراد

طيب اقفلى دلوقتى ولو كملتك عرفيني -

: قالت "ناهد" بلهفه

ولو عرفت حاجة عرفنى يا "مراد" أنا اعده على أعصابي -

كان "مراد" ينهج بشدة وقلبه يخفق بجنون وبهلع .. شعر بغشاوه من العبرات : تظلل عينيه وهو يتمتم

يارب .. يارب احفظها -

\*\*\*\*\*

وقفت "مريم" خارج مكتب الضابط فى انتظار المحامى .. الذى خرج بعد عدة

: دقائق وأشار لها بالدخول قبل أن تدخل همس فى أذنها

حامد" بيه مستنى تليفون منى" -

نظرت "مريم" الى المحامى بإحتقار .. كيف يبيع رجل قانون ضميره هكذا ..

مريم" وجلست وجلست المحامى قبالتها وهو ينظر اليها نظرات ذات "دخلت

مغزى فخفضت بصرها حتى لا ترتطم عيناها بنظراته المهدده .. قال الضابط

: وهو يعقد كفيه على المكتب

ها يا مدام "مريم" .. محامى "حامد" بيه بيقول انك عايزه تغيري أقوالك -

: صمتت "مريم" فقال المحامى

ايوة يا باشا هي اضطرت تعمل كده عشان كانت خايفه من جوزها اللي هو -  
دلوقتي طليقها لكن خلاص هي اطلقت منه ومعدلوش حكم عليها

: قال الضابط للمحامى

لو سمحت سيبها هي تتكلم -

: ثم نظر الى "مريم" التى تطرق برأسها قائلاً

ها يا مدام "مريم" عايز أسمع منك -

أخذت "مريم" تفكر فى الوضع الذى زجت فيه .. تذكرت كلمات "حامد"  
المهددة اياها بالقتل أو ما هو اسوأ .. تذكرت نظرات الرجل الخبيثة التى رمقها  
بها وهو يقترب منها .. تذكرت بيتها الذى يخلو الا منها .. تذكرت وحشة الليل  
والسكون الذى يغمر بيتها كلمها حل المساء .. لكنها وسط كل ذلك تذكرت  
تذكرت "مراد" الذى لا ولم لن تؤذيه أبداً .. شهادتها التى يريد بها .. شيين  
أن تشهد بها ستؤذى "مراد" بشدة وقد يسجن بسببها .. وتذكرت ربها "حامد"  
.. وتلك الآيات التى قراتها كثيراً فى سورة النساء وهى تقيم الليل " يَا أَيُّهَا  
الَّذِينَ آمَنُوا كُونُوا قَوَّامِينَ بِالْقِسْطِ شُهَدَاءَ لِلَّهِ وَلَوْ عَلَىٰ أَنفُسِكُمْ أَوِ الْوَالِدِينَ  
وَالْأَقْرَبِينَ إِن يَكُنْ غَنِيًّا أَوْ فَقِيرًا فَاللَّهُ أَوْلَىٰ بِهِمَا فَلَا تَتَّبِعُوا الْهَوَىٰ أَن تَعْدُوا  
وَإِنْ تَلَوُّوا أَوْ تَعْرَضُوا فَإِنَّ اللَّهَ كَانَ بِمَا تَعْمَلُونَ خَبِيرًا " .. وتذكرت حديث  
ألا أنبئكم بأكبر الكبائر ( ثلاثاً ) ؟ قالوا : بلى "رسول الله صلى الله عليه وسلم  
: يا رسول الله ، قال : الإشراك بالله و عقوق الوالدين و جلس و كان متكئاً فقال  
ألا و قول الزور " قال : فما زال يكررها حتى قلنا : ليته سكت " .. عندما  
تذكرت ذلك شعرت بثقه كبيرة بداخلها وهرب منها الخوف ليحل مكانه الأمان  
: وتشعر أنها فى معية الله .. كرر الضابط كلامه قائلاً

مدام "مريم" عايز أسمع منك شهادتك الجديدة -

رفعت نظرها الى المحامى بعدما شعرت بأن كل الخوف بداخلها قد تبدد لم تعد  
: نظراته المهدده تجدى نفعاً معها .. التفتت الى الضابط وقالت بثقه

لا مش هغير أقوالى يا فندم -

نظر اليها المحامى بصرامة فتجاهلته تماماً .. فقال الضابط باهتمام وهو ينظر  
: اليها

يعني الاستاذ "مراد" مأجبركيش انك تشهدى بشهادتك الأولى -

: قالت "مريم" بثقة شديدة

لأ محشد أجبرنى .. كل اللى قولته حصل .. شوفت اللى اسمه "حامد" ده -  
وهو بيخدر "نرمين" فى العربية وبيفقدھا وعيھا وكان هيمشى بيھا لولا انى  
وقفت ومنعته وصرخت .. ورماھا من العربية وهرب .. ده كل اللى حصل  
: نظر الضابط الى المحامى قائلاً

ابقى اتأكد من المعلومات اللى عندك قبل ما تبلغنا بيھا -

.. شعر المحامى بالخرج والغيط

: قالت "مريم" بحزم

وعايزة أقدم بلاغ فى "حامد" بتهمة خطفى -

: قال الضابط بدهشة

ازاى ؟ -

: قصت عليه "مريم" ما حدث بالتفصيل فقال لها

تمام هنتفتح محضر بالكلام ده بس محتاجين بطاقتك -

"قالت "مريم"

بطاقتى فى البيت هروح أجيبھا وارجع تانى -

: أوما الضابط برأسه وهو ينظر الى المحامى شزراً .. نهضت "مريم" قائلة

تسمحلى أمشى ؟ -

: أشار الضابط الى الباب قائلاً

اتفضلى -

خرجت "مريم" وخلفھا المحامى .. وقبل أن يتحدث اليھا التفتت اليه ترمقه

: بنظرات ناريه وهى تقول بتحدى

قول للى مشغلك ان كان هو مبيخافش من ربنا فأنا مبخافش غير منه -

ثم أدرات لها ظهرھا وانصرفت تغادر قسم الشرطة وعينا المحامى ترمقھا بغيط

وهو يخرج هاتفه فى عصبية

\*\*\*\*\*

عاد "مراد" الى قسم الشرطة مرة أخرى عله يجدها .. فدخل الى الضابط الذى  
طمأنه على "مريم" وقص عليه بلاغها الثانى .. امتقع وجه "مراد" وهو يستمع



"اليه والى ما حدث لـ "مريم" من "حامد"

عادت "مريم" الى بيتها وفي عقلها شئ واحد .. خوفها على "مراد" .. خافت من أن تطاله يد "حامد" لتصيبه بمكروه هو أو أحد من أهل بيتسه .. انتبهت الى كونها تفكر فيه أكثر من تفكيرها فى نفسها .. وخائفه عليه أكثر من خوفها على نفسها .. تذكرت عندما رآته أمام الباب أمس .. شعرت بحنين جارف اليه شعرت بالضيق الشديد من هذا الشعور الذى راودها .. جلست لتخبئ وجهها ..

: بين كفيها .. حدثها عقلها ليقنع قلبها قائلاً

لا تقلق أيها القلب فما تشعر به ليس سوى حنين لرجل يشبه حبيبك -

: قال القلب بحيرة

أنت متأكد أيها العقل .. أتجزم بذلك -

: قال العقل بثقه

طبعاً متأكد .. لا تقلق فما تشعر به طبيعي وسيزول مع الوقت .. فقط أنت -

تحتاج الى وقت أيها القلب

: صمت القلب قليلاً ثم قال

- لكننى أحفظ دقاتى جيداً أيها العقل .. وتلك الطريقة التى أخفق بها عندما أكون -

قريباً منه .. تشى بأننى قد أحمل له شيئاً بداخلى

: قال العقل بعند

لا تردد هذا كثيراً حتى لا تقنعنى به .. افعل ما أقوله لك .. وقل أنك متلهف -

فقط على شبيهه حبيبك

: قال القلب فى عدم اقتناع

أنا متلهف فقط على شبيهه حبيبي -

: قال العقل شاعراً بانتصاره

- رأيت أيها القلب أنت قلتها بنفسك -

: قال القلب بحزن

نعم قلتها لكننى لا أشعر بها -

: صاح العقل بحده

- بل تشعر بها لكنك غارق فى الأوهام .. افق قبل أن تحطم نفسك بنفسك يكفيك -

يا فيك .. أنا العقل وأنت القلب .. انا دائماً أكون على حق .. لكنك تخطئ  
وتصيب .. استمع الى فأنا أكثر حكمة منك .. أنا الذى أدير هذا الجسد وأتحكم  
فى كل وظائفه .. لماذا لم تُترك لك هذه المهمة وأوكلت لى وحدى ؟ .. لأننى  
قادر عليها .. وقادر الآن على ارغامك بما أريد

: قال القلب بإستسلام

فلا .. معك حق أيها العقل .. قوتك أكبر منى .. سأردد كلماتك الى أن اقتنع بها -  
أريد سوى راحة هذا الجسد .. ومادامت راحته فى الاستماع اليك فسأفعل

: قال العقل مبتسماً بثقه

رائع أيها القلب .. انت على الطريق الصحيح الآن .. استمر هكذا وتستريح -  
للأبد .. وتذكر أنا دائماً على حق

انتهت المحادثة بين عقل "مريم" وقلبها لتشعر بالراحة لما انتهى اليه النقاش  
تذكرت خطابات "ماجد" تلك الخطابات التى يبث فيها كلماته التى تطمئنها ..  
وتنزل برداً على قلبها .. هبت واقفة وفتحت دولابها لتخرج الخطاب .. الخطاب  
الذى رفضت أن تفتحه منذ أن أصبحت زوجة لـ "مراد" .. جلست على فراشها  
تذكرت "مراد" واتهامه اياها بالخيانة .. نظرت الى الخطاب وهى تشعر بأنها ..  
تحررت .. تحررت من القيد الذى منعها من قراءة خطابات "ماجد" .. لم تعد  
الآن زوجة لـ "مراد" .. أصبح من حقها قراءة الخطاب دون أدنى شعور  
نظرت الى الخطاب تقلبه بين يديها .. نظرت الى يديها بإستنكار .. .. بالذنب  
لماذا لا تفتحيه بلهفه كما اعتدتى .. أنتفتحت كل جوارحى اليوم ضدى .. لماذا لا  
ترتعشين بلهفه وشوق .. لماذا أيها القلب لا تخفق بلهفه كما اعتدت عندما أهم  
بقراءة خطابات حبيبى .. ألم تسمع ما قاله العقل لك منذ قليل .. تحدث القلب

: بوهن قائلاً

أسف أيها الجسد .. أنا ما خلقت لأفكر .. بل خلقت لأشعر .. ورغم كل الكلمات -  
التى أسمعنى اياها عقلك .. الا أننى لن أخفق اليوم كما أخفق من قبل وأنت  
تمسك بتلك الخطابات .. لأن بكل بساطة .. أصبح لى حبيباً آخر  
وكأنها لم تكتفى بعصيان قلبها ويديها .. اعلنت عيناها أيضاً العصيان فبكت  
شوقاً لهذا الحبيب

سمعت طرقات على الباب ففزعت وهبت واقفة .. مسحت دموعها وهى تقترب

: من الباب الذى يتعالى صوت الطرقات عليه قالت بحذر بصوت مرتجف  
مين ؟ -

: سمعت صوت "مراد" خلف الباب يقول

"أنا "مراد" افتحى يا "مريم" -

شعرت بشعور غريب وهى تستمع الى صوته .. اختفى كل شعور داخلها  
بالخوف ليحل محله أمان لا حدود له .. فتحت الباب فاقترب "مراد" فاضطرت  
دخول واغلق الباب خلفه .. وجدته ينظر اليها بشوق ولهفه .. للرجوع للخلف  
وخوف وجزع .. كتلك النظرات التى رمقها بها بعد أن خرجا من البحر يوم  
: مراد" بلهفه وهو مازال يحتضن وجهها بعيناه" احتراق اللانث .. قال  
انتى كويسه -

: قالت بضعف وهى تحاول التظاهر بالتماسك وتناسى خفقات قلبها العنيفه  
أبوة كويسة -

: قال بلهفه

ايه الى حصل قالك ايه وعملك ايه عايز أسمع منك -

: قالت "مريم" وقد انتبهت لوجوده داخل بيتها والباب المغلق خلفه

مينفعش كده .. لو سمحت اخرج -

: قال "مراد" يحده

بقولك قوليلى الى حصل -

قالت "مريم" بحده مماثله وهى تنظر اليه وتحاول التحكم فى تلك المشاعر التى  
: تجتاحها بقوة

بقولك اخرج لو سمحت .. ميصحش كده انا عايشه لوحدى .. كده مينفعش -

: أطبق "مراد" على شفثيه بقوة وهو ينظر اليها ثم قال بهدوء

طيب أنا هخليه ينفع -

: صمت لبرهه وعيناه تنظر داخل أعماق عينيها .. ثم قال بحزم وبصوت رخيم  
"رديتك يا "مريم" -

توقف قلبها عن العمل لثانيه ثم عاد ليخفق بجنون .. اتسعت عيناه دهشة  
وهى تنظر اليه وصدرها يعلو ويهبط من سرعة تنفسها .. صاح القلب ضاحكاً  
: بانتصار

.. رأيت أيها العقل .. لقد كنت على حق .. ها أنا أخفق كالمجنون بسعادة -  
اسكت أيها العقل ولا تملئ على أوامرك مرة أخرى .. لقد انتصرت عليك هذه  
المرة.

## الفصل الثالث والعشرون

مينفേഷ كده .. لو سمحت اخرج -

: قال "مراد" بجده

بقولك قوليلي اللي حصل -

قالت "مريم" بجده مماثله وهى تنظر اليه وتحاول التحكم فى تلك المشاعر التى  
: تجتاحها بقوة

بقولك اخرج لو سمحت .. ميصحش كده انا عايشه لوحدى .. كده مينفേഷ -

: أطبق "مراد" على شفثيه بقوة وهو ينظر اليها ثم قال بهدوء

طيب أنا هخليه ينفع -

: صمت لبرهه وعيناه تنظر داخل أعماق عينيها .. ثم قال بحزم وبصوت رخيم

"رديتك يا "مريم" -

توقف قلبها عن العمل لثانيه ثم عاد ليخفق بجنون .. اتسعت عيناها دهشة وهى

تنظر اليه وصدرها يعلو ويهبط من سرعة تنفسها .. صاح القلب ضاحكاً

: بإنتصار

.. رأيت أيها العقل .. لقد كنت على حق .. ها أنا أخفق كالمجنون بسعادة -

اسكت أيها العقل ولا تملئ على أوامرك مرة أخرى .. لقد انتصرت عليك هذه

المرة.

صمتت طويلاً وقد هربت منها الكلمات .. تتطلع الى "مراد" بدهشة .. ويتطلع

: اليها بنظرات تحاول تفسير معناها .. أخيراً تحدثت وقال بصوت مضطرب

ليه .. ليه عملت كده ؟ -

: بدا عليه التوتر .. وكأنه يخفى مالا يريد البوح به .. قال بشئ من العصبية

عشان اللي حصل النهاردة .. مش ممكن أسيبك لوحدك -

: لا تدري "مريم" لما شعرت بالحنق والغيط والغضب فصاحت

لا متقلقش عليا أنا أعرف أحمى نفسي كويس .. متشكرة أوى -

: قال "مراد" بتهكم

واضح انك بتعرفى تحمى نفسك كويس بدليل انك اتخطفتى النهاردة -

: امتقع وجهها وقالت بحده

ملكش دعوة أتخطف ولا متخطفش -

: قال "مراد" بغضب

مش فاهم انتي عقلك فين عشان تفتحي الباب لراجل غريب متعرفيهوش -

: قالت "مريم" بإستنكار

أنا ميفتحش الباب لحد غريب .. بس هو قالى انه من طرفك وعشان كدة -

اطمنتله ووثقت فيه وفتحت الباب

ساد الصمت للحظات .. رأت فى عيني "مراد" نظرة غريبة .. تساءلت أعيناه

: تبتسمان حقاً أم خيل لها .. قال بنبره حانيه

يعني معنى كدة انك بتتقى فيا و بتطمئلى -

: شعرت بالحرج فأبعدت عيناها عنه وصمتت .. نظر اليها للحظات ثم قال بحزم

يلا لى هدومك عشان هنرجع الفيلا -

: رفعت "مريم" رأسها ونظرت اليه بعناد قائله

لا مش راجعه -

: قال "مراد" بعناد مماثل

هترجعى .. انتى دلوقتى مراتى ومسؤلة منى -

: صاحت "مريم" بإستنكار

أصلاً مينفعش اللي حصل ده -

: قال "مراد" ببرود

هو ايه ده اللي مينفعش ؟ -

: قالت بحده

مينفعش انك تردنى كده أصلاً أنا مليش عدة -

: سألها "مراد" ببرود

ليه بأه ملكيش عدة ؟ -

احمرت وجنتاها وأشاحت بوجهها وعقدت ذراعيها أمام صدرها بغیظ .. فقال

: "مراد" بحزم

- أيوة محصلش حاجة بينا بس الناس عارفه انك مراتى وكنتى عايشة معايا فى -

بيت واحد وفى أوضة واحدة وشرعاً وقانوناً ليكي عدة اسمها عدة احترازية

: نظرت اليه "مريم" بدهشة وقالت بشك

الكلام ده بجد ؟ -

: قال "مراد" بعصبية

- معتقدش انى هضحك عليكى فى حاجة خطيرة زى دى .. وعامة تقدرى تتأكدى -

بنفسك من المأذون واحنا رايعينله دلوقتى

: قال "مريم" ببرود

- ما قولتش انك بتضحك عليا .. بس أول مرة أعرف المعلومة دى -

: ثم قالت وقد انتبهت لكلامه

ليه هنروح للمأذون مش بتقول انك كده خلاص ردتنى ؟ -

: قال "مراد" بنفاذ صبر

- أيوة رديتك بس طالما اطلقنا عند المأذون وطلعنا ورقة طلاق .. يبقى لازم -

يتمتبت انى رديتك عشان اثبات حقوقك .. ممكن بأه تتفضلى تحضرى شنطتك ..

مش عايزك تستنى هنا لحظة وعايز أسمع منك اللى حصل بالتفصيل

شعرت "مريم" بالضيق لإضطرارها الى العودة اليه .. خاصة اذا كان السبب

الذى جعله يرجعها هو احساسه بالمسؤولية تجاهها لأنها شاهدة فى قضية أخته

ليس أكثر من ذلك .. شعرت بالضيق الشديد .. فقالت وهى تعلم أن قولها لن

: يجدى معه نفعاً

..... انت مش مضطر تعمل كده .. أنا كنت عايشة لوحدى سنين وأقدر -

لم يدعها "مراد" تكمل كلامها بل توجه من فوره الى غرفتها .. ليجد حقيبتها

الفارغة موضوعه بجانب الدولاب أخذها ووضعها على الفراش بعنف وفتح

دولابها وأخذ يضع الملابس بداخلها بإهمال .. لحقت "مريم" به وهتفت

: باستنكار

انت بتعمل ايه ؟ -

فأمسكت .. لم يجيبها .. همت بأخذ ملابسها التي يحملها بيديه ليلقيها فى الحقيبة بيده دون قصد .. اضطربت .. و اضطرب .. وتلاقت نظراتهما لحظة .. لحظة واحدة فقط لكنها قالت الكثير .. ابتعدت فوراً .. فوضع الملابس فى الحقيبة ببطء هم بأن .. وهو مازال يتطلع اليها .. يحاول النفاذ الى أعماقها ومعرفة ما بداخلها : يأخذ كومة أخرى من الملابس لكنها أوقفته قائله

طيب هلمهم أنا .. ممكن تتفضل تعد فى الصالون لو سمحت لحد ما أخلص - اممثل "مراد" لما قالت وتوجه الى الصالون وهو يتفحص ما حوله .. جمعت أغراضها فى تبرم .. وقفت قليلاً تفكر فيما يصيبها عندما تكون قريبة ""مريم نفضت تلك الأفكار من رأسها وأكملت مهمتها .. خرجت تحمل الحقيبة ..منه الثقيلة فبمجرد أن رآها "مراد" هب واقفاً وأخذها منها .. تأكدت "مريم" من اغلاق المحابس والشبابيك وتممت على كل شئ فى البيت ثم نزلت معه الى انطلقا فى طريقهما الى أن أوقف السيارة فى نفس المكان الذى أوقفها .. سيارته فيه منذ ما يقرب من اسبوعين .. نزل والتف حول السيارة وفتح لها الباب .. كانت تشعر بمشاعر كثيرة متضاربة ونزلت ببطء وهى تشعر أنها تود الهرب أما اجراءات توثيق الزواج .. وانطقا فى طريقهما الى قسم .. من كل شئ الشرطة

قدما البلاغ واستمع "مراد" الى ما قصته "مريم" على الضابط وقد احمر وجهه وانتفخت أوداجه من الغضب .. بعدما انتهيا من تقديم البلاغ ركبا السيارة مرة اخرى وانطلق "مراد" بها فى صمت .. تطلعت "مريم" اليه فوجدته غارقاً فى شروده وعلامات الغضب على وجهه .. كانت تشعر وكأن عيناه جمرتا نار .. كان يسير بالسيارة فى سرعة وحركاته تشوبها العصبية .. شعرت بالخوف من أن يتهور ويفعل مالا يحمد عقباه .. رن هاتفه فرد قائلاً

وعليكم السلام .. أيوة يا ماما لقيتها .. احنا جايين فى الطريق .. أيوة هى معايا - .. هتطلعك هيا وأنا هروح مشوار وأرجع .. طيب مع السلامة

: أنهى المكالمة دون ان ينظر الى "مريم" تزايد خوف "مريم" وقلقها فقالت ليه مش هتروح معايا .. انت رايح فين ؟ -

التفت ونظر اليها .. متفرساً فيها .. شعرت بالخجل وندمت على تسرعها فى

: القاء السؤال .. لكنها قالت بقلق

بلاش تعمل حاجة غلط .. لو سمحت اوعى تروحله وتضربه تانى -

: نظر "مراد" أمامه قائلاً بصرامة

ده يستاهل القتل مش الضرب -

: قالت "مريم" بجزع

اوعى تقتله هتضيع نفسك -

: التفت "مراد" اليها يراقب تعبيرات القلق على وجهه قائلاً بتحدى

ايه اللي مخوفك كده .. ايه المشكلة يعني لو وضعت .. مالك ومالى -

: قالت "مريم" بتوتر

كدة عشان مامتك واخواتك محتاجينك -

تفرس "مراد" فيها فأشاحت بوجهها .. عاد الى النظر أمامه بصمت .. توقفاً

عند احدى الإشارات المزدهمة وكل منهما شاردأ .. اقترب بائع متجول يحمل

: عقود طويلة من الفل من "مراد" قائلاً

فل يا بيه -

: "هز" "مراد" رأسه نفيأ .. فقال الرجل بالحاح وهو يلقي نظرة على "مريم

ده الفل عنوان المحبه .. ومعناه بحبك انتى وبس .. فل للهانم يا بيه -

شعرت "مريم" بالخرج لظن الرجل بأنهما حبيبان .. وشعرت أيضاً بالحزن وهى

تقول لنفسها ليتك تعلم أنه اضطر لمصاحبتى اليوم من أجل شعوره بالمسؤولية

تجاهى فقط .. فلا شئ يجمعنى به منذ أن رأيته إلا المصالح المشتركة .. رأت

بطرف عينيها "مراد" وهو يشتري عقداً من الرجل ويضعه أمامه على التابلوه

بالتأكيد ليتخلص من الحاح الرجل عليه فى الشراء .. انفتحت الإشارة وسارا ..

مرة أخرى فى طريقهما .. توقفت السيارة أمام بوابة الفيلا فقالت "مريم" وهى

: تلتفت اليه

ياريت متعملش حاجه تندم عليها سيب الشرطة تشوف شغلها وهما أكيد مش -

هيسيبوه

: بدا عليه أنه منشغل فى التفكير فى شئ ما .. فقالت مرة أخرى وهى تنظر اليه

ياريت بجد تتحكم فى أعصابك لان أى حاجة هتعملها هتتاخذ ضدك خاصة انك -

ضاربه مرة قبل كده

لم يجيب فالتفتت وهمت بالنزول من السيارة لكنها وجدته فجأة مطبقاً على يدها

التفتت باستغراب وهى تنظر الى يده الممسكه برسغها .. دون أن ينظر اليها ..



.. وجدته يحمل عقد الفل ويلفه حول يدها ببطء .. شعرت بقلبيها تتعالى دقاته  
انتهى فسار .. وحبست أنفاسها وهي تتطلع الى يده التي تلف العقد على يدها  
العقد كالإسورة يزين يدها اليسرى .. لم تنظر اليه .. ولم ينظر اليها .. لكن بدا  
لكن .. وكأنهما يتحدثان الى بعضهما البعض .. بحديث تعجز الأذان عن سماعه  
يفهمه القلب جيداً .. ظل ممسكاً يدها للحظات قبل أن يطلق سراحها ويعود الى  
النظر أمامه .. خرجت من السيارة وهي تشعر بإضراب شديد وبشعور لذيذ  
يغمرها .. سمعت صوت السيارة خلفها لتجده وقد رحل فتوجهت الى الحديقة بدلاً  
من الفيلا وجلست على أحد المقاعد للحظات .. أخذت خلالها تتطلع الى عقد الفل  
الذي يزين يدها .. تلمسته بأصابعها تداعب البتلات البيضاء .. ثم قربته من أنفها  
تتشمم عبيره .. ارتسمت ابتسامه على شفثتها وهي تتذكر كلام الرجل البائع : "  
تتسائل في "ده الفل عنوان المحبه .. ومعناه بحبك انتى وبس " .. أخذت "مريم  
!ثرى أيقصد ذلك بالفعل ؟ .. نفسها .. لماذا أهدانى اياه

\*\*\*\*\*

حبيبتي "مريم" حمدالله على سلامتك -

"هتفت "ناهد" بتلك العبارة وهي تعانق "مريم

: قالت "سارة" وهي تعانقها هي الأخرى

مريم" حبيبتي أنا فرحانه أوى أوى انى شوفتك تانى " -

: قالت "نرمين" وهي تجرى تجاهها لتعانقها

مريم" أنا مصدقتش لما ماما قالتلى انك جايه وحشتيني أوى " -

شعرت "مريم" بالتأثر وهي ترى المشاعر الفياضة التي تغمرها بها كل منهن ..

: قالت لهم بتأثر و بأعين دامعة

والله أنا اللي افتقدتكووا جداً -

أخذتها "ناهد" من يدها وجلست معها فى حجرة المعيشة وبجوارها "سارة"

: و "نرمين" .. قالت "نرمين" بلهفه

قوليلنا ايه اللي حصل -

: قصت عليهم "مريم" ما حدث .. فهتفت "ناهد" بغضب

حسبى الله ونعم الوكيل فيه .. ايه البنى آدم ده .. مش خايف من ربنا -

: قالت "مريم" بأسى

قالى ان قلبه ميت ومبيخفش من حاجه .. ربنا ينتقم منه -

: قالت "سارة" بحزن

"أكيد كنتى مرعوبة يا "مريم" -

: قالت "مريم" وهى تشعر بالخوف من مجرد تذكرها ما حدث

كنت ميتة من الرعب .. بس الحمد لله -

: قالت "نرمين" بأسى

"أنا السبب فى كل ده .. سامحيني يا "مريم" -

: ربتت "مريم" على كفها قائلاً

أنا مش زعلانة منك يا "نرمين" .. وبعدين انتى كنت هتعرفى منين ان -

معدوش ضمير كدة وانه هيعمل كل ده

: قالت "نرمين" بغضب شديد

ربنا ينتقم منه بجد ربنا ينتقم منه -

: قالت "سارة" مبتسمة

بس تعرفى أحلى حاجة فى الموضوع ان انتى و "مراد" رجعتوا لبعض -

: "شعرت "مريم" بالخرج .. فقالت "نرمين

فعلا دى أحلى حاجة فى الموضوع أنا مش عارفه انتوا ايه اللى خلاكوا تطلقوا -

أصلاً

ارتبكت "مريم" ولم تدرى ماذا تقول فأنقذتها "ناهد" موجهة حديثها الى

: الفتاتان

دى حاجة تخصها هى و "مراد" مينفعش نسألها عنها .. وبعدين سيبوها -

ترتاح شوية

: ثم التفتت الى "مريم" قائلة بحنان

اطلعى يا حبيبتى غيرى هدومك وارتاحى وأنا هبعثك دادة "أمينة" بالفطار -

تفطرى وتنامى شكلك مرهق

: ابتسمت "مريم" قائلة بوهن

حاضر يا طنط -

صعدت "مريم" ودخلت حجرة "مراد" .. شعرت بحنين جارف تجاه كل جزء

فى تلك الغرفة وكأنها كانت غرفتها منذ الأزل .. شعرت بسعادة وهى تلف حول

نفسها وتتأمل كل ما حولها وكأن هذا هو بيتها ومكانها .. شعرت بالدهشة من هذا الشعور .. تذكرت أن حقيبتها فى سيارة "مراد" نسيت بأن تأخذها .. فتحت الدولاب لتجد ملابسها التى اشتراها لها "مراد" والتى تركتها يوم أن رحلت عن هذا البيت .. شعرت بالألم وهى تتذكر اليوم الذى طلقها فيه "مراد" .. والى اللحظة التى نطق فيها بتلك الكلمة .. نفضت تلك الأفكار من رأسها ودخلت لتأخذ دسأً ساخناً وتناولت طعامها وغطت فى نوم عميق وابتسامة راحة وأمان على شفيتها .. فهنا هو أكثر مكاناً تشعر فيه بالراحة و بالأمان .

\*\*\*\*\*

توجه "مراد" الى المحامى الخاص به ليعلمه بكل تلك التطورات .. فطمأنه

: المحامى

- متقلقش يا أستاذ "مراد" .. كده هو بيلف الحبل حولين رقبتة وأخطاءه بتزيد -  
أكثر و أكثر

: قال "مراد" بغضب

- مش عايزه يقرب منى ولا من أى حد من أهلى والا قسمأ بالله لأقتله بإيدي -

: قال المحامى

- ياريت يا أستاذ "مراد" متتصرفش أى تصرف متهور عشان ميستخدموش -

ضدك فى القضية

: قال "مراد" بصرامة

- هحاول أتحم فى نفسى عشان مديش فرصة للكلب ده انه يهرب من اللى -

بيعمله .. بس لازم اشوفه محبوس وفى أقرب وقت

: طمأنه المحامى

- متقلقش قريب أوى ان شاء الله -

\*\*\*\*\*

عاد "مراد" الى البيت .. فوجد الجميع فى الحديقة فتوجه تجاههم .. هبت

: "سارة" واقفة وقالت بفرح

أبيه ألف مبروك .. فرحت أوى انكوا رجعتوا لبعض -

: قالت "ناهد" مبتسمة

"حمدالله على السلامة يا "مراد" -

: "قال "مراد" وعيناه تبحث عن "مريم

هي فين "مريم" ؟ -

: "قالت "نرمين

طلعت ترتاح في اوضتكوا يا أبيه -

: أوما برأه وجلس معهم .. فسألته أمه قائله

كنت فين ؟ -

: زفر بضيق وقال

كنت عند المحامى هكون فين يعني -

: "قالت "ناهد

خفت تكون روحت للزفت ده تانى .. وموبايلك أفله معرفش ليه .. بتجنن لما -

نكون فى مشكلة كدة وألاقى اللى بكلمه قافل موبايله

: "أل "مراد" وهو ينهض

أنا ما قفلتوش .. فصل شحن -

توجه "مراد" الى غرفته .. طرق طرقة صغيره خشية أن يوقظها إن كانت نائمة

دخل وأغلق الباب .. اقترب من .. فتح الباب .. ليجدها نائمة تتوسط فراشه ..

اقترب .. الفراش ينظر اليها بحنان مبتسماً .. كم افتقد وجودها .. والنظر اليها

منها وجلس بجوارها ومسح على شعرها برفق .. اتسعت ابتسامته وهو يرى

حباً .. عقد الفل مازال يزين يدها .. تلمسه بأصابعه ثم نظر اليها وعيناه تشعان

".. فجأة استيقظت وفتحت عينها لتجده جالساً بجوارها .. شعر "مراد

بالإضطراب ونهض من مكانه بسرعة .. كذلك اضطربت هي وجلست مكانها ..

: مراد" بتوتر وهو يتحاشى النظر اليها" قال

كنت عايز أتكلم معاكى بس لقيتك نائمة -

: أزاحت "مريم" ونهضت وهي تقول

أنا كنت نائمة بس صحيت -

: وقفت قابلته وقالت

فى حاجة حصلت ؟ -

: "قال "مراد

لا مفيش بس كنت عايز أطمئنك انى كلمت المحامى ..وهيحتاج يتكلم معاكى -  
شوية

: "قالت "مريم

مفيش مشكلة -

: قال "مراد" بضيق وهو ينظر اليها

- معلش يا "مريم" .. بس هو مضطر يتكلم معاكى عشان يسمع منك انتى -

التفاصيل

: كررت بهدوء

مفيش مشكلة -

: قال برقه

انتى كويسه -

أومأت برأسها صامته .. نظر الى عقد الفل ثم نظر اليها .. فشعرت بالخجل ..

: وقالت لتخفى ذلك

الشنطة بتاعتى فى العربية -

: قال بهدوء وهو يتوجه الى الباب

حاضر هجيبها لك -

خرج وتركها تتساءل ترى هل ما تراه فى عينيه موجود بالفعل أم أنها تتوهم

!ذلك .. واذا كان موجوداً بالفعل فلماذا لا يصارحها به ؟

\*\*\*\*\*

كانت "مريم" جالسه فى الحديقه وقد شردت بخيالها .. نظرت "مريم" الى

: ردت قائله ..هاتفها الذى يرن والموضوع على الطاولة

"السلام عليكم .. ازيك يا "سهى" -

: قالت "سهى" بهدوء

"وعليكم السلام ورحمة الله وبركاته .. بخير الحمد لله .. ازيك يا "مريم" -

: قالت "مريم" بحنان

تمام يا حبيبتي الحمد لله المهم طمنيىني عليكى انتى -

: "قالت "سهى

الحمد لله بخير .. بس كنت عايزة أشوفك .. محتاجه أتكلم معاكى شوية يا -

""مريم

: "صمتت "مريم" قليلاً فقالت "سهى

عارفه ان جوزك ممكن ميرضاش انك تشوفيني أو تعرفيني تانى .. بس فعلاً -  
أنا محتاجة أتكلم معاكى .. حاولى تقنعيه وهستنى تليفونك

: تمتت "مريم" بخفوت

"ماشى يا "سهى -

توجهت "مريم" الى غرفة مكتب "مراد" طرقت الباب ودخلت وقفت أمامه

: بحرج قائله

هعطلك عن حاجة -

: قال لها مبتسماً

لا أنا أصلاً تعبت شغل وكنت عايز آخذ بريك -

: همت بأن تتحدث لكنه أوقفها بإشاره من يده وهو ينهض قائلاً

استنى دادة "أمينة" بتحضرلى الأكل هقولها تعمل حسابك ونتكلم واحنا بناكل -

سوا

لم يعطيها فرصة لإبداء رأيها وخرج .. خرجت خلفه وتوجهت الى حجرة الطعام  
فى انتظاره .. ونظرت الى المائدة التى يتم اعدادها .. دخلت "أمينة" تحضر  
باقى الأطباق وخلفها "مراد" الذى ترأس المائدة فى مكانه المعتاد .. جلست

: بجواره وهى تقول "مريم"

أصلاً أنا مش جعانه هعد أتكلم معاك بس -

: قال "مراد" بتحدى وهو يرفع حاجبيه بمرح

لو مكنتيش ببقى مفيش كلام .. انا מבحبش آكل لوحدى -

: ابتسمت له وقالت

خلاص هاكل شوية صغيرين -

.. ابتسم لها .. كانت تلك من المرات النادرة التى يبتسم كلاهما فى وجه الآخر  
فشعرا بشعور ألفة يجمعهما .. أخفضت "مريم" بصرها لكنها لم تستطع اخفاء  
ابتسامتها .. عادت "أمينة" حاملة طبق "مريم" ووضعته أمامها مبتسمة وهى

:تقول:

نورتى البيت والله .. كان مضلم من غيرك -

: ابتسمت "مريم" لمجاملة المرأة قائله

شكراً يا دادة "أمينة" بس البيت دائماً منور بصحابه -

: هتفت "أمينة" قائله

مش بجاملك .. والله كان مضلم فعلاً -

: ثم نظرت الى "مراد" قائله

وسى "مراد" مكنش على بعضه من ساعة ما سييتى البيت .. وحتى مكنش -  
بياكل ولا بيشرى ولا بيعمل أى حاجة غير انه قاعد فى أوضته او فى الجنية  
نظرت "مريم" الى "مراد" الذى بدا عليه التوتر انشغل بالطعام أمامه فأكملت  
: "أمينة"

- كان مبوز ومكشر على طول كان ميتله حد .. ومشفتش الابتسامة على وشه الا -

لما انتى نورتينا امبارح

: التفت "مراد" لأمينه قائلاً بحرج

مش هناكل ولا ايه يا دادة -

: قالت "أمينة" وهى تغادر

معلش الكلام خدنى .. يلا بالهنا والشفاء -

أمسكت "مريم" ملعقتها وهى تفكر فى كلام "أمينة" .. ثرى أحزن حقاً لفراقها  
:؟! .. أم أن "أمينة" تهول الأمر؟! .. قال "مراد" بخفوت دون أن ينظر اليها  
كلى -

: بدأت فى تناول طعامها وهى مستغرقة فى التفكير .. فنظر اليها "مراد" قائلاً

كنتى عايزة تكلميني فى ايه -

: تذكرت "مريم" أمر "سهى" فقالت

- سهى "كلمتى النهاردة وقالتلى انها محتاجة تتكلم معايا ضرورى"

: بدا على "مراد" الإمتعاض .. فقالت بحماس

"أنا عارفه انها اتصرفت غلط .. بس أنا حسه انها محتجاني جمبها .. "سهى" -

مفيش فى حياتها صحبة كويسة تقدر تاخذ بايدها .. والديب مبيقدرش الا على

الغنة الشاردة عن القطيع

: نظر "مراد" اليها وبدا وكأنه اقتنع بكلامها وقال بحزم

طيب مفيش مشكلة .. بس هى اللى تجيلك هنا .. انتى ما تروحيلهاش -

: ابتسمت "مريم" قائله

خلاص تماما هقولها كدة .. متشكرة أوى -

: نظر اليها "مراد" للحظات وقال فجأة بحنان

انتى طيبة أوى على فكرة -

: شعرت "مريم" بالإحمرار يغزو وجنتيها وابتسمت وهى تنظر الى طبقها قائله

عادى يعنى -

: قال "مراد" وهو مازال ينظر اليها بحنان وابتسامه صغيره على شفثيه

لا مش عادى .. اللى بتعمليه مش عادى -

: قالن بتوتر دون أن تنظر اليه

أنا مبعملش حاجة -

: قال "مراد" بهدوء وهو ينظر اليها بإعجاب شديد

لا بتعملى .. بتهتمى بكل اللى حوالىكي .. وبتنغمسى فى مشاكلهم أكنها مشكلتك -

انتى .. وبتحبى الخير لكل الناس .. خاصة الناس اللى بتحبهم .. ولما بتحبى

بتخلصى أوى .. لدرجة صعب ان الواحد يلاقى زيها فى الزمن ده .. ولما

بتخلصى بتدى كل حاجة .. قلبك وعقلك ومشاعرك وكيانك كله .. وفى نفس

الوقت انتى حطه لنفسك خطوط حمرا كتير فى حياتك .. رغم انك عايشة لوحداك

ومفيش حد يحاسبك ومفيش حد يقولك الصح من الغلط .. أو يلومك لو عملتى

الغلط .. لكن انتى بفطرتك السليمة بتعرفى تميزى بين الصح والغلط .. وبتراعى

ربنا فى كل حاجة بتعملها .. ورغم انك وحيدة ومفيش حد معاكى .. بس دايماً

بتكونى قوية وواثقة من نفسك .. وبتعرفى تتحملى المسؤولية وانسانه يعتمد

وناجحة فى شغلك .. وفى نفس الوقت عارفه حدودك .. وعارفه انك .. عليها

يعنى رغم نجاحك وثقتك فى نفسك وقوة شخصيتك واعتمادك .. بنت مش راجل

بتقدرى تحسسى الى أدامك برجولته وبقوامته .. على نفسك الا انك أنثى بجد

عليكى

كانت وجنتيها تشتعلان خجلاً وتنظر الى طبقها وتلعب بعصبيه بالملعقة وهى لا

تستطيع النظر اليه .. أمرها عقلها بأن تستأذن وتنصرف .. لكن قلبها أمرها

بالبقاء .. فإمتثلت لأوامر هذا الأخير .. مرت لحظات صامته بيهما .. لا تستطيع

: أن ترفع نظرها اليه .. لحظات لم يقطعها الا صوته الحزين وهو يسألها

لسه بتحببيه ؟ -

خفق قلبها وهى تعرف معنى سؤاله .. شعرت بالحيرة .. بماذا تجيبه .. حثها

: قائلاً



مریم " بصیلي " -

: لم تفعل .. لم تستطع .. قال "مراد" بهدوء

- كان محظوظ أوى على فكرة .. انه لقی واحدة زیك وحبته وأخلصت له حتى -

بعد ما مات

: ثم تتم بحزن

الله یرحمه -

رفعت "مریم" رأسها ونظرت الیه ترقب تعبيرات الحزن على وجهه .. نظر

: الیها بحزن وسألها بألم

- اوصفی هولی یا "مریم" .. شخصيته أخلاقه طباعه .. كلميني عنه .. هو أخويا -

بس معرفش عنه أى حاجة .. ومش فاکر عنه غير لقطات بسيطة فى دماغی

واحنا صغیرين

شعرت "مریم" بالألم وهى تسمع نبرات صوته المتألمه .. شعرت بالحزن لأجله

: لحرمانه من أخوه دون سبب واضح .. فقالت بهدوء

- كان انسانه محترم .. ويعرف ربنا .. كان طيب .. وهادى .. وكان كل الناس -

بتحبه

: كان يتأملها وهى تتحدث عنه .. بدت شارده وهى تقول

- كان الأطفال قبل الكبار بیحبوه .. كان طيب مع كل الناس .. وقف جمبي كثير -

أوى .. وهى دى طبیعته .. كان بیحب یساعد الناس ویقف جمبهم

صمتت .. راقب "مراد" تعبيرات الحزن على وجهها متألماً من أجلها فقال

: بصوت متهدج

كان نفسي أقابله أوى -

: نظرت الیه "مریم" بأعين دامعه وهى تقول مبتسمه بضعف

كنت هتحبه -

: قال "مراد" وقد بدت الدموع فى عيناه

أکید كنت هحبه -

ظل ينظران الی بعضهما البعض وعیناهما تغشاها العبرات .. شعرت وكأنها

تتقاسم معه آلامها .. وشعر وكأنه يتقاسم معها آلامه .. امتدت يده من فوق

الطاولة تتلمس طريقها الی كفها لیحتضنه فى حنان .. لم تبعد عیناهما عن

بعضهما البعض لحظه .. شعرت "مریم" بالدهشة بداخلها .. نعم هى تنظر الی

ملاحم تشبه ملامح "ماجد" الى حد كبير .. لكنها لا ترى "ماجد" فى تلك الملامح .. وكان "ماجد" كان بملامح أخرى وشكل آخر .. وكأنهما لا يشبهان بعضهما البعض على الرغم من وجود هذا الشبه بالفعل .. شعرت بأنها .. تنظر .. الى رجل آخر تماماً .. ولدهشتها .. فهى تشعر بشعور عميق تجاه هذا الرجل الذى شعرت أنه لا يشبه أى رجل آخر قابلته فى حياتها .. تركته يحتضن كفها فى استسلام وعناه مركزتان عليها .. لكنها لمحت فى عينيه نظرة خوف و تردد "و ألم .. ثم .. أبعد يده عن كفها وأبعد عينيها عن عينيها .. شعرت "مريم بالحر ج .. وبالضيق من تغيره المفاجئ .. ودون كلمة .. نهضت لتغادر الغرفة

\*\*\*\*\*

: قالت "نرمين" فى دهشة

أحمد "ابن خالتي" -

: أوما "مراد" برأسه ثم أكمل قائلاً

بصراحة يا "نرمين" أنا شايف انه انسان مناسب وكمان عارفينه كويس -  
وعارفين أخلاقه .. يعنى بصراحة أنا شايف انه الشخص المناسب ليكي

: "صمتت "نرمين" فأكمل "مراد

بس طبعاً دى حياتك انتى .. انا ليا انى أنصحك واقولك رأيي بس مش ممكن -  
أفرضه عليكى لو كنتى انتى رفضاه أو مش حسه نحيتة بقبول .. لان الجواز أهم  
حاجة فيه القبول

: صمتت "نرمين" فحثها "مراد" قائلاً

ها يا "نرمين" .. هل انتى رفضاه رفض قاطع .. ولا فى قبول ومحتاجه فترة -  
تفكرى فى قرارك ؟

: قالت "نرمين" بخجل وهى تنظر أرضاً

سيبنى شوية أفكر يا أبية -

: ابتسم "مراد" وقبل جبينها قائلاً

ماشى يا "نرمين" فكرى براحتك .. واستخيري ربنا قبل كل شئ -  
أومات برأسها دون أن تنظر اليه وغادرت غرفة المكتب وأغلقت الباب خلفها  
وابتسامة سعادة تتكون على شفيتها ببطء

\*\*\*\*\*

: دخلت "مريم" المطبخ وابتسمت لـ "أمينة" قائلة

طنط "ناهد" والبنات عايزين نسكافيه يا دادة -

: ابتسمت "أمينة" وهي تعطيها صانية موضوع عليها فنجان شاى

طيب ادخلى دخلى دى لجوزك على ما أكون عملتكوا كلكوا النسكافيه -

: أخذت "مريم" الصينية وطرقت باب غرفة المكتب بتوتر سمعته يقول

اتفضلى -

دخلت "مريم" .. فنظر اليها بدهشة وهي حاملة صينية الشاى ظل يتابعها

بنظراته الى أن وضعتها بجانيه على مكتب .. لاحت ابتسامه صغيره على شفثيه

: .. همت بأن ترحل لكنه أوقفها قائلاً بخبث

مش هتصبيه ؟ .. مش اللي يقدم شاى لحد يصبهوله ويحطله السكر -

: ابتسمت "مريم" بخرج وصبت الشاى ثم سألته

أد ايه السكر -

: ابتسم لها قائلاً

اتنين -

وضعت السكر وقلبته ثم قدمت له الفنجان .. همت بالإنصراف لكنها عادت تلتفت

: اليه وتقول بخرج

سهى " هتجىلى بعد بكرة ان شاء الله " -

: قال بهدوء

تمام -

: التفتت لتغادر لكنه أوقفها بسؤال مفاجئ

الجواب اللي كان على السرير ده من "ماجد" مش كده ؟ -

: التفتت لتتظر اليه بدهشة .. فأكمل قائلاً

لما جتلك البيت عشان أخدمك وأنا بحط الشنطة على السرير شوفت جواب .. ده -

من "ماجد" مش كده

: شعرت بالإضطرب وقالت بصوت خافت

أيوة -

: أشاح بوجه وبدا عليه الجمود قائلاً

شكراً على الشاى -

: وقفت تنظر اليه فى حيرة .. قال "مراد" بحزم دون أن ينظر اليها

لو فى حاجة حابه تتكلمى فيها أجليها دلوقتى لانى مشغول -

: بلعت "مريم" ريقها بصعوبة وقالت بصوت خافت متوتر

أنا مفتحتوش -

: رفع "مراد" رأسه بحدده وأخذ يتفرس فيها .. فأكملت قائله

مفتحتش الجواب -

: ظل ينظر اليها للحظات وقد ضاقت عيناه .. ثم قال

ليه ؟ .. ليه مفتحتيهوش ؟ -

لم تستطع الإجابة ولم تستطع المكوث أكثر .. فغادرت الغرفة بسرعة وأغلقت الباب خلفها وهى تشعر بالغيظ من نفسها .. ما الذى دفعها لتخبره بأنها لم تقرأ خطاب "ماجد" .. لماذا فعلت ذلك .. أخذت تلوم نفسها بشدة .. وشعرت بالحنق .. خرجت لتجلس فى الحديقة وقد عقدت ما بين حاجبيها فى غضب وهى تتمتم  
غبية يا "مريم" .. غبية -

جلس "مراد" فى مكتبه شارداً .. اخذ يتساءل ما الذى منعها من قراءة خطابات ماجد" .. حبيبها .. الذى كانت تتألم لعدم استطاعتها قراءة خطاباته .. لقد .. .. تطلقها .. وحررها من قيده .. فلماذا لم تعود لقراءة تلك الخطابات مرة أخرى طالما الخطاب .. ما الذى منعها ؟ .. وما الذى دفعها لأن تخبره الآن أنها لم تقرأه أممكن أن .. كان على السرير اذن فلقد أخرجه لتقرأه .. ما الذى منعها إذن ؟ لكنه عقد ما بين .. .. ؟! .. لا غير ممكن .. كاد أن يجن من فرط التفكير كيف تفعل ذلك يا .. حاجبيه فى ضيق وقد انتبه الى أمر هام .. وأخذ يحدث نفسه "مراد" كيف سمح لك ضميرك لأن تفعل ذلك .. اعترف بأنك تحاول التقرب منها .. تحاول جذبها اليك .. لكن كيف تريد السيطرة على مشاعرها وهى لا تعلم حقيقتك .. "مريم" لا تعرف شيئاً عن اعاقتك .. كيف تقربها منك دون أن تخبرها الحقيقة .. كيف تحاول أن تعلق قلبها بك لتصدمها بعد ذلك بإعاقتك .. مراد" .. ؟ تجعلها "أحاول أن تضعها أمام الأمر الواقع ؟ .. أهذه رجوله يا كيف تفعل ذلك بها .. ب .. تحبك ثم تخبرها بأمر اعاقتك .. حتى تضمن ألا تترك

"مریم"؟! .. أخذ يلوم نفسه بشدة .. وهو يشعر بأنه أخطأ خطأ جثيماً عندما حاول التقرب اليها دون علمها بأمر اعاقته

\*\*\*\*\*

استيقظ "مراد" فزعاً على صوت صرخة مكتومة .. قفز من مكانه لينظر الى الجالسه في فراشها وجسدها ينتفض بقوة وتخفى وجهها بكفيها وتبكي "مریم" : .. اقترب منها "مراد" وجلس قبالتها وقال بهلع

مریم" فى ايه ؟ .. انتى كويسه" -

لم تجيبه "مریم" .. كانت تبكى وهى تخفى وجهها بكفيها .. فخنم أنها رأت كابوساً .. كانت تنتفض بشدة .. أحطاها بذراعيه وقربها الى حضنه دون مقاومة منها .. ضمها اليه بشدة ليوقف ارتجافتها وليبث فيها الطمأنينه .. قال بصوت

حانى :

متخافيش .. استعيذى بالله -

: تمت بصوت مرتجف وهى مازالت تخفى وجهها بكفيها

أعوذ بالله من الشيطان الرجيم -

ظلت ترددها كثيراً .. كانت تعلم بأنها يجب أن تبتعد عنه .. لكنها كانت تشعر مسح .. بأمان كبير لا تريد مفارقتة وحرمان نفسها منه .. هدأت شيئاً فشيئاً

: مراد" على شعرها وقال بحنان"

خلاص .. متخفيش .. تلاقىكي نسييتى تقولى الأذكار قبل ما تنامى -

: رفعت "مریم" رأسها ببطء لتبتعد عنه وقالت دون أن تنظر اليه

فعلاً نسييت أقولها النهاردة -

: مسح بكفيه العبرات التى تغرق وجهها وقال

لسه خايفه ؟ -

: هزت رأسها نفيماً ومازالت لا تستطيع النظر اليه .. فقال

طيب نامى وهصحىكى على الفجر -

: التفتت "مریم" ونظرت الى الساعه خلفها وقالت

لا هقوم اصلى قيام -

أزاحت الغطاء ونهضت وتوجهت الى الحمام .. نظرت فى المرآة الى وجهها

الباكى توضأت وخرجت وارتدت الإسدال .. نظر اليها "مراد" الجالس يقرأ فى

: مصحفه قائلاً بإهتمام

كويسه دلوقتى -

: قالت بصوت أكثر ثباتاً

أيوة الحمد لله -

: قال بإهتمام

متقوليش لحد اللى انتى حلمتى بيه طالما حلم وحش -

: قالت بخفوت

عارفه -

: قالت وهى تتوجه الى الباب

هصلى تحت -

: نهض بسرعة قائلاً

لا خليكى انتى هنا هقرأ أنا تحت -

: قالت "مريم" وهى تنظر اليه

- متصلى انت كمان .. احنا فى التلت الاخير من الليل متضيعش فضل القيام فى -

الوقت ده

: وقف أمامها وهو يبتسم لحرصها على ألا يفوته الأجر وقال لها

- على فكرة القيام مش شرط يكون صلاة .. القيام ممكن يكون قراءة قرآن أو -

دراسة علم شرعى أو حتى دعاء وذكر

: نظرت اليه بدهشة وقالت

بجد ؟ -

: أوما برأسه وقال وهو مازال محتفظاً بإبتسامته

أيوة بجد -

: ابتسمت قائله

مكنتش أعرف -

شعرت بالألفة وهى واقفة تتحدث معه ويبتسمان لبعضهما البعض .. فجأة تغيرت

ملامحه الى الجديه وغادر الغرفة مسرعاً .. تابعته "مريم" بعينيها وهى تحاول

أن تفهم ما الذى يحدث له ويجعله يتغير تجاهها فجأة .. أشعر بالذنب لكونها

كانت زوجة لأخيه الراحل .. أهذا ما يجعله ينأى بنفسه عنها .. أهذا ما يفصل

بينهما .. جلست على الأريكة وملامح الأسي على وجهها .. كيف لها هي الأخرى  
أن تنسى أنه شقيق زوجها الراحل .. كيف تسمح لنفسها بأن تشعر بشئ تجاهه  
: أخذ عقلها يلومها بشدة .. لكن قلبها قال لها ..  
لا تستمع الى عقلك أيها الجسد .. فأننا لا أفعل شئ يغضب ربك .. لا شئ يمنعنى -  
. من أن أحب هذا الرجل

\*\*\*\*\*

: "دخلت "مى" منزلها لتستقبلها والدتها بإبتسامه واسعة .. قالت "مى

السلام عليكم -

: قالت أمها بحماس

وعليكم السلام .. تعالى عايزاكى -

دخلت خلفها المطبخ وهى تلقى نظرها على والدها الجالس أمام التلفاز .. قالت

: لأمها

ايه يا ماما فى ايه ؟ -

: قالت أمها بحماس

جالك عريس -

: امتقع وجه "مى" وقالت ببرود

طيب -

: ثم التفتت ودخلت غرفتها .. دخلت أمها خلفها وأغلقت الباب وقالت

مالك مش فرحانه ليه -

: قالت "مى" بوجوم

عادى يعنى -

: اقتربت منها أمها وقالت

"مى" احنا مش قولنا نشيل الموضوع ده من دماغنا " -

: قالت "مى" بأعين دامعه

غضب عنى -

: قالت أمها

حبيبتي ممكن الراجل اللى جاى تقدملك ده يطلع أحسن من "طارق" ده -

مليون مرة .. اعدى معاه واتكلمى معاه وان شاء الله لو ليكي خير فيه أكيد ربنا

هيفتح قلبك ليه

: قالت "مى" بصوت باكى

مش عايزة يا ماما مش هقدر صدقيني -

: قالت أمها بإصرار

حبيبتي جربي مش هتخسرى .. مش بقولك وافقى عليه .. بقولك اعدى -

واتكلمى معاه

: صمتت "مى" حائرة فقالت أمها وهى تغادر الغرفة

اعملى حسابك انه هيبجى آخر الاسبوع ان شاء الله -

\*\*\*\*\*

شعرت "مريم" بتصرف "مراد" معها ببرود وبأنه يتحاشى النظر اليها أو الكلام معها .. أشعرها هذا بالضيق الشديد .. جلست مع الجميع على طاولة الطعام وهى شاردة تحاول تخمين ما يصيبه .. أحياناً تشعر بإهتمامه بها وبنظراته التى تقول الكثير وأحياناً تشعر أنه بعيد بارد .. كانت تشعر بالحيرة من

: "تغير معاملته ونظراته .. قالت "ناهد" بـ "مريم

كلى يا "مريم" مبتاكليش ليه -

: باتسمت "مريم" بضعف قائله

باكل يا طنط -

عادت لتكمل طعامها .. حانت منها التفاته لـ "مراد" لتجده منشغلاً بطعامه ..

: فأبعدت عينيها عنه .. قالت "نرمين" بمرح

ايوة كدة رجعتى وسطينا تانى يا "مريم" .. كنا بجد مفتقدينك أوى -

: ابتسمت "مريم" قائله

أنا كمان افتقدتكوا أوى -

: قالت "نرمين" بخبث

طيب مين أكثر حد فينا افتقدتية -

: فهمت "مريم" تلميح "نرمين" فارتبطت قائله

انتوا كللكوا -



: ضحت "نرمين" بخبث وقالت

ماشى هفوتها المرة دى -

: نهض "مراد" فجأة فقالت "ناهد" باستنكار

مش هتكمل أكلك -

: قال ببرود

شبعت -

رمقته "مريم" وهو ينصرف وهى تشعر بالحيرة والغضب فى آن واحد

فى المساء كانت "مريم" جالسه فى غرفة "سارة" تتحدثان وتتمازحان .. ثم

: قالت "سارة" مبتسمه

نفسى نعد نتكلم مع بعض للصبح -

: "قالت "مريم

احنا فيها -

: قالت "سارة" بحماس

- بجد مش بهزر .. تعالى نسهر سوا النهاردة لانى جبت لعبة بازل انما ايه -

هتعجبك جدا

: قالت "مريم" بحماس

هاتيها بسرعة شوقتينى -

: قالت "سارة" وهى تشير الى دولابها

طلعيها من الدولاب على ما أخلى داده تعملنا نسكافيه -

: قالت "مريم" وهى تنزجه للباب

لا خليكي انتى زمانها نايمه هعمله أنا -

خرجت "مريم" من الغرفة وهمت بالنزول لتتلاقى بـ "مراد" الذى كان يصعد

: الى غرفته .. تحاشت النظر اليه وهى تنزل فأوقفها قائلاً

مفيش حد تحت كلهم طلوعوا يناموا -

: التفتت اليه وقالت ببرود

عارفه .. أنا نازله اعمل نسكافيه ليا ولد "سارة" عشان هنسهر سوا -

: قال "مراد" وهو ينظر لساعته

تسهروا أكثر من كدة -

: قالت بنفس البرود

أيوه .. واحتمال أنام فى أوضتها كمان .. فرصة تاخذ راحتك فى أوضتك -  
النهاردة

قالت ذلك ثم نزلت الى الأسفل ونظراته النارية تتابعها .. دخل "مراد" غرفته  
وبدل ملابسه وافترش الأريكة للنوم .. قضى ساعة ونصف من الأرق الى ان  
أزاح الغطاء وجلس على الأريكة .. أخذ ينظر الى السرير الخالى .. شعر بأنه  
يفتقد وجودها معه .. بالرغم من أنه لا يفصل بينهما إلا جدار واحد الا أنه يشعر  
بأنها بعيدة عنه أميال .. شعر بالضيق وهو يتذكر قولها بأنها ستقضى الليل فى  
.. غرفة "سارة" .. هو يريد هنا .. فى غرفته .. وعلى فراشه .. يتأملها نائمة  
يطمنن لكونها بجواره .. ماذا لو رأت كابوساً آخر .. يريد أن يكون بجوارها  
. يهدئها كما فعل بالأمس

كانت "مريم" جالسه مع "سارة" تمزحان وهما يكملان الأحجية أمامهما ..  
: عندما دق الباب .. فتحت "سارة" وسمعتها "مريم" تقول  
أبيه -

التفتت "مريم" بسرعة تنظر الى "مراد" الواقف على الباب .. كان الفتاتان  
: تنظران اليه فقال لـ "مريم" بهدوء  
تعالى يا "مريم" عايزك -

ثم غادر .. قامت "مريم" وهى تتساعل عما يريد .. توجهت خلفه الى غرفته  
وأغلق الباب .. انتظرت أن يتحدث لكنها وجدته يزيح الغطاء عن الأريكة وينام  
: اقتربت منه وقالت فى دهشة .. عليها

خير .. كنت عايزنى فى ايه ؟ -

: أشار الى الفراش برأسه قائلاً

نامى كفاية سهر -

: ثم أشاح بوجهه .. فقالت بعناد

مش عايزة أنام هروح أكمل لعب مع "سارة" ولو حببت أنام هبقى أنام معاها -  
: التفتت لتغادر لكنها قام وجذبها من ذراعها قائلاً بحده

ازاى يعنى تنامى معاها "سارة" تقول ايه المفروض اننا متجوزين -

: قالت بتحدى

- عادى يعنى مش شرط كل اتنين متجوزين يناموا مع بعض كل يوم .. عادى -

"يعني أما أنام مع "سارة"

: قال بحزم

لا مش عادى .. قوليلها انك عايزة تنامى واتفضلى تعالى نامى -

: قالت بعناد وهى تعقد ذراعيها أمام صدرها

مش عايزة أنام دلوقتى ايه هتيني غصب عنى -

تبدلت نظراته من الحزم الى اللين .. لانت ملامحه وبدا وكأنه يعاني من صراعاً  
لماذا هو خائف .. كبيراً بداخله .. رأت فى عينيه خوف وألم وودت لو تعلم سببهما  
.. مما هو متألم .. شعرت بأنه يخفى شيئاً بداخله .. شيئاً كبيراً يعذبه .. بدا وكأنه  
تعب من النقاش .. أو مما يدور فى عقله .. التفت وتوجه الى الأريكة وتمدد  
عليها وأولها ظهره .. مرت لحظات وهى واقفة تنظر اليه ثم غادرت الغرفة  
وأغلفت الباب خلفها .. تنهد "مراد" وهو يغمض عينيه فى ألم .. كان يتمنى  
وجودها بجواره .. لكن وجودها بجواره يعذبه .. كان يشعر بخوف شديد ..  
يعلم أن .. خوف من اخبارها بأمر اعاقته .. شعر بأنه لن يتحمل خسارتها  
سمع باب .. الوضع لن يستمر هكذا .. وعليه التحدث .. لكنه يجد صعوبة فى ذلك  
تمددت .. الغرفة يفتح ويغلق مرة أخرى .. سمع صوت السرير وهى تجلس عليه  
""مريم" ونامت ووضعت رأسها على وسادتها وهى تنظر الى ظهر "مراد"  
ويأخذها .. النائم .. ابتسم "مراد" رغباً عنه .. شعر بأنه يريد التوجه اليها الآن  
.. ويرجوها ألا تغادر حياته .. بين ذراعيه .. ويخبرها بأنها أحلى ما فى حياته  
لكنه لم يستطع .. التفت لينظر اليها .. فوجد أنظارها معلقة به .. تلاقت نظراتهما  
وكلاهما نائماً فى مكانه .. شعرت وهى تنظر اليه بأنه مصدر آمانها و أمنها ..  
بمجرد ذكر اسمه .. شعر بالحنان يملء .. تشعر بالطمأنينه بمجرد سماع صوته  
معها يشعر بقلبه ينبض كما لم ينبض من قبل .. قلبه .. ويفتت قسوته شيئاً فشيئاً  
ظلت أنظارهما معلقة ببعضهما البعض .. الى أن غلبها النعاس ونامت .. ..  
وآخر صورة رآها كل منهما .. هى صورة الآخر .. وبعدها بلحظات نام هو

## الفصل الرابع والعشرون

جلست "مريم" فى حديقة الفيلا فى انتظار قدوم "سهى" .. التفتت الى البوابة لترى سيارة أجرة تتوقف أمامها .. دقت النظر لترى فتاة تعبر البوابة فى شعرت بالدهشة ونهضت من مكانها وذهبت فى اتجاهها .. طريقها الى الداخل وقفت "مريم" أمام "سهى" تنظر الى العباءة .. وهى مندهشة تلاقت الفتاتان والى الحجاب الطويل الذى ترتديه فوقها وتخفى به .. المحتشمة التى ترتديها .. شعرها كله .. تأملت ملامحها التى ظهرت بريئة بدون أى أصباغ صناعية

: ابتسمت "سهى" وقالت

اتصدمتى مش كده -

: ابتسمت "مريم" واقتربت منها معانقة اياها وقالت

بصراحة أيوة -

: ثم ابتعدت خطوة لتتأمل اليها مرة أخرى بإمعان قائله

ايه التغيير ده -

: قالت "سهى" مبتسمة

تعالى نعد وبعدين نتكلم -

توجهتا الى الحديقة وجلستا على أحد المقاعد الكبيرة .. نظرت "مريم" الى

: "سهى" مبتسمة وهى تقول

ما شاء الله شكلك حلو أوى يا "سهى" بجد وشك منور -

: ابتسمت "سهى" وقالت

الحمد لله .. كنت عارفه انك هتشجعيني .. خفت أتكلم مع حد تانى غيرك -

يحبطنى ويرجعنى لوره

: "قالت" مريم

بس ايه التغيير ده .. ايه اللى خلاكى تاخدى الخطوة دى -

: تنهدت "سهى" وقالت بحزن

للأسف ربنا بعثلى رسائل كثير بس مكنتش بفهمها .. او كنت بفهمها -

وبطنشها .. لحد ما حصل اللى حصل .. كان أدامى ساعتها حلين .. إما انى

أفوق وأرجع لربنا .. وإما انى استمر فى الغلط وحياتى تتدمر أكثر ما هى

: نظرت الى "مريم" قائله

وقررت أفوق -

: ابتسمت "مريم" بسعادة وقالت بحماس

"ما شاء الله .. ربنا يثبتك يا "سهى" -

: قالت "سهى" وقد تجمعت العبرات فى عينيها

مريم" انا جتلك عشان محتاجه اتكلم معاكى .. محتاجه أسمع منك كلام " -

يطمنى

: قالت "مريم" بقلق

"خير يا "سهى" -

: قالت "سهى" والعبرات تتساقط من عينيها

سامر" رفض انه يتجوزنى " -

: شعرت "مريم" بالأسى من أجلها فأكملت "سهى" بألم

أنا خلاص مش هطلب منه حاجه .. أنا هطلب من ربنا بس .. مش هطلب -

تانى أى حاجة من أى انسان .. بس يا "مريم" أنا مش عارفه حياتى هتكون

مش عارفه أعمل ايه .. انا قررت مردش على "سامر" أبداً .. عاملة ازاي

بس أنا مش عارفه .. انا كده ضعت .. ريحيني يا "مريم" .. .. مهما اتصل بيا

محتاجه أسمع كلام يريحنى شوية .. يحسنى ان فى أمل .. يحسنى ان ربنا

معايا .. يحسنى انى مش هضيع .. يحسنى انى هبقى كويسة .. ان ربنا

ممكن يسامحنى

: شعرت "مريم" بألم "سهى" وبمدى معاناتها .. فقالت بحنان

سهى" يا حبيبتي المفروض متيأسيش من رحمة ربنا أبداً .. كل واحد فينا " -

بيغلط .. بس لازم نصلح الغط ده ومنتما داش فيه .. وده الى انتى عملتية

دلوقتي .. عملتى وقفة مع نفسك وغيرتى الحاجه اللى غلط فى لبسك وشكك

وفى تصرفاتك .. وبدأتى تقربي من ربنا أكثر وتهتمى ايه بيرضيه وايه بيغضبه

صدقيني يا "سهى" لو فضلتي كده مستحيل ربنا يضيعك أبداً .. طول ما ..

انتى مع ربنا مستحيل تخسري .. بس لو ربنا ابتلاكى اعرفى انه بيبتليكي

عشان يمتحن صبرك وقوة ايمانك .. عشان يمتحن توبتك هل .. عشان يختبرك

هى فعلاً صادقة ومن قلبك ولا لأ .. اعرفى ان ربنا هيرزقك باللى فيه الخير

ليكي .. انتى شايفه ان جوازك من "سامر" هو الخير .. بس انتى متعرفيش ..

يمكن جوازك منه شر وربنا بيصرفه عنك .. أو ربنا بيمتحنك زى ما قولتلك ..

المهم دلوقتي انك فعلا تكونى توبتى بجد .. وتغيري من نفسك بجد .. وتعرفى ان ربنا هو اللى بيأيدك كل شئ .. بيأيدك قلب "سامر" .. ويأيدك قلوب البشر دى كلها .. يقدر يقلبهم زى ما هو عايز .. اطلبى منه هو .. متطلبيش من انسان وخليكي واثقه ان ربنا مش هيضيعك طالما لجأتيله .. طالما .. ضعيف زيك رجعتيله وسلمتيله أمرك .. طالما هترضى باللى كاتبهولك أى ان كان ايه هو .. وانتي مش هتخسري .. وخليكي واثقه فيه يا "سهى" .. .. سلمى نفسك ليه واثقه انه أحن وأرحم من الأم بابنها .. خلي عندك حسن ظن فى ربنا .. ربنا بيقول "أنا عند حسن ظن عبدى بي" .. أحسنى الظن فى ربنا .. وربنا سبحانه وتعالى هيكون عند حسن ظنك بيه

تنهدت "سهى" فى ارتياح وعلامات الراحة على وجهها وهى تستمع الى مريم" التى نزلت عليها برداً تبرداً نار قلبها .. نظرت اليها وقالت "كلمات : مبتسمه

بجد أنا بحبك أوى يا "مريم" .. ريحتى قلبي بكلامك ربنا يريح قلبك -

: ابتسمت "مريم" وعانقتها قائله

و انا بحبك أوى يا "سهى" .. وأتمنى أشوفك فى أحسن حال -

: ابتعدت عنها "سهى" وقالت بلهفه

ادعيلى يا "مريم" ادعيلى ان ربنا يهديني ويقبل توبتى -

: ابتسمت "مريم" وقالت

حاضر يا حبيبتي .. هدعيلك من قلبي -

\*\*\*\*\*

دخل "حامد" مكتبه وهو يحمل بيده ورقة بدت له فى غاية الأهمية مذيلة بأحد

: الأرقام .. اتصل بالرقم المكتوب فرد عليه صاحب الرقم

ألوو -

: "قال" حامد

"ألو .. "حسن" بيه "المنفلوطى" -

: "قال" حسن

ايوه أنى .. ميين بيتكلم -

: قال "حامد" وهو يرجع ظهره الى الوراء ويضع ساقاً فوق ساق

- أنا واحد هيقدملك خدمة عمرك -  
: صاح "حسن" بعصبية  
خدمة اييه ؟ .. وانت ميين ؟ -  
: قال "حامد" وعيناه تلمعان خبثاً  
انا مين مش مهم .. أما خدمة ايه أقولك .. ايه رأيك أوصلك لـ "مراد خيري -  
الهوري" ؟  
: ساد الصمت للحظات قبل أن يقطعه "حسن" قائلاً  
انت بتعرفه ؟ -  
: "قال" حامد  
أيوة أعرفه .. أعرفه كويس أوى -  
: قال "حسن" بشك  
وانت ايه مصلحتك في اكده -  
قال "حامد" وقد تبدلت تعبيرات وجهه لتشى بحقد دفين وهو يتلمس أسنانه  
: الصناعية ويتذكر يوم تهجم "مراد" عليه في المكتب  
عشان عايز أنتقم منه .. وعشان عايز أشيله من طريقي تماماً -  
: قال "حسن" بحماس  
جولى عايز كام وآنى أذفهملك فوراً و كاش -  
: قال "حامد" بابتسامه خبيثه  
لا مش عايز فلوس .. زى ما قولت دى مجرد خدمه .. والباقي عليك -  
: قال "حسن" بلهفه  
جولى الأاجيه فين -  
: قال "حامد" والشرر يتطاير من عينيه  
هقولك -

\*\*\*\*\*

- كانت "مريم" تجلس بمفردها فى الحديقة بعد رحيل "سهى" فإقترب منها  
: "مراد" قائلاً  
مريم" ممكن نتكلم شويه" -  
: التفتت اليه بسرعة و قالت

أبوة افضل -

: جلس بجوارها وترك مسافة بينهما .. نظرت اليه وقالت بقلق

خير فى حاجة حصلت ؟ -

: نظر اليها "مراد" قائلاً

انتى كنتى عارفه ان "جمال" ابن عمى اتجوز "صباح" عمك ؟ -

: قالت "مريم" يهدوء

أبوة عارفه -

: قال "مراد" وهو يتفرس فيها

وعارفه اتجوزوا ليه ؟ -

: قالت "مريم" بحيرة

يعنى ايه اتجوزوا ليه ؟ -

: قال "مراد" مستفهماً

انتى عرفتى ايه بالظبط ؟ -

: قالت باستغراب

- عرفت انهم اتجوزوا بس .. تيته اللى قالتلى واتصلت بـ "صباح" باركتلها .. -

ليه بتسأل السؤال ده

تنهد "مراد" فى أسى ثم قص عليها أن "صباح" هى من أطلقت النار على  
وأنها هى من أوقعت بها ليحقق "جمال" انتقامه .. شعرت "مريم" ""جمال

: بالصدمة وقالت بعدم تصديق

معقول .. معقول "صباح" تعمل فيا كده .. ده أنا بنت أخوها -

: ثم نظرت اليه قائله

مين قالك الكلام ده -

: قال "مراد" بحنق

"عمى اللى قالى .. ومن ساعتها وأنا قرфан أتصل بـ "جمال" -

غشت عينيها العبرات وهى تشعر بالألم لتلك الخيانة التى تعرضت لها من أقرب

: الناس اليها .. قال "مراد" بندم شديد

أنا آسف يا "مريم" .. ظلمتك أوى وقسيت عليكى أوى .. أنا آسف بجد -

: نظرت اليه "مريم" والعبرات فى عينيها .. فأكمل قائلاً بألم

- لو كان فى أى حاجة اقدر أعملها عشان أكفر بيها عن كلامى ليكي ومعاملتى -



ليكي قوليلي وأنا أعملها

: قالت "مريم" وهي تحاول منع عبراتها من السقوط

- أنا مش زعلنه منك .. انت معذور مكنتش تعرف .. كان مستحيل يبجي فى -

بالك اللى حصل ده .. زى ما هو مستحيل كان يبجي فى بالى

: ثم قالت بدهشة ممزوجة بالألم

- بس ليه ابن عمك يعمل فيا كده وهو ميعرفنيش ؟ -

: تنهد "مراد" قائلاً

- عمتى الله يرحمها قالتلى انه عمل كده عشان ينتقم .. وانه بيصفى حساب -

قديم

: قالت "مريم" بدهشة

- حساب ايه ؟ -

: قال "مراد" بحيره

- معرفش .. صدقيني معرفش .. بس أكيد حاجه تخص المشاكل اللى كانت بين -

العيلتين زمان

صمتا وكل منهما غارق فى تفكيره .. رأت "مريم" حمامة حطت على غصن

شجرة وهى تحرك جناحاً واحداً أما الآخر فيبدو أن به خطباً ما .. حاولت

الطيران فوقعت من على الغصن لتسقط على الأرض .. هبت "مريم" مسرعة

ينظر اليها .. رآها تمسك بالحمامة وتحتضنها بين يديها "اليها و" مراد

مراد" وتوجه تجاهها ليجدها تمسح بأصابعها على "وتقربها منها .. وقف

: رفعت رأسها لتتنظر الى "مراد" قائله بأسى .. رأس الحمامة فى حنان

جناحها شكله فى مشكلة .. مش عارفه تطير -

أخذت "مريم" تمسح عليها بأصابعها و "مراد" ينظر اليها متأملاً .. قالت

: "مريم"

- أعمل ايه ؟ -

: قال "مراد" بحيرة

- مش عارفه -

: قالت "مريم" وهى تشعر بالأسى لأجلها

- هدخل أشوف أى حاجة عشان أأكلها ممكن تكون جعانه .. وبعدين نشوف -

دكتور بيطري أو نوديتها محل عصافير أكيد اللى بيبيع هيكون فاهم

: ابتسم "مراد" ونظر اليها بحنان قائلاً

شكلك بتحبي الحمام أوى -

: قالت "مريم" وهى تتأمل جناح الحمامه باهتمام

لا أنا أول مرة أمسك حمامه .. بس صعبت عليا عشان جناحها مكسور ومش -  
قادره تطير

اختفت ابتسامه "مراد" ليحل محلها الوجوم .. ثرى كيف سيكون رد فعلها ان  
أخبرها بإعاقته .. أستشفق عليه مثلما أشفقت على تلك الحمامة .. لا وألف لا  
لن يتقبل منها أى شفقه .. لن يسمح لها بالشعور بالشفقة من أجله .. آخر ..  
ما يريد منها هو شفقتها .. نظرت اليه "مريم" وقالت كمن تذكرت شيئاً هاماً

:

صحيح كنت عايزة أزور وحدة قريبتى فى دار المسنين -

: أفاق "مراد" من شروده وسألها

تقربلك ايه ؟ -

شعرت "مريم" بالتوتر واحترت أتخبره أم لا .. فقال "مراد" وهو يتفرس فيها

:

أنا سألتك لانك قولتلى قبل كده انك ملكيش قرايب هنا -

: تلعثت "مريم" وهى تقول

ليا قريبة واحدة بس -

: أعاد "مراد" سؤاله

تقربلك ايه ؟ -

: قاطعهما صوت "نرمين" التى أقبلت نحوهما تقول

يلا يا جماعة الأكل جاهز ومستنيينكوا على السفرة -

حمدت "مريم" ربها على قدوم "نرمين" الذى أنقذها من سؤال "مراد" .. فلم  
.. تكن تتوقع أن يسألها هذا السؤال .. وهى ليست مستعدة لإخباره الحقيقة بعد

لأنها لا تستطيع النبؤ برد فعله ان علم .. سبقتهما "مريم" الى الداخل وهى

"تحمل الحمامه فى يدها .. التفتت "نرمين" لتدخل هى الأخرى فأوقفها "مراد"

: قائلاً

نرمين" .. فكرت فى الموضوع اللى كلمتك فيه" -

: ارتبكت "نرمين" واحمرت وجنتاها خجلاً .. واسرعت الى الداخل وهى تقول

ماما هتقولك ردى يا أبية -

ابتسم "مراد" وقد توقع موافقتها .. التف الجميع حول طاولة الطعام مبتسمين

: لبعضهما البعض .. قالت "مريم" بحزن

لقيت حمامه يا عيني جناحها مكسور فى الجنية وقعت من على الشجرة -

مكنتش عارفه تطير

: قالت "سارة" بتأثر

يا حرام -

: "قالت "ناهد

وبعدين ؟ طارت -

: "قالت "مريم

لا مش عارفه تطير خدتها المطبخ وحطتها أكل -

: قالت "نرمين" فجأة بحماس

- صحيح ما قولتكوش .. النهاردة وأنا فى الجامعة .. قالوا ان ادارة الجامعة

عاملة دورة فى الإسعافات الأولية واشتركت فيها

: ابتسمت "مريم" قائله

- أنا كمان كنت اشتركت فى دورة زى دى لما كنت فى الكلية -

: ابتسمت "نرمين" قائله

بجد ؟ -

: أومأت "مريم" برأسها وقالت

- أيوه .. مفيدة على فكرة وبيدوكى شهادة فى نهاية الدورة بعد ما بتحلى

الإمتحان

: قالت "نرمين" بحماس

- عرفت فعلاً ان فى امتحان .. أكيد هيبقى نظرى بس مش كدة ؟ -

: قالت "مريم" وهى تتناولى طعامها

لا .. عملى ونظرى -

: قالت "نرمين" بدهشة

ازاى يعنى عملى ؟ -

: قالت "مريم" شارحه

- الفصل بتاع التنفس الصناعى بيكون عملى -

: توقف "مراد" عن تناول طعامه ثم التفت الى "مريم" قائلاً بحده  
ازاي يعني عملى .. انتى امتحنوكى عملى فى التنفس الصناعى ؟ -  
نظرت اليه "مريم" لترى نظرة غاضبة فى عينيه .. تساءلت فى نفسها .. أهذه  
: غيره ؟ .. أم أنها تتوهم ذلك .. قالت بهدوء  
على مانىكان -

هدأت حدة نظراته .. وأشاح بوجهه يكمل طعامه .. التقت نظراته مع نظرات  
.. ناهد" الجالسه فى المقعد المقابل له .. فنظرت اليه مبتسمه بخبث شديد"  
: فأشاح بوجهه عنها هى الأخرى .. قالت "نرمين" مستفهمه  
انتى يا "مريم" فصيلة دمك ايه ؟ -

: "قالت "مريم

-AB

: قالت "نرمين" بمرح

زى ماما A ما شاء الله احنا مجمعين فى بيتنا كل أنواع فصائل الدم .. انا -  
AB "وانتى يا "مريم .. B "و "مراد .. O "وبابا .. و "سارة  
سقطت الملعقة من يد "مريم" فى طبقها لتصدر صوتاً عالياً .. نظر اليها  
الجميع فآدارت بعينيها فى وجوههم .. بدا وكأنها رأت شبحاً أمامها .. كان يبدو  
: عليها الصدمة .. الرعب .. الخوف .. الحيرة .. سألتها "سارة" باهتمام  
انتى كويسة يا "مريم" ؟ -

: حاولت التحدث فخرج صوتها مرتعشاً وقالت

أيوه بس شبعت .. بعد اذنكوا -

نهضت "مريم" وغادرت مسرعة .. وأخذ "مراد" يتابعها حتى اختفت وقد  
. ضاقت عيناه

صعدت "مريم" الى غرفة "مراد" وأغلقت الباب خلفها ووقفت خلفه يعلو  
صوت تنفسها .. كيف .. كيف ذلك .. من غير الممكن أن تكون فصيلة دم  
B وهو A هذا غير معقول .. من غير المعقول أن يكون أبواه .. B "مراد"  
هذا مستحيل .. بل من رابع المستحيلات .. اذن فـ "ناهد" ليست أمه .. ليست  
أم "مراد" .. أخذ عقلها يعمل بسرعة جنونية .. من أم "مراد" اذن ؟ .. هل  
والده تزوج من ثلاث نساء .. "ناهد" و "زهرة" و "من المعقول أن "خيري

أم .....؟! .. توجهت مسرعة الى الدولاب .. "امرأة أخرى هي أم "مراد وأخرجت منه حقيبتها فتحتها بأيدي مرتجفه وأخرجت منها قسيمة زواجها .. أخذت تنظر اليها بلهفة حتى توقفت عند نقطة ما .. فاتبعت عيناها دهشة ووضعت كفها على فمها تكتم صيحة الدهشة التي خرجت رغباً عنها .. انفتح اقترب منها فأخذت تنظر اليه .. مراد " خلفها "الباب فجأة فالتفت لتجد وعيناها متسعان على آخرهما وهي تمسك بيدها قسيمة الزواج .. نقل "مراد" : بصره من القسيمة اليها وقال

فى ايه يا "مريم" ؟ .. مالك ؟ -

لم تستطع التحدث .. هربت الكلمات منها .. اقترب "مراد" أكثر وأخذ الورقة : من يدها ونظر اليها ثم رفع نظره فى حيرة قائلاً : قسيمة جوازنا -

: قالت "مريم" بصوت مرتجف وهي تمعن النظر اليه

انت .. انت توأم "ماجد" ؟ -

نظر اليها يرقب تعبيرات وجهها .. فأخذت القسيمة منه بعصبية وأشارت الى : تاريخ ميلاده وقالت بعصبية

.. تاريخ ميلادك .. نفس تاريخ ميلاده -

: ثم أشارت الى اسم الأم وقالت بصوت مرتجف

"واسم الأم واحد .. "زهرة" -

: ثم نظرت اليه وقالت بحيرة ودهشة وصدمة

انت توأمه ؟ .. انت توأمه مش كده ؟ -

: كانت تعبيرات "مراد" هادئة .. قال

أيوه توأمه -

شعرت "مريم" بالصدمة وهي تسمع هذا الاعتراف منه .. أخذت تحاول استعاب

: ما يحدث وما تكتشفه .. قالت بحده

ليه ما قولتليش .. ليه خبيت عليا ؟ -

: قال "مراد" بحيره

أنا مخبتش عليكى .. انا كنت فاكرك عارفه -

: تمتت "مريم" بحده ومازالت عيناها تتسعان من الصدمة

هعرف منين ؟ .. هعرف منين يعني ان طنط "ناهد" مش مامتك .. وانك توأم -

..... "ماجد" .. وان

: صمتت ثم قالت بألم

وان ماما "زهرة" تبقى مامتك -

: نظر اليها "مراد" متفرساً وقال بدهشة

ماما "زهرة" ؟ -

تزايدت سرعة تنفسه وسرعة ضربات قلبه أمسكها من ذراعيها بعنف وهو

: يقول

مريم" .. فى ايه قوليلى .. ليه بتقولى ماما "زهرة" .. ليه بتقولى ماما ؟" -

: نظرت اليه "مريم" بألم ودموعها تتساقط على وجنتيها وهى تقول

- أنا مش فاهمة حاجة .. أنا مبقتش فاهمة حاجة .. انت ازاي تسبب مامتك كده -

.. ازاي سايبها كده ؟

: قال "مراد" بحده وعيناه تملأهما الحيرة والخوف

يعني ايه سايبها كده .. ماما متوفيه من زمان -

: اتسعت عيناها دهشة وهى تصيح قائله

- مين اللي فهمك كده .. قالولك أخوك مات .. وكمان ان مامتك ماتت ؟!! .. ليه -

كذبوا عليك كده

: قال "مراد" وهو يشعر وكأن الدنيا تدور به

"تقصدى ايه يا "مريم" -

: هتفت "مريم" بغضب وألم ودموعها تتساقط

"مامتك عايشه فى دار مسنين يا "مراد" -

وقع الخبر على رأس "مراد" كالصاعقة .. ظل ينظر الى "مريم" غير مصدقاً

أخذ صدره يعلو ويهبط بسرعة وكأنه كان يبذل مجهوداً شاقاً .. اعاد كلماتها ..

: ليستطيع اتيعابها

ماما عايشة فى دار مسنين -

: قالت ودموعها تبلل وجنتها

- حرام عليهم ليه حرموك منها وحرموها منك -

: قال "مراد" بغضب

ليه ما قولتليش .. من أول ما جيتي هنا وانتى عارفه انى أخوه .. ليه ما -

قولتليش ان ماما عايشه

: هتفت بإستنكار

أيوة عارفه انك أخوه بس معرفش انك توأمه .. افكرت انكوا اخوات بالأب -  
بس .. لو كنت أعرف أكيد كنت قولتلك .. بس متخيلتش أبداً انكوا تكونوا توأم

: صمتت قليلاً ثم قالت بإهتمام

وطنط "ناهد" عارفه انك مش ابنها -

: قال "مراد" وقد بدأ يفيق من صدمته

أيوة عارفه طبعاً -

: جذبها من ذراعها الى الدولاب وقال بلهفه

البسى بسرعة .. عايز أروحها حالاً -

: خرجا معاً وذهبا الى دار المسنين .. قالت له "مريم" وهى تقف خارج الغرفة  
مراد" خليني أدخلها الأول لوحدي .. ماما "زهرة" تعبانه .. صدمة موت " -  
ماجد" كانت كبيرة أوى عليها .. وانت نسخة منه .. سيبنى أتكلم بس معاها "

الأول

: أوما "مراد" برأسه ايجابا وقال بصوت متهدج

ماشى ادخليلها انتى الأول .. بس متأخريش عليا -

شعرت "مريم" بلهفته عينينه تعبيرات وجهه لملاقة أمه .. أمه التى حُرِم منها  
سنين طويلة .. دخلت "مريم" الى غرفة "زهرة" .. لتجدها جالسها فى فراشها  
: والمرافقة تطعمها بيدها .. اقتربت منها مقبلة رأسها ويديها وقالت

حبيبتي ماما "زهرة" عاملة ايه دلوقتي -

التفتت اليها "زهرة" مبتسمه وهى تتطلع اليها .. جلست "مريم" أمامها على

: الفراش واتسعت ابنتسامتها قائله

ما شاء الله حساكي بقيتي أحسن من الأول بكثير -

أومات "زهرة" برأسها ايجابا وهى مازالت محتفظة بابتسامتها .. قالت لها

: "مريم" وهى تمسح على شعرها فى حنان

ماما فى عندي ليكي مفاجأة .. مفاجأة مكنتيش تتوقعيها -

نظرت اليها "زهرة" بإستغراب تحاول تخمين المفاجأة .. فقالت "مريم"

: بحماس وهى ترقب تعبيرات وجهها

"ماجد" كان له أخ توأم مش كده ؟ .. "مراد" -

ظهرت صحابه حزن فى عيني "زهرة" وتوقفت عن الأكل .. ثم نظرت الى  
بدهشة وألم .. وعيناها تسألانها كيف عرفت بأمر توأم "ماجد" ... ""مريم

: بتأثر وبحنان بالغ "قالت "مريم

تحبي تشوفيه .. تشوفى "مراد" ابنك -

اتسعت عينا "زهرة" ونطقت ملامحها بالهفة .. وهى تتطلع على "مريم" ..

: ابتسمت "مريم" والعبرات فى عينيها وهى تقول

هو معايا بره .. أدخلهولك تشوفيه ؟ -

التفتت "زهرة" بحدته الى باب الغرفة المغلق وكأنها تريد اختراقه لتصل الى  
ابنها .. "مراد" .. ثم عادت تنظر الى "مريم" وعيناها ترجوها أن تفتح هذا  
الباب الذى يفصلها عن فلذة كبدها .. قامت "مريم" وفتحت باب الغرفة وقالت

: "مراد" -

تعالى -

شعر "مراد" بقلبه يخفق بجنون .. اقترب من الغرفة شيئاً فشيئاً وتوقف أمام  
وعيناها .. الباب .. أخذ ينظر الى تلك المرأة النحيلة التى تتوسط الفراش  
.. تتطلعان اليه بلهفة وشوق وحب وألم وعذاب وحنين والدموع تبلل عينيها

.. أخذ يلهث وهو يتطلع اليها .. ويحتويها بعينه بلهفه مماثلة للهفتها

.. تساقطت العبرات من عينيها وهى تتطلع اليه وترجوه أن يقترب

منها وجلس أمامها .. وقد بدأت العبرات تعرف طريقها الى عينيها "اقترب" مراد

أخذ كل منهما يتطلع الى وجه الآخر وكأنه يعوض شوق وحرمان السنين ..

مريم" تراقبهما والعبرات تغرق وجهها .. أطبقت "زهرة" "الماضية" .. وقفت

على شفيتها لتوقف ارتجافتها .. وكأنها لم تعد تحتل بعده عنها قيد انمله لفت

يديها حول عنقه وجذبتة اليها بلهفه .. لفت "مراد" ذراعيه حولها يضمها الى

وقد أغمض عينيها لتتساقط العبرات منهما .. تعالت "شهقات" "زهرة" وهى

تضمه اليها بقوة خشية أن تُحرم منه مرة أخرى .. أخذ جسدها النحيل يرتجف

: قبل كتفها و شعرها وقال بصوت متهدج .. بين ذراعيه من شدة البكاء

ثم .. "أبعدت رأسها لتتنظر اليه بلهفه وهى تسمعه لأول مرة ينطق بكلمة "ماما

تعالت شهقاتها مرة أخرى وهى تحتضن وجهه بكفيها وعيونها تنظر الى كل

ملمح من ملامحه بشوق ولهفه .. احتضن هو الآخر وجهها بين كفيه وقبل

: جبينها مرات عدة وقال بصوت مرتجف



مش مصدق انى شوفتك وانى فى حضنك .. مش مصدق انك عايشه -

: ثم صاح بألم

ياااه اشتقتك أوى .. كنتى بتيجي فى أحلامى كتير .. كان نفسي أشوفك -  
وأتكلم معاكى وأرمى نفسي فى حضنك .. كان نفسي أشوفك أوى يا أمى  
ابتسمت "زهرة" من بين دموعها وحاولت التحدث فلم تستطع .. التفت "مراد"  
: الى "مريم" يمسح العبرات التى تساقطت على وجهه وقال لها بلهفه  
هى مبتكلمش ؟ -

: قالت "مريم" من بين دموعها بصوت مرتجف

لأ .. من يوم ما عرفت ان "ماجد" مريض وهى مبتكلمش -

: ثم قالت بحماس

بس أنا واثقة ان صحتها هتتحسن -

التفت لتجلس أمام "زهرة" على الفراش من الجهة الأخرى وقالت لها مبتسمه  
: بحماس

"مش كده يا ماما .. مش انتى هتتحسنى بعد ما شوفتى "مراد" -

ابتسمت لها "زهرة" وأومات برأسها وجذبتها فى حضنها تقبل رأسها .. فعلت  
: "مريم" المثل وقبلت رأسها ويدها قائله

ربنا يخليكى لينا يا ماما وميحرمناش منك أبداً -

نظر "مراد" مبتسماً الى العلاقة التى تجمع "مريم" بأمه .. والتفت الإثنان  
تنظران اليه مبتسمتان .. شعر وهو ينظر اليهما بأنهما أغلى امرأتين فى حياته  
: .. قام "مراد" وقال بلهفه

عايز أقابل مديرة الدار .. لازم أنقل ماما عندى فى الفيلا مستحيل أسببها هنا -  
أبدأ

ابتسمت "زهرة" وهى تنظر اليه بتأثر وقد اغرورقت عيناها بالعبرات مرة  
أخرى

خرج "مراد" ليتحدث مع مديرة الدار التى اشترطت وجود مرافقه مع والدته  
لتلبية طلباتها وعلاجها .. عاد "مراد" الى أمه بلهفه وجلس أمامها قائلاً  
: بإبتسامه واسعة

.. أمى حبيبتي .. خلاص اتكلمت مع مديرة الدار وهاخدك من هنا النهاردة -  
بس هروح الأول أرتب مكان اقامتك وأجيب عربية اسعاف تنقلك من هنا ..

مش هتأخر عليكي .. ماشى  
ابتسمت "زهرة" وهى تجذبه لها لتحضنه مرة أخرى .. قبل رأسها والتفت الى  
: "مريم" قائلاً بحماس  
مريم "تعالى معايا" -  
: قبل أن تنهض "قالت "مريم" لـ "زهرة  
ماما متقلقيش هنرجعك تانى -

ابتسمت لها "زهرة" .. فغادر الإثنان الغرفة .. خرجا من الدار .. توقفت  
مريم" تراقب السيارات ليعبرا الطريق الى سيارة "مراد" التى أوقفها على "  
الجانب الآخر .. فجأة شعرت بيده وهى تتلمس الطريق الى يدها .. التفتت تنظر  
اليه بسرعة .. رأت فى عينيه نظرة حانية .. و .. نظرة حب .. خفق لها قلبها  
بقوة .. شبك أصابعه بين أصابع يدها و احكم قبضته عليها يحتضن كفها فى  
وكأنه يعدها بحياة .. كفه بقوة وكأنه يعدها بأن يظلا متلازمين طيلة العمر  
ورغماً عنها .. بادلته نظرة .. مشتركة بينهما لا يستطيع أن يفرقهما أحد  
بنظرة .. ووعد بوعد .. ابتسم "مراد" لها وابتسمت له .. عبرا الطريق بأيدى  
متشابكة الى أن أوصلها للسيارة وفتح لها الباب جلست ومازالت أيديهما  
متشابكة وقف أمامها وكأنه لا يريد ترك يدها .. نظر حوله يتفقد ان كان يراها  
أحد .. ثم انحنى ليطبع قبلة حانية على كفها .. ورمقها بنظرة حانية قبل أن  
يترك يدها ويغلق الباب .. شعرت "مريم" بقلبها يقفز فرحاً .. جلس بجوارها  
امتدت يده .. فى السيارة كانت تبتسم لا ارادياً وهى لا تستطيع النظر اليه خجلاً  
.وانطلق بسيارته وهو يشعر بسعادة كبيرة تغمر قلبه .. لتمسك يدها الاخرى

\*\*\*\*\*

استقبل الجميع خير وجود "زهرة" على قيد الحياة بصدمة شديدة .. واضطر  
مراد" الى اخبار أختاه بأن "مريم" كانت خطيبة أخوه التوأم الذى لم يكن يعلم "  
أنه مازال على قيد الحياة .. انفرد "مراد" بـ "ناهد" وسألها قائلاً وهو يعنى  
: النظر اليها

ماما .. انا عارف ان ممكن الموضوع يكون صعب عليكي .. بس أنا مستحيل -  
أسيب أمى مرميه فى دار مسنين .. إما انى أجيبها تعيش معنا هنا .. وإما انى

أسكنها فى مكان تانى

: صمت قليلاً ثم قال

بس مش هقدر اسيبها عايشة لوحده .. وهعيش معاها هناك -

: كانت "ناهد" تستمع اليه صامته .. اقترب "مراد" منها وأمسك ذراعيها قائلاً

انتى أمى .. اللى ربنتى وكبرتى وعلمتى لحد ما بقيت راجل .. وأفضالك عليا -

ملهاش حصر .. عمرك ما حسستينى انك مش أمى اللى ولدتنى .. عمرك ما

فرقتى فى المعاملة بينى وبين اخواتى البنات .. عمرى ما حسيت للحظة انك

مراة أب .. كنتى فعلاً أمى ومازلتى أمى وهتفضلى أمى على طول

اغرورقت عينا "ناهد" بالعبرات وهى تنظر اليه .. ثم أجهشت فى البكاء

: فعانقها "مراد" وقبل رأسها .. ثم نظر اليها قائلاً

بس .. اللى هتقولى عليه هعمله .. شوفى ايه اللى يريحك وأنا هعمله يا ماما -

مقدرش أسيب أمى فى دار مسنين .. مستحيل مبقاش راجل لو عملت كده

: كفكت "ناهد" دموعها وقالت وهى تنظر اليه

لو مكنتش قولت كده مكنتش هتبقى "مراد" اللى ربته وكبرته وعلمته لحد -

ما بقى راجل .. دى أمك يا ابنى .. ليها حق فيك زى ما أنا ليا حق فيك .. هى

اللى ولدت وأنا اللى رببت .. ومش ممكن أبداً أحطك فى اختيار بينى وبينها

: أخذت نفساً عميقاً ثم قالت

- هاتها تعيش معنا هنا .. كفاية اللى شافته فى حياتها .. وانها اتحرمت منك

طول السنين دى .. من حقها تعيش مع ابنها اللى اتحرمت منه

: عانقها "مراد" وابتسم بسعادة قائلاً

ربنا يخليكى ليا يا ماما كنت واثق ان قلبك كبير -

ابتسمت "ناهد" وهى تشعر بالسعادة لسعادة ابنها .. فمضى الكثير من الوقت

.الذى لم ترى فيه "مراد" سعيداً بهذا الشكل

\*\*\*\*\*

بعد منتصف الليل وبعدما نام الجميع وقفت تناجى ربها وتتساقط دموعها على

سجادة الصلاة وهى ساجدة .. تبكى بحرقة وينتفض جسدها ألماً وندماً .. أخذت

تلهج بالدعاء وبالاستغفار .. ترجوه ولا ترجو سواه .. وقفت بين يديه الى أن

.. شعرت بالآلام تشتد فى قدميها .. لكنها كانت آلام لذيذة لأنها فى سبيل طاعة  
شعرت وكأنها تُغسل من ذنوبها و من آلامها ومن عذابها .. شعرت وكأنها تولد  
شعرت .. من جديد .. فتاة أخرى .. بقلب آخر .. بروح أخرى .. بجسد آخر  
وكانها .. بأن اليوم هو يوم ميلادها .. وكانها لم تعش قط .. وكانها لم تحيا قط  
اليوم فقط .. علمت معنى الحياة .. أنهت "سهى" صلاتها وأمسكت مصحفها  
.. وظلت تتلو من كتاب الله .. كلما قرأت آيات العذاب استعادت منها وبكت  
وكلمها قرأت آيات النعيم استبشرت بها ودعت .. أغلقت مصحفها عندما سمعت  
آذان الفجر يتردد فى المسجد القريب .. أغمضت عينيها وهى تسمع ذلك النداء  
الذى كانت تصم آذانها عنه طيلة أعوام طويلة .. ها هى الآن تسمعه بقلبها قبل  
أذنها .. وتستشعره بكل حواسها .. فتحت عينيها عندما انتهى المؤذن وقفت  
لتصلى بلهفة وشوق .. وأخذ قلبها ينبض بقوة وكانها على ميعاد يقفز قلبها  
: لهفه له .. رفعت كفيها وقالت من أعماق قلبها  
.الله أكبر -

\*\*\*\*\*

استيقظت "مريم" فجراً لتجد الأريكة فارغة .. خرجت وتوجهت الى الغرفة التى  
خصصها "مراد" لـ "زهرة" فسمعت صوته بالداخل .. طرقت الباب برفق ..  
: فتح الباب مبتسماً لها .. ابتسمت له قائلة  
جيت أطمئن عليها -

أفسح لها "مراد" المجال للدخول .. دخلت "مريم" لتجد "زهرة" جالسه على  
"الفراش ووجهها يشع نوراً وسعادة .. فتحت لها ذراعيها فاقتربت منها "مريم  
وألقت بنفسها بين ذراعيها .. مسحت "زهرة" على شعرها وهى تنظر الى  
: مبتسماً .. فقال بمرح ""مراد

أنا بصراحة بدأت أشك أنا اللى ابنك ولا هى -

: قالت "مريم" بدلع وهى تنظر اليه

ماما "زهرة" دى حبيبتي -

: ثم رفعت رأسها ونظرت اليها قائلة

مش كده يا ماما -

أومأت "زهرة" برأسها فنظرت "مريم" الى "مراد" بتحدى .. فعقد ذراعيه

: "أمام صدره وقال له "زهرة

يعني أطلع منها أنا -

.. مدت له يدها فأقبل تجاهها في الجانب المقابل له "مريم" وعانقته هو الآخر  
أحاطت "مريم" بذراع و "مراد" بذراع وهي تنظر الى السماء والعبرات في  
عينها لتحمد الله عز وجل .. شعرت "مريم" بالخرج لاقتربها من "مراد" الى  
"هذا الحد .. كانت نظراته مركزة عليها مبتسماً أبعدت نفسها من حضن "زهرة  
: وقالت لهما ..

هروح أصلى الفجر -

.. قبل أن تنصرف .. حضرت الممرضة التي أحضرها "مراد" لملازمة والدته  
: وخصص لها غرفة بجوار غرفة "أمينة" .. قال "مراد" للممرضة بإهتمام  
ده معاد الدوا -

: قالت الممرضة مبتسمة

أيوة يا فندم -

: قال "مراد" بتأكيد

وخلال .. ركزى فى مواعيد الدوا كويس .. تاخدها كلها فى معادها وبيانتظام -  
يومين ان شاء الله هدخلها المستشفى تعمل تشيك أب كامل .. بس لحد ما ده  
يحصل استمرى على الأدوية اللي وصفها دكتور الدار  
: ابتسمت وقالت برقة

حضرتك تؤمر -

"شعرت "مريم" بالحنق الشديد من الطريقة التي تنظر بها الممرضة الى "مراد  
ومن تبسمها الدائم فى وجهه .. غادرت الغرفة فى ضيق .. نظر "مراد" الى  
مريم" التي غادرت بعصبيه ملحوظة .. دخلت "مريم" غرفة "مراد" "  
وتوضأت وهي تستعيذ بالله من الشيطان .. أنهت من صلاة الفجر وجلست  
مكانها تغلى من الغضب .. لقد انتبهت لابتسامات الممرضة ونظراتها وركزت  
معها الى درجة أنها لم تنتبه إذا كان "مراد" بادلها اياهما أم لا .. دخل "مراد"  
غرفته بعدما عاد من صلاة الفجر .. قامت "مريم" وطوت السجادة وخلعت  
اسدالها وتوجهت الى الفراش .. تابعها "مراد" وهو يرى العصبية فى  
: تصرفاتها فسألها قائلاً

فى حاجة مضايكاكى يا "مريم" ؟ -

: قالت "مريم" وهي تفرد الغطاء على السرير بعنف دون أن تنظر اليه

لا وأنا ايه اللي هيضايقتى -

: اقترب منها قائلاً

بس حاسس ان فى حاجه مضايقاكى -

: جلست فى الفراش وتدثرت بالغطاء وهي تقول بغيظ

كنت فاكراك هتهتم بمامتك أكثر من كده -

: قال "مراد" بدهشة

قوليلى أنا قصرت معاها فى ايه .. تقصدى موضوع التشيك أب اللي أجلتته -

ليومين .. أنا كان قصدى انى أدور على أحسن مستشفى واحسن دكاتره فى

جميع التخصصات عشان هى مش حقل تجارب كل دكتور يكتبها علاج شكل

فلازم أوديتها عند دكاترة ممتاة كل واحد فى تخصصه

: قالت "مريم" بعصبيه وهي تنظر اليه بحده

أنا مش بتكلم عن كده -

: قال "مراد" بدهشة

أمال بتتكلّمى عن ايه ؟ -

: قالت بعصبيه

- رايح جاييلها حتت ممرضة صغيرة وواضح أوى ان معندهاش خبرة فى أى

حاجة أنا مش عارفه انت اخترتها ازاي

: قال "مراد" باستغراب وهو يعنى النظر اليها

- أنا مخترتهاش أنا طلبت من واحد صحبى دكتور انه يرشلى ممرضة كويسة -

ومقيمة وهو بعتهالى .. وبعدين ايه اللي عملته غلط فهميني ؟

: قالت "مريم" بحده

- دى متنفّش ممرضة أصلا -

صمت "مراد" وهو يتطلع اليها والى وجهها الذى تشوبه حمرة الغضب ..

تحولت نظراته الى الخبث وظهرت ابتسامه صغيرة على زاوية فمه وهو يقول

:

- مفيش مشكلة .. بكرة الصبح هتكلم تانى مع صحبى وأخليه يبعثلى واحدة -

كبيرة فى السن وخبرة

: صمتت "مريم" وقد هدأت عصبيتها .. فابتسم بخبث قائلاً

كويس كده ؟ -

نظرت اليه لترتطم عيناها بنظرات عينيه الضاحكة وابتسامته الخبيثة .. احمرت  
: وجنتاها بشدة وتمتمت بصوت خافت

تصبح على خير -

نامت وأولته ظهرها .. وقف مكانه للحظات ثم اقترب منها وانتفضت عندما  
وجدته ينحنى ليقبل رأسها .. تسارعت خفقات قلبها وظلت مكانها كما هي ..  
مراد" النور وتوجه الى أريكته ونام عليها والابتسامه على شفثيه .. "أغلق  
شرد بخياله وهو يشعر بالتلذذ من غيرتها التي لمسها فى كلامها ونبرة صوتها  
ونظرات عينينها .. كانت ابتسامتها تملو شفثيها هى الأخرى .. لكن سرعان ما  
اختفت تلك الإبتسامه ليحل محلها العبوس وأخذت تتسائل فى نفسها .. أيجبها  
حقاً ؟ .. إن كان يحبها بالفعل فلما لا يعترف بذلك؟! .. لكن السؤال ظل فى  
رأسها بلا إجابة .

## الفصل الخامس والعشرون

استيقظ "مراد" من نومه ونظر الى "مريم" النائمة وهو جالس على الأريكة  
عزم أمره على اخبارها بكل شئ عن اعاقته وعن زواجه السابق .. اليوم ..  
سيخبرها بكل شئ وليكن ما يكون .. لن يتحمل هذا البعد أكثر .. إن أرادت أن  
تخرج من حياته فلتخرج لن يجبرها على البقاء ولن يرجوها لتبقى .. يعلم أن  
فى هذا عذاب شديد له .. لكنه أرحم من عذاب قربها وبعدها فى نفس الوقت ..  
إما أن تكون له .. أو لا تكون .. دخل الحمام ليأخذ دشاً وأخذ يفكر .. نعم عزم  
أمره واتخذ قراره بمصارحتها بكل شئ .. لكنه يعلم جيداً أن هذا العزم وهذا  
الإصرار لا يمنع قلبه من الخفقان خوفاً .. بنظرة واحدة منها إما أن يكسبها  
للأبد وإما أن يخسرها للأبد .. لن يرحمها ان رأى نظرة شفقة واحدة فى عينها

.. أو نظرة نفور .. كلاهما يبغضه .. كلاهما يقتله .. كلاهما يرفضه ..  
الأولى رآها كثيراً فى عيون "ناهد" و أختيه وأصدقائه والممرضات فى  
حتى قرر ألا يدع أبداً أحداً يراه بدون ساقه الصناعية .. مهما .. المستشفى  
كان ومهما حدث .. لم يسمح لأحد أبداً منذ أن خرج من المستشفى أن يراه  
.. معاقاً .. عاجزاً .. لا يستطيع الحركة بدون ساقه الصناعية .. ناقصاً  
والنظرة الثانية رآها فى عين زوجته السابقة .. النفور .. لم تكن نظرة .. بل  
خنجرأ انغمس داخل قلبه .. لتسيل منه كل دمانه وتسقط أرضاً دون أن تأبى لها  
.. لن يتحمل رؤية أى من تلك النظرتين فى عيني "مريم" .. ان فعلت  
فسيلفظها لفظاً خارج حياته وللأبد .. ظل يتمنى شيئاً واحداً .. ألا يرى أى  
منهما فى عينيها .. الشفقة .. و النفور

\*\*\*\*\*

: قالت "سارة" لـ "نرمين" على طاولة الطعام  
لسه لحد دلوقتى مش قادرة أصدق ان مامه "مراد" عايشة -  
: فقالت "نرمين" باستغراب شديد  
ليه بابا الله يرحمه قالنا وقاله انها ماتت وان أخوه كمان مات ؟ -  
: قالت "سارة" بدهشة  
وكم ان مش قادرة اصدق ان "مريم" كانت مرأة أخو "مراد" التوأم .. قصة -  
ولا فى الأحلام  
: قالت "نرمين" متسائله  
يا ترى ماما مضايقة من وجود مامه "مراد" هنا ؟ -  
: قالت "سارة" بسرعة  
لا طبعا انتى مش عارفه ماما ولا ايه -  
: ثم قالت بأسى  
وكم انتى شافيه حالها عامل ازاي .. صعبانه عليا اوى انها مبتتكلمش .. -  
"مريم" بتقول ان ده حصلها بعد وفاة أخو "مراد"  
: قالت "نرمين" بحزن  
زمان "مراد" زعلان عشانها اوى .. بس أكيد فى نفس الوقت فرحان انه -  
شافها



\*\*\*\*\*

استيقظت "مريم" ورأت "مراد" خارجاً من الحمام يحمل منشفته ابتسم لها  
قائلاً :

صباح الخير يا كسلانه -

: ابتسمت بصعوبة وقالت

مش عارفه ليه حسه أكن حد كان بيضربنى طول الليل -

: وقال .. انفجر "مراد" ضاحكاً

برى يا بيه .. مجتش جبمك -

ضحكت هى الأخرى وقامت متكاسلة .. أوقفها "مراد" قائلاً وبدا عليه القلق  
وقال :

مريم" عايز أتكلم معاكى النهاردة فى حاجة مهمة" -

: ظهرت علامات الجدية على وجهها وقالت

أنا كمان عايزة أكلمك فى موضوع مهم -

: قال "مراد" باهتمام

عايزة تقولى ايه -

: سمعت طرقات دادة "أمينة" على الباب وهى تقول

"الفطار يا سي "مراد" -

: قالت "مريم" بسرعة وهى تدخل الحمام

نفطر وبعدين نتكلم -

وقفت "مريم" تنظر الى نفسها فى المرآة وهى تشعر بتوتر بالغ .. كيف  
كيف سيتقبل الأمر .. ثرى ماذا سيكون رد فعله .. كان الأمر أهون .. ستخبره  
حينما كانت تظن أن "زهرة" والدة "ماجد" فقط .. وأنها بالنسبة له زوجة أبيه  
.. أما وأنها والدته .. فقد إزدادت خوفاً على خوف .. لكن يجب اخباره .. لا حل  
.. أمامها سوى اخباره بكل شئ .. فليظن ما يظن .. لم يخطئ أحداً فى شئ  
ستخبره وليكن ما يكون

\*\*\*\*\*

انتهوا من تناول افطارهم وصعد "مراد" للإطمئنان على أمه .. جلس معها بعض الوقت ثم خرج ليبحث عن "مريم" .. قال فى نفسه يجب أن أنهى هذا لن أنتظر أكثر .. صعدت "مريم" لتبحث عن "مراد" .. يجب .. الأمر الآن اخباره بما تخفيه عنه .. "زهرة" لا تتكلم لكن "مريم" تتكلم .. ويجب أن يعلم .. تقابلا فى أعلى السلم .. وكل منهما يبحث عن الآخر .. ليخبره بالسر الذى نظر كل منهما الى الآخر بقلق وتوتر وخوف .. خوف من .. يورق مضجعه الخسارة .. خوف من أن تتبدل الأمور .. خوف من أن تتبدل المشاعر .. تحدث :

: "مراد" أولاً وقال

تعالى فى المكتب -

نزلت "مريم" معه وتوجها الى المكتب .. اغلق الباب ووقفا قبالة بعضهما كل منهما ينتظر من الآخر أن يتحدث أولاً .. لتقل رهبته قليلاً .. قال .. البعض :

: "مراد"

ابدأى انتى يا "مريم" .. كنتى عايزه تقولىلى ايه -

: شعرت بالتوتر وبدا عليها الإرتباك .. فحثها "مراد" قائلاً

خير يا "مريم" .. اتكلمى -

بلعت "مريم" ريقها بعصوبة .. ثم قالت وكأنها تريد ازاحة حمل ثقيل عن

: كتفيها

فى حاجة كنت مخبياها عنك .. بس صدقتى لو كنت أعرف ان ماما "زهرة" - مامتك كنت قولتهالك من الأول .. لكن أنا مكنتش مدركه ان الموضوع هيخصك أوى كده وان ماما "زهرة" تبقى مامتك

: قال لها بقلق

فى ايه يا "مريم" .. اتكلمى -

: قالت "مريم" وهى تنظر اليه لتتبين رد فعله

..... ماما "زهرة" .. تبقى -

: نظر اليها بامعان قائلاً

تبقى ايه ؟ -

: تنهدت ثم قالت

تبقى مراة بابا الله يرحمه -

اتسعت عينا "مراد" دهشة .. حاول أن يستوعب ما قالت .. سألها وهو

: مصدوم

ماما كانت متجوزة باباكي انتى ؟ .. "خيري" اللي قتل وهرب -

: قال "مريم" بحدده

- بابا مقتلش حد .. مش بابا اللي قتل -

: صمت "مراد" قليلا ثم قال بحزم

- مفيش داعى نفتح الموضوع ده لانى عارف كويس أوى ان مش بابا اللي قتل -

.. وان باباكي هو اللي قتل

: صاحت "مريم" بغضب

- بابا مقتلش حد .. فاهم .. بابا مقتلش حد -

قالت ذلك ثم غادرت المكتب دون أن تنتظر سماع ما يريد قوله

خرجت "مريم" الى الحديقة وجلست فيها وهى تشعر وكأن الدنيا تنهار حولها

وهى لا تستطيع فعل شئ لمنعه هذا الانهيار .. شعرت بالحنق والضيق من

النبش فى الماضى خاصة ان كان مؤلماً .. تنهدت فى ضيق وهى تتذكر اتهام

"مراد" لوالدها بالقتل .. تجمعت العبرات فى عينيها وهى تتذكر والدها الحانى

التقى الطيب الذى لا يترك فرضاً والذى يشهد الناس له بحسن الدين والخلق ..

لا يمكن أن يقتل .. لا يمكن .. اقترب منها "مراد" وجلس بجوارها .. نظرت

: اليه بعتاب ثم أشاحت بوجهها فى حده .. قال "مراد" بحنق

- أنا آسف يا "مريم" .. مش قصدى أعيب فى والدك الله يرحمه .. أنا عارف -

انك كنتى بتحببيه أوى .. مكنش قصدى اشوه صورته أدامك

: نظرت اليه "مريم" بحدده وقالت

- انت مشوهتش صورته أدامى ومحدش يقدر يشوه صورتى أدامى لانى عرفاه -

كويس .. وعارفه انه مستحيل يعمل كده

: نظر اليها "مراد" بغضب وقال

- وأنا عارف بابا كويس .. مستحيل بابا يقتل -

: قالت "مريم" بحزم

- وأنا متهمتش باباك بحاجه .. كل اللي قولته ان بابا مقتلش .. لكن انت اتهمت -

بابا بالقتل .. أنا ما أسأتش الظن فى باباك لانى معروفش .. لكن انت أسأت

الظن فى بابا رغم انك متعرفوش ومتعرفش أى حاجه عنه

: تنهد "مراد" قائلاً مصداقاً على كلامها

فعلاً معاكى حق .. مكنش لازم أقول اللي قولته .. مش عشان أدافع عن بابا -

يبقى أتهم باباكي

: هدأت "مريم" قليلاً .. فالتفت اليها "مراد" وقال مرة أخرى بصوت منخفض

أنا آسف يا "مريم" متزعليش منى -

نظرت اليه "مريم" ومازال شئ من الضيق فى عينيها .. فنظر اليها بحنان

: قائلاً

محبش أشوفك مضايقه -

اختفى فجأة كل الضيق من عينيها لتبتسم وتنظر أرضاً .. التفت "مراد" تجاهها

وامتدت أصابعه لتلعب بخصلات شعرها .. رفعت رأسها لتتنظر اليه .. وودت أن

ودت أن يخبرها بكل مشاعره تجاهها .. وودت أن يؤكد لها ما تراه .. يتحدث

كانت عيناه تشعان حباً وحناناً .. شعرت بأن داخل هذا الرجل الذى .. فى عينيها

يبدو عليه الغلظة والقسوة يوجد بحر من الحنان .. وودت لو غرقت فيه .. للأبد

..

: اقترب منها وقال بصوت متهدج

..... مريم" .. أنا" -

بدا .. نظرت اليه تنتظر بلهفه ما يريد قوله .. بدا وكأنه يعانى صراعاً بداخله

: الخوف فى عينيها .. وودت لو علمت سبب هذا الخوف .. حثته قائله

انت ايه ؟ -

: قال "مراد" بصعوبه وهو خائف من خسارتها

فى حاجة عنى لازم تعرفيها -

: صمت قليلاً ثم قال

هما حاجتين مش حاجة واحدة -

: نظرت اليه "مريم" وقالت برقه

ايه هما ؟ -

: نظر اليها "مراد" بحنان ومسح بيده على شعرها برقه قائلاً

أنا كنت متجوز قبل كدة -

لم تخبره "مريم" بأنها علمت ذلك من دادة "أمنية" .. تركته يكمل حديثه قائلاً

:

واطلقنا من ٦ سنين -

نظرت اليه دون أن تتحدث كان يراقب تعبيرات وجهها ونظرات عينيها ..

: شجعه هدونها ونظراتها المشجعه على المواصلة فقال

هى اللى طلبت الطلاق .. ومكنش فى حد فى حياتى قبلها .. ولا بعدها -

: صمت للحظة ثم احتواها بعينيه قائلاً بحنان

لحد من فترة قريبة .. فى واحدة قدرت تحرك قلبي نحيثها .. بعد ما كنت فاكِر -

انه خلاص مات ومفيش حاجه تقدر تحركه

تعالى صوت دقات قلبها حتى كادت أن تسمعه بأذنيها .. صمتت وقد احمرت

: وجنتاها .. انتظرت أن يكمل كلامه .. قال "مراد" بتوتر

..... مريم" .. الحاجة الثانية اللى عايزك تعرفيها" -

أمسك بكفها يحتضنه بين كفيه .. رأت صدره يعلو ويهبط من سرعة تنفسه ..

وبدا عليه الوجوم والإضطراب .. ضم كفها بين كفيه يحتضنه بقوة .. كما لو

كان يخشى أن ينزلق هذا الكف من بين يديه مبتعداً بعدما يخبرها بأمر اعاقته

.. كانت كل ذرة فيه تهمس .. لا تتركنى لن أحتمل بعدك ليس ذنبي ما أصابنى

لست أنا من قدر أن أصاب بهذا .. اعاقتى لا تعوقنى عن ممارسة حياتى بشكل

طبيعي .. لن تخجلى منى بين صديقاتك .. لن تشعري بأننى مختلف عن أى

رجل آخر .. فقط جزء من جسدى مبتور .. لم أرد بتره .. لكن الله أراد .. ساقى

الصناعية تحل محل الجزء المبتور .. لن تشعري بالنقص معى .. لن تسيري

من يرانى لا يعرف بأمر اعاقتى .. لا يعرف بأن قدمى .. معى وأنتِ خجلة منى

مبتور .. ليس ذنبي فلا تعاقبيني .. لا تحرميني منك .. لا تنظري الى بشفقه

لست فى حاجة الى شفقتك بل أنا فى أمس الحاجة الى حبك وحنانك الى

مشاركتك لحياتى الى انجاب اولاد منك الى تكوين أسرة معك الى أن تكونى

مريم" أنتى آخر أمل لى فى أن أحب "سكنى وأكون سكنك .. لا تتركيني يا

مريم" لن أفتح قلبي لسواكى .. لا "وأحب كأى رجل عادى .. لن أحب غيرك يا

تطعيني مثلما فعلت زوجتى السابقة ومثلما فعلت من تقدمت لها ومثلما فعلت

كل من عرفت بإعاقتى .. كوني دوائى يا مريم ولا تكونى سبباً فى زيادة آلامى

بداخلى حب كبير لك فلا تتخلى .. وأحزانى .. لن أحتمل بعدك فلا تحرميني منك

لم يحبك رجل مثلما أحبك .. كوني .. عنه وعنى .. لن يحبك رجل مثلما أحبك

لى زوجة وحببية ورفيقة طريقى .. وسأعطيكى قلبي عمرى وكل ما أملك

.. تكلم بقلبه دون أن يجرؤ على قول تلك الكلمات بلسانه .. شعرت "مريم" به وبمعاناته .. ودت لو علمت بسببها .. ودت لو طمأنته .. ودت لو علمت همه وما يورقه .. نظرت اليه .. فى انتظار أن يتكلم .. أن يبثها نجواه .. نظر اليها يتأملها .. نظر اليها ليعلم كيف سيكون رد فعلها .. كيف ستنظر اليه .. ماذا سيرى فى أعماق عينيها .. فتح فمه ليتحدث .. فقاطعه صوت "نرمين" التى تقول :

أبيه أبيه .. طنط "زهرة" اتكلمت -

: هب "مراد" و "مريم" واقفين .. قال "مراد" بلهفه  
بجد اتكلمت ؟ -

: قالت "نرمين" مبتسمة

(أبوة كنت أعدة معاها .. وفجأة لقيتها بتقولى (مراد -

ابتسمت "مريم" بسعادة وأسرع ثلاثتهم فى اتجاه غرفة "زهرة" .. جلس

: "مراد" بجوارها على الفراش وأخذ ينظر اليها بلهفه قائلاً

ماما انتى قولتى اسمى ؟ .. ناديتى عليا -

: ابتسمت "زهرة" وقالت بصعوبة وبصوت أجش للغاية

"مراد" -

: ثم قالت

ولدى -

ابتسم "مراد" وعانقها عناقاً طويلاً وهو يقبل رأسها ويديها .. اغرقت عبرات  
الجميع بالدموع .. ابتسمت "مريم" وسط دموعها واقتربت من "زهرة" قائله

:

"ماما" زهرة -

: التفتت اليها "زهرة" قائله بنفس الصوت الأجش

مريم "بنييتى" -

كانت سعادة "مريم" غامرة وهى تستمع الى اسمها من بين شفتى "زهرة" ..  
وكانت ايضاً سعادة "مراد" لا توصف .. فى هذه اللحظة دخلت "ناهد" وهى

: تقول بلهفه

فى ايه يا ولاد .. ليه كنتوا طالعين بتجروا كده ؟ -

: قالت "نرمين" مبتسمة

طنط "زهرة" اتكلمت -

: ابتسمت "ناهد" واقتربت منها قائلة

- حمدالله على سلامتک -

: قالت لها "زهرة" بصوتها الاجش

- الله يسلمک -

: ثم التفتت الى "مراد" تسأله

- مين ؟ -

: نظر "مراد" الى "ناهد" ثم الى "زهرة" وقال

- دى أمى اللى ربتنى .. مرأة بابا الله يرحمه -

التفتت "زهرة" تنظر الى "ناهد" تطلعت المرأتان الى بعضهما البعض .. ثم

: تنهدت "زهرة" وقالت

- الله يرحمه ويرحم جميع أمواتنا -

: "قالت "ناهد"

- اللهم آمين -

: التفتت "زهرة" الى "مراد" قائلة بصوت متعب مبجوح

- بدى أتحدث معاك كثير يا ولدى -

: قبل "مراد" يدها قائلاً

- وأنا نفسي أتكلم معاكى كثير أوى يا أمى -

: ثم قال بحنان

- بس ارتاحى دلوقتى وان شاء الله بكرة هنروح المستشفى عشان بس نطمئن -

وان شاء الله لما نرجع نتكلم مع بعض زى ما انتى عايزه .. المهم .. عليكى

عندى صحتك دلوقتى

: قالت "زهرة" وهى تغمض عينيها شاعره بالوهن

- ماشى يا ولدى .. ربنا يباركلى فيك -

\*\*\*\*\*

كانت سهى فى عملها .. عندما رن هاتفها .. نظرت لتجد المتصل "سامر" ..

أغلقت فى وجهه .. و فتحت الهاتف بعصبية وأخذت الشريحة كسرتها الى

نصفين ثم ألقتهما فى سلة المهملات .. وظلت تستغفر ربها .. و "مى" ترمقها  
بنظرات حانية وتدعو لها فى سرها بالثبات

: عادت "مى" الى بيتها لتستقبلها والدتها بلهفه قائله

يلا يا "مى" العريس زمانه على وصول -

: قالت "مى" بتأفف

طيب يعني أعمل ايه يعني افرشله الأرض ورد ؟ -

: قالت أمها

ادخلى خدى شاور و اعملى ماسك وشك شكله باهت -

: قالت "مى" بحنق

والله أنا كده اذا كان عجبه -

: دخلت "مى" غرفتها وجلست على فراشها وهى تقول

يارب ولو مليش خير فيه اصرفه عنى يارب -

دخلت الحمام وأخذت دشاً تهدئ به نفسها وتحد من توترها .. ارتدت ملابس  
محتشمة ولم تضع أى زينه كعادتها .. سمعت جرس الباب فشعرت بتوتر بالغ  
جلست على فراشها تستغفر ربها لتهدئ من روعها .. دخلت أمها تنظر ..

:اليها قائله

حطى على الأقل كحل .. عينك شكلها دبلان -

: قالت "مى" بحنق

مش حاطه حاجة أنا مبحطش ميك اب أدام أى راجل غريب .. مش هاجى -

أحط دلوقتى عشان جناب العريس

: زفرت أمها قائله

طيب يلا اخرجى .. تعالى على المطبخ الأول خدى صنبة الشاى -

: قامت "مى" ودخلت المطبخ مع أمها وقالت بضيق

ايه الحركات النص كم دى .. ما تدخلى انتى صنبة الشاى يا ماما .. مش لازم -

يعني أنا اللي أدخلها

: قالت أمها بحزم

مى" اتفضلى الصنية وادخلى الصالون الراجل مستنى" -

: أخذت "مى" الصنية وقالت لأمها بتوتر



هو لوحده ولا معاه حد -

: قالت أمها

لوحده -

: تقدمت "مى" من الصالون وهى تنظر أرضاً .. هتف والدها

اتفضلى يا عروسه -

هتفت فى نفسها : عروسة ايه بس يا بابا

تقدمت "مى" تجاه الرجل .. لم ترفع عينها لتتنظر الى وجهه .. قالت بصوت

: منخفض

- اتفضل -

: مد يده ليأخذ منها فنجان الشاى قائلاً

"متشكر يا آنسه "مى" -

قفز قلب "مى" من مكانه عندما استمعت الى صوته .. رفعت نظرها لتتنظر اليه

شعرت بالصدمة .. "طارق" .. ارتجفت يداها وسقطت منها صنية الشاى ..

فقام يصرخ من الألم بعدما حرقه الشاى الساخن .. نظرت اليه .. فوق قدميه

: مصدومة وهى لا تدري ماذا تقول .. صرخ والدها فيها

ادخلى هاتى فوطه ولا أى حاجة -

تسمرت فى مكانها للحظات ثم أسرعت الى الحمام وأحضرت الفوطه وأعطتها

: له وقد احمرت وجنتاها بشدة وقالت باضطراب

أنا آسفة أنا آسفة أوى -

: قال "طارق" وهو يمسح الشاى عن يديه وبنطاله

حرقتي فى الرؤية أمال بعد الجواز هتعملى فى ايه -

: قالت بخجل وتوتر شديد بصوت على وشك البكاء

والله آسفة مكنش قصدى -

: قال "طارق" مبتسماً

كنت بهزر معاكى -

: نظر اليها أباهاً شذراً قائلاً

اتفضل يا ابنى استريح .. وهدخل أشوفك حاجة من عندى تلبسها -

: دخل والدها وتركهما .. فنظر اليها "طارق" قائلاً

أنا كنت حاسس انك ممكن تتصدمى بس مكنتش متصور انك هتدلقى عليا -

## صنية الشاي

: قالت بإضطراب وهي تتحاشى النظر اليه

بصراحة متوقعتش أبداً وبعدين بابا مقاليش على اسم حضرتك بالكامل -

: "قال "طارق

أنا اتعدمت ما أقولوش كنت عايزها مفاجأة -

: ثم ضحك قائلاً

وجت فوق دماغى -

: ابتسمت بخجل دون أن تنظر اليه .. فقال "طارق" هامساً

طيب بسرعة كدة قبل ما باباكي ييجي قوليلى هي مفاجأة حلوة ولا وحشة ؟ -

شعرت بالدهشة فلم تعتاده متحدثاً معها بتلك الطريقة .. صمتت ولم تجب ..

: فحثها قائله

بسرعة قبل ما الحكومة تطب علينا -

: قالت "مى" وهي مازالت تتحاشى النظر اليه

ممكن أسأل حضرتك سؤال -

: قال "طارق" مبتسماً

سؤال بس .. اسألى زى ما انتى عايزه -

: قالت "مى" بجديه

ممكن أعرف ليه اتقدمتلى ؟ .. ليه أنا بالذات رغم انك عارف انى عارفه انك -

.....

: صمتت ولم تكمل فأكمل عنها قائلاً

رغم انى عارف انك عارفه انى كنت معجب بصحبتك .. مش كده ؟ -

: شعرت "مى" بالغيرة تنهش قلبها وقالت بعصبية

أنا آسفة مش موافقة -

: همت بأن تقوم وتغادر لكنه أوقفها قائلاً

.. انتى على طول أفشه كده .. لا بقولك ايه أنا مبحبش كده .. بحب الصراحة -

يعني عشان ميحصلش مشاكل كتير بينا لما نتجوز ان شاء الله عايزك تتعودى

انك تتكلمى معايا فى كل حاجة مضايقاكى مش تقفشى وتقفلى الموضوع ..

"مى" اتفقنا يا

: رغم أن كلماته أسعدتها الا أنها قالت بحده

ايه الثقة دى ومين قال لحضرتك انى هو افق أصلاً -

: ابتسم لها ابتسامه عذبه وقال

أنا عارف ان مفيش بنت تقدر تقاومنى -

رفعت رأسها لتتنظر اليه لأول مرة منذ أن جلست .. نظرت اليه بحدة وغضب

: وقالت

يا سلام -

: لكنها وجدته مبتسماً وهو يقول

بهزر معاكى .. انتى اللى مفيش راجل يقدر يقاومك -

: شعرت بالخجل مرة أخرى وأبعدت نظرها عنه فقالت بصوت خافت

ليه يعني زى أى بنت -

: قال "طارق" برقه

لا انتى مش زى أى بنت .. انتى بنت جدعه .. ومخلصة .. وخجولة .. وطيبة -

.. ومحترمة .. وملتزمة .. ودغرى .. وأمينة .. وصادقة

شعرت بالسعادة وهى تستمع الى اطراءه لها وكلماته التى كان كاللحن فى

: فأكمل قائلاً .. أذنيها

وجميلة وعجبانى -

: احمرت وجنتيها مرة أخرى ونظرت اليه بحدة قائله

لو سمحت مينفعش كده -

: ابتسم قائلاً

هو أنا واحد واقف على ناصية الشارع بعكسك .. مش بقولك ايه اللى عجبني -

وبعدين انتى اللى سألتيني أصلاً .. فيكى وخالنى اتقدملك

صممت "مى" وهى تشعر بالحيرة بداخلها أرادت أن تتأكد من أمر واحد ..

: فقالت له

هسألك سؤال وعاييراك تحلف انك تحاوبنى بصراحة -

: قال فوراً

لأ -

: "رفعت رأسها لتتنظر اليه فقال "طارق

اتعودى ان أى حاجة اقولها تصدقها فوراً من غير حلفان وانتى أى حاجة -

تقولها هصدقها فوراً من غير حلفان

ابعدت عنها مرة أخرى وابتسامه صغيره ترسم على شفيتها .. ثم اختفت تلك الابتسامه لتسأل بجديّة :

انت لسه حاسس بحاجة ناحيه "مريم" ؟ .. وبصراحة ومش هزعل -  
: صمت "طارق" قليلاً .. شعرت بالتوتر خلال فترة صمته .. الى أن قال  
أنا هحلف المرة دي بس لانيك لسه متعرفيش "طارق" .. أقسم بالله العظيم -  
من ساعة ما صحبي اتجوزها وحسيت انه بدأ يحبها ويتعلق بيها وأنا شيلتها  
من قلبي ومن عقلي تماماً .. ولو حاسس ناحيتها بأى حاجة مكنتش جيت  
وأنا عارف ان انتى الوحيدة اللى كنتى عارفه بمشاعرى .. اتقدمتلك انتى  
نحيتها لانك الوحيدة اللى قرأتى رسالتى ليها .. يعنى لو حاسس بحاجة نحيتها  
فأكيد هختار أى واحدة تانية غيرك متكونش عارفه انى كنت هتقدملها  
: شعرت "مى" بأنها تصدقه بالفعل .. لكنها أرادت الإطمئنان أكثر فقالت  
مراد" صاحبك .. وأنا صحبتها .. يعنى لو حصل نصيب هنبقى معرضين ان " -  
حد يجيلنا او احنا نروحلهم .. ازاي هنبقى أعدين مع بعض كلنا فى مكان واحد  
وأنا عارفه انك كنت حاسس بحاجة نحيتها

: قال "طارق" بمرح

هو انتى عايزة تعدى معايا أنا و "مراد" ليه ان شاء الله .. هو انتى -  
هتجوزى راجل ولا شوال بطاطا .. انا معنديش النظام ده .. نظامى الرجالة فى  
حته والستات فى حته .. وحسك عينك تنطقى اسم "مراد" ولا أى حد من

صحابى تانى

: اتسعت ابتسامه "مى" رغماً عنها .. فأكمل بجديه  
ياريت منتكلمش فى الموضوع ده تانى وننهيه دلوقتى حالا ونشيله ونرميه -  
ورا ضهرنا .. عشان أن مش عايز أى حاجة تعكر حياتنا مع بعض

: ثم قال بحنان

"ماشى يا "مى" -

: أومأت برأسها ونظرت اليه مبتسمه وقالت بخجل

ماشى -

: جاء والدها يهتف

مش لاقى أى حاجة مقاسك يا ابنى -

: قال "طارق" بمرح

ولا يهملك يا عمى أنا خلاص قربت أنشف -  
: ضحكت "مى" وهى تكتم بيديها صوت ضحكها .. ثم التفتت اليه قائله  
معلش بجد آسفة -  
: لمحت نظرت سعادة فى عينيه وهو يقول هامساً  
ولا يهملك فداكى البنطلون وصاحب البنطلون -

\*\*\*\*\*

: قال محامى "حامد" بقلق  
يارب الموضوع ده مييجلبناش مشاكل يا "حامد" بيه احنا مش ناقصين -  
: ضحك "حامد" قائلاً  
مبيقاش قلبك خفيف كده .. أنا ساعدته مش أكثر والباقي عليه هو -  
: قا المحامى بقلق شديد  
ربنا يستر -  
: قال "حامد" بتهكم  
يا متر قولتلك مبيقاش قلبك خفيف .. وبعدين هو أصلاً ميعرفش مين اللى -  
اتصل بيه .. متقلقش مفيش أى حاجة ضدى .. وبكرة نخلص كمان من القضية  
مراد" يتكل .. ساعتها القطة مش هتقدر تقف قصاد "حامد" أبداً "كلها لما  
وهعرف ازاي أنتقم منها على اللى عملته

\*\*\*\*\*

: هتفت "مراد" فى الهاتف  
ألف ألف مبروك يا "طارق" بجد فرحتك من قلبي -  
: قال "طارق" بسعادة  
الله يباركلك يا "مراد" .. وزى ما قولتلك ان شاء الله الفرحة هيكون خلال -  
شهر  
: قال "مراد" ضاحكاً  
ايه سلق البيض ده يا ابني -  
: ضحك "طارق" قائلاً

- شوفت يا بنى .. أنا بحب أجيب من الآخر .. مش لسه هخطب و أكتب كتاب -  
ومش عارف ايه .. لا احنا بنجيب من الآخر وبندخل على الفرع على طول  
: ابتسم "مراد" بسعادة قائلاً
- ربنا يهنيك يا "طارق" ويسعدك .. وأحلى حاجة فى الموضوع .. انها صاحبة -  
مراتى .. لانى بجد بعزك جداً يا "طارق" وانت بجد أخ ليا .. وصدافتك حاجة  
ليها قيمة كبيرة عندى  
: قال "طارق" مبتسماً
- تسلم يا "مراد" انتى كما أخويا بجد .. وان شاء الله صداقتنا دى تفضل طول  
العمر  
: قال "مراد" بسعادة  
ان شاء الله -

\*\*\*\*\*

- ألف مبروك يا "مى" بجد فرحتك أوى -  
: صاحت "مريم" بهذه العبارة على الهاتف .. فقالت "مى" ضاحكة  
تسلمى يا "مريم" الله يبارك فيكى -  
: قالت "مريم" بلهفه
- بس بجد مفاجأة جميلة أوى .. بجد مش مصدقة .. انتى بنت حلال وتستهلى -  
"كل خير يا "مى"  
: قالت "مى" بسعادة
- ربنا يكرمك يا "مريم" انتى كمان بنت حلال وتستاھلى كل خير -  
: صاحت "مريم" بسعادة كالأطفال
- مش مصدقه أخيرا هيبقى في فرح وأحضره .. ياااه كان نفسي أوى أحضر -  
.. فرح  
: "قالت "مى"  
بقولك ايه رجلك على رجلى أنا قدامى شهر واحد وعازاكي معايا بجد -  
: قالت "مريم" بحماس  
طبعاً يا حبيبتي مش ممكن أتأخر عنك أبدا -

: صاحت "مى" بسعادة

- أنا فرحانه يا "مريم" .. فرحانه أوى بجد .. لسه لحد دلوقتى مش قادرة -  
أصدق

: ضحكت "مريم" قائله

- لا صدقى يا حلوة .. والحقى اتمتعى بحريتك فى الشهر ده .. قبل ما تدخل -  
القفص يا جميل

: قالت "مى" بمرح

- يا ستى قفص قفص المهم ندخل -

: ضحكت "مريم" بشدة وقالت

- ده انت واقعه أوى -

: قالت "مى" ضاحكة

- أعمل ايه بحبه بجد -

: قالت "مريم" مبتسمة

- بس انتى ندله على فكرة .. عمرك يعنى ما قولتيلى ولا لمحتيلى .. رغم انى -  
فعلا كنت ساعات بحس بكده .. بس انتى عمرك ما قولتى أى حاجه  
: "قالت "مى"

- بجد يا "مريم" مكنتش قادرة اقول حاجة ولا حتى أتكلم مع نفسى فى -  
الموضوع ده .. كنت بحاول أتجاهل احساسى .. لانى مكنتش عايزة أعمل حاجة  
غلط .. أنا عمرى ما هكون أبداً زى البنات اللى بتعمل البدع عشان تلفت نظر  
أنا مش كده لا دى تربيتى ولا أخلاقى .. وكنت حساه مش شايفنى .. راجل ليها  
وعشان كده كنت بحاول انسى نفسى الموضوع ده .. أصلاً

: قالت "مريم" بمرح

- أهو طلع شايفك ومعلم عليكى كمان -

: ضحكت "مى" قائله

- انتى اتعلمتى اللغة دى فين ؟ -

: ضحكت "مريم" قائله

- نرمين "ربنا يخليها بتروح الكلية وترجعنا بمصطلحات غريبة" -

: ثم قالت

- بجد فرحانه عشانك يا "مى" ربنا يتملك على خير ويسعدك دائماً يارب -

\*\*\*\*\*

لم تستطع "مريم" التحدث مع "مراد" اليومين الماضيين بدا وكأنه يتهرب منها ومن الحديث معها .. منذ أن كانا فى الحديقة وقاطعتهما "نرمين" لم تعلم .. حتى الآن ماذا أراد أن يخبرها .. وهى لم تحاول الضغط عليه .. وانشغل طيلة اليومين الماضيين بفحوص والدته الطبية .. الى أن اطمئن الجميع على صحتها وشعر "مراد" بالراحة والطمأنينة .. فى هذا اليوم لم يأتى "مراد" الى .. غرفته انتظرته طويلاً ولم يحضر .. قررت أن تسأله عما كان يريد قوله عندما قاطعتها "نرمين" .. خرجت "مريم" لتجد السكون يعم المنزل ظنت ان "مراد" فى مكتبه همت بالنزول لكنها توجهت أولاً الى غرفة "زهرة" طرقت الباب وفتحته لتجد "مراد" جالساً بجوار "زهرة" .. .. للإطمئنان عليها

: قالت بخرج

كنت فاكرة ان ماما "زهرة" لوحدها -

: "قالت "زهرة

تعالى يا بنيتي .. كنت لسه بجول لـ "مراد" يجوم يناديلك .. عايزاكى انتوا -  
التنين

دخلت "مريم" وهى تتوجس خيفه .. كان "مراد" يجلس بجوار والدته على الفراش .. جلست على أحد المقاعد .. نظرت "زهرة" الى "مراد" قائله

دلوجيت يا ولدى أجدر أحكيلك كل شئ انت ومرتك -

: نظر "مراد" الى "مريم" ثم الى "زهرة" ثم قال

قالتلى انك كنتى متجوزه باباها "أنا عارف يا ماما .. "مريم -

: "قالت "زهرة

لا يا ولدى مش جصى اكده .. آنى جصى السبب اللى خلى بوك وأهلك -

يجولوك انى مت وان خوك مات

أرهفت "مريم" أذنيها تستمع الى كلام "زهرة" باهتمام .. وكذلك فعل "مراد"

: بضعف وقالت "الذى أولاها كل انتباهه .. تحدثت "زهرة

زمان جوى .. وجت ما كنت بنت صغيره .. شفنى "خيري" الله يرحمه وكان -

رايد يتجوزنى



: قال "مراد" مستفهاً

خيري" .. اللي هو بابا الله يرحمه مش كده ؟" -

: صمتت "زهرة" قليلاً ثم نظرت الى "مريم" قائلة

"لا .." خيري السمري -

: نظرت اليها "مريم" بدهشة .. وعقد "مراد" ما بين حاجبيه وحثها قائلاً

وبعدين يا ماما .. ايه اللي حصل ؟ -

: أكملت "زهرة" بضعف

- وبعدين رفضوا أهلى الجوازه .. لانى من عيلة "الهوري" .. و "خيري" من

عيلة "السمري" والعيلتين دول كان بيناتهم عداوة كبيرة جوى .. وتار من

زمان جوى جوى .. ومكانوش بيطيحوا بعض .. الكل رفض جوازي من

"خيري" وانى كنت بنت صغيرة مكنش ليا رأى .. بعدها اتجدملى "خيري"  
الهوري" أبوك يا ولدى كان يجربلنا .. وافجوا أهلى عليه .. لانه من نفس

عيلتنا .. واتجوزته

: ثم أمسكت بيد "مراد" وقالت بتأثر

قسماً بالله يا ولدى كنت مخلصاً لأبوك طول فترة جوازنا -

: ثم قالت بأسى

- بس الله يرحم حماتى ويسامحها .. بعد ما خلفتك انت و "ماجد" تعبت ودخلت -

المستشفى والدكاتره جالوا انى لازم أعمل عمليه واشيل الرحم .. جدر ومكتوب

يا ولدى

: نظر اليها "مراد" بتأثر فأكملت

- حماتى معجبهاش اللي حوصل .. مع انه مرض مش بيدي ولا بيد حدا .. ده -

بيد اللي خلجنى وخلصك .. كانت بتحاول تخرب عليا بكل شكل .. وكانت بتترجى

أبوك يتجوز عليا .. بس أبوك مرضيش يتجوز ولا رضى يسببى .. لحد ما

"اتفجت مع حريم فى البلد انهم يجولوا انهم شافونى مع "خيري السمري

: التفتت الى "مريم" تقول

أبوكى يا بنتى -

اتسعت عينا "مريم" من الدهشة .. وألجمت الصدمة لسان "مراد" فنظرت

: "زهرة" الى "مراد" قائلة بأعين دامعه

- ظلمونى جوى وكل واحد منهم نهش فى زى الكلاب السعرانه .. من غير أى -

دليل .. مجرد اشاعة وانتشرت وملت البلد

: قالت "زهرة" بأعين دامعة وبلهجة حازمة

نسوا كلام ربنا نسوا انه جال : "يا أيها الذين آمنوا إن جاعكم فاسقاً بنياً -  
فَتَبَيَّنُوا أَنْ تُصِيبُوا قَوْمًا بِجَهَالَةٍ فَتُصِحُّوا عَلَىٰ مَا فَعَلْتُمْ نَادِمِينَ " و كمان جال  
إِنَّ الَّذِينَ يُحِبُّونَ أَنْ تَشِيعَ الْفَاحِشَةُ فِي الَّذِينَ آمَنُوا لَهُمْ عَذَابٌ أَلِيمٌ فِي الدُّنْيَا "   
وَالْآخِرَةُ " .. ونسوا كلام حبيبك النبي صلى الله عليه وسلم : " يا معشر من قد  
أسلم بلسانه ، ولم يفض الإيمان إلى قلبه ، لا تؤذوا المسلمين ولا تعيروهم ،  
ولا تتبعوا عوراتهم ، فإنه من تتبع عورة أخيه المسلم تتبع الله عورته ، ومن  
تتبع الله عورته يفضحه ولو في جوف رحله " .. الناس اللي بنتجل الاشاعات  
بدون أى دليل متعرفش ان بكلمة واحدة ممكن حياة انسان تتدمر وذنبه يبجي  
فى رجبها طول العمر

صمتت قليلاً وقد بدا الألم فى عينيها يشى بمدى الأذى الذى تعرضت له .. قرب  
: "مراد" كفه ووضعها فوق كفها .. اكملت قائله

بعدها أبوك طلجنى يا "مراد" .. جالى آنى مش مصدج عليكى اكده بس -  
مجدرش أعيش معاكى وسط الخلع وهما بينهشوا فى عرضك  
: ثم قالت بأسى

"وحرمنى منكوا انتوا التنين انت وأخوك يا "مراد -

أجهشت "زهرة" فى البكاء .. دمعت عينا "مريم" وهى تنظر اليها وتشعر  
بمدى الظلم والقهر الذى تعرضت له .. لانها ذاقت من نفس الكأس يوم اتهمها  
الناس بأنها على علاقة بـ "جمال" .. فكانت "مريم" أكثر من تشعر بها فى تلك  
: هدأت "زهرة" قليلاً فقال "مراد" بحنان .. اللحظة

كفاية يا ماما .. انتى تعبتى ارتاحى شوية .. مش مهم كلام دلوقتى -

: قالت "زهرة" بتصميم

لا مهم لازم أجول كل اللي كنت كتماه فى جلبى طول السنين اللي فاتت يمكن -  
أرتاح

: اكملت قائله

حاولت كثير أخذكوا أو حتى أشوفكوا انت وخوك .. بس حماتى كان جلبها -  
جاسى جوى .. وكانت رافضه انى أشوف ضفر عيل منكوا .. وأبوك مكنش فى  
مكنش بيكسر كلمة لأمه الله يسامحها .. كانت ست جويه جادره .. يده حاجه

: ثم أكملت

فى الفترة دى حصلت جريمة جتل فى عيلة "المنفلوطى" والعيلة دى كانت بتعادى العيلتين "الهوارى" و "السمرى" وكان فى بينهم مشاكل وبين الاتنين من العيلتين .. ولما اتجتل ابن "حسن المنفلوطى" .. جالوا ان اللى "خيرى" جتله اسمه "خيرى" لانه كتب اكده بدمه على الجدار .. وأقسم "حسن المنفلوطى" انه يجتل الاتنين "خيرى" .. فالعيلتين اتحدوا مع بعض وهربوهم على "مصر" وجبل ما أبوك يهرب يا ولدى .. روت حداهم فى بيت العيلة .. كان بدى أشوفك انت وأخوك .. لجيت "ماجد" بيلعب جدام البوابه .. محستش .. وبهرب بيه .. بنفسى الا وآنى بخطفه

: ثم نظرت اليه وقالت بأعين دامعه

كان بدى أخذك انت كمان .. بس خفت أستنى أكثر من كده حدا يشوفنى .. ومحستش بنفسى أنى بعمل ايه .. خدت "ماجد" وطلعت أجرى بيه

: تعالت شهقاتها وهى تجول

- انا اتظلمت أوى أوى أوى وملقتش حل أدامى غير كده كان لازم أعمل كده ..

سامحنى يا ولدى انتى سيبتك .. سامحنى

: اقترب منها "مراد" معانقاً ايها قائلاً

- مسامحك يا أمى .. مسامحك .. انتى مغلطييش .. انتى اتظلمتى أوى .. ربنا

ينتقم من كل اللى ظلمك

: قالت "زهرة" بسرعة

- أنى مسماهم يا ولدى .. مسماهم ربنا يغفر لكل اللى ماتوا

: ثم أخذت نفساً عميقاً وأكملت قائله

بعد اكده عرفت بموضوع جريمة الجتل وعرفت انهم أكيد هيدوروا على ولاد

"خيرى" ويجتلوهم .. فاضطريت أهرب أنى كمان على مصر .. مكنتش أعرف

حدا فيها واصل .. وسبحان الله يشاء ربك انى أهرب فى نفس اليوم اللى هرب

فيه "خيرى السمرى" و "خيرى الهوارى" واتصدمت لما لجيتهم راكبين نفس

الجتز .. وجليبى وجع فى رجلي .. وفضلت جاعده بعيد عنهم عشان

خيرى السمرى" هو الوحيد اللى بعرفه "ميشوفونيش .. بس عيني كانت على

واللى ممكن يساعدى لانى معرفش حدا فى مصر .. بعد ما نزلنا من الجتز

النتين اتفرجوا وكل واحد راح فى طريق .. مشيت ورا "خيرى السمرى" لحد

ما التفت فجأة وشافنى .. جريت منه وبكيت بين يده وجولت له يساعدى ..  
يساعدى انى الاجى شغل وسكن عشان أعيش أنا وابنى .. بس ربك كان كريم  
جوى .. وجالى انه هيتجوزنى على سنة الله ورسوله .. ومحدث عرف  
بجوازنا الا اربعة .. أبوى الله يرحمه وهو اللى جه حدانا فى مصر وجوزنى له  
و"بهيرة" عمك يا ولدى .. و "عبد الرحمن" و مرته ..

: قال "مراد" بدهشة

عمتو ؟ -

: "قالت" زهرة

ايوة يا ولدى .. اتصلت بيها وجولت لها انى اتجوزت على سنة الله ورسوله -  
ولما ابنى "مراد" يكبر جوليله أمك ما غلظتش واصل ومعملتش أى حاجة  
يخجل منها

: ثم غشت العبرات عينيها وهى تقول بصوت باكى

لكنها جالتلى ان أبوك جالك انى مت آنى وأخوك .. ساعتها حسيت انى مت -  
فعلاً يا ولدى

: ربت "مراد" على كتفها وقالت وهى تبكى

طول السنين اللى فاتت كان نفسى أشوفك مرة واحدة بس .. كان نفسى -  
أجولك أنى عايشه ومظلومة يا ولدى .. ظلمونى وحرمونى منك غصب عنى يا  
"مراد"

تنهد "مراد" بألم .. وتساقطت العبرات من عيني "مريم" .. بدا على "زهرة"  
: الإرهاق والتعب فقال لها "مراد" بقلق

ماما انتى كويسه ؟ -

: أومأت برأسها فقال

طيب نامى واتراخى كفاية كلام كده .. نكمل كلامنا الصبح -

غادر الاثنان الغرفة بعدما طلب من الممرضة الحضور وملازمة فراش أمه ..  
مريم" الى الغرفة وجلست على الفراش واجمة .. دخل "مراد" وأغلق "دخلت  
: الباب ومسح وجهه بكفيه ثم نظر اليها قائلاً

انتى أول مرة تعرفى الكلام ده ؟ -

: أومأت برأسها ايجابا وقالت

أيوة .. كل اللى كنت عارفاه ان بابا كان متجوز ماما "زهرة" بعد ما جوزها -

طلقها .. وانها جالها مرض وشالت الرحم ومعدتش بتخلف .. وبابا اتجوز ماما  
وخلفنى أنا واختى

: ثم أكملت وهى شارده بحزن

ماما مكنتش بتحب ماما "زهرة" ومكنش فى اى علاقة بينهم وبابا كان -  
معيش كل واحد فيهم فى شقة بعيدة عن الثانية .. ومبتدتش أشوف "ماجد" و  
اعرفه غير بعد ما أهلى ماتوا فى الحادثة .. وبعدها كتبنا كتابنا وكانت ظروفنا  
صعبة واضطريت أنزل اشتغل عشان مصاريف علاج ماما "زهرة" كانت كبيرة  
علينا لانها تعبت أوى بعد وفاة بابا وأصلا كان عندها ضغط على واعدت فترة  
كبيرة فى المستشفى وده اللى عطل جوازنا .. لحد ما عرفنا بمرض "ماجد"  
.. بس للأسف معرفناش الا فى مرحلة متأخرة جدا

: قالت بألم

كان بيبقى تعبنا ويخبي عليا لحد ما وقع فى الشغل .. وعرفنا ساعتها ان -  
المرض امكن منه تماما .. وماما "زهرة" تعبت أوى ومعدتش بتتحرك ولا  
بتتكلم واضطرينا نودينا الدار عشان ياخدوا بالهم منها لانى كنت بضطر انزل  
لحد ما "ماجد" مات الله يرحمه .. اشتغل  
ساد الصمت طويلاً بينهما .. دخل "مراد" يغسل رأسه بالماء البارد .. ثم يجففه  
ويخرج من الغرفة دون القاء كلمة .. توجه الى مكتبه .. وظل غارقاً فى شروده  
. وهو يفكر فى كل ما قيل

## الفصل السادس والعشرون

مراد" من كثرة التفكير .. وقرر أن يدع الماضى وشأنه وأن يردم عليه "تعب  
التراب ويعيش اليوم ويخطط للمستقبل مع والدته و "ناهد" و اخواته و ...  
هب واقفاً وتوجه الى غرفته ليحدها نائمة تتوسط فراشه .. اقترب .. "مريم  
منها وجلس بجوارها يتأملها .. مسح على شعرها وأخذ يتذكر كم عانت مثلما

عانت أمه من قبل .. تذكر أنها هي أيضاً طعنت في عرضها مثلما طعنت أمه ..  
لكن الفرق أنه صدق ما قيل عن "مريم" .. تنهد في أسى وانحنى يقبل رأسها ..  
وأمسك كفها الموضوع بجوارها ورفعها الى شفثيه يقبله وكأنه يعتذر لها عما  
بدر منه في حقها .. تذكر في تلك اللحظة عمته "بهيرة" يوم أن طلبت منه في  
المستشفى الزواج من "مريم" .. وأصرت أن يتزوجها "مراد" .. أرادت من  
"مراد" أن يفعل مع "مريم" .. مثلما فعل أبوها مع أمه .. أحكم وضع الغطاء  
عليها وتوجه الى الأريكة .. شعر بألم في ساقه .. فخلع الساق الصناعية وتركها  
في مكانها تسد فراغ قدمه تحت الغطاء .. وغط في سبات عميق  
نائماً على الأريكة .. اذن فقد عاد من الأسفل "استيقظت" "مريم" لتجد "مراد"  
دون أن تشعر به .. نهضت لكي تتوجه الى الحمام .. وفجأة .. وضعت يديها على  
فمها تكتم شهقتها ودهشتها وفزعها .. رأت "مريم" الساق الصناعية واقعه  
على الأرض بجوار الأريكة .. أخذ قلبها يخفق بقوة وهي لاتزال تضع كفيها على  
مراد" لتجده نائماً .. اقتربت من الأريكة ببطء وهي "فمها بقوة" .. نظرت الى  
تنظر لتلك الساق الموجودة على الأرض .. اقتربت أكثر لترى في ضوء القمر  
المتسلل للغرفة الفراغ أسفل ساقه اليميني من فوق الغطاء .. أجهشت في البكاء  
وكادت أن تلعو صوت شهقاتها لولا أنها أحكمت تكميم فمها بقوة .. تساقطت  
العبرات من عينيها ساخنة وجسدها يرتجف بشدة وهي تنظر الى الفراغ في  
.. مكان ساقه .. رفعت نظرها الى وجه "مراد" واقتربت منه تنظر اليه نائماً  
كانت عيناها تشعان حزناً وألماً وعذاباً شديداً .. شعرت وكأنها اكتشفت بأن  
نظرت اليه وهي تقول في نفسها .. أهذا ما كنت تخفيه .. ساقها هي المبتوره  
عنى ؟ أهذا ما كان يورق مضجعتك ؟ .. أهذا ما كان يقلقك ويخيفك ؟ .. أهذا ما  
كنت أرى بسببه الألم والحيرة والقلق في عينيك ؟ .. أهذا ما يبعدك عني يا  
"مراد" ؟ .. أهذا ما يبعدك عني يا .. حبيبى .. ؟ التفتت لتنظر الى الساق الملقاة  
على الأرض مرة أخرى .. اقتربت منها وحملتها .. ورفعت الغطاء برفق  
نظرت الى نهايه ساقه التي التحمت ببعضها فيما يشبه .. ووضعتها في مكانها  
شعرت بدموعها تنهمر مرة أخرى .. أحكمت وضع .. شكل الركبة المثنية  
الغطاء عليه .. ثم اقتربت من رأسه وجثت بجواره وهي تنظر اليه .. قربت  
أصابع يدها من رأسه تتلمس شعره برفق .. وودت أن توقظه الآن وتخبره بكل ما  
يجيش داخل صدرها .. لكنها أرادت أن تفوق من صدمتها أولاً .. أرادت أن تكون  
وهي الآن أضعف ما يكون .. هي الآن كالطير .. مستعدة جيداً لتلك المواجهة  
الجريح .. لن تستطيع مداواته اذا كانت هي نفسها تشعر بالجرح .. غادرت  
الغرفة مسرعة وأغلقت الباب ووقفت أمامه تبكي بحرقة وهي تحاول التحكم في  
مشاعرها دون جدوى .. كانت تشعر بألم شديد في قلبها .. كانت تشعر بكل الألامه

وضعت كفها على الباب وأسندت .. وعذابه وأحزانه كالطغعات فى قلبها هى رأسها اليه .. مرت دقائق وهى واقفة هكذا تحاول أن توقف شلال الدموع المنهمر من عينيها و امتداد الألم داخل قلبها .. مسحت دموعها وعندما شعرت أنها بدأت فى استعادة القليل رباطة جأشها توجهت الى غرفة "سارة" التى :  
اذنت بها بالدخول .. قالت "مريم" وعيناها تبدوان شديداً الإحمرار  
"صباح الخير يا "سارة" -

: قالت "سارة" وهى تنظ اليها بإمعان

صباح الخير "مريم" .. مال عينك -

: قالت "مريم" بارتباك

مفيش عادى .. انتى عارفه الجو اليومين دول فيه تراب وبيوجع العين -

: ابتسمت "سارة" قائله

اها فعلاً الجو غريب اليومين دول -

: جلست "مريم" بجوار "سارة" على الفراش قائله

سارة" عايزة أسألك عن حاجة" -

: "قالت "سارة"

"خير يا "مريم" -

: قالت "مريم" بصوت مضطرب

عايزاكى تحكىلى ازاي "مراد" رجله اتبترت -

: قالت "سارة" بدهشة

هو محلكيش ؟ -

: قالت "مريم" بتوتر

عايزة اسمع منك انتى .. ومتسألينيش عن السبب -

: قالت "سارة" وهى مازالت تشعر بالدهشة من سؤالها

كانت حادثة -

: قالت "مريم" بإهتمام

ايه اللى حصل ؟ -

: قالت "سارة" بحزن

كان هو وظيفته عندنا سمعناهم بيتخانقوا جامد فى الجنية .. كانوا بيتخانقوا -

هو كان عايز يخلف وهى عايزة تأجل .. نرفزته بكلامها .. على موضوع الحمل

.. خرج وساق العربية وطلع بيها .. وفجأة جلنا خبر انه عمل حادثة ونقلوه

المستشفى .. بس للأسف رجله كانت متدمرة والدكاترة ملقوش حل الا فى البتر

كانت "مريم" تستمع اليها وعلامات الحزن على وجهها .. تخيلت شعور

تخيلت شعوره واحساسه وقتها .. تخيلت .. "مراد" وهو يتلقى خبر بتر قدمه

كيف كانت صدمته الأولى عندما رأى مكان البتر .. تخيلت ألمه من فقدانه لتلك  
الساق .. بالتأكيد شعور صعب وقاسي وغير محتمل  
: أكملت "سارة" بأسى شديد

كان "مراد" تعبان فى الأول لكنه كان راضى وصابر .. بس للأسف هى مكش -  
عندها ذرة احساس  
: التفتت اليها "مريم" بحده وقالت  
طليفته تقصدى ؟ -

: أومات "سارة" برأسها وقالت بحزن  
اتخلت عنه وطلبت الطلاق -

: "شعرت" "مريم" بنغزات الدموع كالشوك فى عينيها .. أكملت "سارة"  
سمعناه وهو بيترجاها متسيبوش وتفضل جمبه .. وعدها انه هيركب رجل -  
صناعيه ويمشى بيها زى الأول .. بس هى كانت مصرة على الطلاق  
لم تعد "مريم" تحتمل حبس دموعها أكثر فانهمرت منها رغماً عنها وارتجف  
بحزن وهى شاردة كأنها ترى شريط ذكريات أمام "جسدها بقوة .. أكملت "سارة"  
: عينيها

فى ساعتها رمى عليها اليمين وطلقها .. اتعذب أوى .. واتألم أوى .. واتغير -  
أوى .. خاصة لما عرف انها اتجوزت .. كان يوم صعب أوى بالنسبة له .. كنا  
حسين انه بيموت أدامنا واحنا مش قادرين نعمله حاجه .. بعد الموضوع ده  
بسنتين فكر انه يرتبط تانى .. كان فى بنت بتشتغل عنده فى الشركة أعجب بيها  
.. وكلمها انه هيتقدملها .. البنت وافقت وكانت مبسوطه .. ولما راحلها البيت  
عرفها بموضوع رجله

: نظرت اليها "مريم" بامعان .. فقالت "سارة" بحزن  
لما عرفت رفضته -

: "شعرت" "مريم" وكأنها طغنت فى قلبها مرة أخرى .. أكملت "سارة"  
من ساعتها رفض الارتباط تماما .. وكان بيرفض أى عروسة ماما بتجيبها له -  
: ثم نظرت الى "مريم" مبتسمه وقالت

لحد ما قبلك انتى يا "مريم" .. متتصوريش فرحنا أد ايه بجواز "مراد" -  
وفرحنا اكرت لما عيشتى معانا وعرفناكى وحبيناكى  
: ثم قالت

كنت خايفة "مراد" يفضل لوحده وميتجوزش تانى .. بس هو برده معذور -  
كان خايف انه يتعرض للرفض مرة ثانية أو انه يرتبط بواحد يحس انها حسه  
نحيته بالشفقة

: التفتت الى "مريم" قائله بحزن



تعرفى انه مش بيرضى أبداً يخلى اى حد مننا يشوفه من غير رجله الصناعية -  
.. حتى ماما مبيرضاش يخليها تشوفه كده

مراد" وفى الألم الذى لاقاه .. كم عانى فى "كان كل تفكير "مريم" منحصر فى حياته .. كيف استطاعت زوجته السابقة أن تتخلى عنه وتتركه بمفرده يعانى وسط آلامه .. كيف تركت يده فى منتصف الطريق .. كيف تخلت عنه وهو فى بل أشد أنواع الخيانة .. شعرت .. أمس الحاجة اليها .. هذه تعد خيانة "مريم" بغضب شديد تجاهها .. وبألم شديد تجاهه .. طرقت "نرمين" الباب دخلت "مريم" غرفة "مراد" .. لتخبرهم بأنه تم الانتهاء من اعداد الفطور دخلت وغسلت وجهها .. لتجده غير موجود بها .. نظرت الى الأريكة بأسى وبدلت ملابسها ونزلت للأسفل

كان "مراد" جالساً فى مكانه على رأس الطاولة .. خفق قلبها لرؤيته .. دون وعى منها نظرت وهى تدخل الغرفة الى ساقه التى تبدو وكأنها ساق طبيعيه .. شعرت بوغزات الدموع فى عينيها مرة أخرج لكنها حاولت التماسك .. جلست تنظر اليهم وهما يتحدثون ويمزحون دون أن تشاركهم الحديث .. كانت كل مشاعرها وحواسها موجهة الى الرجل الجالس بجوارها والذى لا تستطيع النظر كان "مراد" يتابعها وهى تحرك .. اليه حتى لا يرى الألم الذى تنطق به عينيها الطعام أمامها وتتظاهر بالأكل دون أن تأكل بالفعل .. كان يتابعها باهتمام ..  
: استأذنت وقالت

انا شبعت .. هخرج أتمشى فى الجنيئة شوية -

: "قالت "ناهد

ماشى يا حبيبتي -

خرجت "مريم" وجلست فى مكانها المعتاد فى الحديقة نظرت الى الشجرة التى سقطت منها الحمامة .. تذكرت يوم أن قالت له بأنها أشفقت على الحمامة لأن ثرى هل ألمه كلامها .. هل ظن أنها ستشفق .. جناحها مكسور .. أخذت تتساءل زفرت بضيق وهى تتمنى لو لم تقل تلك .. عليه كإشفاقها على الحمامة ؟  
تسلل الى أذنيها ليقفز قلبها فى جنون .. الكلمات وقتها .. سمعت صوته خلفها  
:

"مريم" -

التفتت تنظر اليه .. الى هذا الرجل الذى أحبته بكل كيائها .. نظر اليها بإمعان  
قائلاً :

مريم" فى حاجة مضايكاكى" -

: حاولت التحدث لكن الكلمات أبت أن تخرج .. تفرس فيها وهو يقول باهتمام  
مالك ايه مضايقتك -

شعرت بحنين شديد اليه .. شعرت بأنها تريد أن تلقى بنفسها بين ذراعيه وتطيب جراحه .. تريد أن تطمئننه وأن تخبره أنها ليست كتلك النسوة اللاتي قابلهن في أرادت أن تصرخ فيه لا تخف منى لن أؤذلك .. لن .. حياته .. لن ترفضه أبداً أجرحك .. لن أولمك .. لن أتركك .. تعلقت عيناه بعينيها يخترق أعماق روحها : قال بصوت متهدج

مريم" مالك .. فى حاجة تعبأكى ايه هى " -

اقتربت منه وأحاطت عنقه بذراعيها .. حاولت التحدث مرة أخرى ففشلت بالدهشة وهو يراها بين ذراعيه .. "وتركت لعبراتها العنان .. شعر "مراد أحاطها بذراعيه هو الآخر .. ضمها اليه بشدة .. وتمسك بها كالغريق الذى شعر "مراد" بقلبه يقفز فرحاً لقربه .. يتعلق بالشئ الذى يبقيه على قيد الحياة منها .. ضمها اليه يخشى مفارقتها .. شعر بالخوف مرة أخرى من ردة فعلها ان علمت بإعاقته .. شعر بأنه يخدعها .. شعر بأنه غير أمين معها .. استدرج عواطفها وهى لا تعلم شيئاً عن ظروفه .. أخذ يلوم نفسه قائلاً .. هذه ليست رجولة يا "مراد" .. أبعدا عنه .. وهو لا يتمنى غير قربها منه .. أرغم نفسه على أن يمسك بذراعيها ليفك الطوق الذى كونته حول رقبتة .. ابعدا عنه برفق .. لم تغضب "مريم" .. فهى تعلم لماذا فعل ذلك .. تعلم لماذا أبعدا عنه .. أصبحت تفهم تماماً نظراته وكلام عينيه الغير مسموع .. ابتعدت .. أرادت أن تترك له فرصته .. فى أن يستعد لمواجهتها .. كما أخذت هى فرصتها فى أخذ ينظر اليها يحاول أن يفهم ما تفكر فيه .. الإستعداد لمواجهته .. ابتسمت له وما تشعر به .. كانت لغة العيون هى اللغة السائدة بينهما .. والتي تهيمن على وكأن نفسه قد طابت .. وظهرت الراحه على .. باقى اللغات .. بدا وكأنه هدأ محياه .. وابتسم .. كيف لها أن تفعل ذلك ؟ .. كيف تستطيع أن تهدئ من روعه شعر بأنها دواعه .. وفيها أسباب شفاءه .. بنظرة واحدة .. بإبتسامه واحدة : قالت "مريم" وهى مازالت محتفظة بإبتسامتها

نفسى فى درة مشوى على الفحم -

: نظر اليها "مراد" بدهشة للحظة ثم انفجر ضاحكا وهو يقول

أفندم .. درة مشوى على الفحم -

: قالت بمرح طفولى

أيوة درة مشوى على الفحم ايه متعرفوش -

: ابتسمت عيناه قبل شفتاه وهو يقول بدهشة

لا أعرفه .. بس ايه اللى فكرك بيه دلوقتى -

: هتفت بمرح

نفسى فيه أوى -

: قال وقد اتسعت ابتسامته  
طيب أجيبهولك منين دلوقتى -

: قالت بتحدى

اتصرف مش انت الراجل .. اتصرف مليش دعوة عايزة أكل درة -  
نظر اليها قليلاً ثم اقترب منها ونظر الى يدها وأمسكها فى يده قائلاً وهو ينظر

: اليها بمرح

طيب عندى فكرة .. ايه رأيك نهرب فى الخبائه ونروح نشوفلنا أى حد بيبيع -  
دره

: قالت هامسه

موافقه .. يلا بسرعة قبل ما حد يشوفنا -

على الكورنيش جلسا متجاورين .. ابتسم وهو ينظر اليها وهى تأخذ حبة فحبة  
: من الدرة وتضعها فى فمها .. التفتت اليه وابتسمت بخجل قائله  
ايه ؟ -

: ضحك قائلاً

لما بشوفك بتاكلى بحس ان عصفورة بتاكل -

: قالت بمرح ودلال

كويس معنى كدة انى رقيقه -

ابتسم لها .. لمح شيئاً على زاوية فمها فأزاله بإصبعه .. نظرت اليه مبتسمه

: بخجل .. تعلقت عيناه بها مبتسماً .. وقال هامساً

تعرفى انك بتحسسينى بحاجات كتير مختلفه .. كل شوية أحسن انك واحدة -  
شكل

: قالت بإستغراب

ازاى يعنى ؟ -

: قال شاردأ

- ساعات بحس انك عاقلة أوى وتقيلة أوى .. وساعات بحس انك عصبية أوى -  
ونرفوزه .. وساعات بحس انك حنينه أوى ورقيقة أوى .. وساعات بحس انك  
طفلة أوى

: نظر اليها قائلاً بمرح

اعترفى انتى مين فى دول ؟ -

: ابتسمت قائله بمرح

أنا كل دول فى بعض .. كولكشن يعنى -

: رفع حاجبيه قائلاً بتحدى

بس انتى النهاردة مختلفة .. أول مرة أشوفك مرحة كدة -

: قالت "مريم" بعتاب

قصداك انى كنيبة يعنى ؟ -

: قال "مراد" مبتسماً

لا طبعا مش قصدى كدة .. بس انتى جادة على طول .. واول مرة أشوفك -

طفوليه كده .. وشقية كدة .. يا ترى ايه سبب التغيير ده

: قالت "مريم" بشئ من الحزن

ده مش تغيير .. تقدر تقول ان ده عودة لطبيعتى .. اللى شوفته فى حياتى هو -

اللى خلانى جادة أوى وكنيبة أوى .. بس أنا مكنتش كده زمان .. لما بابا وماما

واختى اللهم يرحمهم كانوا عايشين

: شعر "مراد" بالأسى تجاهها وقال

ربنا يرحمهم -

: صمت قليلاً ثم قال

يعنى انتى بدأتى تحسى انك رجعتى لطبيعتك تانى -

: قالت

أيوة -

: نظر اليها قائلاً

ليه .. ايه اللى رجعتك لطبيعتك دى تانى ونسأكى اللى شوفتية فى حياتك ؟ -

صمتت وهى تنظر اليه .. لمحها نظرة فى عينيها أذابت قلبه داخل صدره .. قالت

: هامسه

انت .. وجودك فى حياتى خلانى أنسى كل الظروف الصعبة اللى مررت بيها -

خفق قلب "مراد" وهو يستمع الى كلماتها .. أشاح بوجهه عنها ونظر أمامه ..

: بدا عليه التفكير .. ثم عاد ينظر اليها مرة أخرى قائلاً بصوت مضطرب

يلا نروح عشان منتأخرش -

لم تعترض "مريم" .. فهى تعلم أن صراعاً كبيراً يدور بداخله .. تفهمه وتتفهمه

جيداً

\*\*\*\*\*

كان حفل خطوبة "نرمين" بسيطاً بين أفراد العائلتين فقط فى الفيلا .. كانت

"نرمين" تشعر بالسعادة بإرتباطها بـ "أحمد" ابن خالتها والذى تعرف عنه

: حسن الخلق والتدين .. قدمت له أمه علبه الشبكة فقال لها مبتسماً

لبسيها انتى يا ماما -

ابتسمت أمه وهى تلبس ابنة أختها الشبكة وتعالق الزغاريد فى البيت .. كانت

سعادة "أحمد" كبيرة وقد تمت خطبته على أحب انسانه الى قلبه .. كم قضى لكنه لم يجرؤ يوماً عن الإفصاح عن هذا الحب .. سنين طوال يتمناها زوجة له وخوفاً من فعل شئ يغضب الله عز وجل فيذهب ببركة .. احتراماً لثقة أخيها فيه زيجهما .. فرح "أحمد" أكثر عندما وافق "مراد" و "ناهد" على الخطوبة اتفقوا على أن يكون الزفاف فى نهاية .. السريعة والتي استغرقت أيام قلائل .. العام الدراسى

بعد انتهاء الإحتفال بالثنائى اجتمعت الفتيات فى غرفة "نرمين" أخذن ينعمن .. بالحديث والمزاح

شعرت "زهرة" بالنوم فدثرها "مراد" وبقي بجوارها الى أن نامت .. ثم توجه الى غرفة "نرمين" فرأى ثلاثتهن معاً فابتسم قائلاً  
شكلوا وانتوا متجمعين مع بعض كده مش مريحنى -  
ضحكت الثلاث فتيات وقالت "نرمين" ضاحكه  
ليه بأه يا أبيه هنكون بنتفق يعني على سرقة بنك -  
التفت الى "مريم" قائلاً  
مش هتنامى -

: همت بأن تجيبه لكن "نرمين" قالت  
لا مش هتنام دلوقتى يا أبيه .. احنا عمالين نرغى ونلوك لوك سيبها تلوك معانا -  
.. وبعدين احنا سهرتنا النهارده للصبح  
:اتسمعت ابتسامته قائلاً  
ماشى لوك لوك براحتكوا -

انصرف "مراد" عائداً الى غرفته .. جلس على الأريكة ورفع طرف بنطاله وأزاح الساق الصناعيه قليلاً مستغلاً عدم وجود "مريم" فى الغرفة  
: "بحثت "مريم" عن هاتفها فلم تجده .. قالت لـ "نرمين"  
مش لاقياه رنى عليا كده -  
: اتصلت بها "نرمين" وقالت  
بيرن .. شكلك نسيته تحت -

: "قالت "مريم"  
لا أنا طلعت بيه .. شكلى نسيته فى الأوضة .. هروح أجيبه وأرجلكوا -  
: "قالت "سارة"

ماشى مستتبيك بس اوعى تتأخرى -  
توجهت الى غرفة "مراد" الذى سمع صوت هاتفها الموضوع على الكمودينو .. هم "مراد" بأن يرتدى ساقه الصناعيه مرة أخرى ليذهب اليها ويعطيها هاتفها .. كانت "مريم" معتاده على طرق الباب لكنها لم تطرقه هذه المرة لظنها بأنه

عاد الى غرفة "زهرة" بعدما تحدث معهن .. فتحت الباب ودخلت ليتسمر كلاهما فى مكانه .. شعر كل منهما برجفه تسرى فى جسده .. وكأن ماساً قد ارتدى ساقه الصناعيه بعد .. تطلع "كهربائياً أصابهما معاً .. لم يكن "مراد" كل منهما الى عين الآخر .. وكل منهما يحبس أنفاسه .. كانت صدمة "مراد" كبيرة .. أرادها أن تعرف لكن ليس بتلك الطريقة .. ليس فجأة .. أراد أن يمهد لها .. ويشرح لها .. لا أن ترى الفراغ فى ساقه .. لا أن ترى أعاقته ونقصه التى يخفيها عن أعين الجميع .. أرادها أن تعرف لكنه لم يريد أن ترى .. ظل حابساً أنفاسه مطولاً وهو متجمد فى مكانه من الصدمة .. كانت "مريم" تشعر بما يشعر به فى تلك اللحظة .. تعلم أنه كره دخولها عليه الآن .. وكره أن تراه هكذا .. وكره أن تطلع على أعاقته بتلك الطريق .. كانت ترى فى عينيه الخوف والجزع والألم والحيرة والصدمة والتردد والقلق .. عاد "مراد" يتنفس مرة أخرى .. لا بل يلهث وكأنه يبذل مجهوداً شاقاً .. خفض بصره ونظر أرضاً .. شعر بأنه غير مستعد لتلك اللحظة بعد .. غير مستعد لأن يخسرها .. غير مستعد وتدفعه لأن يبتعد عنها ويبعدا عنه .. لأن يرى فى عينيها نظرة يرفضها شعرت بالدموع التى همت بأن تتجمع فى .. ووقفت "مريم" فى مكانها تنظر اليه وأوقفتها قبل أن تظهر داخل عينيها .. كانت تعلم .. عينيها .. لكنها منعها قسراً مدى حساسية الأمر بالنسبة لـ "مراد" كانت تعلم أن كلمة واحدة أو نظرة واحدة منها من شأنها أن تنهى كل شئ بينهما .. مدت يدها وأغلقت الباب .. ووقفت مكانها .. كان "مراد" مازال ينظر أرضاً لا يجد فى نفسه الجرأة ليرى نظرات كانت "مريم" تشعر بتوتر بالغ .. خافت أن .. عينيها .. أو تعبيرات وجهها تخسره فى لحظة .. خافت أن يسئ فهم مشاعرهما تجاهه فيحكم عليها بفراقه .. تقدمت منه ببطء .. كلما اقتربت خطوة ازدادت خفقات قلبه سرعة .. طال أن تسأل .. أن تستفهم .. أن تعاتب .. الصمت .. كان ينتظر "مراد" أن يتحدث .. أن تغضب .. لكن طال انتظاره .. حاول أن يرفع رأسه لينظر داخل عينيها .. لكن خوفه من خسارتها منعه .. فجأة وجدها وقد جثت على ركبتيها أمامه .. حبس أنفاسه .. نظرت "مريم" اليه وهى تسمع صوت خفقان قلبها .. وتساءلت ترى أهذا صوت خفقان قلبي أم قلبه ؟ .. نظرت الى الساق المبتور والساق التى مازال يمسكها بيده .. نظرت الى وجهه تتمنى أن يفهم .. أن يفهم أنها لا تأبى مدت يديها وأمسكت منه الساق .. لتلك الإعاقه .. وأنها لا تعنى لها شيئاً سمعت صوت تنفسه رأت .. الصناعيه .. شعرت برجفة جسده وانفاسه ارتعاشة يده .. شعر "مراد" بالدهشة وهو يراها جاثية على ركبتيها تحت أقدامه تمسك بساقه الصناعيه .. وأخيراً رفع رأسه لينظر اليها عندما بدأت فى محاولة تثبيتها فى ساقه المبتور .. أخذ يتأمل وجهها وعينيها التى كانت مثبتة

على الساق .. كان يلهث بشدة وقد ازداد اضطرابه .. لا يعلم كيف سمح لها بأن  
مريم" من مهمتها "تفعل .. وبأن تكون قريبه منه هكذا وبأن تراه هكذا .. انتهت  
الى أن نجحت .. التي استغرقت بعض الوقت لجهلها بطريقة تركيبها الصحيحة  
فى ذلك .. ثم رفعت رأسها تنظر اليه .. شعر "مراد" برجفه فى كل أوصاله وهو  
ينظر اليها وهى قريبة منه الى هذا الحد جاثيه على ركبتيها تحت قدميه .. بحث  
فى عينيها عن نظرة نفور ورفض فلم يجد .. بحث عن نظرة شفقه وعطف فلم  
يجد .. لم يجد الا نظرة حب وشوق وابتسامه صغيرة ترتسم على محياها وهى  
: تتطلع اليه .. أخيراً وجد فى نفسه القدرة على الكلام .. قال بصوت مبجوح  
عرفتى امتى ؟ -

: قالت "مريم" بهدوء وهى تنظر اليه

من كام يوم -

: قال "مراد" بجمود

مين اللي قالك ؟ -

: قالت بهدوء

محدث قالى .. بس وانت نايم خدت بالى -

: نظر اليها "مراد" بغضب وقال بحده

وليه ما قولتليش انك عارفه -

: قالت "مريم" مبتسمه

لان الموضوع مش فارق معايا أصلاً -

سمع "مراد" كلماتها فهب واقفاً .. وقفت فى مواجهته هى الأخرى .. كان

: عصبياً للغاية .. وكأنه فاق من صدمته للتو وبدا يعي ما حدث .. قال بصرامة

يعني ايه مش فارق معاكى ؟ -

: توترت "مريم" وقالت بهدوء ونظرة رجاء فى عينيها

يعني مش فارق معايا .. اللي شوفته دلوقتى لا قلل ولا زود حاجه جوايا .. -

أكنى مشفتش حاجة

: صاح بعصبيه وهو يلهث بشدة

أيوة ابتدينا تمثيل .. عايزة تفهمينى يعني انك مفيش مشاكل عندك انك ترتبط -

بواحد رجله مبتوره .. وان زيه زى أى راجل تانى

: قالت بهدوء وقد بدأت الدموع تتجمع فى عينيها

أيوة مفيش مشاكل عندى -

: صاح بحده

أنا بأه عندى مشاكل .. مش عايز أرتبط بواحد فى يوم من الأيام تقولى أصلك -

معاق .. ولا واحدة بترد الجميل اللي عملته معاها بانها توافق تتجوزنى

: قالت "مريم" بصوت خافت  
أنا لادى ولادى -

صمت "مراد" وهو يشعر بتوتر كبير بداخله .. قال وكأنه يفتع نفسه قبل أن  
يقنعها :

انتى من حقت تختارى الراجل اللى انتى عايزاه .. مش حاجة مفروضه عليكي -  
.. واحنا المرتين اللى تجوزنا فيهم كان الجواز منى مفروض عليكي  
: صمت وهو يشعر بألم فى قلبه وقال بصوت متقطع  
انتى مش مجبره انك تعيشي معايا .. ولا مجبره ترديلى أى جميل .. بكرة ان -  
..... شاء الله

: قاطعته قائله بمراره والدموع تتساقط من عينيها  
بكرة ايه ؟ .. هتطلقنى تانى ؟ -

نظر اليها يرقب الألم فى عينيها والدموع التى تبلل وجهها .. خفق قلبه لمرآى  
: دموعها .. قالت "مريم" بصوت باكى  
عايز تسيبنى لوحدى تانى .. وتبعد عنى تانى .. وتحرمنى منك تانى -  
ثم قالت :

"لو كررتها تانى مش هسامحك أبداً يا "مراد" -

اقترب منها "مراد" ووجهه ينطق بالألم أخذ يمسح العبرات على وجهها بأطراف  
: أصابعه وهو يقول بصوت مضطرب  
مريم" بطلى عياط لو سمحتى" -

: قالت بعتاب وهى مازالت تبكى  
انت اللى بتخلينى أعيط .. انتى اللى عايز تألمنى .. ليه يا "مراد" بتعمل فيا -  
كده

: شعرت برعشة كفيه وهما يحتويان وجهها يقول بحنان جارف  
انا مستحيل أألمك .. انتى متتصوريش دموعك بتعمل فيا ايه .. أكنها سكاكين -  
بتقطع فى قلبي

: ثم قال بألم  
أرجوكى بطلى عياط -

توقفت عن البكاء وقد هدأت قليلاً .. قال لها "مراد" وهو ينظر الى عينيها بعمق  
:

مش عايزك تندمى أبداً انك اخترتيني .. مش عايزك أبداً تحسى انك كان ممكن -  
تتجوزى واحد أحسن منى .. مش عايزك تحسى أبداً انك اتظلمتى معايا  
: قالت "مريم" بثقه وهى تحتضن بيدها كفيه اللتان يضعهما على وجهها  
أبداً .. عمرى ما هندم أبداً -



: قال "مراد" بشك

"واثقة يا "مريم -

: ابتسمت قائله

- أيوة واثقة -

: مسح العبرات التي مازالت عالقة على وجهها وقال لها بحنان

مش عايزك تعيطى تانى .. اتفقنا -

أومأت برأسها وهي تنظر اليه بسعادة .. ارتسمت ابتسامه عذبه على شفتي

"مراد" وهو يتطلع اليها .. أحاطها بذراعيه معانقاً اياها بقوة .. شعرت "مريم"

بالأمان .. أغمضت عينيها وأخذت تتمسح .. بين ذراعيه كما تشعر معه دائماً

مراد" عنه لينظر فى عينيها بحب قائلاً "بوجهها فى صدره كالمقطه .. أبعدها

: بصدق شديد

"بحبك يا "مريم -

شعرت بقلبيها يرقص فرحاً .. وشعرت بالدموع تتجمع فى عينيها من جديد ..

: فقال محذراً

قولتلك مفيش عياط تانى -

أومأت برأسها وهي تتعلق بعينيها وتبتسم بسعادة .. تأمل "مراد" نظرة الحب

فى عينيها والابتسامه التي تفصح عن سعادتها بقربه .. اطمئن قلبه وشعر بأنه

ساكن أمين .. انحنى يقبلها بحب وشوق .. ويدخلها .. أخيراً وجد لقلبه ساكن

الى عالمه الخاص

نظرت الى ضوء الصباح المتسلل من النافذة وهي .. استيقظت "مريم" بسعادة

ليس كأي صباح مر عليها من قبل .. التفتت .. تشعر بأن هذا الصباح مختلف

وكأنه شعر بنظراتها .. فتح عينيها ببطء .. .. لتتنظر الى "مراد" النائم بجوارها

: ابتسم بسعادة قائلاً .. وتطلع الى وجهها الذي يعشقه

ايه ده القمر والشمس طالعين مع بعض فى وقت واحد -

ضحكت بخجل .. مسح على رأسها بيده مقبلاً اياه .. اعتدلت فى الفراش بخجل

: وهي تنظر الى الساعة هاتفه

ايه ده احنا اتأخرنا أوى عليهم -

: قال "مراد" وهو ينهض هو الآخر

: "أصلاً المفروض عندي معاد مع "طارق" دلوقتي .. قالت "مريم -

"وأنا كمان المفروض أقابل "مى -

: مسح "مراد" بأصابعه على وجنتها قائلاً

- خدى العربية معاكى .. لولا انكوا بنتين مع بعض كنت روحت معاكى -

: ضحكت قائله

لا طبعاً مش هينفع تيجي -

: قال "مراد" بقلق وهو يتطلع اليها

موبايلك معاكى لو حصل أى حاجه كلميني وخليكوا فى الأماكن اللي حددتها -  
متروحوش فى مكان تانى الا لما تعرفيني .. وقولتيلى عليها امبارح

: ابتسمت قائله

حاضر -

: ابتسم وهو يتطلع اليها بحب قائلاً

يا مطيع انت -

: ضحكت بخجل .. رن هاتفه فنظر اليه قائلاً

طارق " .. أكيد بيستعجلنى .. أصلنا رايعين شركة حراسة عشان أختار " -

السيكيوريتي اللي هحطهم على بوابة الفيلا

أنزل "مراد" قدميه وأخذ الساق الصناعية بجوار الفراش ليرتديها .. أسرع

"مريم" بالنهاوض من الفراش والتفت حوله وجثت على ركبتيها أمامه كما

فعلت بالأمس .. خفق قلب "مراد" بشده وهو يراها تلبسه اياها وأخذ يداعب

: شعرها ووجنتها فى حنان .. انتهت فنظرت اليه قائله بمرح

بقيت شطورة وبعرف أركبها بسرعة -

نظر الى وجهها وعينيها يستشعر صدق سعادتها وفرحتها .. أمسك يديها يجذبها

: الى حضنه معانقاً اياها بشدة .. قال هامساً

ربنا يخليكي ليا يا أحلى حاجة فى حياتى -

: شعرت "مريم" بالسعادة لكلماته .. نظر اليها قائلاً بخبث

بقولك ايه متخلى "مى" تروح مع مامتها النهاردة -

: ابتسمت بخجل قائله

"طيب و" طارق -

: قال مبتسماً بخبث

هو صغير يعني ميروح لوحده -

وكل منهما يشعر بأنه وجد فى الآخر ما كان .. نظرا فى أعين بعضهما بسعادة

ينقصه .. "مريم" وجدت فيه الأمان الذى افتقدته .. و"مراد" وجد فيها الحنان

الذى افتقده .. فشعر كل منهما أنه يكمل الآخر

\*\*\*\*\*

حامد" معاً فى منزله ومعهما فتاتان ولم يخلو "فى المساء اجتمع "سامر" و

الأمر من الخمر لتكتمل سهرتهما .. وتعالق أصوات الموسيقى لتتمايل الفتاتان



: أخذت أمه تبكى بحرقه وتقول  
حسبي الله ونعم الوكيل فيكوا انتوا الاتنين .. ربنا ينتقم منكوا انتوا الاتنين -  
: صاح بقسوة قبل أن يغادر  
وفيكي انتى كمان لانك معرفتيش تربى -

\*\*\*\*\*

مراد" جالسا فى مكتبه بالبيت يطالع أحد الملفات عندما "فى اليوم التالى .. كان  
طرقت "مريم" الباب ودخلت بهدوء مبتسمه .. تقدمت من المكتب ووضعت  
: عليه صنية الشاى والكيك التى تحملها .. امسك يدها وقبلها وابتسم لها قائلاً  
تسلم ايدك يا حبيبتي -  
: قالت مبتسمه بخجل  
دوقه وقولى رأيك بصراحه أنا اللي عملاه -  
: قبل يدها مرة أخرى ونظر اليها قائلاً بحب  
طالما انتى اللي عملاه يبقى أكيد هيعجبني -  
فتح "مراد" الخزينه بجواره وأخرج منها علبة قطيفة صغيرة .. فتحها وأخرج  
نظرت "مريم" اليهما بخجل وسعادة .. أمسك .. منها دبلة ذهبية وأخرى فضية  
يدها اليسرى ونزع منها الدبلة التى تزينه وألبسها الدبلة التى تحمل اسمه ..  
أخذت "مريم" الدبلة الفضية التى تحمل اسمها وألبسته اياها .. وكلاهما ينظر  
الى الآخر بسعادة  
حانت منها التفاته الى الملف الموضوع على المكتب أمامه لمحت صور دماء  
: ورجل ملقى على الأرض قالت بدهشه  
"ايه ده يا "مراد" -  
: نظر "مراد" الى الملف والصور قائلاً  
ده ملف جريمة القتل اللى كانت حصلت فى الصعيد .. لقيته فى أوراق بابا اللى -  
كانت فى الخزنة  
: أمسكت "مريم" الصور لتطلع اليها فأخذها منها "مراد" بسرعة قائلاً  
لا متشوفيهاش .. مصورين الجثة على الأرض هيتعبك المنظر ده -  
: "قالت "مريم"  
طيب عايزة أشوف الصورة اللى كان مكتوب فيها بالدم -  
بحث "مراد" فى الصور الى أن أخرج الصورة وأراها اياها .. مسكتها "مريم"  
: تتأملها .. فقال "مراد" وهو يمسك احدى الأوراق بيده  
تقرير الطبيب الشرعى بيقول ان الرصاصة اخترقت قلبه ومات .. وكمان -  
الحرق اللى كان مكان الرصاصة على صدره معناه ان الرصاصة اضربت من

مكان قريب جداً

: نظرت اليه "مريم" قائله

يعني ايه؟ -

: قال "مراد" باستغراب

- يعني اللي ضرب عليه النار كان واقف قريب منه جداً .. التقرير بيقول أقل من

متر .. ودى حاجة غريبة جدا

: قالت "مريم" باستغراب

ليه غريبة ؟ -

: قال "مراد" وهو ينظر اليها

- لأن كان فى مشاكل بين بابايا وباباكي و ابن "حسن المنفلوطى" .. والمشاكل

دى كانت بتوصل لرفع السلاح .. دلوقتى ايه اللي يخلى ابن "حسن" يآمن انه

يقف قريب أوى من واحد المفروض انه عدوه .. مخفش يقتله ؟ .. ازاي يقف

ادامه والمسافة بنهم أقل من متر من غير ما يخاف ؟

: قالت "مريم" وهى تزعم شفيتها

مش عارفه .. طيب السلاح اللي اتضرب بيه لقوه ولا لاء ؟ -

: قال "مراد" باستغراب

- مش هتصدقى .. السلاح كان جمب الجثة واللى أغرب من كده ان السلاح كان

مرخص باسم القتل

: قالت "مريم" بدهشة

وبابايا أو باباك ايه اللي هيوصلهم لسلاح القتل ؟ -

: قال "مراد" شارداً

- يمكن كان القتل عايز يتهم على "خيري" اى ان كان بابايا ولا باباكي ..

و"خيري" خده منه ودافع عن نفسه وضرب عليه النار .. وعشان كده النار

اضربت من المسافة الصغيرة دى

: قالت "مريم" بحماس

- أيوة صح أكيد هو ده اللي حصل لأن انت بتقول ان باباك مستحيل يقتل وأنا

بيأه القتل كان دفاع عن النفس .. كمان بقول نفس الكلام عن بابا

: قال "مراد" بحيرة

- مش عارف برده حاسس ان فى حاجه غلط .. لو هو قتل دفاع عن النفس ايه

السلاح اللي اضرب منه النار سلاح القتل .. يخلى "خيري" اللي قتل ينكر ده ؟

.. وده كافي انه يثبت ان القتل هو اللي اتهم عليه وهو اضطر ياخذ منه السلام

يضرب عليه النار عشان يدافع عن نفسه .. ايه اللي يخليه ينكر انه ضرب عليه

اصلاً ؟

: سألته "مريم" قائله

- طيب مش يمكن فعلا اللي قتله واحد تانى غير بابا وباباك .. والكلمة اللي

تكتبت بالدم القاتل هو اللي كتبها

: قال "مراد" وهو ينظر الى الأوراق

- تقرير المعمل الجنائي بيقول ان البصمات الى على الكلمة اللي اتكتبت هي

بصمات القتل نفسه .. يعني هو اللي كتبها بنفسه

: "قالت "مريم" وهي تمعن النظر الى الصورة وتقربها من "مراد

مراد" انت مش شايف حاجة غريبة هنا ؟"

: أخذ "مراد" الصورة منها ونظر اليها قائلاً

لأ مش واخذ بالي -

:قالت "مريم" بحماس

اسم "خيري" مكتوب بطريقة غريبة -



: تأمل "مراد" الصورة جيداً ورفع حاجبيه دهشة وقال

فعلاً مكتوب بطريقة غريبة -

: قالت "مريم" باستغراب

- لو كان القتل هو اللي كتب اسم "خيري" ايه اللي يخليه يكتبه بالطريقة دي ..

ولو كان القاتل هو اللي كتبها واستخدم فيها صواب القتل عشان تظهر بصماته

برده ايه اللي يخليه يكتبها بالطريقة الغريبة دي

فجأة قفزت في رأس "مراد" فكرة .. أخذ يقلب بين الأوراق التي أمامه بلهفه

: شديده .. قالت "مريم" باهتمام

في ايه يا "مراد" .. اكتشفت حاجة ؟ -

أخرج "مراد" احدى الورقات ونظر اليها لتتسع ابتسامته لتملاً وجهه كله ..

: قالت "مريم" بلهفه شديدة

مراد" قولى" -

: نظر اليها "مراد" قائلاً بسعادة وثقه

لا بابايا ولا باباكي اللي قتل -

: اتسعت عينا "مريم" لتتظر اليه قائله بلهفه

بجد انت متأكد ؟ -

: حضن وجهها بين كفيه وقال بسعادة

أيوة متأكد يا حبيبتي -

: قالت بلهفه

- عرفت ازای يا "مراد" ؟ -

أمسك الورقة التي كانت في يده منذ قليل ووضعها أمامها ووضع اصبعه على

: احدى الجمل وقال مبتسماً

- اقرى الجملة دي -

: قرأت "مریم" الجملة لتتسع عيناها دهشة وهتفت قائله

- مش ممكن .. معقول ده -

: قال "مراد" وهو ينظر الى الورقة

- مراته اللي قتلته -

: قالت "مریم" وهي تعاود النظر الى الصورة

- كان عايز يكتب "خيرييه" مش "خيري" بس مات قبل ما يكملها .. ملحفش -

يكتب الحرف الأخير

: أخرج "مراد" هاتفه فقالت "مریم" باهتمام

- هتعمل ايه -

: قال

- هتصل بعمى أشوف يعرف ايه عن "خيرييه" دي -

- تحدث "مراد" مع عمه "سباعي" قرابة النصف ساعة .. ثم أنهى المكالمة ..

: قالت "مریم" بحزن

- ربنا يرحمها ويغفر لها بأه .. ماتت وسابت العيلتين كل واحد فيهم شاكك في -

التانى

: تنهد "مراد" بأسى قائلاً

- بسببها بابا اضطر يسيب بلده وأهله -

: ثم نظر الى "مریم" قائلاً

- وباباكي كمان اتحرم من بلده وأهله -

: قالت "مریم" بحزن

- خلاص يا "مراد" اللي فات مات .. مش هيفيد بحاجة نتحسر عليه دلوقتي .. -

وبعدين لو مكنش ده كله حصل يمكن مكناش أنا وانت بقينا لبعض

: اقترب منها معانقاً اياها وهو يقول بحنان

- الحمد لله -

\*\*\*\*\*

تم زفاف "طارق" و "مى" فى قاعتين منفصلتين .. حضر الجميع داعيين لهما  
: بالبركة وأن يجمع الله بينهما فى خير .. اقتربت "مريم" من العروس قائلة

حبيبة قلبي طالعه زى القمر -

: ابتسمت "مى" قائلة

"بجد يا "مريم" -

: عانقتها "مريم" قائلة

طبعاً بجد .. حبيبتي ربنا يوفقك فى حياتك وبياركلك فيها -

: شدت "مى" على أيدي "مريم" وهى تقول بسعادة

وانتى كمان يا "مريم" ربنا يسعدك دائماً -

التفتت "مريم" لتتنظر الى "سارة" الجالسه على احدى الطاولات .. فاقتربت

: منها وجلست بجوارها قائلة

ايه يا بنتى أعده لوحدك ليه ؟ -

: ضحكت "سارة" قائلة

مليش فى الرقص -

: قالت "مريم" بمرح

يعني أنا اللي ليا .. اهو الواحد بيعمل أهى حركات وخلص -

: التفتت حولها قائلة

فين "نرمين" ؟ -

: أشارت "سارة" الى المنصة وضحكت قائلة

بتأدى النمرة بتاعتها -

: نظرت اليها "مريم" وانفجرت ضاحكة .. ثم التفتت الى "سارة" قائلة

انتى واثقة ان "نرمين" أحتك انتى و "مراد" .. أنا شكه انكوا لقيتوها على -

باب جامع وهى صغيرة

: ضحكت "سارة" قائلة

"أنا كمان يا بنتى شكه فى كده .. شكلها هتطلع فى الآخر بنت دادة "أمينة" -

انفجرت الفتاتان فى الضحك والمزاح

: فى قاعة الرجال .. وقف "طارق" محاطاً بأصدقائه .. قال أحدهم

مبروك يا عريس .. أخيراً شوفناكى فى الكوشة يا بيضه -

: صاح آخر بمرح

مكنش يومك يا "طارق" .. كان مستخبيك ده كله فين يا ضنايا -

: صاح "طارق" قائلاً

ايه العالم المحبطة دى .. طيب حد يقولى كلمة تشجعنى يا جماعة بدل الكلام -



اللى يجيب ورا ده

: قال أحد أصدقائه ضاحكاً

نجبلك كلام مشجع منين .. انت واقف فى بركة .. مكنش انعذر واتباع جذر -  
شباب متجوزة .. روح فى آخر القاعة يمكن تلاقى شلة شباب زى الورد لسه  
متجوزوش هيدوك دفعه تمام

: التفت "طارق" الى "مراد" وهو يقول بمرح

طيب انت يا "مراد" قولى كلمة تظمن قلبي طيب بدل العالم التعبانه دى -

: ابتسم "مراد" قائلاً

بص يا "طارق" يا حبيبي .. اللى عايز العسل يتحمل قرص النحل -

: صاح "طارق" قائلاً

هى فيها قرص ولا ايه .. يا "مراد" أنا بقولك ظمنى مش ارعبنى -

: شعرت "مريم" بالتوعك فى بطنها .. فالتفت الى "سارة" قائلة

سارة "متيجى معايا عايزة أروح الحمام" -

قامت "سارة" معها وخرجا من القاعة وتوجها الى حمام السيدات .. خرجت

"مريم" وهى مازالت تشعر بالألم فى بطنها حاولت تجاهله .. لكن ظهرت

: بلهفه "تعبيرات الألم على وجهها .. قالت "سارة

انتى كويسة يا "مريم" ؟ -

: قالت "مريم" وهى تجاهل الألم

أيوة كويس متشغليش بالك -

توجهتا الى القاعة مرة أخرى فارتطمت "سارة" برجل كان يخرج من قاعة

: الرجال .. التفت الرجل قائلاً بخرج

معلش أنا أسف والله مخدمش بالى -

: قالت "سارة" بخرج

محصلش حاجة -

: نظرت "مريم" الى الرجل بدهشة .. فالتفت اليها وقال مبتسماً

"ازيك يا مدام "مريم" -

: نقلت "سارة" نظرها بينهما بدهشة .. فقالت "مريم" بارتباك

: ازيك يا أستاذ "عماد" .. ثم جذبت "سارة" من يدها قائلة -

بعد اذنك -

مراد "تتحدث معه .. خاصة لعلمها بشدة غيرته "خافت "مريم" من أن يراها

: سارة" وهى تجلس بجوارها على الطاولة"عليها .. دخلتا القاعة فقالت

مين ده يا "مريم" ؟ -

: "قالت "مريم"  
"ده مديري فى الشركة اللى بشتغل فيها .. أستاذ "عماد" -  
: "قالت "سارة"  
.. اهاا -

عاد "عماد" الى قاعة الرجال مرة أخرى .. ليقع نظره على "مراد" .. أخذ  
مراد "لنظراته .. اقترب منه "عماد" قائلاً "ينظر اليه بدهشة شديدة .. انتبه  
بحرج :

- معلش أنا آسف انى ببصلك كده .. أصلك شكل واحد أعرفه .. بس شكله بشكل  
غير عادى .. لولا انى عارف ان معندوش اخوات كنت قولت انك أخوه

: قال "مراد" باهتمام

تقصد "ماجد خيري" ؟ -

: هتف "عماد" بدهشة

انت تعرفه ؟ .. انت أخوه ؟ -

: قال "مراد" مبتسماً

أيوة أخوه -

: ابتسم "عماد" قائلاً

كنت فاكّر ان معندوش اخوات -

: قال "مراد" باهتمام

كنت تعرفه منين ؟ -

: "قال "عماد"

خطيبته بشتغل عندى فى الشركة -

: قال "مراد" وقد ضيق عينيه

- حضرتك أستاذ "عماد" مدير شركة رؤية للدعاية والإعلان -

: ضحك "عماد" قائلاً

مكنتش عارف ان صيتي واصل للدرجة دى -

: قال "مراد" مبتسماً

مدام "مريم" تبقى مراتى -

: صاح "عماد" بدهشة

- ما شاء الله .. ربنا يباركلكوا يارب -

: ثم قال

- شكراً لانك مخلتناش نخسر ديزاينر محترف زيها .. ووافقت على شغلها معنا -

عن طريق النت

: ابتسم "مراد" قائلاً

وأنا سعيد انى اتعرفت على حضرتك -

خرج الجميع من القاعة وركبا العروسين فى طريقها الى منزلهما .. ركبت ناهد" فى السيارة فى انتظار "مراد" "مريم" مع "نرمين" و "سارة" و كانت "مريم" تشعر بالألم فى بطنها يزداد .. فقالت لـ "سارة" الجالس به جوارها :

"سارة" ممكن تنادى "مراد" -

: التفتت "ناهد" قائله

مالك يا حبيبتي تعبانه -

: قالت "مريم" بسرعة

- لا أبدا يا ماما .. حاجه بسيطه .. بس أصل "مراد" اتأخر واحنا مستنيينه من بدري

نزلت "سارة" من السيارة وتوجهت الى حيث "مراد" واقفاً .. ترك "مراد" صحبة الرجل الواقف معه والتفت الى "سارة" قائلاً

"خير يا "سارة" -

: "قالت "سارة"

مستيينك من ساعتها يا أبيه -

: "قال "مراد"

حاضر جاى حالا -

: أقبل "عماد" فى اتجاه "مراد" قائلاً

"فرصة سعيدة يا أستاذ "مراد" -

: سلم "مراد" عليه قائلاً

أنا الأسعد يا فندم -

سارة" الواقفة مع "مراد" لمحت نظرتة اليها "حانت من "عماد" التفتاته الى

توجه "مراد" بصحبة "سارة" الى .. فتضربت وجنتاها وأخفضت بصرها

سيارته .. فحانت من "عماد" التفتاته أخرى تجاهها قبل أن ينطلق بسيارته

وصل "مراد" بسيارته الى الفيلا .. نزل الجميع شعرت "مريم" بالتوعك

: وشعور بالضيق فالتفتت لـ "مراد" قائله

مراد" أنا هعد فى الجنيئة شوية" -

: سألها باهتمام

مالك ؟ -

: قالت بسرعة

لا مفيش بس حسه انى مخنوقة شوية -

: قال "مراد" وهو ينظر اليها بحنان  
طيب انا هطلع أظن على ماما وأجيبك -  
للإطمئنان عليها .. وبعد فترة خرج "مراد" "صعد" "مراد" الى غرفة "زهرة"  
ليبحث عن "مريم" وجدها جالسه على أحد المقاعد وتعد ذراعها أمامها  
: وتضغط بهما على بطنها .. اقترب منها قائلاً بإهتمام  
مريم " فى ايه ؟" -

: رفعت "مريم" رأسها وقالت  
حسه ان بطنى وجعانى -  
: جلس بجوارها قائلاً بحنان  
ألف سلامه عليكى .. ممكن تكونى كلتى حاجة تعبتك -  
: قالت "مريم" بصوت خافت  
لأ مكلتش حاجه -

: ثم قالت  
ادخل انت أنا هعد شوية وبعدين ادخل -  
: نظر اليه بحنان قائلاً  
مش هقدر أسيبك تعبانه كده -  
: قالت تطمأنه  
أنا كويسه متقلقش -

اقترب منها ووضع يده على مكان الألم يقرأ بصوت خافت آيات من كتاب الله ..  
أغمضت "مريم" عينيها وأسندت رأسها الى صدره فأحاطها بذراعه .. شعرت  
بالسكينة والراحة .. كان صوته عذباً فى القراءة .. استكانت تحت يده .. ودت ألا  
يتوقف أبداً .. انتهى من التلاوة ففتحت عينيها ونظرت اليه ميتسمه .. ابتسم  
: قائلاً  
أحسن شوية -

: قالت  
الحمد لله -

: رن هاتفه فأخرجه قائلاً  
شوانى أرد على المكالمة دى لانها مهمة -  
تحدث قليلاً بجوارها ثم قام أثناء الكلام ووقف مبتعداً عنها ببضعة أمتار وأخذ  
تنظر اليه بحنان .. كانت تشعر بسعادة غامرة "يتحدث فى الهاتف و" مريم  
لأنهما استطاعا التغلب على كل العقبات التى واجهتهم .. وأخيراً أصبحا معاً ..  
كزوج وزوجة .. كحبيب وحبيبة .. حمدت الله فى سرها على ما أنعم به عليها ..  
لتلمح شيئاً غريباً على قميصه الأبيض .. نقطة حمراء "نظرت الى "مراد"

صغيرة تتحرك بسرعة على قميصه وعلى بنطاله الى أن توقفت فوق قلبه .. شعرت وكأن قلبها انخلع من صدرها بقوة .. نظرت بلهفه فوق البناية المجاورة للفيلا فرأت في ضوء القمر رجلاً على السطح يوجه بندقيه في الذى يتحدث والى النقطة "اتجاههم .. نظرت مرة أخرى فى لهفه الى "مراد الحمراء المثبته فوق قلبه .. فكرة واحدة هى التى سيطرت عليها فى تلك اللحظة تحجرت الدموع فى .. "لا يمكن أن تخسره .. لا يمكن أن تخسر "مراد فقط انطلقت كالسهم .. عينيها .. لم تفكر .. لم تشعر .. لم تحسب .. ولم تنتظر لتلف ذراعيها حول عنقه وتلقى نفسها فى حضنه وأغمضت عينيها قبل أن تشعر بألم حارق فى ظهرها وبرجه عنيفة فى جسدها .. شعرت بتنفسها يضيق وبالذنيا تدور من حولها

اندهش "مراد" عندما وجدها تلقى بنفسها فى حضنه وتلف ذراعيها حول عنقه : ..أنزل الهاتف من على أذنه ليمسكها قائلاً  
"مريم" -

فجأة شعر برجة عنيفة فى جسدها وكأنها اصطدمت بشئ ما .. نظر بهلع الى يده الموضوعه على ظهرها ليجدها غارقة فى الدماء .. هوت بين يديه لتسقط أرضاً : وهو ممسك بها .. صاح بلوعه  
"مريم" .. "مريم" -

: كانت تأخذ نفسها بصعوبه كما لو كانت تغرق .. قالت بصعوبه بصوت مرتجف  
خلى بالك -

نظر "مراد" الى الشعاع الأحمر الذى يتحرك بجنون فوق الأرض العشبيه .. نظر حوله ليرى الراجل فوق السطح فأخذ يصرخ فى الأمن الواقفون على وأشهر أحدهما السلاح وصوب فى اتجاه .. البوابه .. حضر اثنان منهما بسرعة الرجل وأطلق طلقة لم تصيبه لكنها صمت الآذان من دويها .. شعر الرجل فجرى واحداً من الأمن .. الواقف على السطح العارى بالخوف فهرب مسرعاً : خارجاً من الفيلا ليلحق بالرجل .. اما الآخر فقد صرخ فيه "مراد" بعنف بسرعة .. اطلب الإسعاف بسرعة -

هرع كل من فى الفيلا خارجاً مع صوت الرصاص والصراخ التفت "مراد" الى "مريم قائلاً بهلع وهو يضع يده على الجرح يكتم دمها الذى يينزف يغزاره

"مريم" .. خليكي معايا يا "مريم" -

كانت مازال تأخذ نفسها بصعوبة .. بكا "مراد" بجوارها وأمسك يديها يضمها : الى صدره قائلاً بصوت باكى

مريم" متسبنيش .. "مريم" خليكي معايا .. متغمضيش عينك " -

فشلت فى ابقاء عينيها مفتوحتان .. فأغمضتهما .. هزها "مراد" بعنف وصرخ  
: فيها

"مريم" فتحي عينك متغمضيهاش .. "مريم" -

اعادت فتح عينيها مرة أخرى وهى تنظر اليه .. قال لها بألم شديد بصوت باكى  
: والدموع تغرق وجهه  
قولى الشهادة يا حبيبتى -

حركت شفاهها دون أن تقوى على اخراج صوتها  
اقترب منهما الجميع وأخذوا فى الصراخ والبكاء .. حملها "مراد" مسرعاً وقال  
: بهلع

مش هينفع نستنى الإسعاف بتنزف جامد -

حملها وتوجه بها مسرعاً الى السيارة وأمر "نرمين" بالركوب جوارها .. ركبت  
بالسيارة وقميصه يقطر دماً .. ظل طوال الطريق "نرمين" وانطلق "مراد"  
كلما وجدها قد أوشكت على اغماض عينيها مد .. يلتفت اليها ليلقى نظرة عليها  
: يده يهزها بعنف قائلاً

افتحي عينك متغمضيهاش -

كانت تنن من الألم .. شعر بقلبه يتمزق .. مد يده ليمسك يدها وهو يقود السيارة  
: بسرعة بالغة .. التفت اليها قائلاً بلهفه

خلاص يا حبيبتى اطمنى دقايق وهنوصل المستشفى -

أوقف "مراد" السيارة أمام المستشفى فى اهمال وحملها مسرعاً .. صاح فيه  
: رجل الأمن

مينفمش توقف العربية كده -

: "صاح به "مراد"

عندك المفتاح فى العربية -

دخل "مراد" المستشفى مسرعاً و"نرمين" خلفه باكيه .. صاح فى الممرضات  
:

عايز دكتور بسرعة -

وما هى الا دقائق حتى كانت فى غرفة .. أتوا له بالترولى وضعها عليه

العمليات .. وقف "مراد" خارج غرفة العمليات وقلبه يكاد يتوقف من فرط

: خوفه وقلقه وتوتره .. ظل يردد ودموعه تغرق وجهه

يارب احفظها .. يارب -

جلست "نرمين" على أحد المقاعد تبكى وتدعو الله هى الأخرى أن يحفظ

"مريم"

مر الوقت بصعوبة شديدة على "مراد" حتى خرج أخيراً الطبيب أسرع اليه قائلاً

: بلهفه

طمنى يا دكتور .. "مريم" كويسه -

: قال الطبيب

حضرتك جوزها ؟ -

: أوما "مراد" برأسه وعيناه تتعلق بشفتى الطبيب .. ابتسم الطبيب بتعب قائلاً

متقلقش المدام بخير .. شلنا الرصاصة وهتبقى كويسة ان شاء الله -

أغمض "مراد" عينيه للحظة ولم يشعر بنفسه الا وهو يخر على الأرض ساجداً

: لله حمداً وشكراً له .. نظر اليه الطبيب وقال مبتسماً

الحمد لله ربنا نجهالك -

: تتمم "مراد" وهو يمسح العبرات عن وجهه

الحمد لله .. الحمد لله -

: "قال له الطبيب وهو يضع يده على كتف "مراد

وربنا يعوضك ان شاء الله -

: نظر اليه "مراد" مستفهماً فقال الطبيب

كانت حامل وفقدت الجنين -

: أغمض "مراد" عينيه لحظه ثم فتحها وقال

انا لله وانا اليه راجعون اللهم اجرنى فى مصيبتى واخلف لي خيراً منها -

: ثم نظر الى الطبيب وقال بصدق شديد

مش مهم أى حاجة المهم هى تبقى كويسة -

راها تخرج محمولة على الترولى .. ترك الطبيب وأسرع تجاهها .. نظر اليها

: نائمة فمسح على وجنتها قائلاً بصوت متهدج

مريم "حبيبتي" -

: قالت له الممرضة

متقلقش الدكتور بيقول انها كويسه بس هتاخذ وقت على ما تفوق من البنج -

أدخلتها الممرضة الى احدى الغرف .. نظر اليها "مراد" بحنان .. تتممت

: "نرمين

الحمد لله .. كنت حسه ان قلبي هيقف من الخوف -

وكانه لم ينتبه الى وجودها إلا الآن .. نظر الى "التفت "مراد" الى "نرمين

ملابسها المدرجة بالدماء والى ملابسه هو الآخر .. قال لـ "نرمين" بصوت

: متعب

انتى كويسة يا "نرمين" ؟ -

: "أومات برأسها فجذبها الى حضنه قائلاً وهو ينظر الى "مريم

متقلقش هتبقى كويسة -

: ثم نظر اليها قائلاً

متسببهاش لحظة لو حصل أى حاجة خدى تليفون .. نرمى "خليكى معاها" -  
من حد من الممرضات وكلميني أنا راجع البيت أطمئن على "ماما" و "سارة" و  
ماما "زهرة" وأشوف الأمن مسكوه ولا لا

: قالت "نرمى" بأسى

"مين اللي عمل كده مين اللي عايز يأذى "مريم" -

: تنهد قائلاً

"كان بيضرب عليا أنا مش على "مريم" -

: "اقترب منها ومسح على رأسها وقبل جبينها .. قالت "نرمى

متقلقش يا أبيه أنا هفضل جمبها -

خرج "مراد" وعاد الى البيت مسرعاً .. أخبره أحد أفراد الأمن أنهم تمكنوا من

القبض على مُطلق النار واقتادوه الى قسم الشرطة بعدما طلبوا الشرطة

: وأبلغوهم بما حدث .. طمأن أهله بأن "مريم" بخير فعاتبته أمه هاتفه

يعنى مكنتش قادر تتصل يا "مراد" تظننا عليها -

: قال "مراد" بوهن

أنا مكنتش فيا عقل أفكر يا ماما .. انا حتى ورحت المستشفى من غير حتى -

بطاقة ومن غير ولا مليم لولا ان صاحب المستشفى صحبي وأول ما اظمنت

عليها وخرجت جيت على طول

: قالت "سارة" باكيه

و "مريم" كويسه دلوقتي ؟ -

: قال "مراد" بوهن

أوية كويسة هغير هدومي وحضريلي هدوم لـ "نرمى" عشان هدومها -

: غرقانه دم التفت الى "ناهد" قائلاً

ماما كويسة -

: "قالت "ناهد

- متقلقش خافت من ضرب النار بس طمنتها اننا كويسين مرضتتش أقولها اللي -

حصل دلوقتي

: قال "مراد" بإمتنان

كويس -

صعد "مراد" مسرعاً الى غرفته ليتغير ملابسه وقلبه وعقل منشغل بحبيبته

الراقدة فى المستشفى والتي كانت على استعداد للتضحية بحياتها من أجله .. من

. أجله هو .



## الفصل السابع والعشرون (( الأخير ))

فتحت "مريم" عينيها شيئاً فشيئاً رأت نفسها نائمة على الفراش فى مكان غريب .. حاولت أن ترفع يدها فانتبهت لوجود شخص بجوارها .. كان "مراد" جالساً على مقعد بجوارها ويمسك بيدها ويسند جبهته على السرير .. شعر بحركتها فهب واقفاً واقترب منها يمسح على رأسها قائلاً:

-حبيبتي .. حمد الله على السلامة

نظرت "مريم" اليه بدهشة وهى لا تقوى على الحركة .. أمازالت حقاً على قيد الحياة .. ألم تمت .. آخر شئ تتذكره "مراد" الذى كان مسرعاً بسيارته ويمد يده للخلف ليمسك بيدها .. نظرت اليه فى مرآة السيارة نظرة أخيرة وكأنها تودعه قبل أن تغلق عينيها وتفقد الشعور بكل ما حولها .. بلعت ريقها بصعوبة فقال "مراد" بهلفه:

-حبيبتي ثوانى هنادى الدكتور

خرج "مراد" مسرعاً وأحضر معه الطبيب الذى فحص الأجهزة التى كانت موصلة بها وفحص عينيها و ضغطها وقال بروتينيه:

-حمدالله على السلامة يا مدام .. ان شاء الله هتبقى كويسة بس لازم تستنى معانا فترة عشان الجرح

أومأت برأسها .. خرج الطبيب فأغلق "مراد" الباب واقترب منها يجلس على الفراش بجوارها احتضن يدها الموضوع بها الكانيولا .. ونظر اليها بحنان قائلاً :

-حبيبتي انتى كويسه

أومأت "مريم" برأها وقالت بضعف:

-ضهرى وجعنى

مسح "مراد" وجنتها بأصابعه قائلاً:

-معلش يا حبيبتي .. هما حظوك مسكن من شوية عشان لما تفوقى

صمت قليلاً ونظر في عينيها وقال بصوت مرتجف وقد غشت عيناه العبرات:  
-ليه عملتى كده؟

نظرت "مريم" اليه بحنان وقالت بضعف:  
-كنت خايفه عليك

قال "مراد" بصوت مضطرب:

-انتى متعرفيش أنا حسيت بإيه لما شوفتك غرقانه فى دمك .. كنت هموت يا  
"مريم" .. ازاي اتهورتى كده .. مفكرتيش لو كان حصلك حاجه أنا كان ممكن  
يحصلى ايه

تذكرت "مريم" جملته التى قالها بعد حريق اللانش .. نظرت اليه بأعين دامعة  
وقالت بوهن:

-وأنا كمان مكنتش هقدر أستحمل يحصلك حاجة يا "مراد" .. الرصاصة كانت  
هتيجي فى قلبك .. لكن أنا كانت هتيجي فى أى مكان غير قلبي  
احتواها بعينيه وقال بتأثر شديد:

-بتحبينى أوى كده؟

ابتسمت قائله:

-بتسأل

قال بلهفه:

-عايز أسمعها

نظرت بحب الى عينيها والى ملامحه .. ملامح "مراد" .. وقالت هامسه:

-بحبك أوى

سألها قائلاً:

-بجد يا "مريم"

ابتسمت قائله:

-بجد يا حبيب "مريم"

اتسعت ابتسامته وأخذ يتأملها الى أن شعر بأنها تغمض عينيها من التعب فقال  
لها بحنان:

-كفايه كلام وارتاحى

قالت برجاء قبل أن تغمض عينيها:

-خليك جمبي

رفع "مراد" كفها الى فمه يقبله دون أن يبعد نظره عنها وهو يهمس قائلاً:  
-حاضر يا حبيبتي .. نامى وأنا هفضل جمبك .. اطمنى  
ابتسمت له وأغمضت عينيها وهي تشعر بالسكينة والأمان لوجوده بجوارها.

\*\*\*\*\*

قال "حامد" بلهفه:

-انت واثق من الكلام ده ؟

قال المحامى فى الهاتف:

-أيوة طبعاً واثق يا "حامد" بيه .. الرصاصة جت فيها هيا ونقلوها على

المستشفى

ضحكت "حامد" قائلاً:

-حلو أوى كدة أحسن ما كانت جت فى "مراد" .. لانى كدة هبقى خلصت من

الشاهدة الوحيدة فى قضيتين الخطف .. قشطة أوى

قال المحامى بقلق:

-بس اللى سمعته انها خرجت من العمليات وانهم قدروا ينقذوها

قال "حامد" بحقد:

-متقلقش يا متر .. أنا مش هخليها يطلع عليها النهار

أنهى المكالمة وخرج من بيته لأحد حراسه:

-ابعتلى "رامى" على المكتب بسرعة

قال الحارس:

-أوامرك يا فندم

توجه "حامد" الى مكتبه وتوجه الى الخزنة ليخرج منها مسدساً مزود بكاتم

للصوت .. أخذ ينظر اليه بتشفى .. سمع صوت خارج المكتب فوضع المسدس

على المكتب وتوجه الى الخارج قائلاً:

-تعالى يا "رامى"

لكنه فوجئ بشخص آخر .. فقال له "حامد" بحده:

-انت مين وايه دخلك هنا ؟

اقترب الرجل منه ووقفه أمامه .. كانت تعبيرات وجهه جامدة .. قال بصوت

أجش:

-فاكر "هايدي"  
نظر اليه "حامد" وقد ضاقت عيناه فأكمل الرجل:  
-أنا أخوها .. اخو "هايدي"  
قال "حامد" بنفاد صبر:  
-أنا مش فاضى .. خلص عايز ايه ؟  
قال الرجل بنبرات قوية:  
" -هايدي " ماتت امبارح وهى بتعمل عملية اجهاض عند دكتور معندوش  
ضمير .. زيك كده  
صمت "حامد" للحظات .. ثم قال بتهكم:  
-وجايلى ليه بأه .. عشان أصلى عليها ؟  
قال الرجل بقسوة وهو يظهر المطواة التى أخفاها خلف ظهره:  
-لا عشان أصلى عليك انت  
لم تتح الفرصة لـ "حامد" للصراخ حتى .. سد الرجل اليه طعنات متتالية  
بسرعة وبقوة وبشراسة وقد تشنج جسده .. حتى خر "حامد" على الأرض  
غارقاً فى دمائه .. وفاقداً لحياته

\*\*\*\*\*

استيقظ "طارق" من نومه ونظر بجواره فلم يجد "مى" غادر فراشه وبحث  
عنها ليجدها واقفة تصلى وببيدها مصحفها .. ابتسم وهو ينظر اليها .. شعرت  
به فسجدت وأنهت صلاتها .. ثم التفتت لتبتسم اليه بخجل .. اقترب منها وقبل  
رأسها قائلاً:

-ربنا يخليكي ليا

قالت "مى" بخجل:

-اشمعنى

قال "طارق" وهو يمسح على شعرها مبتسماً:

-عشان هتخلى حياتى أحسن

قالت "مى" بابتسامه مشجعه:

-صلى انت كمان .. معدش الا شوية صغيرين على الفجر

أوما برأسها وقبل وجنتها قائلاً:  
-هروح أتوضى وآجى نصلى سوا  
ابتسمت بسعادة وجلست تنتظره .. انها صلاتهما وجذبها "طارق" بجواره  
وهو يقول:

-انتي نمتى بالليل كويس  
قالت بإستغراب:

-أيوة .. ليه ؟

ابتسم "طارق" قائلاً:

-بفكر نصلى الفجر ونطلع نقضيلنا اسبوع فى العين السخنة  
ضحكت "مى" قائله:  
-فجأة كدة

قال "طارق" بمرح:

-مفيش أحلى من السفر فجأة .. ها ايه رأيك

قالت بسعادة:

-ماشى بس نفطر الأول

قال "طارق": "

-لا هقولك فكرة احلى اعملى سندوتشات ونبقى ناكلها فى العربية

قالت "مى" بمرح:

-خلاص ماشى

أنهيا صلاة الفجر .. وتوجها الى السيارة حاملين حقائبهم .. انطلق "طارق"  
فى طريقه وهو يتأمل "مى" بين الحين والآخر .. قال لها بعد ساعة من  
الطريق:

-جعت .. متطلعى السندوتشات

فتحت "مى" حقيبة الطعام وأخرجت واحدة ومدت يدها اليه .. فقال "طارق"  
بخبث:

-هاكل ازاي يعنى وأنا سايق ؟

قالت "مى" بحيرة:

-طيب أقف على جمب

قال "طارق" ونظرات المرح فى عينيه:

-تو .. مش عايز أضيع وقت

ثم التفت اليها قائلاً:

-أكليني انتي

ضحكت بخجل وقالت:

-مش هعرف

رفع حاجبه بتحدى قائلاً:

-آه مش هتعرفي .. يعني أجبلى واحدة تأكلني ولا أعمل ايه دلوقتي

نظرت اليه "مى" بغيظ فأنفجر ضاحكاً وهو يقول:

-خلاص أكليني طيب .. بدل هاا انتي عارفه

مدت يدها بخجل فقطم منه وهو ينظر اليها .. ثم صاح قائلاً:

-الله .. أحلى سندوتش مربى كلته فى حياتي

ضحكت "مى" قائلاً:

-على فكرة دى جنبه مش مربى

قال "طارق" بخبث:

-من ايدك انتي تبقى مربى

ضحكت "مى" فى سعادة وهى تمد يدها مرة أخرى لتطعمه

\*\*\*\*\*

حضر "عبد الرحمن" و زوجته و "عثمان" للإطمئنان على "مريم" بعدما

علموا بما حدث لها .. أمضوا اليوم معها الى أن اطمئنوا على صحتها ثم

تركوها فى رعاية "مراد" وتابعوها بالمكالمات من حين لآخر

دخلت الممرضة غرفة "مريم" وطلبت من الجميع المغادرة لإنهاء وقت

الزيارة .. قبلتها "ناهد" قائلة:

-ألف سلامة عليكى يا حبيبتي

قالت "مريم" بوهن:

-الله يسلمك يا ماما

قالت "سارة": "

-ألف سلامة عليكى يا "مريم" ان شاء الله تقومى بالسلامه  
قالت:

-الله يسلمك يا "سارة"

قالت "نرمين" بمرح:

-بقولك ايه خلصى جو المستشفى والعيانين ده بسرعة عشان وحشتينا أوى  
والفيلا بجد ملهاش طعم من غيرك  
قالت "مريم" مبتسمه:

-تسلمي يا "نرمين"

التفتت "ناهد" الى "مراد" قائله:

-خليني أنا بايته معاها النهاردة وروح انت يا "مراد" بقالك يومين بايت هنا  
قال "مراد" بإصرار:  
-لأ هفضل أنا معاها

غادر الجميع وأغلق "مراد" الباب ثم اقترب من فراش "مريم" وابتسم لها  
قائلاً:

-نامى شويه

نظرت اليه وقالت:

-تؤ مش عايزه

جلس على بجوارها وأمسك يدها يتحسس العروق التى ظهرت فيها .. ثم نظر  
اليها قائلاً:

-عايز أقولك حاجه

نظرت اليه "مريم" بترقب .. فقال بهدوء:

-ربنا هدانا هدية بس خدها تانى .. بس أنا واثق انه هيعوضنا بغيرها

نظرت اليه "مريم" بحيره قائله:

-مش فهمه

صمت .. ثم ظهرت الدموع فى عينيها وقد فهمت ما يرنو اليه .. قبل يدها قائلاً  
:

-الصبر عند الصدمة الأولى يا "مريم"

تمتت بخفوت ودموعها تنهمر:

-انا لله وانا اليه راجعون اللهم اجرنى فى مصيبتى واخلف لى خيراً منها

مسح دموعها بأصابعه وهو يقول:

-قولى الحمد لله

رددت:

-الحمد لله

قال "مراد" وهو يحتضن يدها بين يديه بحنان:

-افتكرى الآيه اللى فى سورة الكهف " فانطلقا حتى إذا لقيا غلاما فقتله " ..

كان سيدنا موسى مضايق ان سيدنا الخضر قتل الطفل الصغير ومكنش يعرف ان فى موته رحمه من ربنا لأبوه وأمه "وَأَمَّا الْغُلَامُ فَكَانَ أَبَوَاهُ مُؤْمِنِينَ فَخَشِينَا أَنْ يُرْهِقَهُمَا طُغْيَانًا وَكُفْرًا \* فَأَرَدْنَا أَنْ يُبْدِلَهُمَا رَبُّهُمَا خَيْرًا مِنْهُ زَكَاءً وَأَقْرَبَ رَحْمًا"

قالت "مريم" وقد لاحت ابتسامة رضا على شفيتها:

-الحمد لله

قال "مراد" بمرح:

-وبعدين مالك زعلانه كده شكلك زهقتى منى وعاييزة حاجة تشغلك عنى

نظرت اليه بحب قائله:

-مستحيل أزهدك منك أبداً .. بس مشتاقة أوى يكون ليا ابن منك .. ابنا احنا

اللاتنين يا "مراد"

ابتسم لها قائلاً:

-وأنا نفسي فى كده أكثر منك

قبلها قائلاً:

-بحبك أوى

نظرت اليه بسعادة قائله:

-بحبك أوى

\*\*\*\*\*

قال "طارق" بأسى:

-لا حول ولا قوة إلا بالله .. ازاي ده حصل

قال محامر "مراد" فى الهاتف:

-للأسف اتقتل امبارح بالليل ومات قبل ما يوصل المستشفى



ردد "طارق": "

-لا حول ولا قوة الا بالله

ثم قال:

-مين اللي قتله

قال المحامى:

-لسه البوليس بيحقق .. بس شكله كان مؤذى وأعداؤه كثير

تنهد "طارق" بأسى فقال المحامى:

-أنا حاولت أوصل لأستاذ "مراد" بس بيردش على الموبايل من امبارح فلو

عرفت توصله ياريت تبلغه اللي حصل يا أستاذ "طارق" لان كده خلاص

القضيتين اتحفظوا

قال "طارق": "

-حاضر هبلغه

أنهى "طارق" المكالمة فقالت له "مى" الجالس به جواره على الأريكة:

-خير يا "طارق" .. مين اللي اتقتل؟

قال "طارق" شارداً:

"-حامد" .. اللي "مراد" رافع عليه قضيتين

قالت "مى": "

-لا حول ولا قوة الا بالله .. أدى أخرة الظلم

قال "طارق": "

-خلاص كدة القضيتين اتحفظوا

قالت "مى" بحماس:

-اتحفظوا هنا .. لكن متحفظوش فوق .. مفيش فوق قضايا بتتحفظ .. كل

حاجة ليها تمن

اقترب منها "طارق" وأحاطها بذراعه قائلاً:

-سيبك بأه من السيرة الغم دى .. احنا جايين نقضى يومين حلوين ولا نتكلم

عن الناس

قالت مبتسمة:

-خلاص مركزة معاك أهو

قال "طارق" ضاحكاً:

-أيوة كده أحبك وانتى مركزة

\*\*\*\*\*

سمح الطيب لـ "مريم" بالخروج .. التف الجميع حولها وتقدمت "زهرة"  
بمقعدھا المتحرك لتطمئن عليها قائله:  
-حبيبتي كان نفسي أوى أشوفك  
قالت "مريم" مبتسمة:  
-حبيبتي يا ماما .. انتى على طول كنتى معايا على التليفون .. ربنا يباركلنا فى  
صحتك  
رن هاتف "مراد" فتحدث فى الخارج .. دقائق وعاد قائلاً:  
" -حامد" اتقتل  
شهو الجميع فى دهشة .. تمتت "مريم": "  
-انا لله وانا اليه راجعون  
قالت "سارة": "  
-مين اللى قتله ؟  
قال "مراد" وهو يمط شفتيه:  
-محدث يعرف .. أكيد واحد كان له عنده مظلمه  
قالت "ناهد" بأسى:  
-كان مؤذى فعلاً .. ربنا يرحمه بأه برحمته

\*\*\*\*\*

بعد شهر .. دخل "مراد" غرفته فى المساء واقترب من "مريم" التى جلست  
فى فراشها تقرأ .. وقال لها:  
-بتعملى ايه  
نظرت اليه قائله:  
-بقرأ الخواطر بتاعتك  
ابتسم قائلاً:

-مزهقتيش منها

قالت ضاحكة:

-لا طبعاً

خلع ساقه الصناعية و جلس بجوارها وتدثر بالغطاء وقال لها:

-على فكره يا "مريم" .. "عماد" مديرك فى الشركة كلمنى النهاردة وقال انه

عايز يتقدم لـ "سارة"

صاحت بحماس:

-بجد

أوما برأسه فقالت بلهفه:

-قولتله ايه ؟

قال "مراد": "

-قولته يتفضل يبجي ويعدوا مع بعض و "سارة" هتقول رأيها .. طبعاً أنا من

الصبح وأنا بعمل تحريات عنه بس بصراحه النتائج مبشرة

قالت بحماس:

-متقلقش ده انسان ممتاز

نظر اليه بغضب والتفت اليها قائلاً:

-لا يا شيخه

قالت بتلعثم:

-أقصد أقول انه كويس

قال "مراد" بحده:

-لا متقوليش

ابتسمت واقتربت منه قائلاً:

-خلاص أنا آسفه متزعزعلش

نظر اليها شزراً .. فقالت بدلع:

-خلاص بأه يا "مراد" مكنش قصدى .. معدتش هتكلم عن أى راجل تانى

ثم قالت مبتسمه:

-إلا "مراد" حبيب قلبي وبس

لاحت ابتسامه على شفثيه ولانت نظراته .. فقالت بمرح:

-أيوة كده لما بتكشر بحس ان الدنيا اسودت فى وشى

قال محذراً وهو يبتسم:  
-ماشى هعديهاك المرة دى  
ابتسمت له فجذبها الى حضنه وأغلق ضوء المصباح

\*\*\*\*\*

قال "عبد الرحمن" للضابط:  
-احنا جينا نعرف منك يا حضرة الضابط اللى حوصل عشان نبجى على علم  
قال "سباعى": "

-وعشان كمان نجفل بجه على الصفحة دى ونرميها وره ضهرنا  
قال الضابط لهما:

"-حسن المنفلوطى" اتقبض عليه بأكثر من تهمة وأولهم تهمة قتل "ياسين  
عبد الرحمن السمري" .. أو بمعنى أصح المشاركة فى قتله بالتحريض  
قال "عبد الرحمن" فى أسى:

-انا لله وانا اليه راجعون .. عمله ايه ولدى عشان يجتله  
قال الضابط:

"-حسن" بعث واحد من رجالته عشان يحرق الشحنة اللى كانت طالعه تبع  
المنافسة اللى رسيت عليكموا يا حاج "عبد الرحمن" .. عشان يوقع العيلتين فى  
بعض وتفكروا ان "جمال" أو أى حد من عيلة "الهورارى" هو اللى حرق  
الشحنة والعيلتين تقع فى بعض

قال "سباعى" بغیظ:  
-منه لله

أكمل الضابط:

-ولما اضرب النار على "مراد خيرى" و "مريم خيرى" .. كان المقصود طبعا  
"مراد" لانه ابن "خيرى الهوارى" .. لان "حسن" عرف ان "خيرى  
الهوارى" مات وملوش الا ابن واحد عايش .. فحب ينتقم منه ويقتله لانه كان  
فاكر ان "خيرى" من الاتنين هو اللى قتل ابنه  
قال "سباعى" بحماس:

-الاتنين "خيرى" محدش فيهم جتل .. اللى جتل مرته الله يحرق جبرها .. هى  
اللى جتلته وهو كان بيكتب اسمها مش اسم "خيرى"

قال الضابط:

-المهم الراجل اللى مسكوه فى القاهرة ورحلوه هنا للصعيد قر واعترف كل حاجة لما حس انه هيلبس الليلة لوحده .. و شهد كمان ضد "حسن" انه هو اللى أمر بحرق المخزن .. وان الراجل اللى راح يحرق المخزن لما شاف "ياسين" .. "ياسين" عرفه كويس .. فقتله قبل ما يبلغ عنه  
قال :عبد الرحمن" مقهوراً:

-منهم لله الظلمه .. ربنا ينتجم منهم

قال الضابط:

-ده غير تجارة السلاح اللى كان بيتاجر فيها "حسن" .. الراجل اللى مسكناه واللى ضرب النار على "مراد خيرى" .. اعترف بكل حاجة يعرفها عن "حسن" وبقه شاهد ملك فى القضية مقابل تخفيف حكمه  
ثم قال:

-وعرفنا كمان انه كان بيعت حد فى يوم كتب كتاب "جمال" عشان يقتله .. بس ملحقش ينفذ لان ساعتها اضرب النار على "جمال" فعلاً .. من "صباح"  
قال "عبد الرحمن" فى حرج:

-دلوجيت بجت مرته وهو اتنازل عن حجه يا حضرة الظابط

قال الضابط مكملاً حديث:

-وكمان الراجل اعترف انه بيعت رجاله يطعنوا "عثمان" ابنك .. برده لنفس السبب .. عشان العيلتين يقعوا فى بعض  
صاح "سباعى" بغضب:

-ده ايه ده .. كتلة شر .. ربنا ينتجم منه

قال الضابط:

-متقلقوش التهم الموجهه لـ "حسن المنفلوطى" ان مكنش هياخد فيها اعدام

فعلى الأقل أوى هياخد مؤبد

صاح "عبد الرحمن" من قلبه:

-ان شاله يارب

قال "سباعى" وهو ينهض مع "عبد الرحمن":

-متشكرين يا حضرة الظابط

ابتسم الضابط قائلاً:



-مالهم طولوا كده

قالت "مريم": "

-سببهم ياخذوا راحتهم عشان يوصلوا لقرار صح  
بعد دقائق من حديثهما دخلت "سارة" الغرفة فأغلقت "نرمين" الباب خلفها  
وقالت بلهفه:

-ها طمنينا

ابتسمت "سارة" بخجل وهل تضع يديها على وجنتيها قائله:

-كنت مكسوفة أوى

قالت "مريم" بلهفه:

-طمنينا ايه الأخبار .. ارتحتيله ؟

صمتت "سارة" وهى بتتسم بخجل .. قذفتها "نرمين" بالوسادة قائله:

-يا شيخه انطقى بأه

قالت "سارة" ضاحكه:

-أقولكوا ايه يعني

صاحت "نرمين": "

-يعني أشد فى شعري يعني .. يا بنتى خلصى .. عجبك ولا معجبكيش

قالت "سارة" بقلق:

-المهم ان أنا اللي أعجبه

زغردت "مريم" قائله:

-يبقى عجبك

قالت "نرمين" بمرح:

-متقلقيش يحتى لو مكنتيش عجبتيه مكنش طلبك من "مراد"

قالت "سارة" بقلق:

-تفتكرى

صاحت "نرمين": "

-حد يحوش البنات دى عنى .. آمال متقدملك ليه عشان معجب بـ "مراد" .. ما

هو أكيد معجب بيكي انتى

قالت "سارة" مبتسمه:

-معاكى حق

قالت "مريم" بسعادة:  
-ربنا يوفقك يا "سارة" أنا فرحانه أوى بجد  
قالت لها "سارة":  
" -مريم" انتى تعرفى عنه ايه ؟  
قالت "مريم" بحماس:  
-متقلقيش يا بنتى والله انسان ممتاز ومحترم وملتزم وأخلاقه عالية  
ثم أضافت ضاحكة:  
-بس اوعى تقولى لاخوكى انى قولت الكلام ده أحسن هيعلقنى على باب زويله  
طرقت "ناهد" الباب وانضمت الى البنات .. سألت "سارة" بلهفه:  
- هو "عماد" مشى ؟  
قالت "ناهد":  
-أيوة مشى  
سألته "سارة" بلهفه:  
-ايه رأيك يا ماما  
ابتسمت "ناهد" قائله:  
-بصراحة انا شيفاه ارجل كويس جدا وكمان "مراد" سأل عنه كثير والناس  
بتشكر فيه وفى أهله أوى  
ابتسمت "سارة" بسعادة وقد اطمئن قلبها

\*\*\*\*\*

بعد مضى ثلاثة أشهر

عُقد حفل زفاف "سارة" و "نرمين" معاً .. بعدما ألح "أحمد" و "عماد" فى  
تعجيل زواجهما .. لم تعترض الفتاتان ولا "مراد" ووالدته .. كانت أخلاق  
"أحمد" معروفة للجميع وكذلك "عماد" الذى استطاع أن يكسب ثقة "مراد" فى  
فترة وجيزة لما لمس فيه وفى والديه من حسن الخلق والإلتزام .. كانت سعادة  
"مراد" غامرة وهو جالس أمام المأذون يزوج أخته الإثنتين .. شعر بقلبه يقفز  
فرحاً عندما سمع جملة " قلبتُ زواجها " تتردد مرتين فى القاعة .. كانت  
"مريم" كالفراشة التى تنتقل بين الحضور فى قاعة النساء وهى تشعر بسعادة



غامرة للفتاتين .. كانت سعيدة أكثر لتمكن "زهرة" من حضور الحفل بعدما استعادت قدرتها على المشى مرة أخرى وان كانت مازالت تعاني من آلام بسبب تقدم العمر .. كانت العبرات فى عيني "ناهد" وهى تنظر الى ابنتها وكل منهما كالأميرة فى فستان زفافها الأبيض .. سلم "مراد" كل واحدة منهما الى زوجها ووصاه عليها كوصية النبي صلى الله عليه وسلم للرجال "استوصوا بالنساء خيرا فإنهن خلقن من ضلع وإن أعوج شيء فى الضلع أعلاه فاستوصوا بالنساء خيرا ... " وكما قال فى حجة الوداع : " استوصوا بالنساء خيرا، فإنهن عندكم عوان لا يمكن لأنفسهن شيئا، وإنكم إنما أخذتموهن بأمانة الله واستحللتم فروجهن بكلمات الله فاعقلوا أيها الناس قولي، فإنى قد بلغت " .. وكما قال " : رفقا بالقوارير.. "

عاد "مراد" بـ "مريم" و "ناهد" و "زهرة" الى الفيلا التى خلت إلا منهم .. عبروا الردهه وهم يتحدثون عن تفاصيل ما حدث فى الفرح والبسمة على وجوههم .. قالت "زهرة" بحزن:

-البيت هيبجى فاضى جوى من غير البنات  
قالت "ناهد" وسحابة حزن فى عينها:  
-مش عارفه ازاي هتحمل فارقهم  
قال "مراد": "

-ايه يا جماعة محسنى انهم مهاجرين مهم هيعيشوا معانا هنا فى القاهرة ..  
أمال لو كانوا راحوا محافظة تايئة بأه  
قالت "ناهد" بحده:

-مكنتش أوافق أبداً .. بناتي ميبعدوش عنى أبداً  
صاحت "مريم" بحده مصطنعة:

-شكراً أوى أوى .. ولا كائى موجودة .. عمالين تقولوا الفيلا هتفضى كائى  
هو عايش معاكم .. يلا تصبحوا على خير  
همت بالإنصراف فجذبتها "ناهد" من ذراعها ضاحكة:  
-احنا نقدر برده يا "مريم" ده انتى اللى منوره الفيلا  
قالت بزعل مصطنع:

-لا أنا زعلانه بجد اتضح ان مليش لزمه فى البيت ده

جذبتها "زهرة" الى حضنها قائله:

-ده انتى جلىبى يا "مريم" حد يجد يعيش من غير جلبه .. ها جوليلى  
نقلت "مريم" نظرها بينهما وابتسمت قائله:

-ماشى خلاص اقتنعت انكوا متقدروش تعيشوا من غيري  
صاح "مراد" من خلفهم:

-الله الله .. أنا نفسى أعرف بأه هو مين اللى ابنكم بالظبط أنا ولا "مريم"  
التفت اليه الجميع وصاحت "ناهد" و "زهرة" فى نفس واحد:  
" -مريم"

ثم انفجر الجميع ضاحكاً .. فمشى "مراد" فى طريقة الى الأعلى قائله:  
-طيب اشبعوا ببعض بأه

تركتهم "مريم" وجرت خلفه قائله:  
" -مراد" .. "مراد"

صاحت "ناهد" بغیظ:

-بعتيينا يا "مريم" .. ماشى يا "مريم"

وضعت "ناهد" ذراعها بذراع "زهرة" قائله:  
-سيبك منهم ملناش الا بعض

ابتسمت "زهرة" وربتت على كف "ناهد" قائله:

-ربنا يباركلك فيهم ويخليكى ليهم

ابتسمت "ناهد" قائله:

-ويباركلك فيهم ويخليكى ليهم

\*\*\*\*\*

استيقظ "مراد" من نومه فلم يجد "مريم" بجواره .. وسمع صوت آهاتها فى  
الحمام .. انتفض من الفراش وارتدى ساقه الصناعيه بسرعة وهى ينادى  
عليها:

" -مريم"

خرجت "مريم" وهى تضع يدها على بطنها .. هب واقفاً وهو يقترب منها قائلاً  
:

-مالك يا حبيبتي

قالت وقد ظهر عليها آثار الإعياء:

-مش عارفه بطنى وجعانى من الصبح  
أمسكها وأجلسها على الفراش ووضع وسادة خلف ظهرها ودثرها ثم قال  
بحنان:

-هنزل أعملك حاجة دافيه

قالت له:

-استنى يا "مراد" أنا شاكاه فى حاجه كده

جلس بجوارها وقال باهتمام:

-شاكاه فى ايه ؟

نظرت اليه نظرة معبره .. فهتف بسعادة:

-بجد .. بجد يا "مريم"

قالت بسرعة:

-معرفش متعشمش نفسك إلا لما نعمل تحليل الأول .. عشان منزعلش لو

النتيجة نتيجاتيف

هب واقفاً وقال:

-طيب يلا تعالى نروح سوا نعمل التحليل

ساعدها على النهوض ثم أوقفها قائلاً بقلق:

-لو تعبانه ممكن نأجلها

قالت "مريم" وقد بدا عليها أنها استعادت نشاطها:

-لا انا كويسه .. ملهوفة أوى أعمل التحليل مش هقدر أستنى

ثم استدركت:

-بس متقولش حاجة لماما "ناهد" وماما "زهرة" إلا لما نتأكد الأول

خرجا معاً لعمل تحاليل الدم وأمضيا الساعات التى تفصلهما عن النتيجة فى

التجوال والسير على النيل والتحدث معاً وإفشاء كل منهما الى الآخر بمكنونات

قلبه .. عادا الى الفيلا ودخلا غرفتهما .. قال "مراد": "

-هتصل بيهم دلوقتى

قالت "مريم" وهى تبدل ملابسها:

-بس هما قالوا النتيجة الساعة ٦ والساعة لسه ٥ إلا

قال "مراد" بلهفه وهو يمسك الهاتف:

-مش قادر استنى

أوقفته "مريم" بيدها وقالت بقلق:

-ولو طلعت نيجاتيف

أمسك "مراد" ذراعها وضمها اليه بقوة قائلاً:

-هقول الحمد لله برده .. أنا أهم حاجة عندى انك كويسه .. واننا مع بعض يا "مريم"

ابتسمت "مريم" وقد شعرت بشئ من الطمأنينة داخل قلبها .. ثم ابتعت عنه وقالت بلهفه:

-يلا اتصل

اتصل "مراد" وأملاهم اسم "مريم" وانتظر لسماع نتيجة التحليل .. مرت الثوانى كساعات بل كسنوات حتى قال:

-حضرتك متأكد ؟ .... طيب متشكر

أنهى المكالمة وعيون "مريم" معلقة به فى لهفه وقالت:

-ايه يا "مراد "

اتسعت ابتسامته وعيونه تنطق بالسعادة .. هتفت "مريم" بفرح وهى تضع يديها على فمها غير مصدقه:

-أنا حامل .. انا حامل يا "مراد"

عانقها "مراد" بقوة قائلاً بسعادة:

-أيوة حامل .. حامل يا أم.....

ثم ابتعد ونظر اليها بفرح قائلاً:

-الا قوليلى هو احنا هنسمى ايه

صاحت بفرح طفولى:

-مش مهم انشاله نسمى "اللمبي" المهم انى حامل مش مصدقه

خرجت من الغرفة مسرعة وهى تصرخ منادية:

-ماما "زهرة" .. ماما "ناهد"

أسرع "مراد" خلفها قائلاً وهى تنزل السلم:

"-مريم" متجريش كده بالراحه

دخلت "مريم" غرفة المعيشة حيث كانت المرأتان جالستان معاً أمام التلفاز ..

نهضت "زهرة" بسرعة وقالت:

-فى ايه يا "مريم "

هبت "ناهد" واقفه هى الأخرى وهى تقول:

-مالك يا حبيبتي انتى و "مراد" كويسين ؟

قالت "مريم" بفرحة كبيرة:

-أنا حامل يا ماما

تعالت صيحات الفرحة التى أطلقتها المرأتان .. وعانقتها بشدة .. دخل "مراد" قائلاً بمرح:

-يا "مريم" اعقلى أبوس ايدك احنا ما صدقنا

جذبها من ذراعيها وأجلسها بالقوة .. جلست "مريم" وهى تضع يدها على يد

زوجها الممسك بكتفها وتتطلع اليهم بسعادة وترى نظرات الفرحة فى أعينهم

جميعاً .. اغرورقت عيناها بالعبرات وهى تستشعر نعم الله عليها .. وتردد

بلسانها وقلبها وكل جوارحها:

-الحمد لله

\*\*\*\*\*

انتهت "سهى" من صلاتها ووقفت أمام الشباك تنظر الى السماء وتضم يديها

الى صدرها .. كان فى عينيها نظرات الرجاء والخوف .. بعد قليل وجدت أمها

تدخل عليها قائلة:

-ايه ده يا "سهى" لسه مجهزتيش .. ادخلى استحمى يا بنتى .. عايزين نلحق

ورانا حاجات كتير النهاردة

التفتت اليها "سهى" وتمتمت بخفوت:

-حاضر يا ماما

دخلت "سهى" وأخذت دشاً وهى تفكر .. ترى أتقبل الله توبتها حقاً ..

أستطيع فتح صفحة جديدة فى حياتها دون النظر الى الماضى .. أم أنها

سئفصح شر فضيحة لها ولعائلتها .. خلال الشهور الماضية تنامى حسن ظنها

بالله .. لم تعد ترجو سواه ولا تأنس بالحديث مع غيره .. كانت تدعو الله بأن

يتقبل توبتها ويغسلها من ذنوبها .. كانت مستبشره بقول الله تعالى بعد أن ذكر

جرائم الشرك والقتل والزنا - : ( إِلَّا مَنْ تَابَ وَآمَنَ وَعَمِلَ عَمَلًا صَالِحًا فَأُولَئِكَ

يُبَدِّلُ اللَّهُ سَيِّئَاتِهِمْ حَسَنَاتٍ وَكَانَ اللَّهُ غَفُورًا رَحِيمًا ) .. وخلال الشهور الماضية التحقت بأحد المعاهد الدينية لتتفقه في أمور دينها حتى لا تدع أحداً يخدعها مرة أخرى في أى أمر من أمور حياتها .. عرفت الطريق الصحيح وانضمت للصحبة الصالحة التي أعانتها كثيراً وخففت عنها كثيراً دون أن تخبرهم بكثرة ذنوبها .. استخارت كثيراً قبل أن توافق على العريس الذى تقدم لها .. لم تخبره أى شئ عن ماضيها .. لم تخبره أى شئ عن ذنوبها .. لم تجاهر بمعصيتها أمام أى أحد .. عملاً بقول النبي صلى الله عليه وسلم : "كل امتي يدخلون الجنة الا المجاهرين , قالوا : و ما المجاهرين يا رسول الله ، قال : من يفعل ذنب فيستره الله فيصبح هو و يقول فعلت كذا و كذا " .. استعدت لهذا اليوم كأى عروس .. وقفت فى المساء أمام المراة تتأمل ثوبها الأبيض ناصع البياض وقلبها يبكى قبل عينيها .. كانت تردد دعاءً واحداً فقط " اللهم استرني فوق الأرض وتحت الأرض ويوم العرض عليك " .. لم يفتر لسانها عن ترديده منذ أن أعلنت لله توبتها .. كانت تخشى على نفسها وعلى أهلها الفضيحة .. لكنها استخارت الله عز وجل فيسر أمر زواجها وفى فترة وجيزة .. سلمت أمرها لله وهى توقن أنه لن يضيعها .. حتى لو كانت نهاية هذا العرس هى الفضيحة فسترضى بها كعقوبة دنيوية تخفف من ذنوبها التى انغمست فيها بالماضى .. اذا أراد الله فضحها ليظهرها فليكن .. هى راضية بكل ما يرضيه .. تقدم زوجها وفتح باب بيت الزوجية .. دخلت "سهى" بقلب وجل .. كانت تشعر بقلق وخوف وتوتر بالغ .. كانت تردد دعاؤها الأثير " اللهم استرني فوق الأرض وتحت الأرض ويوم العرض عليك " .. تقدم منها زوجها مبتسماً وقبل يديها قائلاً:

-منوره بيتك يا "سهى "

ابتسمت له مجاملة فقط .. لكن قلبها كاد أن يتوقف خوفاً وهلعاً .. ابتسم لها ابتسامة عذبة وقال بحنان:

-اتأكدى انى عمرى ما هظلمك أبداً .. وعمرى ما هخون الأمانه اللى ربنا ادهالى .. انى أمانه عندى يا "سهى " .. وربنا هيحاسبنى ان فرطت فى حقاك بأى شكل من الأشكال .. عايز نبدأ حياتنا مع بعض بحب وود ورحمة .. وتكونى فعلاً خير زوجة ليا وأكون خير زوج ليكي .. أنا فرحان أوى ان ربنا كرمنى بيكي يا "سهى " .. وهعتبر ان حياتى معاكى هى بداية لحياتى فعلاً وانى

معشنتش قبل كده

كانت كلماته كالخناجر تمزق قلبها ألماً .. شعرت بأنها لا تستحق هذا الزوج  
الطيب المخلص الذى يتعامل معها كجوهرة غالية .. تساقطت العبرات من  
عينيها فمسحها بأصابع يده برفق شديد وقال بتأثر:  
-مش عايزك تعيطى أبداً .. ومتخفيش والله هعمل كل اللي أقدر عليه عشان

أكون زوج صالح

عانقها زوجها يضمها لصدره وقلبه .. أغمضت عينيها وهى تنظر الى السماء  
.. وتردد دعائها الأثير .. وتذكرت كلام ربها "قُلْ يَا عِبَادِيَ الَّذِينَ أَسْرَفُوا عَلَى  
أَنْفُسِهِمْ لَا تَقْنَطُوا مِنْ رَحْمَةِ اللَّهِ إِنَّ اللَّهَ يَغْفِرُ الذُّنُوبَ جَمِيعًا إِنَّهُ هُوَ الْعَفُورُ  
الرَّحِيمُ" .. "فسقطت دمعة من عينيها على ظهر زوجها لم يراها .. وكذلك هى  
.. لم ترى الدمعة التى سقطت من عينه على ظهر فستانها .. وشفقتى زوجها  
التى ارتعشت وهمهم بصوت غير مسموع:  
-يارب اقبل توبتى

\*\*\*\*\*

بعد ثلاثة أشهر

-أحسن حاجه اننا أعيدين فى التكيف وهما بره فى الحر وكمان نازلين شوى  
قالت "نرمين" هذه العبارة ضاحكة وهى جالسه مع "سارة" و "مريم" و  
"مى" فى صالون الفيلا .. قالت "مريم" ضاحكة:

-آه يا شريرة

قالت "مى" بمرح:

-بصراحة أنا كمان فرحانه .. لان "طارق" غايظنى على طول شغل بشوفه  
بالصدفه أحسن خليه يتلسوع من الحر عشان يكن فى البيت  
قالت "سارة" بحزن:

-انتوا شريرين أوى انتوا الاتنين .. "عماد" ذنبه ايه طيب كل واحدة فيكوا  
فرحانه فى جوزها .. انا بأه مش عايزه "عماد" يتلسوع

ضحكت "نرمين" قائله:

-أختى هبله وهفضل طول عمرها هبله

قرصتها "سارة" فى ذراعها قائلاً:

-بنت انتى متقوليش هبله دى أنا أختك الكبيرة

التفتت "مى" الى "مريم" قائله بإبتسامه:

-أخبار النونو ايه

ضحكت "مريم" قائله:

-كويس الحمد لله

قالت "سارة" بفرحه:

-ولد ولا بنت

قالت "مريم" بحماس:

-لسه مش دلوقتى .. بس هعرف فى الخامس ان شاء الله

قات "سارة": "

-يارب تكون بنت .. نفسى فى بنوته صغيره

صاحت "نرمين" قائله:

-لا أنا نفسي بأه فى ولد .. عشان يطلع عفريت ويجنن "مراد" ويطلع عليه

اللى كان بيعمله فينا

هتفت "مريم": "

-ايه يا "نرمين" مالك بقيتي شريرة كده ليه .. هو "أحمد" بيعذبك وبتيجى

تطلعى عقدك علينا ولا ايه

هتفت "نرمين" قائله:

"-أحمد" ده روى روى روى روى روى .. خمسة روى

انفجر الجميع ضاحكاً وقالت "مى": "

-لا واضح

قالت "نرمين" بغیظ:

-بيعد ابن اللذينه يعمل فيا كل مقلب والتانى .. بس على مين ده أنا بطلعهم

عليه

قالت "سارة" بدهشة:

-والله يا بنتى اللى يشوفك يقول انك واحدة فى كى جى .. اعقلى كده وخليكي



راكزه

قالت "نرمين": "

-سبينالك انتى الركزان .. أنا طقه وهفضل طقه

قالت "سارة": "

-ربنا معاك يا "أحمد" ويعينك عليها

قالت "نرمين": "

-آه ادعيله هو محتاج الدعاء ده بالذات

فى الخارج صاح "طارق": "

-أنا كان مالى أنا ومال الشوى .. فى حد يشوى فى عز الصيف كده

قال "أحمد" بغیظ:

-اللى يمشى ورا الستات .. انا واثق انها فكرة "نرمين" .. أما وريتك يا

"نرمين"

قال "مرد" ضاحكاً:

-راعى يا "أحمد" انك بتستحلف لأختى فى وجودى

قال "أحمد" ضاحكاً:

-ما انت خمتى يا "مراد" كان لازم وانت بتجوزهالى تدينى الكتالوج بتاعها

الأول اقراه عشان أبقى فاهم السيستم اللى هى ماشيه عليه مش أتصدم كده

اقترب "مراد" من "عماد" الجالس فى الظل وصاح قائلاً:

-يا أبو دماغ عاليه انت .. اللى مش هيشوى مش هياكل

قال "عماد" بثقه وهو يحتسى من كوب العصير الذى يمسه:

-لا أنا مش قلقان .. "سارة" مش ممكن تسيبنى جعان .. لو انتوا معملتوش

حسابى فى طبق .. "سارة" هتدينى طبقها أنا واثق

ضحك "مراد" قائلاً:

-طول عمرها هبله

قال "عماد" محذراً:

-لا مسمحكش مراتى مش هبله .. مراتى دى مفيش أطيب ولا أحن منها

نظر اليه "مراد" بسعادة وقال مبتسماً:

-ربنا يخليكوا لبعض

خرجت "سارة" لتأخذ الطبق الكبير الذى انتهى الرجال من شويه .. فابتسم لها  
"عماد" قائلاً:

-وحشتيني الشوية دول  
ابتسمت قائله:

-وانت كمان وحشتنى  
أعطاها الطبق قائلاً:

-يلا بالهنا والشفافا  
قالت بزعل:

-مش هعرف آكل لوحدى .. أول مرة من أول جوازنا مناكلش مع بعض  
ابتسم لها "عماد" قائلاً:

-معلش بأه الظروف حكمت النهاردة .. بس كلى كويس ها .. انا عارفك  
بتفضلى طول النهار من غير أكل ومبتكليس الا لما بتشوفينى داخل البيت  
ابتسمت "سارة" قائله:

-أعمل ايه يعنى مبيجيليش نفس آكل من غيرك  
نظر اليها بحب قائلاً:

-معلش عشان خاطرى كلى كويس  
قالت بصوت خافت:

-حاضر

قال "عماد" هامساً:

-بحبك يا "سارة" .. بحبك أوى

خفق قلبها بشدة .. وابتسمت له عيناها قبل شفتاها

\*\*\*\*\*

دخلت "مريم" غرفتها لتفاجئ بـ "مراد" جالساً على فراشه وحوله خطابات  
"ماجد" .. كانت الخطابات موضوعة فى الحقيبة فى الدولاب .. لم تعرف أين  
تضعها أو ماذا تفعل بها فتركتها فى الدولاب كما هى .. اقتربت منه ونظرت الى

الخطابات ثم اليه صمت قليلاً ثم نظر اليها قائلاً بهدوء:  
-كنت حابب أعرف أى حاجه عنه .. كان عامل ازاي بي فكر ازاي .. كان عندي  
فضول أعرف .. وملقتش أدامى غير الجوابات دى تروى الفضول اللي جوايا  
ثم زفر بضيق قائلاً:  
-ويارتنى ما قريرتهم  
قالت "مريم" بهدوء:  
-انت قريرتهم كلهم  
هز "مراد" رأسه نفيماً وقال بعصبيه:  
-قرأت ٣ ومقدرتش أكمل  
قالت "مريم":  
-ليه؟

رفع رأسه لينظر اليها بغضب .. ففهمت أنه شعر بالغيرة عندما قرأ كلمات  
"ماجد" الموجهه اليها .. زفر بضيق مرة أخرى وهو يتمتم:  
-أستغفر الله .. أستغفر الله  
جلست "مريم" بجواره وهى تنظر الى الخطابات الملقاه باهمال على الفراش  
وبينهم الدبلة الذهبية .. ثم التفتت الى "مراد" قائله:  
-أنا بس مكنتش عارفه أعمل بيهم ايه فسيبتهم فى الدولاب زى ما هما  
قال "مراد" دون أن ينظر اليها:  
-عارف

جمعت "مريم" الخطابات لتعيدها الى الحقيبة مرة أخرى وهى تقول:  
-هحاول أشوفلهم صرفه  
توقفت عند خطاب مكتوب عليه بخط كبير ( الأخير )  
حانت من "مراد" التفاته اليها ليرى الخطاب والكلمة المكتوبه عليه .. ثم رفع  
رأسه لينظر اليها .. توترت "مريم" وخافت أن تجرحه فوضعت الخطاب فى  
الحقيبة مع باقى الخطابات .. إلا أن يد "مراد" امتدت الى الحقيبة ليخرجه مرة  
أخرى ويقلبه بين يديه تحت ناظريها .. صاد الصمت للحظات ثم نظر اليها قائلاً  
:

-عايزه تقريره ؟  
شعرت "مريم" بالتوتر وقالت بسرعة:

-لا-

تفرس فيها قانلاً:

-ولا حتى من باب الفضول ؟

صمتت لا تدري ماذا تجيب .. لم ينتظر "مراد" ردها .. أمسك بالخطاب وفتحه وأخذ يقرأه .. شعرت "مريم" بألم فى بطنها من فرط توترها .. ثرى ماذا كتب "ماجد" لها فى خطابه الأخير .. كان الفضول يقتلها .. لكنها لم ترد أن تضايق "مراد" وتطلب منه قراءة الخطاب .. لكنها فوجئت بـ "مراد" يمد يده بالخطاب اليها بعدما انتهى من قراءته .. نظرت الى يده الممدوده اليها بالخطاب بدهشه .. لكن فضولها غلبها .. أمسكت الخطاب لتجد فيه:

"-مريم" .. هذا خطابى الأخيرة من مجموعة الخطابات التى أهديتك اياها قبل وفاتى .. ان كنت تقرأين هذا الخطاب والخطابات التى سبقته إذن فأنا لست معكِ وقد فارقت هذه الحياة .. "مريم" أعلم جيداً بقوة ما كان بيننا .. لكن الحياة تستمر ولا تتوقف عند أحد .. أنا الآن مستبشر وظاناً فى ربي أننى فى مكان أفضل بكثير .. وفى درجة أعلى بكثير .. وفى نعم أحلى بكثير .. أنت أيضاً سترحلين يوماً ما .. فلا تضيغي تلك اللحظات وتلك الأوقات فى الحزن واللاكتئاب .. فما ضاع لن يعود .. لا تضيعي أيام عمرك سدى .. من حَقك أن تحبي مرة أخرى .. أنتِ بشر ولستِ جماداً .. ولديكِ قلب مرهف بالمشاعر والأحاسيس .. ولديكِ ايمان قوى وعقل ناضج .. كونى بهم أسرة تكون خير عون لكِ فى الدنيا .. وتكونين راعية لهم .. تكوين أسرة مسلمة فيه من الأجر الكبير فلا تضيعيه بالنظر الى ماضى لن يعود يوماً .. ولا تقلقى يا "مريم" فى الجنة لا يوجد حزن ولا هم ولا دموع .. فى الجنة فرح وسعادة ونعيم .. سأهنأ أنا وتهانئين أنتى .. حتى لو لم تصبحى زوجتى فى الجنة .. فلا يمكن أن يكون ذلك سبباً فى تعاسة أى منا .. لأن فى الجنة نعيم فقط .. ما أهديتك كل الخطابات السابقة الا لتكون عوناً لكِ فى وحدتكِ على تجاوز الأزمة .. وهذا خطابى الأخير يا "مريم" وأمل أن أكون حققت به غرضى .. طلب الأخير .. أن تحرقى كل الخطابات بما فيهم هذا الخطاب .. وتمحين صورنا معاً .. وتتخلصى من الدبلة الذهبية اتى وضعتها فى اصبعك بنفس الطريقة التى تخلصتى بها من الزهرة .. وأخيراً وليس آخراً .. أستودعك الله الذى لا تضيع ودائعه .. "ماجد"

ترقرقت العبرات فى عينيها بعدما انتهت من قراءة الخطاب .. طوته ووضعته  
فى ظرفه .. قال "مراد" وقد بدا شاردًا:

-كان انسان جميل أوى

قالت "مريم" بخفوت:

-ربنا يرحمه

نظرت الى "مراد" تحاول معرفة ما يدور فى عقله .. جذبها "مراد" معانقاً  
اياها وقبل رأسها قائلاً:

-ربنا يخليكي ليا

أحاطته بذراعيها وقالت مبتسمة:

-ويخليك ليا

وقفا معاً فى نفس المكان الذى ألفت فيه "مريم" الزهرة .. ألفت الدبلة فى  
الماء ونظرت اليها وهى تغوص فيه .. ثم نظرت الى دبلة "مراد" التى تزين  
يدها تلمستها بأصابعها مبتسمة .. فنظر اليها "مراد" وعيناه تشعان حباً  
وحناناً .. فسألها فجأة:

-عمرك ما هتندمى انك اتجوزتىنى ؟

نظرت اليه بسرعة قائلة:

-لا طبعاً .. عمري

سألها باهتمام:

-عمرك ما هتحسى بالنقص معايا ؟

صمتت قليلاً ثم قالت:

-ليه أحس بالنقص ؟

شرد "مراد" قائلاً:

-أكيد كنتى طول عمرك بتتمنى انك تتجوزى راجل عادى .. طبيعى .. وعمرك

ما تخيلتى انك تتجوزى واحد معاق .. دلوقتى أكيد حسه ولو ١% بالنقص

وبان فى حاجة فى حلمك ناقصه

أمسكته "مريم" من يده قائلة بحنان:

-انت اللى حاسس بالنقص مش أنا يا "مراد"

ظهرت سحابة حزن فى عينيه .. وظهر فيهما القلق والتوتر .. قالت "مريم" بحزم:

"-مراد" فى مكان لازم نروحه سوا

سألها باهتمام:

-مكان ايه ؟

جذبتة من يده وتوجها الى السيارة وقالت:

-سوق وأنا أقولك

جعلته "مريم" يتوقف أمام احدى البنايات فى أحد الأحياء الهادئة .. نظر حوله قائلاً:

-جبتينا هنا ليه ؟

نظرت "مريم" الى أحد الافتات الموضوعه على احدى البنايات تتبع "مراد"

نظرها ونظر الى اللافتة التى تنظر اليها والمكتوب عليها "دار رعاية للأيتام

المعاقين" .. التفت بحده ينظر الى "مريم" فقالت بحزم:

-يلا ننزل

نزلت "مريم" من السيارة .. ونزل "مراد" ووقف أمامها وقال باستغراب:

-انتى عرفتى المكان ده منين ؟

قالت "مريم" بهدوء:

-عملت ليهم شغل ديزاين قبل كده

قال "مراد" باهتمام:

-وجايبانا هنا ليه ؟

نظرت اليه بحنان قائله:

-هتعرف دلوقتى

شبكت أصابعها فى أصابعه ودخلا معاً الى الجمعية .. توقفت أمام أحد العنابر

.. نظرت الى "مراد" ترقب تعبيرات وجهه المندهشة ونظارت عينيه القلقه

المتوترة .. فتحت باب العنبر وسبقته الى الداخل .. دخل "مراد" وأدار نظره

فى الأسرة المرصوفة على الصفيين .. كان على كل سرير طفل .. ولكن ليس

كأى طفل .. هذا أحد الأطفال لديه كف واحد فقط والآخر مبتور .. وهذا طفل

لديه ذراع مبتور .. وهذا طفل لديه جزء من قدمه مبتور .. وقف "مراد" ينقل

بصره بين الأسره وعيناه تغشاهما العبرات وقد عقد ما بين حاجبيه بشده ..  
توقفت "مريم" أمام أحد الأسره وذهبت لتجلس بجوار الطفل الجالس فوقها  
أشارت الى "مراد" ليتقدم نحوها ففعل .. نظر "مراد" الى الطفل الذى تجلس  
بجواره خفق قلبه قهراً وألماً عندما نظر الى الطفل لجده بدون ذراعان .. كان  
الطفل يمسك كوب الماء بقدميه ويرفعه الى فمه .. قالت "مريم" للطفل وهى  
تحاول اخفاء تأثرها:

-ازيك يا حبيبي

قال الطفل بخجل:

-الحمد لله

سألته "مريم": "

-اسمك ايه ؟

قال الطفل مبتسماً:

-اسمي "محمد"

صاحت "مريم": "

-الله اسمك جميل أوى يا "محمد"

ابتسم الطفل وأطرق رأسه بخجل .. مسحت على رأسه قائله:

-عندك كم سنة يا "محمد" ؟

رفع ء أصابع من قدمه .. فقالت "مريم": "

-وكمان بتعرف تعد .. ده انت شطور أوى يا "محمد"

شعر الطفل بالسعادة وهو يسمع الى كلمات "مريم" المشجعه .. جلس "مراد"

بجوار الطفل ونظر اليه قائلاً:

-تعرف ان أنا نفسي أسمي ابنك على اسمك

قال الطفل مبتسماً:

-انت عندك ابن ؟

قال له "مراد" مبتسماً:

-هيبقى عندى ان شاء الله

قال الطفل:

-هتسميه "محمد" زىي ؟

ابتسم له "مراد" قائلاً:

-أيوة هسميه "محمد" زيك

قال الطفل عابساً:

-بس مش هيرضى يلعب معايا عشان أنا معنديش ايدين

شعر "مراد" بالألم لكلماته .. فقال له:

-لا هيرضى يلعب معاك متخفش

ثم أشار الى قدمه قائلاً:

-مش انت بتقدر تعمل كل حاجه برجلك

قال الطفل بحماس:

-أيوة .. بعرف آكل وأشرب وألعب كمان

قال له "مراد" مبتسماً:

-خلاص يبأه مفيش مشكلة وتهعرفوا تلعبوا مع بعض

ابتسم الطفل وقال:

-خلاص يا عمو أنا هستناه لما يكبر عشان ألعب معاه

مسح "مراد" على رأسه وانحنى ليقبل رأسه .. مسحت "مريم" على وجنته

قائله:

-احنا هنمشى دلوقتي يا "محمد" بس هنجيلك تانى .. ماشى

أوما برأسه قائلاً:

-ماشى

لوح لهما بقدمه مودعاً .. و "مريم" تلوح له هي و "مراد" .. خرجا خارج

العنبر وكادت أن تتوجه "مريم" الى باب الخروج فقال لها "مراد": "

-استنى

سأل أحد العاملين عن مكتب المدير .. توجه اليه و شكره على اهتمامه برعاية

مثل هؤلاء الأطفال الذين هم فى أمس الحاجة للرعاية بعدما فقدوا أبويهم

وعانوا من مرارة اليتيم قبل مرارة الإعاقة .. قدم اليه "مراد" شيكاً بمبلغ كبير

تبرعاً منه لهؤلاء الأطفال .. شد المدير على يده يشكره على صنيعه .. خرج

"مراد" مع "مريم" من الدار وفتحت باب السيارة لتركب لكنه أوقفها وأغلق

الباب وقبل يدها ورأسها ونظر اليها يحتويها بعينيه .. ابتسمت "مريم" له دون

أن تتحدث .. فتحدث هو قائلاً:

-الحمد لله



قالت "مريم: "

-من قلبك ؟

ابتسم قائلاً:

-من قلبي

قالت وهى تنظر اليه بحب:

-ماشى يا أبو "محمد"

سألها قائلاً:

-يعني موافقة ؟

قالت:

-طبعا موافقه أنا كمان بحب الاسم ده

خاص فى بحر عينيها قائلاً بتأثر:

-مش عارف من غيرك كانت هتبقى حياتى عامله ازاي .. انتى غيرتيني يا

"مريم .. "خلتيني "مراد" تانى .. بس اوعى تهمليني فى يوم من الأيام لانى

دايماً هفضل محتاجك جمبي .. ايدك فى ايدي

أمسك كفيها بين كفيه .. نظرت اليه بحنان قائله:

-انت كمان غيرتني يا "مراد" وخلتني "مريم" تانية .. ومش عايزاك تبعد

عنى لحظة لانى مبسش بالأمان غير لما بكون جمبك .. وايدي فى ايدك

ضغطت بيدها على يده برفق فتشبث بهما بقوة

احتواها بعينيه قائلاً:

-بحبك يا مريومتى

احتوته بعينيه وقالت مبتسمه:

-بحبك يا مرادى

ابتسم لها وتطلع اليها فى حنان .. بحثت "مريم" فى عينيه عن القلق والخوف

والحزن والألم لكنها لم تجد لهم أثراً .. لم تجد إلا الحب .. الحب فقط.

... تمت بحمد الله ... 8/4/2013 09:38pm

بنوثة أسمره

